

BOLALAR ADABIYOTI

KARIMOVA SHAXLOXON G'ANIYEVNA



O‘ZBEKISTON RESPUBLIKASI
OLIY TA’LIM, FAN VA INNOVATSIYALAR VAZIRLIGI
ORIENTAL UNIVERSITETI

KARIMOVA SHAXLOXON G‘ANIYEVNA

"BOLALAR ADABIYOTI"

D A R S L I K

Malatya-2026



ASES KONGRE ORGANİZASYON VE YAYINCILIK

Kanununun hükümlerine göre kitabı yayınlanan yayınevinin izni olmaksızın elektronik, mekanik, fotokopi veya herhangi bir kayıt sistemi ile çoğaltılamaz, kısmen veya tamamen yayımlanamaz, depolanamaz.

Basım Tarihi: 10.07.2026

ISBN: 978-625-8956-16-0

Baskı, Yayım ve Dağıtım
ASES KONGRE ORGANİZASYON YAYINCILIK

Tecde Mah. Damlacık Sok. Polatlar Office
No:12/2 Kat:2 Ofis:13
Yeşilyurt/MALATYA

Tel: 0850 474 30 06 - www.asescongress.com.tr
E-posta: asescongress@gmail.com

Sertifika No: 63715

Mazkur darslik “Bolalar adabiyoti” fanidan 60110500-Boshlang‘ich ta’lim yo‘nalishi talabalari uchun mo‘ljallangan bo‘lib, III bosqich majburiy fanlar sirasiga kiradi.

Mamlakatimiz mustaqillikka erishgach, buyuk ma’naviyatimizni tiklash va yanada yuksaltirish, milliy ta’lim-tarbiya tizimini takomillashtirish, uning tarixiy zaminini mustahkamlash, ayni paytda zamon talablari bilan uyg‘un-lashtirishga e’tibor qaratildi. Shuningdek, O‘zbekiston Respublikasi Prezidenti Sh.Mirziyoyevning 2017-yil 20-apreldagi PQ-2909-sonli “Oliy ta’lim tizimini yanada rivojlantirish chora tadbirlari to‘g‘risida”gi qarorida yangi avlod o‘quv adabiyotlarini yaratish va ularni oliy ta’lim muassasalarining ta’lim jarayoniga keng tatbiq etish, oliy ta’lim muassasalarini zamonaviy o‘quv, o‘quv-metodik va ilmiy adabiyotlar bilan ta’minlash oliy ta’lim tizimini kelgusida rivojlantirishning eng muhim vazifalari qatorida turishi belgilab berilgan. Binobarin, professor-o‘qituvchilar, olimlar tomonidan oliygoh talabalari uchun fan dasturlariga muvofiq o‘quv qo‘llanma, darslik, o‘quv-usuliy qo‘llanmalar yaratilishi dolzarb vazifalardan hisoblanadi.

“Bolalar adabiyoti” darsligi Oliy o‘quv yurtlarining 5111700 – Boshlang‘ich ta’lim va sport tarbiyaviy ish, 5111800 – Maktabgacha ta’lim yo‘nalishi bakalavrlari uchun O‘zbekiston Respublikasi Oliy va o‘rta maxsus ta’lim vazirligi tomonidan 2022- yilning 18.08-sanasi bilan tasdiqlanib, BD-5111700-2.03; BD 5111800-3.05 raqami bilan qayd etilgan, Nizomiy nomidagi TDPUda ishlab chiqilgan “Bolalar adabiyoti” fan dasturi asosida yozilgan.

Unda bolalar adabiyoti fanining nazariy asoslari, uning shakllanishida asosiy omil hisoblanuvchi bolalar folklori hamda bolalar kitobxonligi muammolari, o‘zbek bolalar adabiyotining shakllanishi hamda tadrijiy taraqqiyotiga oid ma’lumotlar, jahon va qardosh xalqlar bolalar adabiyotining asosiy tamoyillari, namunalari umumlashtirilgan.

Mazkur darslik O‘zbekiston Respublikasi Oliy ta’lim, fan va innovatsiyalar vazirligi buyrug‘i bilan nashrga ruxsat berilgan va foydalanishga tavsiya etilgan. № 438380 sonli ruxsatnoma (2023-yil 29-sentyabr 432-sonli buyruq)

Taqrizshilar:

D.Jamoliddinova – *Muqimiy nomidagi Qo‘qon davlat pedagogika instituti*
“Boshlang‘ich ta’lim” kafedrası professorı, filologiya fanlari doktori

D.Rahmatullayeva – *Muqimiy nomidagi Qo‘qon davlat pedagogika instituti*
dotsenti, filologiya fanlari nomzodi

G.Namozova – *Oriental Universiteti “Maktabgacha va boshlang‘ich ta’lim”*
kafedrası o‘qituvchisi

Darslik Oriental Universiteti Kengashining 2023-yil 30-avgustdagi 3-sonli qarori bilan nashrga tavsiya etilgan.



SO‘ZBOSHI

Bolalar adabiyoti — bolalar va o‘smirlar uchun yaratilgan badiiy, ilmiy, ilmiyommabop va publitsistik asarlar majmui. Bularning asosiy qismini badiiy asarlar tashkil etadi. Jahon xalqlari, shu jumladan o‘zbek xalqi Bolalar adabiyoti tez aytish, topishmoq, o‘yin qo‘shiklari, rivoyat, afsona, ertak, makal, masal va doston singari aksariyat qismi bolalarga mo‘ljallab yaratilgan og‘zaki ijod namunalaridan boshlanadi. Bolalar adabiyotini bevosita bolalarga mo‘ljallab yaratilgan va aslida bolalarga mo‘ljallanmagan bo‘lsa-da, keyinchalik Bolalar adabiyotiga o‘tib qolgan asarlarga ajratish mumkin.

Hozirgi rivojlangan davr bolalar kitobxonligiga alohida e‘tibor qaratilmoqda. Yurtboshimiz ham qayta-qayta bu masalaga ahamiyat bermoqdalar. Prezidentimiz O‘zbekiston yoshlari va talabalari forumida yoshlar o‘rtasida kitobxonlikni rivojlantirish masalasi haqida ham so‘zlagan nutqi orasida: “Meni doimo o‘ylantiradigan, tashvishga soladigan yana bir dolzarb masala, bu – yoshlarimizning odob-axloqi, yurish-turishi, madaniy saviyasi, bir so‘z bilan aytganda, tarbiyasi bilan bog‘liq. Biz bu yo‘nalishda katta ishlarni amalga oshiryapmiz. Ammo ularning samaradorligini yanada kuchaytirish uchun quyidagi masalalarga jiddiy e‘tibor berishimiz zarur. Birinchidan, yoshlar o‘rtasida kitobxonlikni, mutolaa madaniyatini rivojlantirish doimiy e‘tiborimiz markazida bo‘ladi”, kabi og‘riqli masalalarga to‘g‘ri yechim topgan edilar. Davlatimiz rahbari faoliyatining ilk kunlaridan yoshlar ta‘lim-tarbiyasiga alohida e‘tibor qaratib kelmoqda. 2017-yilda kitoblar nashr etishni rivojlantirish,



kitob mutolaasi va kitobxonlik madaniyatini oshirish bo'yicha Prezident farmoyishi qabul qilingan edi. Kitobxonlarni rag'batlantirish yo'lga qo'yildi.

Bolalar adabiyotining o'ziga xos xususiyati — o'zgaruvchan hodisa bo'lib, u kitobxon yoshi, tarixiy davr va ijtimoiy muhit bilan bevosita bog'liq. Kitobxon yoshini hisobga olish Bolalar adabiyotining eng asosiy xususiyatlaridandir. Maktabgacha yoshdagi bolalarda bu ko'rgazmalilik, ezgulik va yovuzlik kuchlarining oddiy ko'rinishdagi ziddiyatlariga asoslangan bo'lsa, o'smirlar uchun yaratilgan adabiyotda murakkab hayotdagi murakkab kishilarning ruhiyati ochila boshlaydi. Bolalar adabiyotining yana bir xususiyati uning harakatga boyligidir. U voqealarning tezkor, qiziqarli, fantaziyaga, yumorga boy ravishda yechilishini talab qiladi.

Bolalar adabiyotida badiiylik bilan bir qatorda ma'rifiylik ham yetakchi o'rin tutadi. Chunki Bolalar adabiyoti namunalari yoshlarni insoniy fazilatlar ruhida tarbiyalashga ham xizmat qiladi. Barcha davrlar Bolalar adabiyotining taraqqiyot tamoyillari, avvalo, ma'rifiylik va tarbiyaviylikda aks etadi. Biroq Bolalar adabiyoti rivojlanib borgan sari uning sof badiiyat unsurlarini egallashga intilishi va umumadabiyot taraqqiyot tamoyillari bilan hamkorligi ham ko'zga tashlanadi.

Ushbu darslik maktabgacha va boshlang'ich ta'limy o'nalishi talabalari uchun mo'ljallangan.



I BOB. BOLALAR ADABIYOTI FANINING NAZARIY ASOSLARI

1-MAVZU. BOLALAR ADABIYOTI FANIGA KIRISH

Reja:

1. *Kirish*
2. *Bolalar adabiyoti istilohi haqida tushuncha va uning paydo bo'lish omillari*
3. *Bolalar adabiyoti fanining predmeti va vazifalari*
4. *Bolalar kitobxonligi tushunchasi haqida ma'lumot*
5. *Bolalar adabiyotining umumadabiyotga aloqadorligi*
6. *Bolalar adabiyotining o'ziga xos xususiyatlari, yoxud adresligi*

MAVZUGA DOIR TAYANCH TUSHUNCHALAR: *istiloh, qo'l-lanma, xrestomatiya, omil, genezis, so'qma so'z, munaqqid, muqallid, nasr, nosir, nashr, noshir, muharrir, musavvir, matbuot, kitobatchilik, xarakter, tur, janr, dinamizm, emotsionallik, lirik, komik, matbaa, realistik, badii, fiziologik, biologik, biografik, dialektizm, sujet, publitsistika, detektiv, fantastik, dilogiya, trilogiya, tetralogiya.*

O'zbek bolalar adabiyotining so'z san'ati sifatidagi ulug'vor vazifasi va tarbiyachilik vositasi istiqlol yillarida alohida e'tiborga tushdi.



O'zbekiston Respublikasining Prezidenti Sh.M. Mirziyoyevning 2017 yil 9 sentabrda e'lon qilingan "Maktabgacha ta'lim tizimini tubdan takomillashtirish chora-tadbirlari to'g'risida"gi qarorida alohida belgilab berilganidek, bolalikdan kitob o'qishga qiziqish uyg'otuvchi o'quv-metodik, didaktik materiallar va badiiy adabiyotlarni tayyorlash haqidagi¹, 2017 yil 13 sentabrdagi "Kitob mahsulotlarini nashr etish va tarqatish tizimini rivojlantirish, kitob mutolaasi va kitobxonlik madaniyatini oshirish hamda targ'ib qilish bo'yicha kompleks chora-tadbirlar dasturi to'g'risida"gi qarorlari ham bu fanning maqsad mohiyatini oydinlashtirishga yordam beradi.

Chindan ham bu jiddiy vazifani bajarishda, aniqrog'i, mustaqil yurtning har tomonlama yetuk, barkamol avlodini tarbiyalashda asrlar osha xalq an'analari, milliy qadriyatlari, folklor namunalari, milliy adabiyotimiz va jahon xalqlari adabiyoti an'analari zaminida voqelikka aylangan **o'zbek bolalar adabiyotining** beqiyos o'rni bor.

Yarim asrdan oshayotirki, pedagogika oliygohlari va kollejarining boshlang'ich ta'lim usuliyoti, maktabgacha ta'lim yo'nalishlari talabalari ushbu fanni chuqur o'rganib kelmoqdalar. Bu davr mobaynida bolalar adabiyoti fani bo'yicha chop etilib kelingan darslik va qo'llanmalar tom ma'noda, yosh avlodni tarbiyalashda ruhiy va ma'naviy quvvat bo'lib kelganiga shubha yo'q. Ammo, XXI asr milliy bolalar adabiyoti namunalariga qo'yilgan talablarning ortgani bejiz emas. O'zbek bolalar adabiyotining badiiy jihatdan yuksak namunalariga keng e'tibor qaratish, yangi asr kichkintoylarining shiddat bilan rivojlanayotgan qiziqishlari, ruhiy, ma'naviy olami, ularning ijtimoiy hayotga munosabati masalalari aks etgan asarlar tahlili orqali talabalarda estetik, axloqiy-ma'rifiy, ijtimoiy-siyosiy tarbiyani shakllantirish muhim ahamiyatga ega.

¹ Bu haqda qarang: "Xalq so'zi". 2017, 11-sentyabr.



O'zbek bolalar adabiyoti haqidagi fanning yaratilishi XX asr boshlarida ma'rifatparvar pedagog va adabiyotshunoslar maqolalarida ko'zga tashlangan bo'lsa, ilk xrestomatiyalar va o'quv qo'llanmalarini tuzish harakati asr o'rtalariga to'g'ri keldi. Pedagogika bilim yurti talabalariga mo'ljallangan, I.Ahmedov, A.Suyumovlar tomonidan 1953-yilda birinchi marta tartib berilib, 1967-1978 yillarda qayta takomillashtirilib, nashr etilgan "Bolalar adabiyoti" xrestomatiyasi, 1957-yilda e'lon qilingan "Bolalar adabiyoti" o'quv materiallari qo'llanmasi shu harakatning dastlabki natijasi hisoblanadi. Keyinchalik, 1973-yilda A.Suyumov tomonidan maxsus o'rta o'quv yurtlari uchun nashrga tayyorlangan "Bolalar adabiyoti" qo'llanmasi o'zbek bolalar adabiyoti tarixini yaratish yo'lidagi dastlabki qadam bo'ldi. Bu qo'llanma keyinchalik M.Jumaboyev tomonidan qayta ishlanib, 1995-yildan e'tiboran majmua va darslik sifatida kasb-hunar kolleji o'quvchilari hamda oliy o'quv yurtlari uchun amalda foydalanib kelinmoqda.

Bu sohada P.Shermuhammedov, J.Tursunov, O.Safarov, X.Egamovlar muallifligidagi "O'zbek bolalar adabiyoti" darslik xrestomatiyasi (1976),

O'zbekiston FA Til va adabiyot instituti tomonidan tayyorlab nashr etilgan "O'zbek bolalar adabiyoti tarixi ocherklari" (1978), "Bolalar adabiyoti va zamonaviylik" (1981), "O'zbek bolalar adabiyoti va adabiy jarayon" (1989) kabi monografiyalar ham o'ziga xos hodisa bo'ldi. Biroq, o'zbek bolalar adabiyoti va bolalar kitobxonligi mundarijasini o'zida mujassamlashtiruvchi, XX asr o'zbek bolalar adabiyoti namunalarining g'oyaviy, janriy, badiiy-kompozitsion jihatidan o'ziga xosligi, ularning kichkintoylar, bolalar va o'smirlar yosh xususiyatlariga ko'ra ifoda olami kabilarni milliy istiqlol tafakkuri nuqtayi nazaridan chinakam tahlil va tadqiqot asosidagi ilmiy tarix hanuzgacha yaratilgani yo'q. Zotan, ushbu qo'llanma mazkur vazifani qisman ado etish maqsadini ko'zda tutadi.



Bunda o'zbek bolalar adabiyotining bir asrlik tarixi, tadrijiy taraqqiyot xususiyatlari, XX asr bolalar adabiyotidgi fenomen yozuvchi va shoirlarning ijodi umymlashtirilishga, shuningdek, istiqlool davri bolalar adabiyotining yangi tamoyillariga munosabat bildirishga e'tibor qaratildi.

Bolalar adabiyoti istilohi haqida tushuncha. Tarixning eng qadimgi davrlaridanoq inson nafaqat o'zining tirikchiligi uchun kurasha boshlagan, balki u o'z avlodi bardavomligi haqida qayg'urgan. Insoniyatni o'rab turgan dunyo va u haqdagi tasavvuri, yig'ilgan bilimlari, hayotiy tajribasi, hamda bu boradagi dono fikrlari, xulosalari bolalarga turli pand-nasihatlar shaklida, tushunarli vositalarda anglatilgan. Bu jihat barcha xalqlar og'zaki adabiyotining mushtarak xususiyatlari hisoblanadi.

Folklor har bir xalqning milliy-adabiy ijodini boshlab berishi ham shundan. Bu xususiyat bolalar adabiyoti inkishofida ham muhim rol o'ynaydi. Qachonlardir Ovrupoda aka-uka Grimmlar, X.K.Andersen, Sh.Perro, J.Rodari kabilarning ertak to'plamlari paydo bo'lgan bo'lsa, vaqti kelib, o'zbek bolalar adabiyotining boshlanmasida ham bu hodisa poydevor bo'la oldi. Inson ruhiyatida o'z-o'zini anglash davri aynan bolalikda kashf etilishi ham turli xalqlarda turli davrlarda kechdi. Negaki, bolalik insondagi bebaho ichki olam sifatida, beg'uborligu ajoyibotlari bilan kattalarni o'ziga rom etuvchi davr ekani, kattalik davri esa, xuddi eng samimiy va bolalarcha beg'uborlik tark etilgan jarayon sifatida anglay boshlanishi uchun jamiyat ma'naviy ongida yangilanish zaruratini yuzaga keltirgan. Hamchunin, Yevropa adiblari XVI-XVII asrdayoq nafaqat bolalikni kashf etdi, balki uni eng sof mukammallik namunasi va mehr-shafqat timsoli sifatida insoniyatga me'ros qilib qoldirdi.

Har bir mamlakatda bolalar tarbiyasiga oid, ularga bag'ishlangan yoxud maxsus yaratilgan ijod namunalari u haqdagi



istilohlarni ham vujudga keltiradi. Jumladan, o'zbek bolalar adabiyoti tarixida folklordan tashqari, didaktik adabiyot, bolalar kitobxonligi, ma'rifatparvarlik adabiyoti, milliy uyg'onish davri o'zbek adabiyoti tushunchalari uning shakllanishidagi asosiy omillar hisoblanadi. Hodisaning maydonga kelishi, uning ilmiy iste'molga olib kirilishi, nihoyat, mustaqil fan sifatidagi takomili esa yaxlit tizimni tashkil etadi.

Bolalar va o'smirlar uchun yaratilgan badiiy, ilmiy, ilmiy-ommabop va publitsistik asarlar majmui tom ma'noda bolalar adabiyotini tashkil etsa-da, asosan, sof badiiy asarlar bu tushuncha mohiyatini anglatishi taomilga kirgan. Bolalar o'qishi uchun mo'ljallangan asarlar barcha xalqlar tarixida qadimdan davom etib kelgan. Jumladan, o'zbek bolalar adabiyoti Sharq yozma adabiyotida "pandnoma", "ma'vizatnoma", "nasihatnoma", "axloq kitoblari" singari nomlar bilan tasnif qilinuvchi asarlar zaminida voqelikka aylangani, shuningdek, uning shakllanishi ma'rifatparvarlik va maktab-maorif tizimi islohotlari bilan chambarchas bog'liqligi ayon haqiqat. Bolalar adabiyoti avvalo, turli yoshdagi bolalar va o'smirlarga mo'ljallangan so'z san'atidir. U voqelikni aynan o'n olti-o'n yetti yoshgacha bo'lgan bolalar idroki, tasavvuri, tafakkur obrazlarida gavdalantiruvchi badiiy asar namunalarini o'zida mujassamlashtiradi. Shu jihatdan u umumbadiiy adabiyot bag'rida shakllangan. Ayni paytda, u qator xususiyatlariga ko'ra alohidalik kasb etadi.

Bolalar adabiyoti avvalo:

- so'z san'atiga asoslangani va badiiy ijod mahsuli ekanligi jihatdan umumadabiyotga hamohang bo'lsa;
- unda bolalar ta'lim-tarbiyasi ustuvorligi pedagogika bilan;
- bolalar va o'smirlarning murakkab ruhiyati, qiziqishlarini aks ettirishi psixologiya;
- yosh xususiyatlarini ifodalashi fiziologiya bilan;
- ona-tabiat, atrof-olam hodisalarini keng aks ettirishiga ko'ra



- tabiatshunoslik fanlari;
- kichkintoylar til xususiyatlarini mujassamlashtirib tilshunoslik fanlari va defektologiya;
- xalqona ohang va jonli soʻzlashuv tilidan foydalanib, xalq ogʻzaki ijodi bilan uzviylikda namoyon boʻladi.

Bolalarbop barcha asarlarda yosh avlodning dunyoqarashi, tafakkuri, oʻy- kechinmalari, orzu-istaklari, voqelikka estetik munosabati oʻz ifodasini topadi. Ularning aksariyati yozuvchilar (kattalar) tomonidan yaratilsa-da, voqelik bolalar dunyoqarashi nuqtayi nazaridan talqin va tadqiq etiladi, bolalar tilidan hikoya qilinadi va baholanadi. Binobarin, xuddi shu xususiyatlarni oʻzida namoyon qila oladigan oʻzbek bolalar adabiyoti XX asrning 20-30-yillarida toʻliq shakllanib, umumadabiyotning alohida tarmogʻi sifatida maxsus yoʻnalish kasb etadi. Bunda Abdulla Avloniy, Hamza Hakimzoda Niyoziy singari ilk namoyandalari, Shokir Sulaymon, Gʻayratiy, Dorjiya Oppoqova, Gʻulom Zafariy, Elbek, Hamid Olimjon, Gʻafur Gʻulom, Ilyos Muslim, Zafar Diyor, Sulton Joʻra, Qudrat Hikmat, Quddus Muhammadiy, Shukur Saʼdulla, Hakim Nazir, Poʻlat Moʻmin kabi professional yozuvchi-shoirilar oʻz ijodi orqali sohaning shakllanishi va taraqqiyot xususiyatlarini belgilay oladi. Natijada, bolalar **sheʼriyati, nasri** oʻtgan asrning ikkinchi yarmidan ancha yuksaldi. Bolalar **dramaturgiyasi** va **publitsistikasiga** asos solindi. Bolalar **kinosi** va **teatri** rivojlandi.

Muhimi, bu istiloh ruscha “detskaya literatura” soʻzining aynan tarjimasini tarzida emas, balki real voqelikka aylangan, oʻzbek bolalariga moʻljallanib yaratila boshlangan, ularga ixtisoslashgan adabiy hodisani ifodalagan holda dunyoga keldi. Buning tarixiy-tadrijiy tamoyillari, ilmiy-nazariy umumlashmasi esa **“Bolalar adabiyoti”** deb nomlangan mustaqil fan tarixida oʻz ifodasini topa bordi.

Bolalar adabiyotining maqsadi va vazifalari. Bolalar uchun maxsus badiiy adabiyot yaratish anʼanasi jamiyat



taraqqiyotining muhim ma'naviy ehtiyoji tarzida reallikka aylangach, uning maqsadi va vazifalari aniqlashila bordi. Badiiy adabiyot inson ruhiyatini, hatto uning shaxsiyati shakllanishi va rivojidagi o'rnining beqiyosligi bolalar adabiyotida yorqin ko'rinadi. Badiiy asarning mo'jizakor ta'sir kuchi o'sib kelayotgan yosh qalblarda ezgulik, vatanparvarlik, elsevarlik, badiiy-estetik didni shakllantirish, umuman, hayotga, butun olamga ijobiy va ijodiy munosabatda bo'lishga da'vat etadi. Shu sababli inson "bola chog'lardan" badiiy asarga, kitobga oshno bo'lib o'sishini ta'minlaydigan vositalardan biri - **bolalar adabiyoti** hisoblanadi. Bundan qariyb ikki asr ilgari bolalar adabiyoti-ning ulkan munaqqidlari V.G.Belinskiy, N.G.Chernishevskiy, N.A.Dobrolyubov asoslab ko'rsatganidek, yosh kitobxonlarga ta'lim-tarbiya berish bilan birga, ularga estetik zavq uyg'ota oladigan, qaynoq hayot manzarasini butun borlig'icha aks ettirgan chinakam badiiy asarlar hamon muhim talabligicha qolayotir. Shuningdek, bugun bolalar adabiyoti sohasida ham faqat milliy zaminga tayanish ozlik qiladi. Zamondosh o'quvchi o'z milliy bolalar kitoblarini o'qish, uqish bilan birga, jahon bolalar adabiyoti durdonalarini mutolaa qilmasligi mumkin emas. Endilikda bolalar va o'smirlarga mo'ljallanib yozilgan asarlarda ularning faqat yosh xususiyatlarigagina emas, asar janri, mavzusi, uslubi va tasvirda o'ziga xos yondashuvlar bo'lishini taqozo etayotir. XXI asr bolalarining badiiy asarni qanday qabul qilish darajasi ham jiddiy masala. Yosh kitobxonlarga ongi va tafakkurini boyitish bilan birga, ularning qalbini, zavqini uyg'otadigan ya'ni, tuyg'ulariga ham kuchli ta'sir etadigan san'at asarlari zarur. Zotan, bolalar adabiyoti fanining **predmetini** bolalar va o'smirlarga bag'ishlangan asarlarning g'oyaviy-mavzuviy, janriy-badiiy xususiyatlari, ularga oid ilmiy-nazariy qarashlar, tadqiqotlar umumlashmasi, mualliflar hayoti va ijodini batafsil o'rganish kabilar tashkil qiladi. Shuningdek, xalq og'zaki ijodi, jahon bolalar adabiyoti namunalarini tahlil va tadqiq etish, bolalar kitobxonligi ko'rinishlarini oydinlashtirish bundagi muhim hodisalardandir.



Fanning vazifalari esa talabalarni milliy bolalar adabiyoti namunalari bilan tanishtirish, u dastavval, ijtimoiy voqelik, xalq ogʻzaki ijodining boy anʼanalariga ega milliy oʻzbek adabiyoti va jahon adabiyoti tajribalarini oʻzlashtirish orqali yuzaga kelganini asoslash, nihoyat, bu adabiyotning takomili, tadriji, taraqqiyot xususiyatlarini mavjud ijod namunalari misolida koʻrsatib berishdan iborat.

“Bolalar adabiyoti,- deb yozgan edi N.Fozilov,- nozik adabiyot. Bolalar adabiyoti biz bilgan kattalar adabiyotining boshi... Bolalar yozuvchilari oʻz asarlari bilan katta adabiyotga boshlovchi dargʻalar. Bu adabiyot - hurmattalab adabiyot, eʼzoztalab adabiyot. Chunki, bolalar uchun yozilayotgan har bir asarda oʻzing bolaga aylanmasang, u jonsiz tana boʻlib qoladi. Bolaning koʻngli ham shunday. Uni sindirib boʻlmaydi. Unga hamisha eʼtibor darkor. Shundagina uning koʻngli toʻlib oʻsadi. U - mehrtalab. Shundagina u muhabbatingiz mevasiga aylanadi, izingizni bosadi”.²

Bolalar adabiyotining oʻziga xos xususiyatlari. Bolalar uchun ham, kattalarga boʻlgani singari, inson va jamiyatga, tabiatga daxldor barcha mavzularda ijod etish mumkin. Bu farqli xususiyat mohiyatini A.A.Makarenko bolalar uchun yozayotganda ***nima haqda yozish emas, balki qanday qilib yozishning muhimligida***, deb koʻrsatgan edi. Shu jihatdan kattalar turmushining murakkab qirralarini ifodalovchi maishiy hayot mavzusida Q.Muhammadiyning bolalarbop qilib yozilgan “Qoʻngʻizoy bilan Sichqonboy” sheʼriy adabiy ertagi bu fikrga asos boʻla oladi. Bu asar 1940-yilda yozilgan boʻlib, dastlab “Mushtum” jurnalida “Qoʻngʻiz bikach bilan Sichqonboy” nomi ostida bosilib chiqqan. Asar uchun tanlangan voqelik, muammo, gʻoya kattalar hayotiga toʻgʻri kelsa-da, ammo u allegorik obrazlar vositasida tasvirlangani bolalarbop mohiyat kasb etgan.

² Nosir Fozilov. Ijod zahmati. Kitobda: Topdimu yoʻqotmadim. Toshkent, “Sharq”, 2010. -B.267



Bolalar adabiyoti tarbiya quroli sifatida kichkintoylarga bilim berish vazifasini ham bajaradi, ularning qiziqishlari doirasini kengaytiradi. Garchi u “kattalar”- ijod ahli tomonidan yaratilsa-da, bolalar olamini bolalarga xos nuqtayi nazardan badiiy tadqiq qiladi. Bolalar adabiyotining bosh xususiyati ham ana shunda: *narsa- hodisalarga bolalar ko'zi bilan qaray bilish, ularni bolalarcha idrok eta bilish, ularga bolalarcha munosabat ko'rsata olish hamda ulardan bolalarcha hayratlanishda*. Bolalarni onalaridan yaxshiroq tarbiyalaydigan odam yo'q, chunki ular bolalar his qilgan narsani his etadilar, ular bilan birga kuladilar, yig'laydilar. Bunday ijodiy fazilat nafaqat bolalar adabiyotiga, balki uning bunyodkorlariga ham xos xususiyat bo'lib, har qanday yozuvchiga ham nasib qilavermaydi. Buni chuqur his etgani bois K.I.Chukovskiy: “Bolalar - bizning ustozimiz”,- deya iqror bo'lgan edi.⁴ Chindan ham bolalarni ustoz darajasida anglamoq - bu, avvalo, ularga yuksak ehtirom ko'rsatmoq, ularning xarakterlarini, qiziqish va intilishlarini, kishilarga, narsa va hodisalarga munosabatlarini, quvonch va iztiroblarini sinchkovlik bilan o'rganmoq, ayni zamonda shu jarayonni bolalarcha his etish, idrok qilish asosida ular uslubiga muvofiqlashtirish, badiiyat sintezidan o'tkazmoqdan iborat san'atkorlikdir. Rost, inson ulg'aygani sari o'z bolaligidan uzoqlashadi, bolalik tabiatidagi xususiyatlarni yo'qota boradi. Biroq bolalar yozuvchisi bundan mustasno; u inson sifatida har qancha ulg'aymasin, baribir, bolalik tabiatini saqlab qolmog'i, uni tobora teranlashtirmog'i, bolalarcha sinchkov va qiziqsinuvchi bo'lib, ular ko'ngliga yo'l topmog'i, ruhiy dunyosiga kira bilmog'i shart. Shundagina u chinakkam bolalar yozuvchisiga aylana oladi.

Insonshunoslik adabiyotning bosh masalasi ekan, bolalar adabiyoti ham shu makon va zamondan ayri rivojlanmaydi. Jamiyat taraqqiyotida ro'y berayotgan buyuk o'zgarishlar, tarixiy hodisalar, kishilar ruhiyatidagi evrilishlarkichkintoylar adabiyotida ham zuhur topadi. Shunday ekan, bolalar



adabiyotining uzoq yoki yaqin o'tmishidagi o'ziga xosliklar hozirgi adabiy jarayonda bir muncha yangilanishi tabiiy. Chunki har bir davr o'z adabiyoti oldiga eng dolzarb va g'oyat muhim talablarni qo'yadi. Shu ma'noda, o'tgan asrboshlarida bolalar adabiyotining tarbiyaga xizmat qilishi, xalq bolalarini bilimli, ma'rifatli qilishga da'vat etishi, ularning qoloq maishiy hayotini ko'rsatib berishi asosiy mezon qilib belgilangan bo'lsa, sho'ro mafkurasi davrida asosan, "baxtiyor yosh avlod" obrazini tarannum qilish bosh yo'nalish kasb etdi. Qahramon ruhiyatini ochish, bolalar va o'smirlikdagina kechadigan tuyg'ular, murakkab ruhiy holatlarning badiiy tasviri juda kam asarlarda ko'zga tashlandi. Bolalar adabiyotidagi pedagogik talablar uning so'z san'ati sifatidagi badiiy ijod o'zanlariga band soldi. Faqat o'tgan asrning so'nggi choragi, aniqrog'i, 80-yillardan boshlab bolalar adabiyoti yakranglikdan qutula boshladi. Istiqlof arafasi va mustaqillik yillaridagina bolalar adabiyoti mavzu va qahramon, shakl va mazmun, janrlar xilma-xilligi jihatidan sezilarli darajada o'zgardi. Binobarin, o'zbek bolalar adabiyoti o'z taraqqiyotida umumadabiyotga mushtarak va farqli xususiyatlarga hamohang tarzda rivojlandi.

Binobarin, bolalar adabiyoti tabiat va jamiyatdagi barcha mavzularda ijod etish jihatdan umumadabiyotga yaqin, "*qanday qilib yozish muhim*"ligi esa uning o'ziga xos jihatidir. Bu tarixiy tasnif mohiyati ayniqsa istiqlof davri bolalar adabiyotida yorqin ko'zga tashlanadi. Aytaylik, E.Malikning "Shaytonvachchaning nayranglari"

HyKOBCKun K.H. Ot gByx go namu.M. ^emrn'i, 1963, cmp.358. ma'rifiy qissasida mustaqillik tufayli bolalar adabiyotiga xalq pedagogikasi, milliy ta'lim-tarbiya asoslarining singdirilishi, shu bilan birga asarda jamiyat va mamlakat taraqqiyotiga salbiy ta'sir etuvchi ijtimoiy hodisalarning obrazli tasviri namoyon bo'lishi ahamiyatlidir.

G'afur Gulomning "Shum bola" asari o'tgan asrning 30-yillarida yozilgan bo'lsa ham u haqda "Qilichning damida



yurib yaratilgan san'at mo'jisasidir" (A.Rasulov) deyilishida istiqlool mafkurasining ta'siri yaqqol seziladi. Zero, yaratilgan chinakam badiiy asarlar zamonlar osha navqiron avlodlarga ham yangicha estetik zavq bilan xizmat qilaveradiki, bunday asarlar yosh kitobxonni aslo befarq qoldirmaydi.

Bolalar adabiyotining **ikki yo'nalishli adabiyot** ekanligi hodisaning muhim xususiyatlaridan. Chindan-da, u bolalar va o'smirlarga mo'ljallangani uchun, avvalo shularning adabiyoti, ayni paytda san'at asari bo'lgani bois kattalarning ham diqqatini tortishi tabiiy. Adabiy ertak yozish an'anasini boshlab bergan va uni cho'qqiga ko'targan X.K.Andersen shuni nazarda tutib yozgan edi: "Men nafaqat bolalar uchun, balki kattalar uchun yozayotganimni har doim esda tutaman. Bolalarni ertaklarning fabulasi ko'proq qiziqtirsa, kattalarni ularga singdirilgan g'oya qiziqtiradi".³ Darhaqiqat, Sharl Perroning mashhur "Qizil shapkacha" ertagi har qancha sodda va quvnoq sujet asosida qurilgan bo'lmasin, ham bolalarni, ham kattalarni qiziqtirgani holda unda ifodalangan "Qizil shapkacha"li go'zallarni (qizil shapkacha - go'zallik ramzi, unda fransuz qizlarining umumlashma obrazlari ko'zda tutilgan) fransuz burjuaziyasining shahvoniyatparastligidan (Bo'ri qiyofasida fahshga mukkasidan ketgan burjuylar ko'zda tutilgan) ogohlantirishdan iborat g'oyani faqat asar ijod etilgan tarixiy davr mantiqidan uqa olgan kattalargina ilg'ashlari mumkin. Shuningdek, Hamza Hakimzoda Niyoziyning "Yengil adabiyot" darsligida keltirilgan "To'g'ri so'zli bola" she'ri rostgo'y bolaning ibрати ifodasi tarzida taassurot qoldiradi. Ammo, "Meni - deb yozadi adabiyotshunos A.Rasulov, - she'rdagi o'zga masala jalb etdi. Bolaning yo'lini to'sgan, qaddi qomati kelishgan, tasavvurimcha, bashang kiyingan ikki kishi kim edi? Nega ular pul berib yolg'on sotib olmoqchi bo'ldilar? Qolaversa, iste'dodli Hamzada yolg'onfurushlar qiyofasini yaratish fikri qachon, qanday paydo bo'ldi? Olim masalaning shu tomoniga e'tibor qaratgani holda, she'rdagi yangi mazmunni

³ AHгeпceH X.K.3пmaKaap. - TomkeHT: "Emraapgua", 1960, 4-6.



inkishof etadi: XX asrda mamlakatimizning ijtimoiy-siyosiy hayotida yolg'onning urchib ketgani, yolg'on inqiloblar, yolg'onni suv qilib ichib yuborgan "dohiylar", yer kurrasining oltidan birida barpo etilajak jannat haqidagi uydirmalar... xullas, oxiri sarob "izm"lar munaqqidni mushohadaga undaydi. Ya'ni, bolalar uchun yozilgan maktab darsligidagi mazkur she'r ham aslida dolzarb ijtimoiy-siyosiy mazmun ahamiyat kasb etgani anglashiladi.

Sujetning qiziqarliligi bolaga haqiqatan zavq bag'ishlaydi. Biroq zamondosh kichkintoylar uchun buning o'zi yetarli emas. Shiddat bilan rivojlanayotgan davrning navqiron avlodlariga o'tkir mazmunli fikr hamda g'oya zarur. Tasavvurga boy obraz va teran tasvirli psixologik, falsafiy-ma'rifiy jihatdan o'tkir sujetli asarlar hamda badiiy yuksak ijod namunalari yosh kitobxon ma'naviy olamini boyitishga xizmat qiladi. Masalan, M.A'zamning inson va zamin muammolariga bag'ishlangan mushohadakor she'rlarini yosh kitobxon diqqat bilan o'qiydi. Jumladan, uning "Yodgor xolaning vahimasi" she'ri yumoristik tabiati bilan o'quvchiga zavq bag'ishlay olgan. Shoir, xalq tilidan foydalangani holda voqelikni sujet tizimiga bog'laydi. She'r quyidagi muammoli vaziyatdan boshlanadi:

Yodgor xola to'satdan bir tepdi-yu qopqani, chopa ketdi dalaga nevarasin topgani.

Hovliqqan kampir chor tarafga yugurgilab, nevarasining ismini aytib chaqiraveradi:

– Akbar, Akbar, hov Akbar, qayga ketding, zumrasha?

Zumda g'oyib bo'lasan ariq osha, yo'l osha... - Yodgor xola yugurar oyoqlari lorsillab, javrab borar o'zicha yo'l-yo'lakay harsillab...

Yodgor xola nevarasining ko'rinmay qolganidan vahimada va sarosimada. Bunga shunchaki, so'roqsiz ketib qolgan bolaning kattalarni xavotirga solishidagi odatiy holat deb qarash



ham mumkin, albatta. Ammo kampir nevarasini avval yengilgina - “zumrasha” deb, keyin esa g’azabi ortgach, achchig’iga chidolmay “qay go’rdasan”, “tirmizak” deya urisha boshlagani o’quvchi diqqatini oshiradi:

- O’tirsa bo’lmasmikin ko’milib uy ichida?

Tashqarida nima bor, nima bor ko’y-ko’chada? Akbar, Akbar, hov Akbar, qay go’rdasan, tirmizak? Tez kela qol, jon bolam, momongni qilmay halak.

Qizig’i shundaki, nevara hech qayoqqa ketmagan edi. Yodgor xola bir oz oldin uni erkalab, opichlab olgan bo’ladi. Ammo keksalik tufayli buni unutadi. Shuning uchun sujet yechimida quyidagi kulgili voqea beriladi:

... Yodgor xola bo’ynidan siqib so’rar Akbarjon:

- O’zi qaysi Akbarni chaqiryapsiz, momojon?

O’z qilmishidan o’zining kulgisi qistagan, hatto nevarasining oldida mulzam bo’lib qolgan buvi sir boy bermay, yana zo’ravonlik ko’rsatib deydi:

- Ha, basharang qurmasin, darrov “ha” demaysanmi?

Lo’killatmay meni ko’p, tez ovoz bermaysanmi?

Ayni paytda nevara ham bo’sh kelmaydi. Buvi-nevaraning dialogi asosida she’rning yumoristik ruhi yanada kuchaytiriladi:

- O’zingiz opichvolib, o’zingiz chaqirasiz. Jinnimisiz, momojon, nimaga baqirasiz?

She’r so’nggida esa shoirning bosh g’oyasi buvining haqiqiy tashvishi yanglig’ namoyon bo’ladi:

- Voy Akbarjon, bolam-a, mening ko’nglim alag’da, depalatsa boshlandi o’tgan hafta dalada. Butiposmi, mutipos, bir balolar sepadi. Qancha-qancha bolalar balnisaga ketadi. Mirza bo’lang yotibdi sariq kasalga uchrab, tinmasdi, yerga ursang, olovday ko’kka sachrab. Uyda o’tir, jon bolam, joning omon bo’lsa, bas. Sen ham dardga chalinsang, jonimdan bitta qolmas.



Anglashiladiki, she'r mazmunidagi yetakchi g'oya o'tgan asrdagi "paxta yakkahokimligi"ning turli jarohatlari, alamli azoblaridir. Uning barcha qiyinchiliklarini o'z boshidan o'tkazgan katta avlod - buvi-bobolar, ota-onalar o'z farzandlaridan ham xavotirga tushadilar. Bolalar uchun buvining holati kulgi qo'zg'atib, she'rdagi komiklikni ta'minlagan bo'lsa, she'r xotimasi kattalarni jiddiy mulohazaga yetaklaydi: yaqin tariximizdagi muammolarni eslab qayg'uradi, istiqlool zamonidan, inson qadri ko'tarila boshlaganidan shukrona qiladi. Shu tariqa, bu kabi she'rlar bolalar va kattalar adabiyotining muhim namunasi hisoblanadi.

Shunga o'xshash, o'zbek bolalar adabiyotining mustaqillik arafasi va istiqlool yillarida yaratilgan ko'pgina asarlar ikki yo'nalishli adabiyot ekanligi bilan diqqatga sazovor. Jumladan, A.Obidjonning "Dahshatli Meshpolvon" ertak qissasidagi Meshpolvon portreti tasviri ("...ikki lunji nog'ora, beti oftobday zog'ora, betida eshak tepkisidan naqshlangan chandiq, qorni qirq pudlik sandiq, burni mushuknikidek puchuq, yelkasi baayni hurpaygan chumchuq, bo'yni oldinga enkaygan, quloqlari dinkaygan, oyoq bosishi ilang-bilang, boshi Yozyovon cho'lidek yap-yalang, ko'rinishidan kamgap-u anqov, aslida mahmadana-yu mijg'ov, ko'zlari boyqushnikiday ola... Xullas rosayam qiziq bola") va qahramonlik sarguzashtlari katta-yu kichikka baravar zavq berishidan tashqari, yozuvchi bu orqali xalqona iboralar jilosi, unutilayozgan xalq dostonlari va ertaklari ohangi, ruhini bugungi yosh avlod qulog'iga singdirishni ko'zlaydiki, bu ham o'z navbatida, hodisaning ikki xil mazmun-mohiyatiga xizmat qila oladi.

Binobarin, bolalarga mo'ljallangan badiiy adabiyot kichikintoylardan tashqari dastlab, san'at asari sifatida, so'ngra, g'oyadorligi jihatdan hammabop bo'lishi mumkin ekan.

Bolalar adabiyotida voqelikning o'ziga xos tasviri ham muhim ahamiyat kasb etadi. Bunda quyidagi xususiyatlar ko'zga tashlanadi:



1. Badiiy obrazning, voqelikning aniq-tiniqligi, ko'rimlilik. Bu xususiyat aksaran, maktabgacha tarbiya va kichik maktab yoshidagi o'quvchilar kitobxonligiga xos. Ular uchun yozilgan asarlarning har bir jumlasida asosida rasm chizish mumkin. G'afur G'ulomning "O'ylashni o'rganamiz" she'rida mavhum hodisani ko'rimli qilib tasvirlash yorqin kuzatiladi. Muxtorjon olti yoshli singlisi Munisxondan "O'ylashni bilasanmi?" - deb so'raganida, uning: "Aka-a, o'zing ayta qol, O'ylash degan nimadi?", - deya iqror bo'lgani bejiz emas. Shunda, Muxtorjonning "jiddiy turib", "qoshini birga yig'ib" o'ylashida ham aynan kichikintoylarga xos "muzqaymoqdan tog', nuqul gilos bog', bir qozon qaymoq, "tuyaday pishloq" kabi obrazlar ko'rimlilik - predmetlilik kasb etadi. Bu esa kichikintoylar tasavvurini yorqinlashtiradi.

Kichik maktab yoshidagi o'quvchilarga mo'ljallab yozilgan asarlarda yana do'stlik, Vatanga muhabbat, iymon, e'tiqod singari mavhum tushunchalar obrazli tasvirda, ramziy detallarda tasvirlanadi. A.Obidjonning "Vatan" she'ri bugungi yosh avlod tafakkuri, o'tkir aql-idrokiga monandligi bilan e'tiborga loyiq :

- Senga bitta savol bor,

Menga quloq sol, hoy, qush.

Vayronada yashaysan, Noming esa naq Boyqush, Ayt-chi, nahot sen boysan? - Asl boylik neligin Tushunmaysan, chamasi. Bu vayrona bo'lsa ham, O'zimniki hammasi, Shuning uchun men boyman!

Shoirning bolalarga xos tushuncha va tasavvurdan foydalanib, asl muddaoni ayta olgani diqqatga sazovor. Boyqushning ko'rimsizligi, buning ustiga xarobada yashashi uning nomiga munosib emasligi bolalarni qiziqtirishi tabiiy. Shoir aniq va ko'rimli timsol - boyqush hamda u yashaydigan vayrona orqali kichik maktab yoshidagi kitobxonlar uchun hali mavhum bo'lgan tushuncha - vatanparvarlik, o'ziga beklik hissini anglatishga erishgan.



Bu jihat badiiy adabiyotning ijtimoiy hayotni o'rganishdagi asosiy vosita ekanligini ham oydinlashtiradi. Zotan, S.Jo'ra, Q.Muhammadiy, A.Muxtor, Sh.Sa'dulla, X.To'xtaboyev, T.Adashboyev, S.Barnoyev kabi ijodkorlarning kichkintoylar uchun yaratgan asarlarida aniqlik ustuvor bo'lsa, N.Fozilov, H.Nazir, M.A'zam, A.Obidjon, T.Malik singari adiblar ijodida o'smirlarga xos tasavvur yetakchi.

2. Hikoya qilishda lirik yoki komik mayning kuchlili-gi. Bolalar adabiyotining asosiy xususiyatlaridan biri - uning samimiy his-tuyg'ularga boyligi ekani o'z vaqtida V.G.Belinskiy tomonidan qayta-qayta uqdirilgan edi. Quvnoq yumor esa uni yanada to'ldiradi. Bu hali-hanuz bolalar adabiyotining o'ziga xosligini belgilab kelmoqda. N.G.Chernishevskiy shu ma'noda, bolalarga mo'ljallangan badiiy asarlarda "Vah... Qanday dahshat?", "Ey, muncha kulgili!", "Bay-bay, muncha yaxshi!" kayfiyatlarini qo'zg'ovchi alomatlari bo'lmasa, yosh kitobxonlarni to'lqinlantira olmaydi, deb hisoblagan edi. Shu jihatdan qaralsa, o'zbek bolalar adabiyoti tarixida ham lirik ko'tarinkilik va quvnoq yumorga boy asarlar yosh avlod qiziqishiga ko'proq muyassar bo'lgan. Zero, G'afur G'ulomning "Shum bola", X.To'xtaboyevning "Sariq devni minib", "Sariq devning o'limi", "Sehrgarlar jangi yoxud, shirin qovunlar mamlakati", A.Obidjonning "Dahshatli Meshpolvon" va "Meshpolvonning janglari" kabi asarlarini o'zgacha zavq bilan o'qilishining siri avvalo shunda.

Real olam voqealarini xayolot dunyosiga o'g'irib, adadsiz orzular tasvirida berish bolalar adabiyotining doimiy ehtiyojlaridan. Ayniqsa, kichik yoshdagi bolalar kitobxonligiga xos ertak va hikoyalarni sehrli predmetlar, ajoyib-u g'aroyib sarguzashtlarsiz tasavvur qilib bo'lmaydi. Bolalar adabiyotida X.Andersen, M.Tven, R.Kipling, J.Rodari, K.Chukovskiy, X.To'xtaboyev, A.Obidjon kabi bolalar adiblari asarlarida bu sirli tilsimlar asosiy g'oyani ifodalashda muhim rol o'ynaydi. "Ayniqsa, Xudoyberdi To'xtaboyevning Hoshimjoni - deb yozadi



A.Rasulov - sehrli qalpoqchasini kiyib yarim dunyoni kezib chiqdi, ming-minglab kitobxonlar qalbidan joy oldi”⁴. Olim bunda X.To‘xtaboyevning mahorati, bolalar qalbini rom etish san‘atini nazarda tutadiki, chindan ham o‘zbek bolalar adabiyotshunosligi oldida ularni teran yoritish masalasi hali-namuz ko‘ndalang turibdi.

3. Xarakter va hodisalar ifodasida dinamikaning yorqinligi, jonliligi. Harakatchanlik, tinib-tinchimaslik, hamma narsaga qiziquvchanlik bolalarning tabiatida mavjud. Bu jihat ularbop asarlarda ham o‘z ifodasini topadi. Jahon va o‘zbek bolalar adabiyotidagi Robinzon (“Robinzon Kruzo”), Gulliver (“Gulliverning sayohatlari”), Pinokkio (“Pinokkio va uning boshidan kechirganlari”), Buratino (Oltin kalit yoki Buratinoning sarguzashtlari), Kachal polvon (“Kachal polvon yoxud yog‘och qo‘g‘irchoqning sarguzashtlari”), Qoravoy (“Shum bola”), Hoshimjon (“Sariq devni minib”), Alamazon (“Alamazon va uning piyodalari”) kabi qahramonlarning sarguzashti, o‘ziga xos va mos harakati orqali voqealar sujetida qiziqarlilik sodir bo‘lgan. Ba’zi asarlarda esa yanada shiddatli dinamizm ko‘zga tashlanadi. K.Chukovskiyning “Moydodur” (“Yuvin, do‘mbog‘im”), Q.Muhammadiyning “Temirlar o‘yini”, Sh.Sa’dullaning “Ayyor chumchuq” kabi she‘rlarida sujet shiddatli dinamizm asosida voqelikka aylangan. Kichkintoylar o‘z tabiatiga yaqin shu xildagi harakat zahirida namoyon bo‘luvchi voqelikni kattalarga nisbatan tez ilg‘aydi, voqealar almashinuvi uning ko‘z o‘ngida yorqin akslanadi.

Anvar Obidjonning “So‘nggi axborot” ko‘zga tashlanadi:

(she‘rida mevalar va sabzavotlar misolida)

Bo‘lib o‘tdi qishloqda Kecha zo‘r shamol.

Natijada ro‘y berdi Anchayin kor-hol.

⁴ Rasulov A. G‘aroyib saltanat. T.: Adib, 2012. -B.12



Uzum boshi aylanib, Bo'p qoldi kasal.
Shoxdan yiqilib olma, Yotibdi o'sal.

Hatto gilos lat yedi, Bo'lsa ham abjir.
To'qnashuvda anorga... Chaplandi anjir.
Shamollatdi qornini, Oshqovoq polvon.
Pachoc qildi burnini, Mulla baqlajon.

Uyqichiroq bir tarvuz Yumalab borib,
Uyg'onibdi qovunning Boshini yorib.
Noklar yerga to'kildi, Bo'lishib bir jom.
Ammo zarar ko'rmadi Sabzi va sholg'om.

Ko'rinadiki, harakatlanayotgan har bir narsa o'ziga xos sazoga ega bo'lishidan tashqari, bolalar sho'xligini ham eslatadi. Kichkintoylar bu harakat va "jang" zamirida o'sha narsalarning o'zini va o'zlarini ko'rib turganday sezadilar. Ammo, bolalar ulg'aya borgan sari ular zohiridagi bu dinamika botiniga, tasavvuriga ko'cha borganidan, o'smirlar adabiyotida detektiv, yoxud fantastik asarlar tarzida davom etadi. Binobarin, ulug' munaqqidlar ta'kidlaganidek, bolalar adabiyotida "borliqni va barcha mavjudotni harakatga keltirmoq zarurligi" masalasi bolalikning o'zi qadar umrboqiylik kasb etadi. Haqiqatan, kichkintoy bola nazdida "soqov tosh ham, dala-dashtdagi xas-xashaklar ham shivirlab, oqayotgan ariqcha ham, sokin esayotgan shamol ham parvoz qilib, guldand-gulga qo'nayotgan kapalak ham muhabbat va hayot tilida so'zlashi" tabiiy.

4. Tilning aniqligi, tushunarligi va serqirraligi.

Kichkintoylar asarlarining tili grammatik jihatdan umumadabiyotga mushtarak bo'lgani holda, bolalarcha tafakkur qilishning ifodaviy vositasi ham. Bunda bolalar adiblarining tilshunoslik mahorati muhim rol o'ynaydi. Negaki, bolalar kitobxonligida asar til xususiyatlari muhim rol o'ynaydi. Jamiyat



taraqqiyotida tilning o'zgarib, boyib borishi ayon. Har bir davr yosh avlodining so'z boyliklari imkoniyati turlicha bo'ladi. Tushuncha va ifodalarning bola yosh xususiyatlariga mos bo'lishiuning adresliligini ta'minlaydi.

Jamiyatda ro'y bergan o'zgarishlar adabiyotda o'z aksini topar ekan, bolalar adabiyoti ham bundan mustasno emas. Shu ma'noda, bugungi bolalar adabiyoti til xususiyatlari, emotsionalligi jihatdan-da, "kechagi"dan bir muncha farq qiladi. XX asrning boshlarida bolalar adabiyotida ham ifoda va iboralarda o'sha davr ruhidan tashqari, yosh xususiyatlari umumiyliги ko'zga tashlanadi. Ya'ni, ularda bolalar kitobxonligining adresliligi nazarda tutilmagan. Maktabgacha tarbiya va kichik maktab yoshidagi kichkintoylarning lug'at boyligi (leksikoni) o'smirlarga nisbatan alohidalik kasb etishi uning keyingi taraqqiyot davrida ko'zga tashlanadi.

1940-80-yillar bolalar adabiyotida ham ijtimoiylashuv yetakchilik qilgan esa- da, kichkintoylarning til xususiyatlariga qisman e'tibor berilgan. Aytaylik, Sh.Sa'dullaning "Yil fasllari" she'ridagi:

Milt etib chiqdi quyosh,

Dedi: – Do'stlar, qish *odosh*, -

misralaridan uning maktabgacha yoshdagi bolalarga mo'ljallangani anglashiladi. Bunda ular nutqiga xos lug'at aks etgan. Ta'kidlab ko'rsatilgan so'zlar aynan 2-6 yoshdagi bolalarning taqlidchilik, erkalash ohanglariga mos. Shoir bunday serjilo nutq zamirida bahor fasli tashrifini shu yoshdagi kichkintoylar hali sezishga ulgurmagan ikki xususiyatini - bahor qishdan so'ng kelib, qishga xotima ekani, uning tugashi ("qish odosh") hamda endilikda iliq kunlar ("miltillab quyosh chiqishi") boshlanishini kichkintoy o'quvchi saviyasiga muvofiq ma'lum qilmoqda. Yoki, shoirning:

Dala-dashtda tindi ish,

Keldi mehmon bo'lib qish.



(Qish emas, u - qorbobo,

Sovg'alari bor bobo.) -

she'rida ham kichkintoy bola tasavvuri o'z ifodasini topgan. Yosh bola nazdida, yangi yil, qorboboning sovg'a ulashishi - qish ramzi. Ularning qishni intiqlik bilan kutishlari ham shundan. Zero, shoir qish ta'rifida teran, qisqa va obrazli ifoda bilan kichkintoy olamini yorqin aks ettirishga erishgan. Uning ta'sirchanligi va bir necha avlod bolaligining sevimli she'ri ekani ham shundan.

Bolalarning lug'at boyligi ularning saviyasini belgilovchi asosiy mezon. Ular ma'nau ulg'aygani sari voqelikni o'zlashirish imkoniyatlari, til boylıkları orta boradi. Jamiyat taraqqiyoti bu tamoyilni yanada orttiradi. Yosh avlodning did- saviyasi, tafakkuri o'sishida so'z boyligi, ularning ma'no qirralaridan kengroq foydalanish muhim ahamiyatga ega. Zotan, bolalar adabiyotining tili endilikda shu jihatdan rang-baranglik kasb etayotir. E.Vohidovning bolalar uchun yozgan "Olma" she'ri shunday so'z jilolanishiga ega:

Men sizlarning

Olmangiz.

Xomligimda

Olmangiz.

Nortojiga o'xshab so'ng

Voy qornim, deb

Qolmangiz.

Ma'lumki, turkiy xalqlar she'riyatida tajnisli qofiyaga asoslangan lirik janr - tuyuq mavjud. Bunda shakldosh so'zlar mo'jazgina matn doirasida turli ma'nolarda va o'rinli qo'llanadi. Bu esa shoirdan yuksak badiiy mahoratni talab qiladi. Shuningdek, tuyuq ona tilining go'zalligidan zavqlanish, uning beqiyos imkoniyatlari bilan faxrlanishga asos bo'lar ekan, bolalarni bu badiiy san'atga o'rgatish maqsadi ko'zlanganiga



shubha yo'q. Ta'kidlangan so'zdagi ikki xil ma'no - meva (olma) va harakatni bildiruvchi buyruq fe'li (olmoq) she'r mazmunini osongina yod olish bilan birga, ona tilimizning serjiloligini ham namoyon qiladi. Bu shoirning "Qarag'ay" she'rida ham kuzatilgan. Unda o'rmonda tik o'sadigan doimo yashil turuvchi ignabargli daraxt (*qarag'ay*) bilan tilimizda o'z yoki o'zga shaxsini bo'rttirib ko'rsatish, yuqorilash uchun ishlatiladigan ibora (akang *qarag'ay*) omonimi hamda *qaramoq* fe'lidan yasalgan paronim so'zidan (*qaragay*) o'rinli foydalanilgan.

Bo'yin cho'zib

Qarag'ay,

Yon-atrofga *Qaragay*, Der u :

Barcha daraxtdan

Baland *akang-*

Qarag'ay.

Anglashiladiki, kelajakda o'tkir idrokli, keng mushohadali bolalarni tarbiyalash, ona tili va o'z yurti boyliklarining haqiqiy egasi bo'la oladigan avlodni voyaga etkazishda mazmundor, serqirra asarlarning ta'siri katta. Shu ma'noda, tilning aniqligi, yorqinligi, yoxud, serqirraligi jamiyat taraqqiyoti bilan birga rivojlanib boraveradi. Ijodkorlarning o'ziga xos tasvir uslubi, ramziy ko'chimlardan foydalanish mahorati, poetik obrazlarning yangilanishi bilan badiiy so'z kamalakday jilolanadi. "Aslida biz hayratga tushadigan narsalarnigina o'qishimiz zarur",- degan edi V.Gyote. Bu jihat bolalar adabiyoti uchun yanada muhim hisoblanib, ular kitobxonligining adresliligini ta'minlaydi desak, xato bo'lmaydi.

Aslini olganda umumadabiyotda ham kitobxon har xil toifaga bo'linadi: o'z tafakkuri, qiziqish va didiga qarab u yoxud bu janrdagi, yo'nalishdagi asarlarni mutolaa qiladi. Bolalar kitobxonligida bu jihat ham yo'q emas. Ammo ularning yosh xususiyatlari bilan bog'liq tabiiy jarayon **bolalar adabiyotining adresliligini** belgilaydi.



Pedagogika va psixologiyada turli yosh davrlari ruhiyatining bir-biridan sezilarli farqi asoslab berilgan. Xususan, chaqaloqlik, ilk bolalik, maktabgacha ta'lim yoshi, kichik maktab yoshi, o'smirlik, o'spirinlik, yoshlik, yetuklik va keksalik davrlarning har biri o'ziga xos xususiyatlarga, sifatlarga ega bo'lib, ular bir-biridan odamning xronologik yosh ko'rsatkichlariga ko'ra emas, balki shu davrda inson ruhiyatida kechadigan hodisalar, ro'y beradigan o'zgarishlar uning ruhiyatidagi umumiy qonuniyatlarga binoan ham farqlanishi ta'kidlangan. Bolalar qalbini badiiy tadqiq etish, bolalikni badiiyat ko'zgusida butun borlig'icha aks ettirish, aniqrog'i, bola dunyoqarashi, botiniy va zohiriy takomillashuvi hamda ijtimoiy-axloqiy jihatdan shakllanish pillapoyalarini ko'rsatishni maqsad qilib belgilagan adabiyotijodkordan o'z o'quvchisining yosh xususiyatlari, ruhiyati, saviyasi va qiziqishlarini nazarda tutishni talab etadi. Shunga ko'ra bolalar kitobxonligida quyidagi uch asosiy bosqich o'zaro tafovutlanadi:

1) 2 yoshdan 6-7-yoshgacha – maktabgacha tarbiya yoshdagi bolalar kitobxonligi;

2) 7-yoshdan 11-12 yoshgacha – *kichik maktab yoshdagi bolalar kitobxonligi*;

3) 12-13 yoshdan 16-17 yoshgacha – *o'smirlar kitobxonligini* tashkil qiladi.

Maktabgacha ta'lim (tarbiya) yoshidagi bolalar kitobxonligi xususiyatlari L.N.Tolstoyning quyidagi san'atkorona bahosi bilan yaqqol oydinlashadi: "Axir men hozir nimalarda yashayotganimni o'shanda kashf qilmaganmidim? – deya xotirlagandi u yetmish yillik umriga sarhisob qila turib. -Shuncha ko'p, shuncha tez kashf etgan narsalarimning yuzdan birini ham, qolgan butun umrim davomida kashf eta oldimmi? Aslo! Besh yashar boladan mengacha - faqat bir qadam, yangi tug'ilgan chaqaloqdan besh yashar bolagacha - dahshatli masofa!"⁵.

⁵ ToncTOH I.H. Co6p. Co'i. t.1, M. 1'H.VI. 1952, c. 330



Lev Tolstoy fikrlaridan bolalar dunyosini idrok qilish, his-tuyg'u, o'lchovlari va qiziqishlarini ulardek anglash kattalar uchun naqadar og'ir va mas'uliyatli ekanligi anglashiladi. Yoki, Korney Chukovskiyning mashhur "Ikkidan beshgacha" asarida ham aynan shu yoshdagi bolalarning o'ziga xos olami tadqiq etilgani bejiz emas. Muallif insondagi ko'pgina fazilat va qirralar, qobiliyat va qiziqishlar, tasavvur va tushuncha aynan 2-5 yoshlik davrida to'la namoyon bo'lishini qator misollar tahlili orqali isbotlaydi.

Zotan, umr ibtidosidayoq so'z san'ati sehri bilan tarbiyalanish beqiyos ijtimoiy-estetik qimmat kasb etadi. Aslida ham xalq ijodiyotidagi erkalamalar, ovutmachochlar, qiziqmachochlar, ertaklar va aytim-olqishlar shunday vazifani ado etib kelgan. Murg'ak bolani so'z ohangida erkalash, ardoqlash ular ruhiyatida o'zgacha ta'sir etishi folklorshunos, psixolog va pedagoglar tomonidan qayta-qayta ta'kidlanmoqda.

Ulug' mutafakkir Ibn Sino bundan ming yillar avval yozgan "Axloq haqida risola"sida shunday yozadi: "Tarbiyani bolaning eng yosh paytidan boshlash kerak, zero unga yaxshi xulq odat bo'lib qolsin". Bu kabi fikrlar Unsurulmaoliy Kaykovus, Shayx Sa'diy, Abdurahmon Jomiy, Alisher Navoiy kabi mumtoz so'z san'atkorlarining didaktik asarlariga ham singdirilgan. XX asr boshlarida esa Abdulla Avloniy o'zining pedagogik risolasida tarbiyaning zamoni haqida mulohaza yuritib, shunday yozadi: "Emdi ochiq ma'lum bo'ldiki, tarbiyani tug'ulgan kundan boshlamak, vujudimizni quvvatlandurmak, *fikrimizni nurlandurmak, axloqimizni go'zallandurmak, zehnimizni ravshanlandurmak* lozim ekan..."

Binobarin, ana shu e'tiroflarning o'ziyoq maktabgacha tarbiya yoshidagi bolalar kitobxonligining dolzarb ahamiyatini asoslashga xizmat qiladi. Bu yoshdagi bolalar hali kitob o'qishni, uning mazmunini idrok etishni bilmasa-da, atrof-olamdagi narsa-predmetlarga qiziqishlari kuchli bo'ladi,



taqlidchilik asosida hayotni o'zlashtira boradilar. Shu sababli kichkintoylar eng ko'p eshitadigan, sevib tinglaydigan ertaklari va she'rlarining personajlari - hayvonlar, qushlar, hasharotlar, dov-daraxtlar hisoblanhsa-da, insonga xos taqlidiy suratga ega: gapiradi, yig'laydi, xafa bo'ladi va h.k.

Kichkintoylarda 2-3 yoshidan boshlab so'z o'rganish, so'zni anglash va aytish ehtiyoji jiddiy tus oladi. Ular 3 yoshda 1200-1500 so'z bilsa, 4-5 yoshda 2500 tacha so'zni o'z nutqida faol qo'llaydi. Bola hech qanaqa grammatik qoidadan xabarsiz holda so'zlarni mantiqan to'g'ri aloqaga kiritib, o'z fikri va istagini bildiradi, hatto o'zicha so'z yasab, uni ifodalagan bo'ladi, shu tariqa o'z lug'atini aks ettiruvchi tili yuzaga keladi. Xuddi shunday bir vaziyatda bolaga hayvonlar, qushlar va hasharotlarning yorqin rasmlari, ularga daxldor voqelikni ifodalovchi voqeaband rasmlardan tashkil topgan pishiq kartondan ishlangan **animal kitoblar**, hayvonlar haqidagi ertaklar mazmunini aks ettiruvchi **dekorativ, kesma** yoxud **yig'ma** kitobchalar berilmog'i lozim. U bunday rangli kitobchalarni o'zi ochib varagqlamog'i, rasmlariga qarab, tasvirdagi narsalarning holatini, rangini, shaklini, a'zolarini, aytmog'i, yoxud kattalar yordamida shularni o'rganib qayta so'zlamog'i shart. Bunday kitobchalar bolada hajm, shakl va rangni his qilishda ham muhim rol o'ynaydi. Xususan, "O'zing bo'ya" ruknidagi kontur suratli kitobchalar bu jarayonni yanada faollashtiradi, bolalar bu kitoblarni bo'yab turib konturda ifodalangan ma'nolarni, shakllar va ularning ranglar garmoniyasida o'qib idrok qiladigan bo'ladilar. Bu holat ularda so'zga, so'zlashga rag'batni yanada kuchaytiradi. Shuningdek, har bir jumlaning jarangdorligi, musiqiyligi, ertaklarni rolli va didaktik o'yinlar orqali, she'rni esa qo'shiq qilib ayta olishi muhim. Zero, bolalar adiblari kitobxonlikning bu davriga alohida e'tibor qaratmog'i, ularning til va nutq boyliklari, quvnoqlikka moyil tabiatini inobatga olishi g'oyat zarur. Rost, maktabgacha tarbiya yoshidagi bola o'zi qiziqqan ertak yoki she'rni, hikoyani tanlash imkoniyatiga ega emas. Ammo tanlab eshita oladi. Zukko



ota-onalar, maktabgacha ta'lim muassasalarining pedagoglari kichkintoy ko'zidagi hayrat, quvonch yoki o'ychanlikni ilg'ay biladi. Aytaylik, Z.Diyorning "Kapalak", "To'p", "Suv bilan suhbat", Sh.Sa'dullaning o'yinchoqlar tilidan aytiluvchi "Ayiqlar", "Buzoqlar", "To'ychiq", "Uloqcham" she'rlari shu ma'noda kichkintoylar tilidan tushmay keladi. Bunday she'rlarda 2-6 yoshli kichkintoylarning fe'l atvori (kapalakni quvlashi, suv bilan suhbatga kirishishi, o'yinchoqlar tilga kirib, unga arz qilishi), nutqi ("jiyron toycham", "o'ynab-kishnab", "suzoqlar") ohangi aks etgani, ular sho'xligiga mos ifodalar (kapalak, buzoqlar, toychiq, sharqiroqlar soy, to'p, uloqcham...) bilan tasvirlangani, qolaversa, so'z va qofiyalarning aniqligi (buzoqlar- suzoqlar) diqqatga sazovor.

Shunga o'xshash S.Barnoyevning "Feruza aytgan qo'shiqlar" she'ri zamondosh kichkintoylar kuylab kelayotgan qo'shiqlar hisoblanadi:

Quyosh bo'lsin, oy bo'lsin, O'zbekiston boy bo'lsin. Menga atlas, ukamga Gijinglagan toychiq bo'lsin.

Dadam yuzga kirsinlar, Oyim yuzga kirsinlar, Bizlar yuzga kirganda Yonimizda yursinlar.

She'rda katta-yu kichikning samimiy tilagi bor. U juda sodda, o'ynoqlar ohangda bitilgan. Ayni paytda jajji qizaloqlar oila farovonligini istayotirki, bunda osmon-u zamin tinchligi bilan birga milliylik (atlas) hamda yurt tinchligi, ota-bobolar an'analariga sodiqlikning ("gijinglagan toychiq") umrboqiyliqligi ko'zlanayotir.

Kichkintoylar shunday she'rlarni kuylab ulg'aysa, albatta, uning mazmun- mohiyati ham qulog'iga singib boradi.

Yoki R.Farhodiyning "Tonggi so'z" hikoyasida qator taqlid so'zlar ishlatilgani e'tiborga loyiq. Ya'ni, "Miyov-miyov!", "G'uv-g'uv", "Chiriqlar, chiriqlar!", "Vov-vov-vov!", "G'oqlar-g'oqlar-g'oqlar!", "G'a-g'a-g'a!" - bular tongda uyg'ongan

Ahmadning yo'lda uchratgan do'stlari - mushuk, shamol, Qoplon, g'oz va o'rdaklarning erta tongda aytgan so'zlari



-“Assalomu-alaykum!”- degani ekan. Darhaqiqat, bunday hikoyalar jajji kichkintoylarga estetik zavq berish bilan birga tarbiyaviy vazifaga ham ega. Shu sababli kichkintoylarga bag‘ishlangan she‘r va hikoyalar ularda hayotni anglash, vatanparvarlik tuyg‘ularini shakllantirish, mavhum tushunchalarining reallashuvi, so‘z boyliklarining muttasil boyib borishiga xizmat qilishi asosiy tamoyillardan hisoblanadi.

Kichik maktab yoshidagi bolalar kitobxonligi ham o‘ziga xos tafovutlarga ega. Chunki bu yoshdagi bolalarning ichki olami nihoyatda boy. Ular hali ko‘p narsani bilmasa-da, lekin bilishdan iborat ma‘naviy ehtiyoj jarayonini boshdan kechiradi. “Bolalarga o‘zlari sezgan va o‘ylaganlarini gapirib berish g‘oyat qiyin, chunki ularni so‘zda ifodalashga to‘g‘ri keladi”, - deb yozgan edi Yanush Korchak taxallusi bilan butun dunyoga tanilgan polyak adibi Genrika Goldshmit. - Bundan ham og‘irrog‘i esa yozish. ... lekin bolalar shoir va faylasufdirlar.”

Anglashilishicha, adiba o‘zining pedagogik tajribasi, bolalar shifokori sifatidagi bilimi, betakror yozuvchilik iqtidori orqali bolalik dunyosining ko‘pgina sir-asrorlarini ilg‘ay olgan; xususan, bola qalbining erkinligi qushga, kapalakka va gulga qiyoslanishini, hamchunin ular o‘zlariga jonivorlar, hasharot-u hayvonlarni aka-uka, yoxud, tengqur do‘stdek tutishini ta’kidlaydi. Chindan ham shunday. Bolalar tabiatidagi “shoirlik”- ularning hamma narsadan hayratlanishlari, har bir hodisadan hayajonlanishlari bo‘lsa, “faylasuflik”- hayratni va hayajonni qo‘zg‘agan shu narsalar va hodisalarning asl mohiyatiga qiziqishlaridir. “Bu nima?”, “Bu nega bunaqa?”, “U nima deydi?”, “U nega katta yoki nega kichik?”, “U qanday o‘sadi?”, “Nega qattiq?”, “Nega yumshoq?”, “Suv nega qotadi?”, “Quyosh qanday qizitadi?”, xullas, shu xildagi sanoqsiz savollar bu yoshdagi bolalarning qiziqishlari hosilasi bo‘lib, ana shu savollarga topgan va topolgan javoblari - olamni o‘zlashtirish yo‘llaridir. Olam ular uchun jumboqqa aylanarkan, ularning o‘zlari ham “nimavoy”ga



aylanishlari tabiiydir. Shu ma'noda, rus bolalar yozuvchisi N.Nosov yaratgan Pochemuchka (yoki, Nimavoy - o'zbek tilida Bilmasvoy tarzida tarjima qilingan) -bu yoshdagi bolalarning umumlashma obrazi darajasiga ko'tarilgan. Bunday umulashma obrazni Q.Muhammadiyning "Tabiat alifbesi" turkumiga kiruvchi lirik qahramon timsolida ham ko'rish mumkin. U ham butun vujudi bilan "Yong'oqni nega yong'oq deymiz?", yoki "Yong'oqning qobig'i nega qattiq?", "Olcha negaqip-qizil?", "O'rik nega sarg'ayib pishadi?", "Jiydaning shoxi nega egik?", "Shaftolining bargi nega achchiq?", "Sada nega meva qilmas?", " Dada, bog'bon nega tokni qirqib turadi?", yoki, "Tok daraxti bir xil-u uzumlari nega har xil?", "Mol nega kavsh qaytaradi?", "Chittak nega chittak?" singari son-sanoqsiz savollarga aylangan. Q.Muhammadiy bu savollarga poetik javob berish maqsadida nima to'g'risida asar yaratmasin, nima haqda gapirmasin, doim o'sha narsadan inson hayotini ko'zda tutib, ma'no izlaydi. Shoir shu ma'noni topadi ham. Bu ma'no doim bolalarning hayotdan oladigan birinchi taassurotlarini izohlaydi, uning dunyoqarashi shakllanishiga xizmat qiladi.⁶ Eng muhimi, bolada insonni sevish, kasb-u koriga rag'bat bilan qarash, shu asosda hayotni anglash va sevish tuyg'usini ardoqlab o'stiradi. Bu yoshdagi bolalar folklordan kengroq bahramand bo'la boshlaydilar: tez aytishlar mashqi bilan nutq tovushlari talaffuzini ravonlashtirsalar, chandish o'ynab so'zlar ohangdoshligini idrok qiladilar; guldur-guplar vositasida so'z va harakat uyg'unligini his etsalar, topishmoqlarni yechish jarayonida zehnlarni charxlay boradilar. Hayvonlarga oid ertaklarga qiziqishlari sehrli- fantastik va hayotiy-maishiy ertaklarga omixtalashib, ular hisobiga to'lisha boradi va xayollariga parvoz bag'ishlay boshlaydi. Hayotiy-maishiy ertaklarni o'qish jarayonida real hayot hodisalariga qiziqishlari uyg'ona boradi. Ertakka bu xildagi ma'naviy chanqoqlik turli xalqlar ertaklarini ham, shuningdek, yozma adabiy ertaklarni

⁶ Qarang: Qo'shjonov M. Katta hayot va jo'shqin lirika. -Kitobda: Quddus Muhammadiy. Tabiat alifbesi. She'rlar. - T., "Yosh gvardiya", 1971, 3-b.



ham sevib o'qishga chog'laydi: Sharl Perro, aka-uka Grimmlar, Hans Kristian Andersen, P.Yershov asarlarini, ayniqsa, bolalarga moslashtirib tabdil qilingan E.Rapsenning "Baron Myunxauzenning sarguzashtlari", shuningdek, A.Tolstoyning "Oltin kalit yoki Buratinoning boshidan kechirganlari", Leonid Solovyevning "Nasriddin afandi sarguzashtlari", Sh.Sa'dullaning "Yog'och qo'g'irchoq yoki Kachal polvon sarguzashtlari" ertak-qissalarini, Turg'unboy G'oyibovning adabiy-nasriy ertaklarini zavqu shavq bilan o'qiydilar. Multfilmlarga va qo'g'irchoq teatri spektakllariga o'chliklari zamirida ham aslida ertakka ehtirosli qiziqishlari yotadi. Ayni paytda ham bunday asarlarning ahamiyati pasaymagan. Shu bilan birga, o'sib kelayotgan yosh avlodni endilikda ko'proq mantiqiy bilimlar, insonning ruhiy kechinmalari, tabiat va jamiyat munosabati masalasi qiziqtirayotgani sir emas. R.Tolibning "Kim baxtiyor?" she'ri shu ma'noda kichik maktab yoshidagi o'quvchilar tabiatiga monand:

O'tirib goh Mirjalol, O'zicha surar xayol: "Bobom qanday baxtiyor? O'zlarida ixtiyor, Birov bermaydi tanbeh. Yanglishsalar hamki ... eh, Doim hurmatda bobom. Hamma beradi salom, Joy tayyor, dimog'i chog', Avtobusga chiqqan chog' "Bobomlarga maza xo'p, Uxlaydilar rosa ko'p. Xunob bo'lib erta-kech, Misol yechmaydilar hech.

O'zicha aytar bobo: "Alam qilarkan goho, Ko'z xira oyoq og'rir, Keksalik ekan og'ir. Yaxshi emas ishtaham, Unum yo'qdir ishda ham, Tunbo'yi kelmay uyqu Bosar keksalik, qayg'u. Qani, endi bo'lsam yosh, O'tirmasdim qashlab bosh. Kuchi, sog'liqlari bor, Yoshlar qanday baxtiyor?"

She'rda inson umrining ikki qarama-qarshi qutblari - keksalik va yoshlik yuzma-yuz kelgan. Shoir keksalikni dastlab, zohiriy jihatlarinigina bola tasavvuri orqali aks ettiradi. Bu kichik maktab yoshidagi o'quvchilarga xos bo'lgan uyquni yaxshi ko'rish, arifmetik misol va masalalardan xunob bo'lish, shumtakaliklari uchun dakki yeyaverish kabilar bilan muvoziy



qo'llanib, tasvirdagi aniqlikni ta'minlay olgan. Bobo o'ylari orqali esa umr poyonidagi botiniy kechinmalar, qarilikning o'ziga yarasha tashvihlari his qilinadi. Yosh kitobxon bobo va nevara xayolidan ogoh bo'lgach, keksalarni ko'proq e'zozlash zarurligi, haqiqiy baxtiyorlik esa yoshlikda ekani, "bosh qashlab" o'tirmay, bilim olish, izlanish zarurligini anglaydilar.

Umuman, kichik yoshdagi o'quvchilarni ham davr taraqqiyotining barcha muammolari, mavzulari qiziqtiradi. 8-11 yoshli bolalar, xalq nasri va adabiy ertaklar, tabiat, Vatan, vatanparvarlik, ota-onaga muhabbat, axloq-odob va kitob o'qishga da'vat ruhidagi asarlar bilan birga, insonni teranroq o'rganishga oid she'r va hikoyalarni katta qiziqish bilan o'qiydilar. Binobarin, o'zbek bolalar adabiyoti tarixida kichik maktab yoshidagi o'quvchilar kitobxonligini G.G'ulom, H.Olimjon, S.Jo'ra, Z.Diyor, Q.Muhammadiy, Sh.Sa'dulla, I.Muslim, A.Rahmat, Q. Hikmat, P.Mo'min, T.Adashboyev, M.A'zam, A.Obidjon va boshqalarning quvnoq she'r va qo'shiqlari, dostonlari va she'riy ertaklari; H. Nazir, X.To'xtaboyev, N.Fozilov, M.Osim, T.Malik, H.Shayxov, S.Barnoyev, F.Musajon, O.Husanov va boshqalarning hikoya, qissa hamda romanlari tashkil etib keldi. Istiqolga erishgach, bu yoshdagi kitobxonlarga, ayniqsa, vatanparvarlik va Vatan tarixi haqidagi badiiy asarlar behad zarurligi, xorijdagi tengqurlari hayoti haqidagi asarlar ham alohida qiziqish uyg'otishi yaqqolroq anglandi. Bu jihatdan ham o'zbek bolalar adabiyoti namunalari hisoblangan "Qonli barmoqlar", "Zafar va Zahro" (Oybek), "Dunyo bolalari" (A.Muxtor), "Afg'on hikoyalari" (S.Barnoyev) qatorida mashhur italyan bolalar adibi Janni Rodarining "Chipollinoning boshidan kechirganlari", "Jelsomino yolg'onchilar mamlakatida", "Muzqaymoqdan qurilgan shahar", shved bolalar adibasi Astrid Lindgrenning "Mittivoy va tomda yashovchi Karlson haqida ikki qissa", polyak adibi Yanush Korchakning "Qirol Matiush birinchi", shuningdek, qardosh xalqlar bolalar adabiyotlarining eng sara namunalari alohida qimmat kasb etadi. Bu xildagi asarlar bolalarning olam



va odam haqidagi bilimlarini rivojlantiradi, lug'at boyligini oshiradi, dunyoqarashining shakllanishiga, insoniy fazilat tarkib topishiga, shaxs xarakterining toblanishiga ta'sir ko'rsatadi, nihoyat, badiiy adabiyot ular uchun chinakam "hayot darsligi" ga aylana boradi.

O'smirlar kitobxonligi esa o'quvchilarning shu yoshdagi ruhiyatiga monand ancha murakkab. O'smirlik insonning bolalikdan kattalar olamiga o'tayotgan va aytish mumkiinki, nisbatan keskinroq, murakkabroq kechishi bilan farqlanib turuvchi davridir. Bu bolaning 5-6-sinfda o'qish paytlariga to'g'ri kelib, 13 yoshdan 16-17 yoshgacha bo'lgan davr oralig'ida kechadi. Ayrim bolalarda bu 1-2 yil ertaroq yoki kechroq kuzatilishi ham mumkin. O'smirlikda rivojlanishning fiziologik, biologik, aqliy, ijtimoiy-tarbiyaviy jihatdan to'lisha borishi ko'zga tashlanadi. O'smirlar o'z ideallari (mutlaq ijobiy)ni orzu qilib, uni o'zlarida ro'yobga chiqarishni xohlaydilar. Bu yoshda biror kasb yoki hunarni egallashga qiziqish va intilish paydo bo'ladi. Muhimi, o'smir o'zini tarbiyalashda kitob, kinofilm qahramonlaridan andaza oladi. Shunday ekan, o'smirlarga mo'ljallangan badiiy adabiyotning vazifasi ham o'ta mas'uliyatli va serqirradir. Unutmaslik kerakki, o'smirlik inson hayotining ajoyib pallasi, shaxs sifatida shakllanishining asosi. O'smirning aqliy kamolotga yetishuvi muhim o'ringa ega. Ularning o'z fikrini aniq ifodalashga yo'naltirish, mustaqil mulohaza yuritish ko'nikmasiga ega bo'lish, qolaversa, bu jarayonni anglab yetishlarida badiiy ijodning ta'siri diqqatga sazovor. Xususan, Oybek, A.Qahhor, M.Osim, N.Safarov, O.Muxtor, T.Malik kabi yetuk adiblarning biografik va avtobiografik qissalari, esse hamda hayotiy hikoyalari bu jarayonda dasturulamal bo'la oladi. O'smirlardagi ulkan ma'naviy ehtiyoj va shaxs sifatida kamol topish zaruratini o'z vaqtida payqagan M.Gorkiy XX asrning 30-yillarida "Mashhur kishilar hayoti" ruknida badiiy-biografik asarlar ijod etish tashabbusi bilan chiqqan edi. Shu munosabat bilan mashhur yozuvchi, olim, bastakor, harbiy sarkarda, mohir



hunarmandlar-u jahon urushi va mehnat qahramonlarining hayoti, ijod yo'li badiiy-tadqiqiy namunasi bo'lgan yuzlab asarlar yaratildi. Yakunlangan asrning yetmishinchi yillariga kelib, bu ruknda asarlar ijod etish an'anasi o'zbek ijodkorlari faoliyatida ham ko'rina boshladi. Endilikda Aziz Qayumovning "Alisher Navoiy", "Abu Rayhon Beruniy", "Abu Ali ibn Sino"; Laziz Qayumovning "Hamza"; Naim Karimovning "Hamid Olimjon", "Oybek", "Cho'lpon", "Usmon Nosir"; Adham Akbarovning "G'afur G'ulom"; Ozod Sharafiddinovning "Abdulla Qahhor"; Bo'riboy Ahmedovning "Mirzo Ulug'bek", "Amir Temur"; O'tayorning "Mirtemir", "Islom shoir"; Habib Karimovning "O'ral Tansiqboyev" singari asarlari shu yo'nalishdagi izlanishlarning samaralari bo'lib, o'zbek voqeligini ilmiy-ma'rifiy asosda badiiy tadqiq etganligi bilan e'tibor qozonib borayotir. Bunday asarlar o'smirlarni insonparvarlik, tarixiy qadriyatlarga muhabbat ruhida tarbiyalaydi, ularning kasb tanlashlariga ko'maklashadi, ajdodlar jasoratidan iftixor qilish tuyg'ularini o'stirib, chinakam vatanparvar inson sifatida kamol topishlariga ta'sir ko'rsatadi.

Binobarin, o'smirlik ham jismoniy, ham ma'naviy-axloqiy balog'atga yetishuv bo'sag'asi ekan, qahramonlar xatti-harakati orqali shu yoshdagi o'quvchilarga ibratli saboq berish - ularga mo'ljallangan kitoblarning asosiy vazifasidir.

Albatta, yangi ming va yuz yillikda o'smirlar kitobxonligi arsenali bundan-da ortib borishi, jahonga mashhur mumtoz va o'zbek adiblarining tarixiy, detektiv, biografik roman va qissalarini, esse hamda she'riy asarlarni, ilmiy-ommabop kitoblarni mutolaa qilishlarini taqozo etayotir. Shuningdek, ular endi bolalar adabiyoti bilan cheklanib qolmay, umumadabiyot xazinasidan keng bahramand bo'layotirlar. Bugungi o'smir P.Qodirovning "Yulduzli tunlar", "Avlodlar dovoni", M.Osimning "Karvon yo'llarida", "Zulmat ichra nur", Ibn Sino qissasi", O.Yoqubovning "Ulug'bek xazinasini" singari tarixiy, biografik roman va qissalarni o'qimay turib, Abu Rayhon Beruniy, Ibn Sino, Amir Temur, Ulug'bek, A.Navoiy, Bobur kabi ulug' ajdodlar



hayot yo'lini to'liq tasavvur qila olmaydilar. T.Malikning "Alvido bolalik", "Shaytanat" qissasi ham ularga jamiyatda shaxsning shakllanishidagi muhim omillaridan saboq berishi uchun g'oyat zarur. Shuningdek, X.To'xtaboyevning "Mungli ko'zlar", "Jannati odamlar"; O'.Hoshimovning "Ikki eshik orasi", "Urushning so'nggi qurboni", "Dunyoning ishlari" kabi asarlari, M.Yusuf, A.Oripov, E.Vohidov she'rlari ham o'smirlar qo'lidan tushmay kelayotir. Bu shundan dalolat beradiki, o'smirlar kitobxonligida asosan ikki yo'nalish ko'proq kuzatiladi:

Birinchidan, o'tgan asr o'rtalaridan bolalar va o'smirlar uchun maxsus ijod qilgan H.Nazir ("Yonar daryo", "Lochin qanotlar" kabi), N.Fozilov ("Shum bolaning nabiralari", "Saraton" k.), X.To'xtaboyev (deyarli barcha asarlari), F.Musajonov, L.Mahmudov, T.Malik, H.Shayxov, M.A'zam A.Obidjon, T.Adashboyev singari adiblarning badiiy teran asarlari o'z o'quvchisini yo'qotmay kelayotir.

Ikkinchidan, o'smirlarning bugungi intilishlari, qiziqishlariga mutanosib asarlar maxsus yaratilmayotganidan, ular umumadabiyot namunalarini katta qiziqish bilan o'qimoqdalar. Bunda yuqorida zikr etilgan asarlar, shuningdek, jahon adabiyotining namunalari sujeti, mavzusi dolzarbligiga ko'ra o'smirlar e'tiboriga ko'proq sazovor bo'layotir.

Bilim, ko'nikma va malakani rivojlantirishga yo'naltiruvchi savollar :

1. Bolalar adabiyoti istilohi nimani anglatadi?
2. Bolalar adabiyotining ikki yo'nalishdaligi nimada ko'rinadi?
3. Bolalar adabiyotidagi tasvirning o'ziga xosligini qanday izohlaysiz?
4. Bolalarbop asarlardagi xarakter va hodisalar ifodasida dinamikaning yorqinligini misollar asosida tushuntiring?



5. Maktabgacha tarbiya yoshidagi bolalar kitobxonligi haqida nimalarni bilasiz?
6. Kichik maktab yoshidagi bolalarga mo'ljallangan badiiy asarlar qanday spetsifik xarakterga ega?
7. O'smirlar kitobxonligida qaysi yo'nalishdagi asarlar yetakchi ahamiyat kasb etadi?

MAVZUGA DOIR TEST SAVOLLARI

1. O'zbek bolalar adabiyotining fan sifatida takomillashuvi va unga doir darsliklarning chop qilinishi to'g'ri qayd etilgan javobni aniqlang?

- a) XX asrning o'rtalari, 1953, 1967,1973, 1976,1978, 1981,1989;
- b) XX asr boshlari,1905,1910,1937,1953,1981,1989;
- c) XIX asr oxiri,1889,1898,1900,1913,1917.
- d) XXI asr boshlari, 1995, 1997, 2002, 2005

2. O'zbek bolalar adabiyotining paydo bo'lish omillari qaysi javobda bosqichma- bosqich to'g'ri ifodalangan?

- a) folklor, jahon adabiyoti, rus adabiyoti, mumtoz adabiyot, jadid adabiyoti, mustaqillik davri adabiyoti;
- b) ijtimoiy voqelik, xalq og'zaki badiiy ijodi, o'zbek mumtoz adabiyoti, yangi realistik o'zbek adabiyoti, jahon va rus xalqlari bolalar adabiyotini o'rganish va o'zlashtirish, ilk maktab darsliklari;
- c) yozma yodgorliklar, xalq og'zaki ijodi, sho'ro davri mafkurasi, mustaqillik davri adabiyoti;
- d) istiqlol davri adabiyoti



3. Bolalar kitobxonligi haqidagi tushuncha qaysi javobda batafsilroq qayd etilgan?

a) umuman, kitob o'qish hodisasi, kattalar didi, hayotiy tajribasi dunyoqarashiga mos holda yaratilib, bolalarning ham o'qish doirasida amal qilgan hammabop badiiy - ilmiy hamda professional bolalar adabiyoti;

b) bolalarning o'zlari tomonidan yaratilgan ijod namunalari;

c) kattalar uchungina daxldor badiiy adabiyot;

d) faqat bolalarga ixtisoslashgan, ulargagina mo'ljallangan adabiyot namunalari.

4. Bolalar kitobxonligi va adabiyoti orasidagi tafovut qaysi javobda to'g'ri ko'rsatilgan?

a) bolalar kitobxonligi og'zaki, adabiyoti esa yozma shaklda bo'lishi;

b) bolalar kitobxonligi kattalarga, adabiyoti bolalargagina mo'ljallanganligi;

c) bolalar kitobxonligida didaktikaning ustuvorligi, adabiyotida esa uning ko'zga tashlanmasligi;

d) bolalar kitobxonligi ijtimoiy-estetik hodisa sanalib unda mantiqiy tafakkurning ustuvorligi, bolalar adabiyotida esa obrazli badiiy tafakkur amal qilib, adabiy-estetik hodisa hisoblanishi.

5. Badiiy adabiyotda obraz yaratuvchi yagona vosita qaysi javobda to'g'ri ko'rsatilgan?

a) yozuv;

b) so'z;

c) til;

d) tovushlar.



6. "Bolalar adabiyoti bu.." ushbu mulohaza qaysi javobda to'g'ri davom ettirilgan ?

- a) bolalarning o'zlari o'qishlari mumkin bo'lgan adabiyot;
- b) ota-onalar o'qishiga mo'ljallangan adabiyot;
- c) sodda mazmunga ega rasmlar majmui;
- d) bolalarning yosh xususiyatlariga ko'ra ularga ixtisoslashgan professional badiiy adabiyot namunalari;

7. Bolalar adabiyoti fanining obyekti qaysi javobda to'g'ri ko'rsatilgan?

- a) bolalar uchun yozilgan yuksak badiiy ijod namunalari va adiblar ijodi;
- b) maktab darsliklari;
- c) bolalar matbuoti;
- d) kichkintoylar psixologiyasi.

1-jadval





Tavsiya etilgan adabiyotlar:

1. Barakayev R. Abdulla Avloniy va bolalar adabiyoti. - T.: Fan, 2004.
2. BenuHCKUH BT., HepHumeBCKun HT., .TwojIOOOB H.A. O gemcKOH numepamype- M.: ^em.num.1983.
3. Bolalar adabiyoti va zamonaviylik. -T.:Fan, 1981.
4. Ibrohimova Z. Kichkintoylar adabiyotining xususiyatlari.-T.:O'qituvchi,1994.
5. Suyumov A., Jumaboyev M..Bolalar adabiyoti. - T.: O'qituvchi. 1995.
6. Jumaboyev M. Bolalar adabiyoti va folklori-T, 2006.
7. Irisxo'jayeva S. Bolalar adabiyotida didaktika-T.: Fan, 1978.-48b.
8. Mamajonov S. Hozirgi o'zbek bolalar adabiyotining ba'zi tendensiyalari-Bolalar olami. -T,1975.
9. Safarov O. O'zbek bolalar adabiyotining spetsifik xususiyatlari.-Kitobda: O'zbek bolalar adabiyoti va adabiy jarayon.-T.:Fan, 1989, 4-18-betlar; Yana: Oliy o'quv yurtida "Bolalar adabiyoti" fani muammolari. // Til va adabiyot ta'limi j.,1994, 2-3-son, 4-6-betlar. Yana: O'zbek bolalar adabiyoti tarixi mundarijasini belgilashga doir.// O'TA, 1998, 6-son,63-66-b., yana: Bolaning tili chiqdi. // Maktabgacha tarbiya. 1992, 1-son, 40-41-b.; yana: Bolalar kitobatiga bir nazar. // Sog'lom avlod uchun. -1997, 11- son,22-24-b.
10. Shermuhamedov P., Tursunov J., Safarov O., Egamov X. O'zbek bolalar adabiyoti. Darslik- xrestomatiya.- T.:O'qituvchi, 1976.



II BOB. BOLALAR FOLKLORI

Reja:

1. *Bolalar folklori tabiati.*
2. *Bolalar folklorining janriy tasnifi.*
3. *Allaning janriy xususiyatlari.*
4. *Bolalar qo'shiqlarining janriy tarkibi va mavzuviy mundarijasi.*
5. *Maqollar va ularning etnopedagogik ahamiyati.*
6. *Ertaklar va ularning janriy tasnifi.*

MAVZUGA DOIR TAYANCH TUSHUNCHALAR: aytim-olqish, erkalama, alla, taqvim, maishiy, etnopedagogik, poetika, tizim, ovutmachiq, qiziqmachiq, qaytarmachiq, etnografik, deklomatsiya, monoton, repertuar, kumulyativ, animistik, totemistik, yalinchoq, hukmlagich, cheklashmachiq, verbal, qiqillama, tegishmachiq, uzv, dialog, monolog, guldur-gup, chandish, arsenal, alliteratsiya, ritm, tabu, maqol, masal, mashoyix, oqin, hukm, paremik, paremiografiya, paremiologiya, sintaktik, saj', fetishistik, gallyutsinatsiya, inonch, versiya, mif, afsona, rivoyat, uydirma, tugun, sajiya, motiv, sayyor, allegoriya, antropomorfizm, folklorizm, stilizatsiya, tabdil.

Bolalar folklori tabiati. Xalq og'zaki badiiy ijodiyoti xilma-xil adabiy tur va janrlarda namoyon bo'lgan hodisa sifatida kishilik jamiyati tarixida ko'p vazifali ijtimoiy-estetik mohiyatga ega so'z san'ati hisoblanadi. U hamma zamonlarda ham o'z ijodkori bo'lgan xalqning orzu-armonlarini ifodalab keldi,



qolaversa, xalqning o'z-o'zinigina emas, balki bolalarning ham ma'naviy-axloqiy jihatdan shakllanishlarida muhim tarbiyaviy vosita vazifasini bajarmoqda. Bolalar xalq ijodiyotidan otabobolarining hayot tajribasini, mehnat va kurash ilmini o'rganib kelayotirlar. Ular xalq qo'shiqlaridan, doston-u ertaklaridan, afsona-yu rivoyatlaridan sevish-sevilish, samimiyat, insoniylik, sabr-u qanoat, mehnatda fidoiylilik, eng muhimi, otalari yashab obod etgan Vatan tuyg'ularini idrok etish asnosida yurt erki va ozodligi uchun kurashgan buyuk ajdodlari To'maris, Shiroq, Spitamen, Muqanna, Temur Malik, Jaloliddin Manguberdi, Mahmud Torobiy va Amir Temurlarning jasoratlaridan saboq olmoqdalar, yashash va yaratish romantikasidan surur tuymoqdalar. Binobarin, xalq ijodiyoti qadim zamonlardan hozirgacha bolalar uchun ham ezgulikni qadrlash va yovuzlikdan nafratlanish sabog'i bo'lib, avloddan avlodga o'tgani sayin muttasil to'lishib, mukammalashib, og'izdan-og'izga ko'chgani sayin tobora sayqallanib, xalq milliy ruhini teranroq aks ettirgan holda asrlar davomida avlodlar ma'naviy-axloqiy vorisligini ta'minlab keldi, jamoa ijodi namunasi sifatida xalq zakovatini, iste'dodini va til boyligini namoyish etdi, xalq uchun o'zligini anglash, o'z tarixini sevish vositasiga aylanib qoldi, eng muhimi, yozma adabiyotning bunyodga kelishida genetik asos vazifasini bajardi. Bu silsilada bolalarning o'z folklori ham muayyan rol o'ynadi.

Binobarin, **bolalar folklori - kichkintoylar olami bilan kattalar dunyosining o'zaro uyg'unlashuvi oqibatida yuzaga kelgan o'yinlar, qo'shiqlar va musiqiy poetik janrlarning yaxlit bir tizimiga aylangan xalq og'zaki ijodiyotining o'ziga xos tarmog'idir.**

Shunga qaramay, o'zbek bolalar folklori namunalarini to'plash, nashr etish va ilmiy-estetik qimmatini o'rganishga uzoq zamonlar e'tibor berilmay kelindi. XX asrning dastlabki choragi oxirlarida bu ishga kirishilgan bo'lsa-da, u uzluksiz jarayonga aylanmadi. Elbek to'plab, tartib berib 1937-yilda



chop ettirgan “Bolalar qo’shig’i” to’plamidan O.Safarov tartib bergan “O’zbek xalq ijodi” seriyasida 1984- yilda bosilib chiqqan “Boychechak” to’plamigacha kechgan salkam yarim asrlik uzilish ana shu fikr dalili bo’la oladi. O’zbek bolalar folklorini o’rganish 60- yillardan e’tiboran izchillasha bordi. Z.Husainovanning “O’zbek topishmoqlari” (1966), G’Jahongirovning “O’zbek bolalar folklori” (1975), shuningdek, O.Safarovning “Bolalarni erkalovchi o’zbek xalq qo’shiqlari” (1983), “O’zbek bolalar poetik folklori” (1985), “Alla-yo alla” (1999), “Chittigul” (2004), “O’zbek xalq bolalar o’yinlari”(2012) Sh.Galiyevning “O’zbek bolalar o’yin folklori” (1998) singari tadqiqotlar tufayli bu izlanishlarning samaralari ko’zga tashlanadigan bo’ldi. Shuni ham aytish kerakki, folklorshunoslar orasida mavsum va marosim qo’shiqlariga munosabatda ularning ijodkori har qachon kattalar bo’lganini e’tirof etish bilan bolalarning bu sohadagi qo’shiqchiligini yo cheklash, yo tamoman inkor etish hollari ham mavjud. To’g’ri, marosimlarni kattalar uyushtirganlar. Ularning o’tkazilish tartiblarini ham, rasm-rusumlari va qo’shiqlarini ham kattalar ijod etganlari rost. Lekin unutmazlik lozimki, shu marosimlarning birortasi ham bolalar ishtirokisiz o’tmagan; hech bo’lmaganda, bolalar tomoshabin sifatida unga qatnashganlar va kattalar bajargan ishlarni ko’rgach, o’sha marosimni keyinroq o’yinda muqallid qilib o’zlari bajarganlar, shu muqallidlariga yarasha qo’shiqlarni to’qiganlari ham ayni haqiqat. Binobarin, bolalarning ham o’z marosim va mavsum qo’shiqlari yuzaga kela boshlagan. Bu jarayon davr o’tishi, turmush sharoitining o’zgarishi, yangicha ijtimoiy munosabatlarning tug’ila borishitufayli u yoki bu marosimning tamoman yo’qolishi, yo shunchaki kattalar o’rtasida nufuzini yo’qotishi natijasida o’sha marosim bolalar o’yini yoki ijrochiligida yashash shakliga o’tishi bilan yanada chuqurlasha borgan. Bunday holatni “Boychechak”, “Chittigul”, “Binafsha”, “Oppoqijon” kabi mavsum qo’shiqlari misolida yaqqolroq ko’rish mumkin. O’zbek bolalar folklori namunalari tabiatidan kelib chiqib, genetik asoslariga ko’ra uni uch qismdan tarkib topgan hodisa sifatida kuzatish mumkin:



*I. Kattalar hamisha o 'z farzandlarini o 'ylab yashaganlar - mehnat va ijod bilan shug'ullangan. Bu jarayon ularda bola va uning taqdiri to'g'risida qayg'urish majburiyatining tobora chuqurlashuvi tarzida kechib, talay qo'shiqlarning to'qilishiga sabab bo'lgan. Ayniqsa, chaqaloqni parvarish etish mas'uliyati behad katta bo'lgan. Onalar ana shu murakkab mas'uliyatni zimmalariga olganlar: o'tkir zakovat, tadbirkorlik, beqiyos insoniy mehribonlik evaziga o'zlari goho tushunib, goho tushunmay, "bolalarni tarbiyalab o'stirish bilan mamlakatning kelajak tarixini, demakki, dunyo tarixini ham tarbiyalab yetishtirganlar. Bu yo'lda qo'shiq ularga madadkor bo'lgan: bolalarini qo'shiq bilan uxlatganlar, yig'lasa, kuylab ovutganlar, erkalatganlar, hatto qo'shiq bilan chaqaloqqa daxldor marosim rasm-rusumlarni bajarganlar. Shu zaylda allalar, aytim-olqishlar, ovutmachochlar, erkalamalar, qiziqmachochlar va qaytarmachochlar yuzaga kelgan. Ularda erkalash leytmotiv bo'lgan. Shu sababli xalq og'zaki poeziyasining ana shu namunalari **erkalash poeziyasi** tarzida umumlashtirish va xarakterlash asoslidir.*

Erkalash poeziyasi namunalari ijro maqsadi, o'rni va bola yoshiga munosabatiga ko'ra ikki guruhga ajraladi. Birinchi guruhga mansub qo'shiqlar bolaning beshikdaligi davri bilan chambarchas bog'liq, shu vajdan ularni **beshik qo'shiqlari** deyishadi. Allalar va etnografik mazmundagi aytim-olqishlar ana shunday xarakterga ega.

Beshik qo'shiqlari chaqaloq uch yoshni to'ldirgunigacha aytilsa, ikkinchi guruhga mansub qo'shiqlar bola tug'ilganidan to 6-7 yoshga to'lgunigachaijro etilsa-da, aslida ular beshik bilan bog'lanmagan onalik mehri tarovatidan bitilgan badihalardir. Bular **suyish qo'shiqlari** bo'lib, erkalamalar, ovutmachochlar, qiziqmachochlar va qaytarmachochlardan tarkib topgan.

II. Kattalar bolalarning tabiatga munosabatini shakllantirishda ham faol ishtirok etadilar. Buning natijasida bolalar taqvimi va uni ifoda etuvchi marosim qo'shiqlari yuzaga



kelgan. Bahor, yoz, kuz, qish mavsumlari bilan bog'liq bunday qo'shiqlarning bir qismi ijtimoiy-siyosiy taraqqiyot taqozosiga ko'ra kattalar repertuaridagi mavqeini yo'qota borib, yo tamoman so'nib ketgan, yo transformatsiyaga uchrab bolalar repertuariga ko'chib o'tib saqlanib qolgan. "Boychechak", "Chittigul", "Yo ramazon" qo'shiqlari va hayitliklar shular jumlasidan hisoblanadi. Qolaversa, ibtidoiy ajdodlarimizning animistik va totemistik e'tiqodlari asosida shakllanib, endilikda o'sha mohiyatini yo'qotgan **yalinchoq va hukmlagich** janrlari bolalar repertuarida hamon faol yashamoqda.

III. Bolalarning o'z ijodkorligi va ijrochiligi hosilalari bo'lgan qo'shiqlar va o'yinlar - o'zbek bolalar folklorining asosini tashkil etadi.

Bolalar folklorining janriy tasnifi. So'z va harakatning nisbatiga ko'ra ularni ikki katta guruhga bo'lish mumkin:

1. Bolalarning maishiy qo'shiqlari.

2. Bolalarning o'yin folklori.

AYTIM-OLQISHLAR erkalovchi motivdagi rasm-rusum qo'shiqlari bo'lib, asosan, bolalarning beshik davriga oid turli-tuman marosimlarda ijro etiladi: chaqaloq besh va to'qqiz kunga to'lganda, ilk bor cho'miltirilganda, beshikka ilk bor va har gal bog'langanda, yana qayta ochib olinganda, ilk bor tish yoriganida, birinchi marta mustaqil o'tirganida, ilk bor oyog'ida tikka turganida, birinchi marta odimlaganida, "toy-toy"laganida, har gal yangi kiyim kiygizganda, ilk bor ovqat yeganida, qizaloq sochini ilk bor yuvganda-taraganda, o'g'il bola sochi ilk bor olinganda, chaqaloq tirnog'i ilk bor qirg'ilganda, bolalar sha'niga har gal isiriq tutatilganda, xullas, urfiyatga aylangan va e'tiqod bilan amal qilinadigan shu xildagi rasm-rusumlarning har biri mazmuniga yarasha aytim-olqishlar mavjud. Aytaylik, chaqaloq 7-9 oyligida ilk bor qadam tashlab mustaqil yurishga intila boshlaydi. Shunda uning qadami qutlug' va ravon bo'lishi uchun oyog'i chigilini echish rusumini bajarish an'anaga



aylangan. Dastavval, bolakayning oyoqlariga ipak chilvir solib tushovlaganlar, so'ngra u yuraboshlaganda boshidabir juft kulcha ushatila turib, orqa tarafidan bola oyog'idagi chilvirni qaychilab kesa turib:

Adoq-adoq yurisin, Tikan shunga kirmasin. Ko'zi qattiq bandalar, Ko'zi shunga tegmasin,- deya alqaganlar. Ehtiyot chorasi sifatida darhol is chiqarilib, isiriq tutatilgan. Kulchalar marosim ishtirokchilariga taqsimlab berilgan. Odatda bu marosim haftaning xosiyatli kunlari sanalgan chorshanba, yo juma kunlarida nishonlangan.

Bunday marosimlarning ma'lum qismi ijtimoiy taraqqiyot tufayli endilikda so'nishga yuz tutgan bo'lsa-da, ma'lum qismi xalq an'alarining poetik uzvi sifatida hamon yashamoqda. Aytaylik, bolalarning yangi kiyim kiyishiga oid aytim- olqishlar yangi ijtimoiy munosabatlar ta'sirida transformatsiyaga uchrab, tug'ilgan kunni nishonlash jarayonida bolaga yangi kiyim kiydirish qutloviga aylangan:

San bir yillik,

Man ming yillik.

Kiya-kiya to'zdiraylik, Dugonalarimdan o'zdiraylik.

Bu xildagi aytim-olqishlarning ijrosidagi o'ziga xoslik shundaki, ularni avval bolaga kiyim kiydiruvchining o'zi aytadi, so'ngra kiyim kiyayotgan boladan uni takrorlash talab qilinadi. Bola shu talabni ado etadi, xolos.

Aytim-olqishlar xalqimizda bolaparvarlik tuyg'usining e'tiqod darajasiga ko'tarilganligini ko'rsatuvchi marosimiy qo'shiqlardir.

ERKALAMA VA OVUTMACHOQlar ham suyish qo'shiqlarining bir-biridan farq qiluvchi mustaqil janrlari sanaladi. Ovutmachochlar kichkintoylar g'ashlanganda, chinqirib yig'laganda, ehtiyojga aylanish oqibatida yuzaga kelsa, erkalamalar uchun esa, kayfiyatning ko'tarinkiligi muhimdir. Erkalamalar mehr xuruji jarayonida yuzaga keluvchi badihalardir. Ovut-



machoqlar vaziyat taqozosi tufayli ehtiyojga aylansa, erkalamalar kayfiyat taqozosi tufayli yuzaga chiqadi.

ERKALAMALAR xalqning o'z farzandlariga beqiyos mehr tovlanishlarini aks ettiradi:

O, shugina, shuginagina, Munchagina tunchagina. Shunchagina-kunchagina. Yashnab turgan g'unchagina.

Mehr xuruji ona qalbini tug'yonga keltirganidan u shu so'zlar tizimi ritmida arzandasini ardoqlash, erkalash ohangini chuqur tuygan. Erkalamalarda "-gina", "- ginagina" qo'shimchalari faol, ularda kichraytirishdan ko'ra erkalash ma'nosi bo'rtibroq tovlanadi.

Erkalamalarning "Ha, lo'tti-lo'tti", "Ha, do'rsa-do'rsa", "Ha, kishta-kishta- kishta", "Kishtala-kishtal" singari taqlidiy va so'qma so'zlar tizimidan iborat an'anaviy qolipga aylangan satrlar bilan boshlanuvchi qator turkumlari borki, faqat 2-3 yashar bolalarga mo'ljallangan. Buning sababi - shu yoshdagi bolalar vaznining yengilligi, ularni havolata-havolata ko'tarib tushirish o'ngg'ayligidir. Erkalama ham xuddi shu harakat ravishiga mutanosib ohangda shovqin solingan holda aytiladi:

Ha, do'rsa-do'rsa-do'rsa.

Bozorga otasi borsa,

Go'shtu birinch ketirsa, Onasi pazanda bo'lsa. Bolasi xo'randa bo'lsa.

Erkalamalarda kichkintoylar kelajagiga daxldor orzularni kuylash-yetakchi motivdir. Ular, asosan, yetti yoshgacha bo'lgan bolalarga aytilsa-da, aslida bolalarni faol erkalash jarayoni 11-13-yoshga to'lganlaridagina va hatto undan keyin ham davom etishi mumkin. Biroq bu davrda erkalash poetik shaklda kechmay, maqtash, xatti-harakatni ma'qullash va minnatdorchilik izhoridan iborat obrazli iboralar ("Yasha!", "Balli!", "Ofarin!", "Rahmat", "Barakalla!", "Baraka top!" va hokazo) va olqishlar vositasida amalga oshadi. Erkalamalar bolalarda samimiylik tuyg'usini tarbiyalaydi.



OVUTMACHOQLAR esa bolani tinchlantirish ehtiyojini qondiruvchi badihalardir:

Vo'y-vo'y, shuginani kim urdi?

Vo'y-vo'y, shuginaga kim lab burdi?

Yig'lama, oppoqqinam,

Boshimdagi qalpoqqinam!

Ko'rinayotirki, chaqaloqning yig'isi onada uni tinchlantirish assotsiatsiyasini uyg'otgan. Ona shu zaruriyatga ko'ra so'zga murojaat qilayotir. U so'zbozlik qilayotgani yo'q, balki so'zni tashkil etgan tovushlar garmoniyasida tinchlantiruvchi ohangga urg'u berib, orom beruvchi, ovutuvchi ma'noni anglatishga, his etishga va tuydirishga erishayotir. Bunda bolani bag'riga bosib, beshik yo belanchakda tebrata turib, unga termulgan holda lablarni cho'chchaytirib yoxud bolaning yupqagina lablarini qitiqlab, ovutuvchi ma'noning omuxtalashtirilishiga alohida ahamiyat berilishini ham unutmashlik darkor. Shundagina so'zlarda ham, tovushlarda ham ohang, ma'no va harakatning o'zaro muvofiqligi ovutmachoning ritmik mehvariga aylana oladi. Buni his-hayajonni ifodalovchi so'zlarning juftlashgan takrori bo'rttirib ifodalagan:

Ho'-ba, ho'-ba, nega yig'laysan?

Ho'-ba, ho'-ba, nega big'laysan?

Ho'-ba, ho'-ba, big'-big'lama Ho'-ba, ho'-ba, san yig'lama.

Ho'-ba, ho'-ba .. jo..o..on, jo..o..on, Sadqa senga shirin jo..o..on.

"Ho'-ba, ho'-ba" taqlidiy so'zidan tarkib topgan **anafora** mayin va cho'zinchoq ohangda aytiladi. Tovushlar alliteratsiyasi asosida ohangdoshlik kasb etgan qofiyalar anaforadagi mayin va cho'zinchoq ohangni to'ldirib, izchil tarovatlanishini ta'minlagan. Natijada boladagi inijqlikni elita oladigan jozibali ovutuvchi ohang yuzaga kelgan.



QAYTARMACHOQLAR. Bolalar uchun, asosan, beshik davri tugagandan keyingi ma'naviy ehtiyoj taqozosiga ko'ra yuzaga kelgan badihalar bo'lib, she'riy namunasi ko'pincha monolog, nasriy shakli dialog (savol-javob) negizida quriladi.

Uning poetik nutqida bir voqeadan ikkinchisi o'sib chiqadi, shu zaylda har ikkala tipdagi qaytarmachohlarda ham bu xususiyat mushtarak fazilatga aylangan. Har ikkala holda ham qaytarmachohq sujetini tashkil etgan har bir voqea alohida epizod tusini oladi, biroq bu epizodlar umumiy bir motiv (g'oya) atrofida izchil mantiqiylik asosida birlashgan bo'ladi. Bunda har bir epizod bir savol shaklida, izohi ham o'zida birin-ketin qaytarilaveriladi. Hodisani qaytarmachohq deyilishi va alohida janr sifatida e'tirof etilishiga ham xuddi shu xususiyatlari asos bo'lgan. Masalan, "Yumalandim yumoq topdim" satri bilan boshlanuvchi qaytarmachohqda lirik qahramon yumalab yumoq topadi (1), yumaloq ichidan taroq topadi (2), taroqni momoga beradi (3), momo unga churak (non) beradi (4), churakni cho'ponga beradi (5), cho'pon unga tayoq beradi (6), tayoqni daryoga tashlaydi (7), daryo unga ko'pik beradi (8), ko'pikni tutga surtadi (9), tut unga yaproq beradi (10), yaproqni molga beradi (11), mol unga sut beradi (12), sutni pishirib turganida qaydagi quyon uni to'kib ketadi (13). Shuncha mehnati zoye ketadi. Ko'rinayotirki, o'n uchta epizod bir-biridan o'sib chiqqan, o'zaro uzviy mantiqiy ketma-ketlik hosil qilgan. Alohida-alohida voqealar qaytarilib, bir ipga marjondek tizilgan holda yaxlitlik kasb etgan. Shu tariqa, xususiylik o'zaro uyusha turib umumiylikka aylana borgan. Bola uchun saboqlik xususiyati ham shunda: har bir voqea, yo hodisa o'zicha mustaqil, biroq bir-biri bilan bog'liq holda namoyon bo'ladi. Bolaga ana shu haqiqat uqtirilmoqda.

"Kun, san nimadan kuchlisan?" qaytarmachog'i dialog negizida qurilgan. Unda bolalarni qiziqtirgan "Dunyoda kim kuchli?" savoliga javob narsa va hodisalar bahsi asosida



voqeadan voqeaning o'sib chiqishi shaklida bola qiziqishi va idrokiga mos holda bayon qilingan:

- Kun, san nimadan kuchlisan?
- Man kuchli bo'lsam, bulut bosarmidi?
- Bulut, san nimadan kuchlisan?
- Man kuchli bo'lsam, yomg'ir yog'armidi?

Ko'rinayotirki, har bir savol o'zidan keyingi voqeaga mantiqiy maydon hosil qilgan, shu maydonaro voqealar tizila boradi: yomg'ir ^ yerni, yer ^ o'tni, o't ^ qo'zini, qo'zi ^ bo'rini, bo'ri ^ echkini, echki ^ sichqonni, sichqon ^ qumursqa (chumoli) ni o'zidan kuchli deb biladi va eng e'tiborlisi shundaki, ularning har biri o'zlaridagi ojizlikni ham oshkora tan ola borishadi. Voqealar shu xilda mantiqiy zanjirsimon tizim tusini ola boradi. *Antropomorfizm* usuli kun, bulut, yomg'ir, sichqon va qumursqa singari nabotot hamda hayvonot olamiga mansub jonzotlarni odamlar singari so'zlash xususiyatiga ega bo'lishlarini ta'minlagan, natijada qaytarmachoqdagi sujet dinamikasi ta'minlangan.

HUKMLAGICHLAR ham qadimgi ajdodlarimizning totemistik e'tiqodlariga daxldor marosim qo'shiqlarining ijtimoiy-siyosiy taraqqiyot ta'sirida transformatsiyaga uchrab, bolalar repertuariga o'tgan va bolalarcha mushohadakorlik zahirida qayta sayqallanib, yangi motivlar, yangi obrazlar hisobiga to'lishgan badihalar silsilasidir. Totemistik e'tiqod qoldiqlari bolalarning hasharotlarga munosabati ifodalangan hukmlagichlarda ravshanroq ko'rinadi.

Chunonchi, bolalar orasida beshiktervatni ko'rganda uning vositasida fol ochish an'anasi mavjud:

Beshiktervat, beshiktervat,
Salima xolam nima tug'adi?

Beshiktervat o'ng oyog'ini ko'tarsa - o'g'il, chap oyog'ini ko'tarsa - qiz tug'ilishiga yo'yilgan.



Ertapishar xalili uzum xol tashlaganda xonqizi, tillaqo'ng'iz hasharotlari ko'payadi. Bolalar orasida xalilipazak yoki hasanak nomlari bilan ham yuritiladigan xonqizi sirtida nuqtasimon xolchalar borligidan unga xol deb murojaat qilishadi:

Xol, xol, xol,

Otang o'ldi, Onang o'ldi, Borib xabar Olmaysanmi?

Rivoyatga ko'ra, xonqizi aslida podsho qizi bo'lgan-u, qashshoq bir cho'ponni sevgani uchun g'azablangan otasi uni "Iloyo, qumursqaga aylan!"- deya qarg'agan emish. Shu qarg'ish tutib, u hasharotga aylanganmish. Xonqizi deyilishi shundan qolganmish. Tillaqo'ng'iz, kaltakesak, ilonga ham shu xildagi murojaat tarzida to'qilgan hukmlagichlarda totemistik qarashlar saqlangan. Qarg'a, musicha, to'rg'ay, bedana, qaldirg'och, laylak va boshqa qushlarga oid hukmlagichlarning ma'lum qismida totemizm ta'siri bir qadar sezilsa-da, taqlidiy so'zlar faolligida to'qilgan aksar namunalarida bu ta'sir, asosan, so'ngan. Taqlidiy so'zlar hukmlagichlarda ma'lum poetik vazifani bajaradi:

- Qurvaqajon, vaq-vaqa, Ko'zing nega bundaqa?

- Bugun o'sma qo'ymadim, Shuning uchun shundaqa.

Taqlidiy so'zlar yordamida yaratilgan bunday hukmlagichlarning ko'pchiligi totemistik aqidalar ta'siridan xoli bo'lib, bevosita bolalar dunyoqarashini, ularning voqelikka hayratomiz munosabatlarini, idrok va zavqlaridagi o'zgachalikni aks ettiradi.

MASXARALAMalar esa satirik ruhdagi, aniqrog'i, bolalarning voqelikka sinfiy-ijtimoiy nuqtayi nazardan tanqidiy munosabatlarini ifodalashi va ijro etilishi jihatidan tegishmachoqlardan farq qiluvchi badihalardir. Tegishmachoqlar ham, masxaralamalar ham shovqin solib aytilishlariga ko'ra o'zaro o'xshasalar-da, birinchisi - bevosita obyektga qaratilgan bo'lib, ko'pchilik tomonidan ijro etilsa, ikkinchisi - ayni ijro jarayonida obyektga qaratilgan bo'ladi. Masxaralamalar yakka holda - soloda aytilaveradi, goho deklomatsiya qilinishi ham mumkin.



Masxaralamalarda bolalar sinfiy mavqelarini ayonroq ko'ra boshlashlari tufayli sinfiy dunyoqarashlarining kurtak ota borishidan tug'ilgan tanqidiy munosabatlarini ifodalash yetakchi tamoyildir. Dastlabki bosqich bo'lganidan bu jarayon birmuncha jo'n va soddaroq kechadi. Bolaning ijtimoiy hodisaga tanqidiy munosabatini ifodalaovchi sinfiy nazari oddiy tashqi belgilarni ajratib ta'kidlash shaklida zuhur topadi:

Yomg'ir yog'aloq, Echki sog'aloq. Boylar bolasi - Qorni dumaloq.

"Yomg'ir yog'ishi" - tabiatga xos hodisa, jamiyatga esa suv tekin sanaladi. *"Boylar bolasi"* mehnatkashlarni *"echkiday sog'ayotgan"* otalari hisobidan *"qorinlarini dumalatib"* yashayotgani sarkastik parallelizmga fosh qilingan.

Masxaralamalar hamma zamonlarda - o'tmishda ham, bugun ham yaratilmoqda. Qaysi zamonda yaratilganidan qat'iy nazar, davrning tarixiy ruhiga muvofiq yovuzlar qiyofasini konkret an'anaviy ifodalarda fosh etadi. Bunda bolalar tasavvurining konkretligi, yovuzlik yoki yovuzlarni badbashara qiyofada aniq ko'rishni taqozo etishi obrazlar tasviridagi an'anaviylikka mone'lik qilmagan. Shu sababli bunday masxaralamalar poetik tavsifnomaga o'xshaydi:

Otam ketgan urushga, Dushmanni ko'p qirishga. Boshi uzun, ko'zi ko'r Gitlerni o'ldirishga.

ALLA. "Alla" istilohining kelib chiqishi haqida turlicha fikrlar mavjud. Kimdir uni arabcha "olloh" so'zining fonetik o'zgarishga uchragan shakli desa, kimdir o'zbekcha "aldamoq" so'zidan kelib chiqqan, shunga ko'ra u bolani aldab-avrab uxlatish ma'nosiga ega deya izohlashga urinadi. Bu izohlarning soxtaligi va haqiqatni aks ettirmasligi o'z-o'zidan ayonlashib turibdi. L.Z.Budagov chig'atoychada "allala" boshning orqasi, ya'ni "ensa"ni anglatishini qayd etgan. Chindan ham chalqanchasiga yotganda boshning orqasi yostiqa bosilib, shu holda uxlanadi. Chaqaloq beshikka, belanchakka faqat bosh orqasi - allalasi



bilan chalganchasiga cho'zilib uxlaydi. Bolaga uyqu chaqirishda qo'llanishi shu vazifasidan kelib chiqqan. Bunda **"allala"** shakli **"alla, alla-yo, alla-yo alla"** tarzidagi ko'rinishlar bilan to'lishib, uyquga chorlovchilik mohiyatini kasb etgan. Chaqaloq yoshini to'ldira borishi jarayonida bu so'zdagi tovushlarni idrok etishi tufayli uyqusi kelganda o'zining ham **"alla"** so'zi lug'aviy jihatdan "bosh orqasi" va "uxlamoq" ma'nolarini anglatga, istilohiy ma'nosiga ko'ra uyqu chaqirmoq, uxlatmoq asosiy vazifasiga aylangan silsilaviy qo'shiq turini anglatadi. Abu Ali ibn Sino allaning shu xususiyatini ming yil ilgariyoq payqab, shunday e'tirof etgan: "... bolaning mijozini kuchaytirmoq uchun unga ikki narsani qo'llamoq kerak: Biri, bolani sekin-asta tebratish, ikkinchisi, uni uxlatish uchun aytish odat bo'lib qolgan musiqa va allalashdir. Shu ikkisini qabul qilish miqdoriga qarab bolaning tanasi bilan badantariyaga va ruhi bilan musiqaga bo'lgan iste'dodi hosil qilinadi". Bu mulohazadan to'rt narsa ayonlashadi: **birinchisi**, allaning bundan ming yil ilgari - Ibn Sino zamonida ham mavjudligi bo'lib, janrning genetik asosiga nazar solish imkonini beradi. **Ikkinchisi**, allaning ijrosi - sekin-asta tebratishga omixta holda kechishi, **uchinchisi** esa, bolani uxlatishgagina xizmat qilishi va nihoyat **to'rtinchisi**, bolaning ham jismoniy, ham ma'naviy chiniqishida muhim ahamiyat kasb etishi to'g'ri ilg'angan.

Alla, odatda, bolaning emizikli davrida - to 3 yoshini to'ldirgunigacha aytiladi. Bolalarning shu yoshi bilan bog'lanishi qat'iy bo'lib, beshik qo'shig'i sifatida tavsiflanishiga yo'l ochgan. Allani ona suti bilan bog'lab "sutda qorilgan va mehrga yo'g'rilgan qo'shiq" tarzida muqaddaslashtirish sababi shunda

Alla faqat kuylanadi. Uni shunchaki aytish, yo deklomatsiya qilish mumkin emas. Monoton ohang o'zbek allalari uchun mushtarak xususiyatdir. Odatda, alla kuyi bilangina bolaga orom bag'ishlaydi, uni elitadi. Bola uchun uning so'zi emas, balki kuyi muhim. Chunki u hali so'zni anglamaydi. Alladagi so'zlar ona uchun muhim: ular ona qalbining nidolari. Allaning



bir maromdagi tebranishga mos mayin ohangi bola ma'naviy ehtiyojining dastlabki qondirgichi sifatida xizmat eta boshlaydi. Zero, tadqiqot va kuzatishlarning tasdiqlashicha, chaqaloq tug'ilgach, uchinchi kundan e'tiboran kuy va ovozni idrok eta boshlaydi. Birinchi oydaligidayoq musiqiy idrokni - ritm va ohangni idrok eta olishini namoyon qila boshlaydi.

Binobarin, *so'z, ohang va harakat birligi, aniqrog'i, shu uzvlarning o'zaro mantiqiy aloqadorligi tufayli allalarning kompozitsion butunligi yuzaga keladi.*

Allalarda to'rtlik band tuzilishi yetakchi bo'lsa-da, uchlik, beshlik, oltilik, ettilik va sakkizlik tarzida bir butun tugallangan allalar ham, shuningdek, shu xildagi band asosida to'qilgan namunalar ham ancha. Jumladan, Qashqadaryo, Surxondaryo vohalaridagi allalarning aksariyati, asosan, to'rtlik, beshlik va sakkizlik shaklida bo'lsa, Buxoro, Samarqand, Xorazm, Toshkent va Farg'ona vodiysida hajman bir necha to'rtlik, yo beshlikdan iborat voqeaband, yo lirik allalar salmog'i baland. Bunday strofik xilma-xillik onalarning alla kuylayotgan vaziyatdagi kayfiyatining natijasi bo'lib, allada kuylanishi kutilgan g'oyaviy niyatning salmog'iga, ko'tarinkiligiga, yo'nalishiga bog'liq. O'zbek allalarida shunday bir ichki mantiq borki, u qaysidir bir ishorada harakat, ohang va mazmun birligini ta'minlab turadi.

Onalar o'zlari xush yoki noxushliklaridan qat'iy nazar farzandlariga hamisha mehribonlik bilan kuylaydilar: farzandlarini erkalata turib uyqu chaqirganlarida eng nafis ranglarni tanlashga, shu ranglarni g'oyat nazokat bilan ishlatishga e'tibor beradilar. Bolalari tabiatini toblantirishda doimo tiniqlik va quvnoqlikka aloqador tuyg'ularni teran ifodalashga xizmat qiluvchi poetik obrazlarga, sifatlash va o'xshatishlarga murojaat qiladilar, shu maqsadda **qo'zichoq, qo'chqor, olqor, toychoq, saman, toyloq, bo'taloq, kiyik(ohu), quralay, serka, bulbul, to'ti, lochin, tog', shahm, chiroq, qizil gul** obrazlarida farzandlari qiyofasi va taqdiriga xos fazilatlarini umumlashtirib e'zozlaydilar:



Bulbul qushning bolasi,

Alla, qo'zim-o, alla.

Daraxtda bo'lar uyasi, Alla, bolam-o, alla.

Daraxt boshini sel olsa, Alla, qo'zim-o, alla. Shaydolar bo'lar onasi, Alla, bolam-o, alla.

O'zbek allalarini kompozitsion tarkibiga ko'ra ikki turga bo'lish mumkin:

1. VOQEABAND (SUJETLI) ALLALAR. Buni allachilikning eng

takomillashgan namunasi sanash mumkin. Bunday allalar yagona, yaxlit sujet (voqea)ga ega, barcha bandlardagi poetik muddao bir silsilada markazlashgan hayotiy voqealarningepizodlari uyg'otgan kayfiyatlar tasviridan iborat bo'ladi. Ularda kompozitsiya puxta: ekspozitsiya, tugun, kulminatsiya va yechim singari uzvlar mavjud:

Bulbul sayrar yozina, alla-yo alla, Qulluq qush ovozina, alla-yo alla. Manim bulbul shu o'g'lim, alla-yo alla, Quloq qo'ysin ovozima, alla-yo alla. Bulbul kichkina qushdir, alla-yo alla, Sahar ovozi xushdir, alla-yo alla. Bermang bulbula ozor, alla-yo alla, Bulbul beozor qushdir, alla-yo alla. Bulbul sayrar chamanda, alla-yo alla, Shu bag'ri keng vatanda, alla-yo alla. Uni aslo cho'chitmang, alla-yo alla, Sayrasin shu chamanda, alla-yo alla. Bulbul uchar qo'limdan, alla-yo alla, Har kim qo'r qar o'limdan, alla-yo alla. Shu bulbulim sayrasa, alla-yo alla, O'lim qochar yo'limdan, alla-yo alla.

Allada ekspozitsiya – bulbulning yozda sayragan va maftunkorligining har qanday minnatdorlikka sazovorligi bo'lsa, tugun - bulbul obrazidagi o'g'ilning kelajakdagi taqdiri, aniqrog'i, kim bo'lishi. Kulminatsiya esa shu bulbul - o'g'il taqdirining o'limga ro'para kelmasligi niyatidan tug'ilgan tuyg'ular qarama-qarshiligida ko'rinadi. Nihoyat, shu o'g'il - bulbulning xushxon sayrab qolishi – o'limni qochirishidan iborat taskin tugunning optimistik yechimi hisoblanadi.



Voqeabandlik xususiyatini nafaqat lirik, balki yumoristik hamda yig'i va yo'qlov xarakteridagi allalarda, shuningdek, badihaviy allalarda ham kuzatish mumkin.

2. PAROKANDA ALLALAR ham o'zbek onalari repertuarida serob bo'lib, ayni zamonda nisbatan faol yaratilmoqda. Ularning muhim xususiyati - yaxlit va izchil sujet negizida qurilmaganligidir. Bunday allalarda har bir band o'zicha mustaqil, tugal motiv, yo mazmunga ega. Lekin mustaqillik boshqa belgi, xolos. Chunki mazmun mantiqan, baribir, bolaga qaratilganligi tufayli bir necha bayt yoki band yagona bir ipga tizilgan bo'ladi. Bunda vazn, qofiya, radif va naqarot singari badiiy-tasviriy hamda kompozitsion-struktural uzvlar kuchayadi. Allada parokandalikning yuzaga kelishida uni kuylayotgan ona kayfiyatidagi beqarorlik, aniqrog'i, sarguzashtlari, hayotiy tashvishlaridagi omad va omadsizliklari, o'kinchlari, armonlari girdobiga nechog'lik chuqur kira borishi, mutaasirligi asosiy rol o'ynaydi. Bunday vaziyatlarda "...o'z mulohazalariga kuchli g'arq bo'lib ketish oqibatida ona chaqalog'ining kelajak taqdirini va hayotining barcha davrlarini o'ylay boshlaydi. Fikri bola atrofida aylanadi-yu, biroq qo'shiqqa ozmi-ko'pmi miqdorda onalik hislari va istaklarini singdirayotganini o'zi sezmay qoladi" (A.Vetuxov). Natijada, onaning o'y-mulohazalari ikki yo'nalishga bo'linadi: ham bolani, ham o'zini o'ylashga moyillasha boradi, oqibatda esa, ona o'y- mulohazalarida parishonlik-tarqoqlik yuzaga kela boshlaydi. Biroq onaning o'zi haqidagi o'y-mulohazalari aslida bolasi atrofidagi o'y-mulohazalar zamirida kechadi. Bu esa alladagi sirtidan parokandaday tuyulayotgan motivga bir butunlik bag'ishlab turadi.

Bolalar qo'shiqlari. Ota-onalar o'z bolalarining tabiatga munosabatlarini shakllantirishda ham faol ishtirok etadilar. Buning natijasida bolalarning taqvim va unga aloqador mavsum-marosim qo'shiqlari yuzaga kelgan. Yil fasllari - bahor, yoz, kuz, qish mavsumlari bilan bog'liq bunday qo'shiqlarning bir qismi ijtimoiy- siyosiy taraqqiyot taqozosiga ko'ra kattalar



repertuaridagi mavqeyini yo'qotgan, yo tamoman so'nib ketgan, yo transformatsiyaga uchrab, bolalar repertuaridagina saqlanib qolgan. "Qo'shiq" keng ma'noda qo'shiqshunoslikka, tor ma'noda folklorga oid atamadir. Qo'shiq - xalq og'zaki ijodida shakllangan lirik janr sifatida mashhur. Uning muhim belgisi - ijro uchun mo'ljallanganlik. Xalq qo'shiqlari biror musiqa jo'rligida (lapar, yor-yor), muayyan ish-harakat ritmi (qo'sh qo'shiqlari, charxchi qo'shiqlari) yoki ma'lum bir ruhiy holat mohiyatiga (yo'qlovlar) mos tarzda ijro qilingan.⁷ Bu jihatlar bolalar qo'shiqlarida ham namoyon bo'ladi. U turli fasl, holat va vaziyatlarda, yoxud har xil o'yinlar jarayonida kuylanib, bolalarning aqliy va jismoniy kamolotga yetishuvida muhim omil sanaladi. Bolalar qo'shiqlari orasida bahor va yoz mavsumlariga bag'ishlangan namunalari ancha faol. Ayniqsa, bahor fasli katta-yu kichik qalbini quvonchga to'ldirgan.

"Boychechak" – bolalar kuylaydigan mavsumiy va marosim qo'shig'i. Boychechak qadimda Navro'z elchisi sifatida bolalar quvonchiga sabab bo'lgan. Undan guldastalar yasashgan bolakaylar hovlima-hovli yurib, qo'shiq kuylab, boychechak ulashib, bahor xabarini berib, suyunchi olishgan. Uning xush kayfiyatda kuylanishi, "Qattiq yerdan qatalab chiqqan boychechak, Yumshoq yerdan yumalab chiqqan boychechak" naqaratining mazmun mohiyati katta-yu kichikka birdek tushunarli. Biroq qo'shiqni yod olgan, zavqqa to'lib kuylagan kichikintoylar uning mazmunini teran anglaganlaridagina xalq madaniy tarixi, milliy qadriyatlarimizdan voqif bo'ladilar. Qo'shiqning birinchi bandi shunday boshlanadi:

Boychechagim boylandi, Qozon to'la ayrondir.

Ayroningdan bermasang, Qozon-tovog'ing vayrondir.

Qo'shiqda qadimgi ajdodlarimizning ilk bahor kunlaridagi "qozon to'ldi" marosimi va bahor kelganiga ishora qilinayotir. Negaki, boychechak bahor elchisi ekan, endi yaylovda o't-

⁷ Quronov D.va boshq. Adabiyotshunoslik lug'ati. Toshkent, "Akademnashr", 2010.- B.384



o'lanlar ko'karadi, sigir-echkilar suti ko'payadi, issiq boshlanishi bilan hamma ayronxo'rlikka o'tadi. Kishilarning qozon to'ldirib ayron tayyorlashi va bir- birlariga ulashishi xayrli udumlardan sanalib, xalqda uni bir-biridan qizg'anganda ro'zg'orga putur yetishi mumkinligi inonchini paydo qilgan.

Boychechak haqidagi qo'shiqlarning genezisi juda qadimiy davrlar bilan bog'liqligi qo'shiqning keyingi bandida ko'rinadi:

Boychechakni tutdilar, Tut yog'ochga osdilar, Qilich bilan chopdilar, Baxmal bilan yopdilar.

Bu tarixan hosildorlik kulti bilan bog'liqligini zamondosh o'quvchiga tushuntirish lozim. Folklorshunos olimlar e'tiroficha, o'simliklar kultining paydo bo'lishi ibtidoiy madaniyat davri bilan bog'liq bo'lib, qadim inonchlardan biridir. "Arxaik dunyoqarashda, - deb yozadi A.Musaqulov,- butun tabiat kabi o'simliklar ham jonli va ongli, deb tushunilgan va ko'pgina xalqlar o'zlarining ilk ajdodlarini o'simliklar totemi bilan bog'lashgan"⁸.

Boychechak - badavlat, muqaddas, ilohiy gul degan ma'nolarga ham ega. Olimlar ta'kidicha, qo'shiqlarda boychechak to'ng'ich go'zal qizga o'xshatiladi. Yuqoridagi misralar ham shu ma'noda juda qadim davrlarda ko'klamgi marosimlarda qizlarni qurbonlik qilish marosimidan nishona ekani e'tirof etilgan. Qo'shiqdagi:

Boychechakni tutdilar, Tut yog'ochga osdilar. Qilich bilan chopdilar, Baxmal bilan yopdilar.

Misralari shunday talqinga asos bo'lgan. Zotan unda ta'riflangan boychechak - erta bahorda ochilgan gul ekanligi bilan birga tarixiy hodisalarning umumlashma obrazi hamdir. Qo'shiq tugagach, boychechakxonlarga sovg'a-salomlar berishgan. Bolalar ularni o'zaro bo'lishib olgan, hammalari birgalikda mehmonnavozlik qilishib, xalqimizning mehmondorchilik an'analarini o'zlashtirishgan. Shu ma'noda: Boychechagim boylandi, Ko'chama-ko'cha aylandi.

⁸ Musaqulov A. O'zbek xalq lirikasi. T., "Fan", 2010. -B.207.



Boychechagim ko'k somsa, Cho'ntaklarga joylandi,- misralari orqali bolalarning ilk boychechakni olib, hovlima-hovli suyunchi so'rashi, keksalar uni yuzlariga sutib, "omonlik-omonlik",- deya yeguliklar, pullar berishlari, ko'k somsalar pishirishlari poetik ifodalangan.

Bolalarning qo'shiqqa bo'lgan kuchli moyilligi ular faoliyatining asosini tashkil etuvchi o'yinlarda ham namoyon bo'ladi. Ular bir-birlarini o'yinga qo'shiq aytib chaqirish asosida *chorlamalar*, o'yinda ishtirok etadigan bolalar tarkibini aniqlashda *cheklashmachoqlar*, navbat aniqlashda *sanamalar*, shuningdek, o'yin nihoyasida *tarqalmachoqlar* kuylashgan. Bularning har biri bolalar folklorining mustaqil poetik janrlari hisoblanadi.

Albatta, davrlar, avlodlar yangilanishi bilan bunday o'yin-qo'shiqlar ham o'zgarib, yangicha mazmun-mohiyat kasb etishi tayin. Xususan, turli sport o'yinlari, anjomlari va mashg'ulotlari keng miqyosda ommalashib bormoqda. Shunday bo'lsa-da, xalq ijodining ko'pgina namunalari bolalar ma'naviy olamini boyitishda hamon hissa qo'shib kelmoqda. Bolalar repertuarida ibtidoiy ajdodlarimizning qadimgi animistik va totemistik aqidalari asosida shakllanib, endilikda o'sha mohiyatini yo'qotgan **yalinchoqlar** va **hukmlagichlar** hamon yashamoqda.

YALINCHOQLAR - ibtidoiy animistik qarashlar zamirida vujudga kelgan tabiat hodisalariga aloqador mavsumiy marosim qo'shig'i. Ular qachonlardir kattalar repertuarida yuzaga kelgan. Biroq davrlar o'tishi bilan animistik e'tiqod ham so'na borgan, natijada, unga daxldor marosim ham so'ngan. Lekin shu marosimning verbal qismi bo'lgan aytim-qo'shiqlar, inchunin, *quyoshga, oyga, yulduzlarga, kamalakka, shamolga, yomg'irga* va boshqa tabiat hodisalariga sig'inishni ifodalagan qo'shiqlar ham asta-sekin yalinish-sig'inishdan iborat animistik mohiyatini yo'qota borib, goh parcha (rudiment) holda, goh transformatsiyaga uchragan holda bolalar repertuariga o'tib



yashay boshlagan. G'oyat keng tarqalgan va xilma-xil variantlarga ega "Oftob chiqdi olamga" yalinchoq'i shu jihatdan e'tiborga ega. Uni qish oxirlab, quyosh bulutni yorib ko'ringanda, bolalar o'sha quyoshga qarata, quvnoq ruhda shovqin solib, sakrab- sakrab birgalikda jo'rovoz bo'lib kuylaganlar:

Oftob chiqdi olamga,
Yugurib bordim xolamga.

Xolam: - Ana yer,- dedi, Borib o'tin ter,- dedi. O'tin terdim bir quchoq, Non yopdi o'choq-o'choq. Menga berdi elakday, O'ziga oldi g'elakday.* Otib urdim eshikka, Boshim tegdi teshikka.

Yalinchoqning quyosh ko'ringandagina unga qarab kuylanishida ajdodlarimizning quyoshga sig'inishdan iborat qadimiy animistik e'tiqodining tarixiy ildizini fahmlash qiyin emas. Gerodot ma'lumoticha, qadimgi massagetlar eng chopqir otni qurbon qilib, quyosh chiqishini intizor kutganlar va unga sig'inish marosimini uyushtirganlar. To'marisning quyosh nomi bilan qasamyod qilishida ham shu e'tiqodga ishora bor. Uning so'nishi tufayli marosim ham yo'qolgan, davrlar o'tishi bilan bolalar qishki o'yinda kuylaydigan yalinchoq shaklida saqlanib qolgan. Biroq endi u animistik mohiyatini ham yo'qotgan, unda shikoyat motivini ifodalash ustuvor tus olgan; qishning shafqatsizligi mehrsizlik mohiyatini ochuvchi ijtimoiy parallelizm (muvoziylik)ni yuzaga keltirgan. Yalinchoqda lirik qahramon muruvvat ko'rsatmagan xolasidagina emas, balki o'tin tersa-da, mehnati munosib qadrlanmaganidan o'ksinadi, biroq o'z qadrini yerga urmaydi. Yalinchoq bolalarga ana shunday axloqiy saboq beradi.

Maqol, masal, matal, zarbulmasal, naql, hikmat, foyda, hikmatli so'z, tanbeh, mashoyixlar so'zi, donolar yoki donishmandlar so'zi, oqinlar so'zi va otalar so'zi atamalari bilan el orasida yurgan bu janr namunalari g'oyat ommaviy bo'lib, umumfolklor hodisasi hisoblanadi. Ilmiy taomilda esa maqol atamasi iste'moldadir. Maqol arabcha "qavolla" so'zidan olingan



va “aytmoq, so‘zlamoq” ma’nolarini anglatadi. Xalq orasida “qavlida sobit” yoki “qavlida tutruqsiz” iboralari bor: birinchisida “so‘zida qat’iyatli, bir so‘zli” ma’nolari anglashilsa, ikkinchisida “so‘zida turmaydigan, o‘z so‘zi ustidan chiqa olmaydigan, so‘zi bilan ishi bir bo‘lmagan” ma’nolari ifodalangan. Binobarin, “maqol” so‘zi o‘zbek tilida ikki ma’noda, avvalo, o‘z lug‘aviy ma’nosida “so‘z, nutq”ni anglatga, ikkinchidan, istilohiy ma’noda folklorda keng tarqalgan janrni ifoda etadi.

Maqol, masal va naql janrlarining yuzaga kelishiga ta’sir ko‘rsatgan, masal va naqlning xulosasi, qissadan chiqarilgan hissasiga aylanganligi tufayli ba’zan masal va ba’zan naql istilohlari bilan ayqashib ketgan. Aslida esa “masal” so‘zi ham arabcha bo‘lib, “o‘xshamoq” ma’nosini anglatga-da, o‘zbek tilida maqol va biror maqsadni izohlashga qaratilgan majoziy hikoya singari ikki ma’noda qo‘llanadi. Biroq XX asrga kelib uni maqol ma’nosida istifoda etish cheklana borildi. Faqat tojik folklorshunosligida maqolni masal istilohi bilan atash qaror topdi.

“Naql” so‘zi ham maqol ma’nosida qo‘llansa-da, arabcha so‘z bo‘lib, “ko‘chirmoq” ma’nosini anglatadi. O‘zbek tilida esa “bayon qilmoq, hikoya qilmoq, rivoyat qilmoq” singari ikkinchi bir ma’noga ega va xalq og‘zaki nasrining mustaqil aforistik janrini ifodalovchi ilmiy istiloh sifatida qo‘llanadi. “Yaxshi naqltomiri aql” maqolida “naql”- maqol ma’nosidadir.

Maqollar xalq donishmandligining nodir namunalari sifatida og‘zaki badiiy ijodning keng tarqalgan mustaqil janridir. Shartli ravishda ularni xalqona axloq- o‘dab qoidalari deb atash mumkin. Zero, maqollar xalqning asrlar davomida hayotiy tajribalarida sinalgan ijtimoiy-siyosiy, ma’naviy-madaniy, axloqiy-falsafaviy qarashlarining g‘oyat ixcham, lo‘nda, siqiq va obrazli ifodasidan tug‘ilgan hodisadir. Maqollar maxsus ijod qilinmaydi, balki ma’lum bir sharoit taqozosi tufayli sinalgan hayotiy tajribadan tug‘iladigan xulosaning axloqiy bahosi



sifatidagi hukm bo'lib yuzaga keladi. Har bir xalq maqolida o'sha xalqning qalbi, milliy sajiyasiga xos qarashlari ifodalansa-da, ulardagi g'oya umumxalqqa tegishlidir. Shu xususiyatlariga ko'ra, maqollar ham milliy, ham umuminsoniy mohiyat kasb etganlar.

Maqollar insonning turli sohalaridagi faoliyatlari jarayonida uzoq muddatli sinovlardan o'tgan turmush tajribalarining hosilasi - barqaror va o'zgarmas, to'g'ri va haqqoniy xulosasi tarzida yuzaga kelgan.

Maqollar ham she'riy, ham nasriy shakllarda bo'lib, na lirik, na epik turga mansub. Shu sababli ular ham, topishmoqlar, irimlar va obrazli iboralar kabi paremik turga kiritilib, yozib olinishi va to'planib kitobat qilinishi *paremiografiya*ga daxldor bo'lsa, paydo bo'lishi, taraqqiyot tamoyillari va qonuniyatlari, badiiyati *paremiologiyada* o'rganiladi.

Maqollar shaklan ixcham bo'lsa-da, badiiyatiga ko'ra yuksak obrazlilikka egadir. Ularda fikr sodda, tabiiy, ravon, silliq va tushunarli bo'lib, ta'sirchan ifodalanishi ehtiyoji turli narsalar, hayvonlar, o'simliklar va hodisalar obrazlaridan g'oyaviy-badiiy niyatni ifodalashda foydalanishni taqozo etgan. Natijada, timsoliy obrazlar vositasida hayotdagi ijobiy yo salbiy voqea, insoniy munosabatlarga axloqiy baho berilib, hukm chiqarilgan.

Maqollar tuzilishiga ko'ra, bir va bir necha sintaktik butunlik asosida tashkil topgandir. Bir sintaktik butunlikdan iborat maqollar, odatda bir qismli maqollar sanalib, ko'pincha darak gap shaklida bo'ladi: "Ayol tilini ayol biladi", "Arg'amchiga qil-quvvat", "Vatanni sotgan er bo'lmas", "Gavhar yerda yotmas", "Yomon it egasini qopar", "Ishni ishchandan o'rgan" kabi. Ko'p sintaktik butunlikdan iborat maqollar esa ko'p qismli, yoki murakkab maqollar deb yuritiladi. Bunday maqollar bir-biriga o'xshash, yoki zid fikrlar bayonidan iborat bo'ladi. Aksariyat maqollar ikki qismdan tashkil topgan; bir qismi tasviriy mohiyatga ega bo'lsa, ikkinchi qismi xulosadan iboratdir: "Aytmas yerda tilingni tiy, mehmonga borsang nafsingni tiy",



“Bulbulning sayrashı guldır, mehr xazınası tıldır”, “Bug’doy noning bo’lmasin, bug’doy so’zing bo’lsin”, “Yolqitsa ham yog’ yaxshi, yondirsa ham yoz yaxshi”, “Ishonish bilan kasal bo’lsang - umid qilsang, tuzalasan” kabi yuzlab maqollarda ikkinchi qism zarbli va asosiy o’gitni ifodalaydi.

Maqollar jonli so’zlashuv tilida yaratilgan va shu taxlitda so’zlanadi. Aksariyati to’g’ri ma’nolarda qo’llansa, ma’lum qismi ko’chma (ramziy va majoziy) ma’no tashiydi: “Avval o’yla, keyin so’yla”, “Yosh kelsa - ishga, qari kelsa - oshga”, “Mehnat, mehnatning tagi rohat”, “Vatani borning - baxti bor, mehnati borning - taxti”, “Vataning tinch - sen tinch” maqollarida to’g’ri ma’no ustuvor; “Dunyoni suv olsa - o’rdakka ne g’am?”, “Bo’rini yo’qlasang, qulog’i ko’rinadi” singari maqollar ko’chma ma’nolardagina hikmatlilik kasb etgan.

Maqollarda saj’lar faol bo’lib, o’ziga xos ichki qo’fiyadoshlikni yuzaga keltirgan va ularning ohangdoshligini ta’minlaydi.

Maqollarni tasnif qilishning xilma-xil ko’rinishlari mavjud. Jumladan, alifbe tartibida, mavzulari, sinonimik yoki antonimik mohiyatiga ko’ra, to’g’ri yoki ko’chma ma’no tashishiga hamda qaysi ijtimoiy davrda yaratilganligiga - xronologiyasiga ko’ra guruhlash, yo tasnif qilish paremiologiyada an’anaga aylangan. Ammo hozircha o’zbek maqolshunosligida alifbe tartibi va mavzusiga ko’ra tasnif qilish an’anasiga ikki jildlik “O’zbek xalq maqollari” (1987) va ko’p jildlik “O’zbek xalq ijodi” ruknida “O’zbek xalq maqollari” (1989) to’plamini tuzishda amal qilingan. Shunday bo’lsa-da, o’zbek xalq maqollarini yozib olish tarixi ancha qadimiy bo’lib, ikki yo’nalishda davom etganini kuzatish mumkin:

Birinchi yo’nalish - *maqollarni jonli so’zlashuvda qanday aytilsa, shu holatida xalqdan yozib olish va kitobat qilish*. O’zbek xalq maqollarini ilk bor yozib olish va kitobat qilish XI asrning buyuk filologi Mahmud Qoshg’ariy nomi bilan bog’liq. U juda



ko'p turkiy qabila va xalqlar orasida bo'lib, xalq ijodiyotining boshqa janrlariga mansub namunalari qatorida anchagina maqollarni ham yozib olib, "Devonu lug'otit turk" asarida darj etdi. Shu asosda maqollarni kitobat qilish an'anasini ham boshlab berdi. Tubandagi maqollar shular jumlasidan bo'lib, ularni hozirgi nusxalari bilan yondosh berish asosida har biriga oid transformatsiya jarayoni hamda ma'no tovlanishlarini kuzatish mumkin:

M.Qoshg'ariyda:

Kishi olasi ichtin,

Yilqi olasi toshtin.

Hozirgi nusxasi:

Mol olasi - toshida, Odam olasi - ichida.

Maqol mazmunida hech qanaqa o'zgarish bo'lmasa-da, undagi sintaktik bo'laklar o'rin almashgan. Qadimiy o'zbekcha "kishi" so'zi arabcha "odam" va turkiy xalqlarning otga sig'inishi asosida qo'llangan "yilqi" so'zi umumlashtiruvchi ma'noga ega arabcha "mol" so'zi bilan almashgan. Bu eski o'zbek tili so'z boyligiga arablashtirish nechog'li kuchli ta'sir ko'rsatganini ayonlashtiradi. Shuningdek, o'rin-payt kelishigini ifodalovchi "-tin" qo'shimchasi "-da" bilan almashinib, tilning grammatik qurilishiga xos o'zgarishni namoyon etadi. Bunday holatni devondagi: "Tog' toqqa qovushmas, odam odam bilan qovushur", "Er so'zi - bir" maqollarini hozirgi "Tog' tog' bilan uchrashmas, odam odam bilan uchrashar" va "Yigitning so'zi bir bo'lar" nusxalari bilan qiyoslaganda ham kuzatish mumkin.

O'zbek halq maqollarini yozib olish an'anasi XVIII asr oxiri va XIX asrning birinchi yarmida yashab ijod etgan shoirlar Muhammadsharif Gulxaniy va Sulaymonqul Rojiylar tomonidan davom ettirildi. Gulxaniy 400 dan ko'proq, Rojiy esa 450 tacha xalq maqolini to'plab, o'zlarining "Zarbulmasal"larida jamlab berganlar. Albatta, ular ilmiy maqsadlarni ko'zlab maqol



yig'maganlar. Bunda, asosan, asarlarida xalqona jozibani kuchaytirish, personajlar tilini

individuallashtirish va tabiiy, sodda ifodaviylikka erishishni nazarda tutganlar. Shunga qaramay, ularning bu xizmati o'zbek paremiografiyasi tarixiy tadrijini ko'rsatishda ayricha ahamiyatga ega.

XIX asrning 2-yarmidan e'tiboran o'zbek xalq maqollarini ilmiy asosda yozib olish va nashr etish harakati izchil tus ola bordi. Venger olimi H.Vamberi 1867- yilda Leypsigda chop ettirgan "Chig'atoy tili darsligi"ga 112 ta o'zbek maqolini kiritdi. U bu maqollarni o'zbek tilida arab alifbosida va lotincha transkripsiyada, so'ngra, o'zi amalga oshirgan nemis tilidagi tarjimalari bilan e'lon qildi va ilk bor o'zbek xalq maqollarini Yevropa jamoatchiligi e'tiboriga havola etdi. Vamberi e'lon qilgan maqollar orasida "Ot oriqlikda - yigit g'ariblikda", "Aqli kishi ikki marta bir toshga qoqilmas", "Ichda bo'lgan og'riqni kesib bo'lmas", "Qo'ling moyli bo'lsa, boshingga surt", "Tilidan kelgani qo'lidan kelsa, hamma odam gadoy bo'lmay xon bo'lur", "Oshiqqan oshga shayton qo'shilur", "Hayit otliniki, to'y to'nliniki" singari nodir namunalar borki, hanuzgacha biror to'plamda uchramaydi. Keyingi maqol esa hozir "To'y kimniki - tegishliniki, hayit kimniki - barchaniki" shaklini olgan holda o'zgargan. "Ichda bo'lgan og'riqni kesib bo'lmas" maqoli o'z ma'nosida tushunilsa, ya'ni zamonaviy tibbiyot taraqqiyoti ichdagi har qanday og'riqli a'zoni kesib, yamab va yangilab davolay olishi inobatga olinsa, eskirganligi ayonlashadi, biroq ko'chma ma'noda qo'llansa, unda inson ichki olamiga xos murakkab tuyg'ular anglanadi va maqol hamon o'z mohiyatini yo'qotmagan holda xizmat qilaverishi ravshanlashadi. Missioner K. P. Ostroumov ham 1888-1890-yillarda chop etilgan "Sirdaryo viloyati statistikasi uchun materiallar to'plami"ning birinchi jildida 492 ta va ikkinchi jildida 628 ta, jami - 1120 maqolni o'zbek va o'z tarjimasida rus tillarida e'lon qilgan. U bu maqollarni bevosita o'zi yozib olgan



emas, balki rus-tuzem maktabi talabalari yordamida to'plashga muvaffaq bo'lgan.

O'zbek xalq maqollarini to'plash va ommaga yetkazishda o'tgan asrning 70-80-yillarida jiddiyoq kirishildi. Bu sohadagi dastlabki ish E.Siddiqov tuzgan "Dengizdan qatralar" (1976) to'plami bo'ldi. Unda ikki mingdan ziyodroq o'zbek maqollari alifbe tartibida jamlangan edi. Bu davrda T.Mirzayev, B.Sarimsoqov, A.Musaqulov, M.Madrahimova singari folklorshunoslar g'ayrati bilan 4 ming maqoldan tartib berilgan "O'zbek xalq maqollari (1978, 1981 va 1984) to'plami yuzaga keldi. 13 ming maqolni o'z ichiga olgan ikki jildlik "O'zbek xalq maqollari" va "O'zbek xalq ijodi" ruknidagi ko'p tomlik tarkibidagi "O'zbek xalq maqollari" tomligi nainki o'zbek paremiologiyasi, balki folklorshunosligi tarixida ham muhim voqea bo'ldi. Nihoyat, 1980-yilda Sh.Shomaqsudov va Sh.Shorahmedovlar ilk bor o'zbek maqollarining izohli lug'atidan iborat "Hikmatnoma" asarini e'lon qildilar. Bu asarlar o'zbek xalq aforistik tafakkurining naqadar boyligini namoyish etdi.

Ertak umumfolklor hodisasi sifatida eng qadimiy epik janrlardan bo'lib, M.Qoshg'ariy o'z "Devonu lug'otit turk" asarida turkiy xalqlarda uning "etuk" atamasi bilan yuritilganini qayd etadi. Unga ko'ra, etuk "biror voqeani og'zaki hikoya qilish"ni anglatadi. Biroq jonli so'zlashuvda O'zbekistonning turli joylarida, chunonchi, Namangan viloyatining Janubiy qismida "ertangi" deb yuritiladigan bu hodisa - ertangi, bo'lib o'tgan, qadimgi zamonlardan qilinajak hikoya ma'nosini anglatga, Samarqand, Farg'ona va Surxondaryoda bu hodisa - matal, Xorazmda - varsoqi, Buxoroda - ushuk, Toshkentda - cho'pchak, yana boshqa bir qator maskanlarda - hikoya, hikoyat, og'zaki hikoya, o'trik yoki o'tirik, afsona deb yuritilganda, folklorshunoslikda ertak ilmiy istilohi qabul qilingan va muhim muomalada bo'lib, ruslardagi "skazka" istilohiga teng



ekvivalentga aylangan. Zero, Alisher Navoiy asarlarining qadimgi lug'ati, sanaluvchi "Abushqa" da ham "ertak" istilohi uchraydi.

"Ertak" so'zi "er", aslida "ir" yo "yir, jir" hamda "tak" so'zlaridan tarkib topgan. "Ir" yo "yir" Alisher Navoiy zamonida og'zaki hikoya, yo doston ma'nolarini anglatganki, bu xususda u shunday ma'lumotni yozib qoldirgan:

Ey yirov, sen ham ishingni ko'rguz, Yotug'on birla ulug' irni tuz

Navoiy tilga olayotgan "ulug' ir" aslida doston bo'lib, uni yotug'on (hozir do'mbira) jo'rligida yirov ijro etgan. Yirov yoki jirov hozir ham xalq an'anaviy dostonlari ijrochisini anglatadi. Navoiy zamonasida "ir" dostonni anglatgani bois u ertak ma'nosida "cho'rchak" istilohini qo'llaydi va og'zaki eposga xos bu ikki hodisani bir-biridan farqlaydi:

Habibim husni vasfin uyla muhlik anglakim, bo'lg'ay, Qoshingda qissai Yusuf bir uyqu keltirur cho'rchak.

Shuni ta'kidlash joizki, Navoiy qo'llagan "cho'rchak" istilohi hozir Toshkent muzofotida "cho'pchak" va uyg'urlarda "cho'chek" shakllarida fonetik o'zgarishga uchragan holda iste'moldadir. Ertak xalq og'zaki badiiy ijodining eng qadimiy, ommaviy, hajman yirik, katta-yu kichiklar uchun baravar qiziqarli bo'lgan janridir. Ular juda uzoq o'tmishda ibtidoiy ajdodlarimizning mifologik dunyoqarashi, qadimiy urf-odatlar, marosimlari asosida paydo bo'lgan. Ertaklarda, odatda, xalq maishiy turmushining insoniy fazilatlar haqidagi orzu-o'ylari xayoliy va hayotiy uydirmalar vositasida bayon etiladi.

Ertaklar janr sifatida uzoq muddatli shakllanish jarayonini boshdan kechirgan. Ular ibtidoiy odamlarning turmushdagi biror voqeani oddiygina hikoya qilishlari asosida yuzaga kelgan. Davrlar o'tishi bilan hikoya qilish ham takomillashib borgan, so'zga sig'inish, ilohiy kuchlarga sig'inish, animistik, totemistik, fetishistik e'tiqodlar, gallyutsinatsiya va tush



ta'sirida fantastik (taxayyuliy) vositalarga to'lisha borsa, hayvonlarni ovlash, xonikalashtirish, ular inonchlariga ishonish, hayvon mahsulotlaridangina emas, balki kuchidan ham foydalanish jarayonlarida hayvonlar haqidagi ertaklar paydo bo'la boshladi. Asta-sekin shu xildagi ertaklarda turmush tajribasini omixtalashtira borish, u yoxud bu xildagi qusur va kamchiliklardan kulish ertakdagi obrazlarga majoziylik (allegorik) xususiyatni baxsh etdi. Natijada hayvonlarga oid ertaklar tarkibida majoziy namunalar yuzaga kela boshladi.

Feodal munosabatlar tarkib topib, unda ijtimoiy jarayon takomillasha borgach, ertaklarda ham shu ijtimoiy munosabatlarni ifodalash tamoyili chuqurlasha bordi, natijada, hayotiy uydirmalar asosidagi maishiy ertaklar paydo bo'la boshladi. Shu zaylda, ertaklar ijtimoiy-estetik hodisa sifatida xalq epik ijodiyotida mustahkam qaror topdi.

Ertaklarning paydo bo'lishi. Ertak xalq og'zaki badiiy ijodining eng qadimiy, ommaviy, hajman yirik, katta-yu kichiklar uchun baravar qiziqarli bo'lgan janridir. Ular juda uzoq o'tmishda ibtidoiy ajdodlarimizning mifologik dunyoqarashi, qadimiy urf-odatları, marosimlari asosida paydo bo'lgan. Ertaklarda, odatda, xalqning maishiy turmushi va eng olijanob insoniy fazilatları haqidagi orzu- o'ylari xayoliy va hayotiy uydirmalar vositasida bayon etiladi.

Ertaklarni ijro etish tartibi. Ertaklar professional ijrochilikka asoslangan. O'tmishda ertaklar yilning ma'lum davrida belgilangan paytda ijrochilik salohiyatiga ega bo'lgan yoshi ulug', dono, hurmatli va e'tiborli kishilar tomonidan aytilgan. Odatda bunday professional ijrochilar ertakchi, deb yuritiladi.

Ertaklarning ijrosi uch xil usulda tashkil etilishi mumkin:

- a) teatrlashtirilgan shaklda;
- b) deklamatsion shaklda;
- v) ohangga solingan shaklda.



O'zbek ertaklarining uch ichki turini farqlab o'rganmoq ma'qul.

1. Sehrli -fantastik ertaklar
2. Hayvonlar haqidagi ertaklar.
3. Maishiy-hayotiy ertaklar.

Ertaklarning janriy tabiati. Ertaklar xalq og'zaki badiiy ijodiyotining epik turiga mansub bo'lib, o'ziga xos g'oyaviy-mavzuviy yo'nalishga, axloqiy- ta'limiy va ijtimoiy-estetik vazifalarga ega. Ertaklar ham og'zaki tarzda jamoa ijodi mahsuli sifatida anonim ko'rinishda yaratiladi. Garchi, uning to'qilish ibtidosi individual ijodkorga borib taqalsa-da, og'izdan-og'izga, urug'dan-urug'ga, avlod-dan-avlodga o'tish jarayonida dastlabki ijrochisiga xos belgilarini, obrazlarini, motivlari va badiiy vositalarini deyarli saqlab qoladi. Shu bilan birga versiya va variantlilik hosil qilishi mumkin.

Ertaklar, asosan, professional ijrochilikka asoslanadi. Kishilarda cheksiz badiiy zavq uyg'ota olish imkoniyatiga egaligi boisidan ko'p hollarda ta'limiy-tarbiyaviy maqsadlarda aytiladi.

Ularning sujeti qiziqarliligi, uydirmalarga boyligi, sarguzashtga to'laligi bilan diqqatni tez jalb qiladi. Va albatta, o'z nihoyasida ezgulikning yovuzlik, oydinlikning qorong'ulik, haqiqatning nohaqlik, hayotning o'lim, aqllilikning nodonlik, adolatning jaholat va to'g'rilikning egrilik ustidan g'alaba qozonishini tarannum etadi.

Ertaklar o'z janriy tabiatiga xos badiiy- kompozitsion qurilishga ega. Ular bir xil badiiy shakliy qoliplar doirasida yaratiladi va ijro etiladi. ***Kirish, boshlama, tugun, epik sarguzasht va tugallama*** ertak kompozitsion qurilmasining asosini tashkil etadi.

Ertaklarning an'anaviy kirish bilan boshlanishi jahon-dagi barcha xalqlar ertakchiligi uchun mushtarak xususiyat hisoblanadi. Goho shunchaki kirish, goho *an 'anaiviy zachin* deb yuritiluvchi bu hodisani rus folklorshunosi V.Dal "goi<y'iioe



Cka3ku” istilohi bilan atab, bolalar folklorining mustaqil janri tarzida tavsiflaydi. Chindan ham soʻzma-soʻz tarjimada “zeriktiradigan”, yoki “ezma ertak” tarzida ifodalash mumkin boʻlgan bu hodisa oʻzbek bolalar folklorida ham ermaklar silsilasini tashkil etadi. Qolaversa, ular qatʼiy bir ertak bilan uzviy mantiqiy bogʻliq holda yashamaydi, balki istalgan ertakni boshlashdan avval aytilishiga koʻra nisbatan mustaqil boʻlib, sayyor holda ijro etilaveriladi. Ularga xos bu xususiyatni oʻzbek ertakshunosi K.Imomov ham “kirish qismi baʼzan sodda, primitiv sujet shaklini oladi”,- deya qisman tan olsa-da, har qalay uni ertak kompozitsiyasining ajralmas tarkibiy qismi sifatida qarashni afzal biladi.

Hayvonlar haqidagi ertaklar. Ertak xalq ogʻzaki ijodining qadimiy va keng tarqalgan janrlaridan biridir. Qadimgi kishilarning tasavvurlari natijasida yuzaga kelgan afsonalarning zaminida dastlabki ertaklar paydo boʻlgan. Dastlabki ertaklarda mifologik obrazlar koʻp uchraydi.

Bu tipga mansub ertaklarning yaratilishida ibtidoiy insonlarning qadimgi totemistik qarashlari muhim rol oʻynagan. Ularda hayvonlar yetakchi personajlar boʻlib, insonlar qiyofasida tasavvur etilgan va badiiy jonlantirilgan. Shunga koʻra ularning sujetida inson obrazi keyingi oʻrinda turadi, koʻp hollarda voqelikka inson aralashmaydi. Binobarin, ular yaratilish maqsadi, mazmun-mohiyati jihatidan ham ichki koʻrinishlarga ega. Bularning birinchisi *etiologik ertaklar* boʻlib, bularda u yoki bu hayvon shakli, belgi xususiyatlari haqida maʼlumot berish yetakchi motivdir. Ikkinchisi, *sof hayvonlar haqidagi ertaklar hisoblanib*, unda insonlarga naf keltiruvchi hayvonlar madhi yetakchi motivga aylangan. Uchinchisi esa *majoziy (allegorik) ertaklarda* insonlarga xos qusur va kamchiliklarni hayvonlar feʼli va xatti-harakati timsolida tanqid qilish, fosh etish, yoki kulish yetakchi motiv darajasidadir



Hayvonlar haqidagi ertaklar dramatik ijroga asoslangan; professional ijrochilar tomonidan hayajonli qilib aytib beriladi. Aytish jarayonida ijrochi ertakdagi hayvon - personajlarning turfa harakatlari va ovozlari taqlid qiladi, ertak tarkibida she'riy parchalar bo'lsa, ularni kuyga solib ijro qiladi.

Maishiy-hayotiy ertaklarning mazmuni bevosita real hayotga bog'liqdir. Ularda real ijtimoiy voqelik hayotiy uydirma asosida tasvirlanadi, hayotiy real kishilar bosh qahramon bo'lib keladi. Maishiy-hayotiy ertaklar taxayyulotdan deyarli xoli bo'lib, ayrim hollardagina fantastik detallar uchrashi mumkin.

Hajviy-maishiy ertaklar asosida o'tkir satira yoki zavqbxsh kulgi (yumor) yotadi. Bunday ertaklar hajman ixcham, mazmunan lo'nda bo'ladi.

“Ertaklar hech vaqt bekorchi, ermak narsalar emas,- deb yozgandi ulug' adib Muxtor Avezov,- ular hamma vaqt zo'r ijtimoiy va tarixiy ahamiyatga egadirlar. Bahaybat maxluqlar haqida hikoya qiluvchi ertak va afsonalar hamda bu boy janrning boshqa turli ko'rinishlarida u yoki bu davrning ijtimoiy, hayotiy kurashlari, xalq manfaatlari badiiy ifodasini topgandir”. Ularda ajdodlarimizning yashash va kurash sabog'i ifodalangan.

Ertaklar xalqning necha-necha ming yilliklar davomidagi hayotiy tajribalarini umumlashtirgan holda uning ijtimoiy ongida, estetik didida, axloqiy qarashlarida, e'tiqodida kechgan o'sish-o'zgarishlarning badiiy tarixi sifatida ayricha ahamiyat kasb etgan. Shu bois hozir ham miriqib tinglanadi, sevilib o'qiladi. Muhimi, navqiron avlodning ma'naviy-axloqiy kamol topishida ham ertaklar beqiyos ta'sir ko'rsatib kelmoqda.

Sehrli-fantastik ertaklar ming yillar davomida insoniyatning turli yovuz kuchlariga qarshi olib borgan kurashlari davomidagi xulosalari, ulardan kelib chiqadigan ehtiyojlarning o'ziga xos yechimi sifatida maydonga kelgan. Inson doimo xayoliy orzu-istaklar bilan yashaydi. Bunday



orzu-istaklarning ro'yobini sehrli-fantastik ertaklarda ko'rish mumkin.

Bu ertaklarda uchadigan otlar va gilamlar, so'ylaydigan jonzotlar, sehrGAR kampirlar, devlar, osmonda, yer va suv ostida yashaydigan odamlar va boshqalar ishtirok etadilar. "Ur to'qmoq", "Zumrad va Qimmat", "Yoriltosh" kabi ertaklar shular jumlasidandir.

Bilim, ko'nikma va malakani rivojlantirishga yo'naltiruvchi savollar :

1. O'zbek bolalar folklorining asosiy janrlari haqida mulohaza yuriting .
2. Qo'shiq deb nimaga aytiladi va qanday qo'shiqlar erkalash poeziyasiga daxldor?
3. Bolalarning taqvimiy qo'shiqlaridan misol keltirib, sharhlab bering.
4. Beshik qo'shiqlari nima va u bolaning qaysi yoshida aytiladi?
5. Maishiy qo'shiqlar deganda nimani tushunasiz?
6. "Alla" istilohi va uning kuylanishi haqida ma'lumot bering.
7. Allalarda farzand qiyofasini umumlashtiruvchi qanday poetik obrazlar mavjud?
8. Voqeaband va parokanda allalarning o'zaro tafovutini tushuntiring.
9. Maqol janri tabiati va uning etnopedagogik ahamiyatini tushuntiring.
10. Paremik tur deganda nimani tushunasiz?
11. Paremiologiya nimani o'rganadi? Paremiografiya-chi?
12. Ertak istilohi va uning qo'llanilishi haqida mulohaza yuriting.



13. Xalq ertaklarining janriy tabiati va o'ziga xos xususiyati nimalardan iborat?
14. O'zbek ertaklarining ichki turlari va ularning o'zaro tafovutlari haqida ma'lumot bering.

MAVZUGA DOIR TEST SAVOLLARI

1. Qaysi javobda bolalar folkloriga oid mulohaza to'g'ri ifodalangan?

- a) kattalarning bolalar uchun ijod etgan og'zaki adabiyotlari;
- b) kichkintoylar olami bilan kattalar dunyosining o'zaro uyg'unlashuvi oqibatida yuzaga kelgan o'yinlar, qo'shiqlar, musiqiy poetik janrlar tizimidan iborat xalq og'zaki ijodining tarmog'i.
- c) bolalarning o'zlari tomonidangina ijro etiladigan turli qo'shiqlar;
- d) mavsumiy-marosim qo'shiqlari.

2. O'zbek bolalar folklorini to'plash, tartib berish qachon va kim tomonidan amalga oshirilgan hamda u qanday nomlanadi?

- a) 1965-yil, Sh.Sa'dulla, "Yoriltosh";
- b) 1937-yil, Elbek, "Bolalar qo'shig'i";
- c) 1984-yil, O.Safarov, "Boychechak";
- d) 1975-yil, G'.Jahongirov, "O'zbek bolalar folklori".

3. Allaning ijro etilishi qaysi javobda to'g'ri ko'rsatilgan?

- a) xor jo'rligida ijro etiladi, mungli ohang;
- b) ifodali aytiladi, quvnoq ohang;



- c) alla faqat kuylanadi, monoton ohang;
- d) oddiy she'r singari

4. Go'dak uchun allaning nimasi muhim?

- a) kuyi;
- b) so'zi;
- c) tovushi;
- d) mazmuni.

5. Allaning kompozitsion butunligini ta'minlovchi unsurlar qaysi javobda to'g'ri ko'rsatilgan?


- a) matni;
- b) kuyi;
- c) ohangi;
- d) so'z, ohang va harakat birligi.

6. O'zbek xalq ertaklari ifodalayotgan voqeligining sajiyasi, g'oyaviy mazmuni, obrazlar talqini, badiiy tili, uslubi va boshqa xususiyatlariga ko'ra necha turga bo'linadi? Ular qaysilar?

- a) 5 turga: sehrli, novellistik, kumulyativ, hayvonlar haqida, hayotiy ertaklar;
- b) 2 turga: fantastik va realistik;
- c) 3 turga: hayvonlar haqidagi, odamlar haqidagi, hayotiy ertaklar;
- d) 3 turga: sehrli-fantastik, hayvonlar haqidagi, maishiy-hayotiy ertaklar.



1-jadval



2-jadval

Xalq og'zaki ijodining o'ziga xos xususiyatlari:

So'z san'atining boshlang'ich namunasi - unda uzoq o'tmishda yashagan ibtidoiy ajdodlar hayoti o'z ifodasini topgan.

Xalq - folklorning ijodkori. Folklor qabila, urug', elat, xalq yoki millatning mafkurasi va psixologiyasini aks ettiradi.

Folklor asarlari jonli ijro jarayonidagina yashaydi. U asosan so'z va kuy uyg'unligida ijro etiladi.



Folklor asarlari og'zaki aytiladi (ertak, maqol, topishmoq, rivoyat, afsona, latifa, naql); ijro etiladi (doston, og'zaki drama, lof, askiya); kuylanadi (qo'shiq)

Folklorlarda an'anaviylik-mavzu va g'oyaviy mundarijasi, badiiy mazmunda aks etadi

Varietlilik-folklorning jonli yashash tarzi. Variant-ma'lum bir asarning jonli og'zaki epik an'ana zaminida vujudga kelgan, bir-birini inkor etmasdan, yonma-yon yashay oladigan va o'zaro farqlanuvchi matnlardir.



Alla janri xususiyatlari



BOLALAR FOLKLORI JANRLARI _____ j			
ALLALAR (VOQEABAND (SUJETLI) va PAROKANDA ALLALAR)			
AYTIM-OLQISHLAR			MASXARALAMALAR 1
ERKALAMA VA OVUTMACHOQLAR			YALINCHOQLAR 1
QIZIQMACHOQLAR			HUKMLAGICHLAR
QAYTARMACHOQLAR			MASXARALAMALAR 1




Hayvonlar haqidagi ertaklar.

1. Etiologik ertaklar. Bularda u yoki bu hayvon shakti, belgi xususiyatlari haqida ma'lumot berish etakchi motivdir.

2. Sof hayvonlar haqidagi ertaklar. Bularda insonlarga naf keltiruvchi hayvonlar madhi etakchi motivga aylangan.

3. Majoziy (allegorik) ertaklar. Bularda insonlarga xos qusur va kamchiliklarni hayvonlar fe'li va xatti - harakati timsolida tanqid qilish, fosh etish yoki kulish etakchi motiv darajasidadir.



Tavsiya etiladigan adabiyotlar:

1. Karimov I.A. Barkamol avlod - O'zbekiston taraqqiyotining poydevori. - T., 1997.
2. Karimov I.A. Yuksak ma'naviyat - yengilmas kuch. - T.: Ma'naviyat, 2008.
3. Allayo-alla. O'zbek xalq allalari. To'plovchi va nashrga tayyorlovchi
4. Afzalov M. O'zbek xalq ertaklari haqida. - T.: Fan, 1964.
5. Berdiyev H., Rasulov R. O'zbek tilining paremiologik lug'ati. - T.: O'qituvchi, 1989.
6. Boychechak. O'X I. To'plovchi, nashrga tayyorlovchi O. Safarov. - T.: G'ASN, 1984.



7. Valixonov O. Chiston. // "Guliston" j., 1974, 7-son, 31-b.
8. Galiyev Sh., O'zbek bolalar o'yin folklori.- T.:Fan, 1998.
9. Jalolov G'. O'zbek ertaklarida janrlararo munosabat.- T.:Fan,1983.
10. Jumaboyev M. Bolalar adabiyoti va folklor. -T.,2006.
11. Jahongirov G'. O'zbek bolalar folklori. -T.:O'qituvchi, 1972.
12. Imomov K. O'zbek xalq satirik ertaklari. -T.:Fan,1974.
13. Mahmudov T. Hamid Olimjonning "Oygul bilan Baxtiyor" ertak-dostoni va uning folklor asoslari. SamDU asarlari: Adabiyot va hayot. – Samarqand, 1969, 84-100-b.
14. Safarov O. Chittigul. O'zbek bolalar xalq o'yinlari. - T.G'ASN, 2000. Yana: Hamid Olimjon she'riy-adabiy ertaklari. // Pedagogik mahorat, 2003, 4-son, 62-69-b. Yana: Folklor va bolalar adabiyoti. // O'TA, 2003, 6-son, 20-27-b. Yana: O'zbek xalq og'zaki ijodi. -T.: Musiqqa, 2010.
15. Yana: Bolalarni erkalovchio'zbek xalq qo'shiqlari. - T, 1985; yana: O'zbek bolalar xalq o'yinlari. - T.:Sharq, 2010.
16. Topishmoqlar. O'XIT. -T.:G'ASN, 1989.
17. Shermuhamedov P. Ertak-bu bir bahona.Kitobda: Bolalar olami. - T.:Yosh gvardiya, 1989, 11-19-b.
18. Shomaqsudov Sh., Shorahmedov Sh. Hikmatnoma. - T,1990; yana: Maqollarning paydo bo'lishiga doir. // O'TA, 1971, 4-son, 31-33-b.
19. O'zbek allalari. To'plovchi va nashrga tayyorlovchilar: T.Nafasov, K.Ochilov. - Qarshi, "Nasaf", 1994.
20. G'oziyeva S. Rasmlı topishmoqlar. – T.:O'qituvchi, 1979.
21. Husainova Z. O'zbek topishmoqlari. - T.:Fan, 1966



III BOB. BOLALAR O'YIN FOLKLORI

Reja:

1. *Harakatli o'yinlar tizimi va tasnifi.*
2. *Ma'naviy (so'z)o'yinlarining poetik xususiyatlari*
3. *Topishmoqlarning janriy xususiyati.*
4. *Tez aytishlarning etnopedagogik ahamiyati.*

MAVZUGA DOIR TAYANCH TUSHUNCHALAR: *sof harakat, predmet, bir predmetli, ko'p predmetli, alliteratsiya, chandish, hukmlagich, guldur-gup, chorlama, sanama, tarqalmachiq, topishmoq, tutaq, chalg'itma.*

Bolalar o'yinlarining xususiyati shundaki, ularda o'yinchi ham, tomoshabin ham - bolalarning o'zlari, yagona bir siymoda birlashgan holda namoyon bo'ladi. Shu bois har bir o'yin - o'ziga xos betakror dramatik asarday, hayotning qay bir parchasi, qay bir dardi, qay bir muammosini aks ettiruvchi sahna asariga aylanadi, uning muallifi ham, sahnalashtiruvchisi ham, ijrochisi ham, tomoshabini ham - tag'in o'sha bolalarning o'zlari, o'zlari ...

O'yinda bolalarning ijodkorlik salohiyatlari badihatan namoyon bo'ladi. Zero, bolalar o'ynab turib zavqlanadi, o'ynab kurashga tushadi, o'ynab mag'lubiyat alamini cheksa, o'ynab g'oliblik nashidasini suradi, o'ynab o'rganadi, o'ynab kashf etish va ijod qilish ilmini o'zlashtiradi, o'ynab kuylaydi, o'ynab hamkorlik va hamdardlik tuyg'usini tuyadi, o'ynab birlashadi va birlashmoq manfaatdorligini his qiladi, hatto o'ynab judo



bo'ladi, yolg'izlanadi va yakkalik iztirobini chekadi. Shu zaylda o'yin uning uchun o'zlari yashayotgan va keyinchalik o'zlari o'zgartiradigan olamni anglash va idrok etish yo'lidagi eksperimentlariga aylana boradi.

O'yinda harakat hayot ma'nolarini ifoda etuvchi ma'no kasb etsa-da, asosan, taqlidiy mohiyatga ega. Bolalar faoliyatida taqlidchilikning yetakchi tamoyilga aylanishi sababli ham xuddi shu omil bilan bog'liq bo'lib, o'yindagi har bir taqlidiy harakat turmushning qay bir qirrasini aks ettiruvchi ma'no tashishi bilan o'ziga xos saboq kuchiga ega. Binobarin, o'yin - bolalar uchun hayotni o'rganish va o'zlashtirish vositasi, bolalar o'ynab turib yashashadi. O'yin shunday bir hayotki - bolalarning vujudini chiniqtiradi, ongini peshlaydi, shakllantiradi va o'stiradi. Olamni anglash va o'zlashtirish mashqlaridan tarkib topgan bunday hayot - bolalar uchun jiddiy mashg'ulotdir. Shu ma'noda o'yinlar amaliy pedagogika, san'at va jismoniy tarbiyadan iborat yaxlit tizimning tengsiz boshlanmasi, binobarin, xalq pedagogik dahosining hosilalari hisoblanadi. Ularning ma'lum qismi harakat zamirida voqe bo'lsa, ma'lum qismi faqat so'z zamirida qurilgandir. Shu xususiyatiga ko'ra ularni **HARAKATLI** o'yinlar va **MA'NAVIY (so'z)** o'yinlari tarzida ikki guruhga ajratish mumkin.

Harakatli o'yinlar tarkibi va vazifasiga ko'ra ma'naviy (so'z) o'yinlaridan tubdan farq qiladi. Ular hamisha kompozitsion tuzilishiga ko'ra uch qismdan iborat holda tarkib topishgan. Bular tubandagicha: *1. Muqaddima qismi.* Buni debocha yo boshlamalar ham deyish mumkin. Muqaddima shovqin bilan aytiladigan yoki kuylanadigan chorlamalar, cheklashmachoqlar va sanamalarni o'z ichiga oladi. Bularning har biri mustaqil folkloriy hodisa bo'lib, muqaddimaning janriy tarkibini tashkil etadi. *2. O'yinning o'zi.* *3. O'yin intihosi yoxud yakuni.* Bunga tarqalmachoq janri kiradi. Shuni ta'kidlash joizki, bunday tarkibiy tuzilish ma'naviy (so'z) o'yinlar uchun emas, balki harakatli o'yinlar



uchungina xos mushtarak xususiyatdir. Bolalar qalbi qo'shiqqa shu qadar oshuftaki, ular hatto faoliyatlarida asosiy o'rinda turuvchi o'yinlarini ham qo'shiq bilan ziynatlaganlar. O'ynagani bir-birlarini qo'shiq aytib chaqiradilar, bunday badihalar **CHORLAM**alar deb yuritiladi. Chorlamalar bolalarning bir-birlarini o'yinga chaqirish jarayonida kechinmalarini vaziyat taqozosiga bog'liq holda ifodalaydi vahamisha o'yinga da'vat etish, chaqirishdan iborat vazifasini bajaradi:

- Bacha, bacha, bozi,
Kim qora qozi?
Kim o'yinga chiqmasa,
Bo'yniga tosh tarozi!

Yoki:

Bacha bo'lsang, kelaver, O'ynab, o'ynab ketaver.
Kel-ho, kel, Kel-ho, kel.

Ikkala chorlama ohangi ham yolg'iz bolaning ko'cha bo'ylab sakrab-sakrab chopish harakatiga mos. Dastlabkisida o'tmishdagi turmushga xos adolatsizlikka kinoya motivi ustuvor: lirik qahramon o'yinga chorlovchi hakamlik qiluvchi qozining qora ishini qilmaslikdan ogohlantirayotir: "*Kim qora qozi*". Shuncha chorlasa-da, o'yinga chiqmayotganlarni o'sha zamon kattalarisingari qarg'ayapti: "Bo'yniga tosh tarozi". Chorlamada o'tmishdagi og'ir hayotning bolalarni muddatidan ilgari kattalarday mulohaza yuritishga, kattalarday gapirishga, qarg'ashga majbur qilganligi in'ikos topgan. Shu xususiyatiga ko'ra unda zamon ruhi, ijtimoiy hayot ruhi tarixan muhrlangan. Ikkinchisida esa, bunday ruh yo'q, unda quvnoq kayfiyatga yo'g'rilgan chorlov motivi ustivor. Hayqirib, baqirib- chaqirib, shovqin solib kuylash barcha chorlamalar uchun mushtarak xususiyatdir.

O'zbek bolalar o'yinlari tashkil etilish tartibiga ko'ra, ikki yo'nalishga ega:



Birinchi yo'nalishdagi o'yinlarda bolalar o'zaro ikki raqib tarafga bo'linmoqlari taqozo etiladi, bu vazifani o'yin muqaddimasi sifatida cheklashmashoqlar vositasi hal qiladi.

Ikkinchi yo'nalishga mansub o'yinlar esa, bolalar raqib tomonlarga bo'linmaydi, balki faqat navbat (gal)da turuvchini aniqlash asosida tashkil etiladi. Navbatda turuvchi esa o'yin muqaddimasi vazifasini bajaruvchi sanamalar vositasida aniqlanadi.

CHEKLASHMASHOQLAR. O'zbek bolalari orasida shunday o'yinlar ko'pki, aksariyati jiddiy musobaqa xarakteriga va ichki qonun-qoidalarga ega. Bolalar shu qonun-qoidalarga g'ayriixtiyoriy tarzda amal qiladilar va bu jarayonda ichki intizom, tartiblilik va o'ynash huquqi mas'uliyatini sezish ruhida tarbiyalanadilar. Bunday ichki qoidalardan biri - o'ynagani to'planishgan bolalarni ikki raqib guruhga taqsimlash masalasidir. Bu jiddiy masala bo'lib, bolalar uni aniq ichki intizom, tartib va quvnoqlik bilan hal qilishda cheklashishga amal qiladilar.

Cheklashish xalqimiz orasida qadimdan ma'lum. M.Qoshg'ariy "cheklashdi" so'zining "qur'a tashlash" ma'nosi borligini qayd etgan. O'tmishda qur'a tashlab tole sinashgan, fol ochib taqdirni oldindan bashorat qilganlar. Folbinlar faoliyatida qur'a tashlab fol ochish an'anasi hamon uchraydi. Qur'a tashlash hozirgi zamon sportida ham keng qo'llanilmoqda. Bu o'yindagi cheklashish asosida yuzaga kelgan.

Cheklashish bo'lajak ikki raqib guruh onaboshilari tanlangandan so'ng amalga oshiriladigan o'yin muqaddimasi bo'lib, ko'p hollarda qur'a tashlash yo'li bilan hal qilinishi an'anaviydir.

Cheklashmashoqlar odatda ikki bolaning o'zaro yashirinchilik kelishuvi - til biriktirib o'zlariga yasama "ot qo'yish"lari asosida yuzaga keladi. Bu ular va onaboshi o'rtasidagi savol-javobning sirliligini ta'minlaydi. Cheklashmashoqlar aksaran onaboshiga murojaat qilish bilan boshlanadi.



- Matti, matti,
- Kimning navbati?
- Meniki.

(Onaboshilardan biri):

- Toji tillo xo'rozni olasanmi
- Yo chala mullo tovuqnimi?
- Toji tilla xo'rozni!
- Men-toji tillo xo'roz.
- O't men tomonga.

Bunday cheklashmachoqlar murojaat va savoldan iborat bo'lishsa-da, savol hal qiluvchi ahamiyatga ega. Savollar to'liqsiz gap shaklida bo'lib, hamisha ikki qismdan tashkil topadi va o'zaro so'roq intonatsiyasi asosida yo, yoki, yoxud bog'lovchilari vositasida bog'lanadi:

- Ho'ppoqni olasanmi, yo so'poqni?
- Tayloqni olasanmi, yo toychoqni?

Murojaat shunchaki onaboshiga qaratilgan bo'lmay, balki uning tashqi ko'rkinini tavsiflash motiviga ham ega:

- Onaboshi, onaboshi, Yigitlarning qalamqoshi.
- Nima yeysan, ne olasan? Atalami? Palov oshi?

Bunday hollarda murojaat va savolni "Nima yeysan?", "Ne olasan?", "Kimni olasan?" singari qo'shimcha savollar o'zaro bog'laydi, shu asosda savolning so'roq ohangi yanada kuchaytiriladi:

- Boshla boshiq,
- Qalam qoshiq.
- Kimni olasan,
- Tovuqnimi? Xo'roznimi?

Ko'rinadiki, bolalar cheklashishni ta'minlagan barcha sirli nomlarning o'zaro mutanosibligiga ahamiyat berganlar. Bu



cheklashmashoqlarda poetik fazilatni kuchaytirgan, ular estetik zavqini tarbiyalovchi vositaga aylantirgan.

SANAMALAR. Bular behad keng tarqalgan o'yinboshi badihalari bo'lib, asosiy vazifasi - o'yin boshlanishi oldidan uni boshlab beruvchini, navbatda turuvchini aniqlash, biror bola galini tayinlashdan iborat. Sanamalar butun o'yinga kompozitsion asos bo'lolmasa-da, muqaddima sifatida uning tarkibiy uzvini tashkil etadi va o'sha o'yinning yo'nalishiga poydevor soladi. Bu ma'sul vazifa sanamalarda raqamlarni "poetik raqsga tushirish", so'z yoki so'qma (ma'nosiz) so'zni raqam o'rniga qo'llab, sanash intonatsiyasida qo'llash asosida ritmik o'ynoqilikka erishish negizida amalga oshiriladi. Bunda sanamalarining leksik xususiyati qanchalik bo'rtib ko'rinsada, ularni ritmik ohangdorlikdan xoli holda tasavvur etish yaramaydi. Shu xususiyatiga ko'ra sanamalarining uch turini farqlab ko'rsatish mumkin:

1. *Voqeaband sanamalar.* Bu turga mansub sanamalar asosini sanash ritmiga omuxta sujet tashkil etadi. Bunday sujetlar mo'jazzgina bo'lib, bir-biriga mantiqan bog'langan ikki-uch harakatnigina ifodalaydi. Harakatning mantiqan izchil tartibi sanash ohangini yuzaga keltiradi.

Ko'pincha birdan yettigacha, birdan o'n ikkigacha va birdan o'n oltigacha bo'lgan raqamlar faol qo'llanadi. Biroq birdan ikkigacha, uchgacha, to'rtgacha.. yettigacha va nihoyat, ba'zan o'ngacha to'liq sanalsa-da, qolgan hollarda ritmik ehtiyoj va qofiya ohangdoshligi talabiga ko'ra sakrab o'n, o'n ikki, o'n olti sanog'i aytib ketilaveriladi:

Bir, ikki.. aylana,
Aylanaga kir yana.
Anqov bo'lma, ey o'rtoq,
Doving keladi yana.

Yoki:



Bir, ikki,... o'n,... o'n ikki,
O'n ikki deb kim aytdi?
O'n ikki deb men aytdim, Ishonmasang, sanab boq:
Birim - bilak, Ikkim - elak.
Uchim - ichak,
To'rtim - terak.
Beshim - beshik Oltim - olganim, Yettim - yetganim.
Sakkizim - jonon qizim, To'qqizim - qizil yuzim.
O'nim - ishimdagi unum, O'n birim - aytilgan sirim,
O'n ikkim - chiqa tur san, ukkim!

2. *Kumulyativ sanamalar.* Uch-o'n ikki yashar bolalarning fikrlashlari va uni bayon etishlari ayni holatdagi kayfiyatlariga bog'liq ravishda turlicha kechishi psixologik jihatdan asoslangan.

Bolalar o'yin jarayonidagi zavq-shavq ta'sirida mantiqsizliklarga tabiiy ravishda yo'l qo'yadilar: hayajonlanib, quvonchlarga to'lib-toshib o'z fikrlarini poyma-poy so'z va iboralar vositasida ifodalashdan huzurlanadilar. Bu hol sanamalarning kumulyativ turida chuqur iz qoldirgan. Zotan, ular bolalarning o'yin boshlashdan hayajonlanishlari oqibatida sochilib ketgan fikr-tuyg'ularining mantiqan bog'lanmagan so'z va iboralarda ifodalana turib, sanash ritmiga qat'iy buysungan holda poetik ohangdorlik kasb etib tizmalanishi, to'planishi tufayli yuzaga kelgan an'anaviy o'yin badihalaridir. "Kumulyativ" so'zi bu xildagi sanamalarning yetakchi xususiyati - tartibsiz va mantiqsiz so'zu iboralarning sanash ritmida to'planishini to'la aks ettiradi, shu sababli ularni kumulyativ sanama istilohi bilan alohida guruh sifatida o'rganish maqsadga muvofiq:

Avag-avag, Boy talog'i, Do'stim tavak. Boy kuchugi. Shoh ho'kizi, Qachon kelar? Shoh kapalak. Yozi kelar. Turna qaro, San tur, Tur kuchugi. San chiq!

Shu holatida sanamada yaxlit bir manzarani tasavvur etishda nimadir yetishmayotganday, sintaktik tuzilishi sanash



ritmida bo'lganidan mantiqdorlik bir qadar chekinganday. Shunga qaramay, unga hayvonlar, qushlar va hasharotlarni ifodalovchi epitets obrazlar tizilishib kelgan. Bolalar shunday obrazlar vositasida tabiatga munosabatlarini ham yashirmaydilar. Ular tushunchasidagi "shoh ho'kizi", "shoh kapalak" obrazlari o'sha hayvon va hasharotning shohga qarashlilikini anglatmaydi, balki "ho'kizlar shohi" - eng zo'ri, yaxshisi, "kapalaklar shohi" - eng chiroylisi, go'zali" ma'nolirini ifodalab, bolalarning estetik didlari andozalarini namoyon etadi.

3. *So'qma sanamalar.* Bu xildagi sanamalarning farqli xususiyati shundaki, bularda voqeabandlik (sujet) yo'q, raqam, ma'noli so'z butkul chekingan, faqat so'qma (ma'nosiz) so'z hal qiluvchi poetik mohiyat kasb etgan.

Bolalar nutqida o'zlarini o'rab olgan olamdan, "o'z imkoniyatlari darajasida idrok etilgan va yangilangan" tovushlardan so'z shaklida tovush birikmalari paydo bo'ladi. Ular hech qanaqa ma'noga ega bo'lmasa-da, ohangdorligi jihatidan bolalar qalbiga yaqindir, ularning olamga munosabatlarini ifodalovchi o'ziga xos vositalardir. Shu sababli bunday tovush birikmalarini so'qma so'z tarzida nomlash an'anaga aylangan. *So'qma so'z, aniqrog'i, so'z shaklidagi tovush birikmalari nomi bo'lib, har xil hodisalarni yopadi.* Bolalar idrok etgan olamni tovushlar ohangdorligi silsilasida ifoda etadi.

So'qma so'zning sanamalar "qurilish materiali"ga aylani-shi janrning to'la- to'kis bolalar repertuariga o'tishi, kattalar ijodkorligiga xos raqamlarga sig'inish an'alaridan batamom tozalanib, bolalar ijodkorligi namunasiga aylanganligini tasdiqlovchi muhim dalildir. Shu ma'noda, so'qma sanamalar janrning takomillashgan turi sifatida bolalar poetik folklori arsenalini boyitdi va bugungi kunda ham faol ijod qilinmoqda:

Abadayni,

Shabadayni, Shab-shabadayni. Dumala qoq, San chiq-u boq!



Sanamalar o'zbek bolalar folklorining qadimiy va g'oyat keng tarqalgan, bugungi kunda ham faol davom etayotgan janri hisoblanadi. Hech bir janr bolalarda ritm tuyg'usini tarbiyalashda unga tenglasha olmaydi. Shu xususiyatiga ko'ra, u bolalar shoirlari va bastakorlari diqqatini tortib, badiiy janrga aylanish jarayonini kechmoqda. Samuil Marshak, Daniel Xarmslar rus bolalar poeziyasida sanamalarning ko'rkam adabiy namunalari yaratgan bo'lsalar, M. A'zam, T.Adashboyev, Anvar Obidjon, Q.Uzoqovlar uni o'zbek bolalar poeziyasi arsenaliga kiritish yo'lida izlanmoqdalar. Bu o'zbek bolalar adabiyotining folklor bilan ijodiy uyg'unlashuvi jarayonining istiqbol omili hisoblanadi.

HARAKATLI O'YINLAR. Bu xildagi o'yinlarni yuzaga keltiruvchi vositalar turlicha namoyon bo'ladi, qay birida narsa (o'yinchoq) harakatni yuzaga keltirib boshqarsa, qay birida faqat so'z bu vazifani ado etadi. Shu xususiyatiga ko'ra ularni uch ichki turga bo'lib o'rganish mumkin:

4. *Sof harakatdan iborat o'yinlar.* Bularni taqlidiy o'yinlar deyish ham mumkin, chunki ularda harakat narsa yoki so'z vositasida emas, balki taqlid negizida yuzaga keladi. "Almash qadamlar", "Sirg'anchiq yoki toyinishma", "Ona tovuq va hakka", "Jik-jik", "Duk-duk", "Shax-shax", "Quvlashmachoq" va boshqa shu xildagi o'yinlarda harakat u yo bu hodisaga taqlid zamirida voqelikka aylangan.

Sof harakatdan iborat o'yinlarning aksariyati maktabgacha va kichik maktab yoshidagi bolalarga mosligi bilan ajralib turadi.

5. *Harakatni narsa boshqaradigan o'yinlar.* Bu guruhga mansub o'yinlar kichik maktab yoshdagi va o'smirlarga mos bo'lib, ularda harakatni tuproq, loy, toshcha, tanga, ishti, oshiq, danak, yong'oq, ro'molcha, chillak va chillakdasta, lanka, to'p, koptok, qo'g'irchoq, sopol va metall hushtaklar, yog'och g'ildirakli itarma aravachalar, g'arg'ara, kamon, soqqa, varrak, parrak, suv solib puflaydigan sopol bulbulchalar, govg'altaklar,



hallo'ngi, turli-tuman o'yinchoqlar yuzaga keltiradi hamda boshqaradi. Shunisi muhimki, o'tmishda bu o'yinchoqlarning aksariyatini bolalarning o'zlari yasashgan, yo'ngan, tikkan, xullas, tayyorlashgan.

Harakatni narsa boshqaradigan o'yinlar silsilasini "Besh tosh", "To'p tosh", "Ishti", "Hango'z", "Kalpo'shto'ppi", "Urib qochar", "O'rtada o'tirish", "Oldim", "Kim echki?", "Tandir-mandir", "To'pdan saqlan", "Qalpoq tepdi", "Chillak", "Qol-qolak", "Baynol", "Laxtak va laxtakboz", "O'ra koptok", "Salavot", "Chillim kes", "Tizma", "Qocharma", "Jambul", "Quloq cho'zma", "Ko'zbog'log'ich", "Podsho-vazir" va boshqalar tashkil etadi. Bu o'yinlarning har birida bir narsa, aytaylik, toshcha, koptok, qalpoq, chillak, ro'mol va hokazolar harakatni yuzaga keltirishga xizmat qilishdan tashqari, o'sha harakatni boshqarib turadi.

XX asrning o'rtalaridan e'tiboran zavod-fabrikalarda ishlab chiqarila boshlangan "madaniy" o'yinchoqlar vositasida o'ynash rusumga kira bordi. Futbol, voleybol, basketbol singari sport xarakteridagi o'yinlarning tobora ommalasha borishi - bolalar o'rtasidagi xalqona o'yinlarni siqib chiqara boshladi. Bunda o'zbek xalq o'yinlariga eskilik sarqiti qabilida qarashni targ'ib qilgan sho'ro mafkurasi ham ma'lum darajada hissa qo'shdi. Qolaversa, texnik tafakkur taraqqiyotiga monand "Konstruktor", aviaplanerchilik va boshqa shu xildagi o'yinlarning bolalar faoliyatiga kirib borishi ular aqliy olamining o'zgarishiga ta'sir ko'rsatmay qo'ymadi.

6. *Harakatni so'z boshqaradigan o'yinlar.* Bu turdagi o'yinlar tarkibiy tuzilmasida qo'shiq muhim uzvga aylangan. U o'yinda harakatni yuzaga keltiradi va butun o'yinni boshqaradi, aniqrog'i, qo'shiq yo o'yin kompozitsiyasining asosini tashkil etadi, yo o'yin yo'nalishida biror vazifani bajaradi. Shu xizmati bilan u o'yin estetik qimmatini oshiradi va folkloriy ruhini kuchaytiradi.

Jumladan, "Oq terakmi - ko'k terak?" o'yin-qo'shig'i bu jihatdan yorqin misol bo'la oladi. Bu o'yin-qo'shiq bolalar



repertuarida uzoq zamonlardan beri o'ynalib kelinadi. Shunga ko'ra uning verbal qismi bo'lgan qo'shiqlari zamon ruhiga yo'g'rilgan holda xilma-xil variantlarda uchraydi. Biroq o'yinning ijro tartibi hamma zamonlarda ham bir xilligicha davom etib kelayotir. Unda to'plangan bolalar dastlab ikki onaboshini belgilab, so'ngra cheklashmachoq vositasida ikki raqib tarafga ajraladilar. Bunda o'yinchi bolalar sonining teng bo'lishiga ayricha e'tibor qilinadi.

Taraflar o'zaro ro'para turib, har biri alohida saflangan holda tizilishadi. Safdagilar esa bir-biri bilan o'zaro qo'lma-qo'l ushlab, o'zlaricha "devor" hosil qilishadi. Shunda gal olgan taraf raqib tarafdagilardan xor bo'lib so'rashadi:

Oq terakmi, ko'k terak,
Bizdan sizga kim kerak?

Yoki:

Qamar-qamar, qamchini,
Qovurg'aning yanchini.
Oq terakmi, ko'k terak,
Bizdan sizga kim kerak?

Raqib tarafdagilar ham shu ohangda xor bo'lishib, shunday javob qaytarishadi:

-Kichkina Karim kerak!

Yoki:

-Jilmayibgina turgan,
Bo'tako'z Zumrad kerak!

Odatda qarshi taraf kichikroq, kuchsizroq yoki o'zlariga yoqqan bolani da'vat etishi an'anaviydir. Shu sababli da'vat etuvchi bola nomi turlicha sifatlanmog'i mumkin, biroq bu javob satri ritmining savol satrlari ritmiga mos bo'lishiga mone'lik qilmasligi lozim. Da'vatlangan bola esa, raqib taraf safini yorib o'tish niyatida shiddat bilan chopib borib, ko'ksi bilan bir-birini



ushlab olgan qo'llar "arqoni"ni "kesib" o'tmog'i shart; agar u kesib o'ta olsa, g'olib sanalib, o'zi kesib o'ta bilgan "arqon"ni hosil qilgan qo'llar egalaridan birini yetaklab keladi va o'z safiga qo'shadi; aks holatda esa uning o'zini mag'lub sifatida qarshi tarafdagilar o'z safida saqlab qolishadi. O'yin to bir taraf safi tugagunicha davom etaveradi. O'yin tartibi va ijrosiga xos qoidalar hamon qat'iyigicha qolgan; safni yorgan-g'olib, yorolmagan - mag'lub. Eng muhimi, safni yorishi zarur topilgan bola qarshi tarafning kuchsiz joyini mo'ljallay olishga, o'sha joynigina yorib o'tishga o'z kuchi yetishini his qilishga, demak, aniq mo'ljal ola bilishga va o'z kuchiga ishonch hosil qilishga ham o'rganadi.

Topishmoqlar xalqning turmush tarzi va qadimiy e'tiqodlari ifodasi sifatida yuzaga kelgan. Ular shartli nutq natijasida qadimiy ajdodlarimizning ibtidoiy animistik va totemistik qarashlari shakllana boshlagan davrlarda -"insoniy shuur endigina uchqunlana boshlagan zamonlarda" (F.I.Buslayev) paydo bo'lgan. Qadimgi ajdodlarimiz tabiat stixiyasi oldidagi ojizliklari tufayli narsalarni, odamlarni, hayvonlarni, qushlarni o'z nomlari bilan aytmay, ularni g'ayritabiiy kuchlar zararidan, insu jinslar va balo-qazolardan omon saqlashni ko'zlab, boshqa so'zlar bilan pardali qilib ayta boshlashlari tufayli ilk topishmoqlar yuzaga kelgan, buning izlarini hozirgi o'zbek topishmoqlarida ham kuzatish mumkin, aytaylik, otani - nor, momoni - tuya, echkini - Abdukarim, quyonni - uzunquloq, itni - shalpangquloq, ko'zni - darcha, bug'doyni - qizil deb atalashida o'sha sirlilik nishonalari mavjud.

Predmetli topishmoqlarda yashiringan aniq narsaning individual xususiyatlari lo'nda, siqiq, sodda va tushunarli tarzda badiiy so'z vositasida chizib beriladi. Ularda borliqdagi narsalarning o'zaro o'xshashligi va yaqinligi to'g'risida ma'lumotlar beriladi. Shu ma'lumotlar yordamida inson tevarak-atrofidagi narsa- hodisalarning serqirraligini his qiladi.



Predmetli topishmoqlarda yashiringan narsaning miqdori muhim rol o'ynaydi. Shu xususiyatiga ko'ra topishmoqlar ikki turkumga ajratiladi:

1. *Bir predmetli topishmoqlar.* Bu xildagi topishmoqlarda birgina narsa jumboqlanadi: jumboq ham bitta, javob ham bittadir: "Bossang, vaqillaydi", "Jar boshida jarti supra" topishmoqlari birgina satrdan iborat holda jumboqlangan va "baqa" hamda "quloq" singari birgina javobga ega. Bunday topishmoqlar ikki, uch, to'rt satrli bo'lishi ham mumkin. "Oy"ni yashirgan "Bir parcha patir - olamga tatir" ikki satrli; "baliq"ni yashirgan "Suv ichar ko'ldan, ko'zlari nurdan, terisi puldan" uch satrli va "toshbaqa"ni yashirgan "Beli, beli belang ot, Beli qalin yo'g'on ot, Tog'u toshdan yumalab, Tura kelar to'rig' ot" to'rt satrli bo'lsa-da, bir predmetli topishmoqlardir. Chunki ulardagi har bir satrda yashiringan narsaning bir belgi- xususiyati ta'rif, yo tavsif qilingan. Biroq aslida birgina narsani jumboqlagan, bir necha mustaqil topishmoqlar o'zaro birlashib, bir butunlik hosil qilishgan bo'lsa-da, biribir, birgina javobga ega bo'lib, bir predmetli topishmoqligicha qolavergan:

Chopsa - chopilmas,

Bo'lsa - bo'linmas,

Kessa - kesilmas,

Ko'msa - ko'milmas,

Yo'nsa - yo'nilmas.

Besh satrning har biri mustaqil topishmoq sifatida "soya" hodisasini yashirganidek, bir butun holatida ham shu yagona javobga ega. Bu xildagi topishmoqlar sodda topishmoqlar, deb ham yuritiladi.

2. *Ko'p predmetli yoki murakkab topishmoqlar.* Yuqorida ko'rilganidek, hamma birlashgan topishmoqlar ham bir predmetli bo'lavermaydi. Aytaylik:

Tog'da talaymonni ko'rdim, Suvda sulaymonni ko'rdim.
Tuzsiz pishgan oshni ko'rdim, Yumalab yotgan toshni ko'rdim,-



topishmog'ining har bir satri mustaqil bir jumboq bo'lib, ko'p predmetlilik xususiyatini kasb etgan. Bu murakkab topishmoqda bir yo'la to'rt narsa - bo'ri, baliq, sumalak va toshbaqa jumboqlangan. Har bir bayti alohida topishmoq shaklida ham aytilishi mumkin, faqat saj'lanish asosidagi ohangdoshlik baytlarda bir butunlikni yuzaga keltirib, kompozitsion yaxlitlikni ta'minlagan.

Kuzatishlar shuni ko'rsatadiki, aslida topishmoqlar har gal bir predmetli shaklda jumboqlanib yuzaga kelgan esa-da, og'zaki ijro jarayonida vaqt o'tishi bilan yangi-yangi jumboqlanishlar evaziga murakkablasha borib, ko'p predmetlilik xususiyatini kasb etishgan: "Chaqaloq" qachonlardir "Og'zida bor ozig'i" tarzida bir predmetli topishmoq holda jumboqlangan, keyinchalik beshik paydo bo'lib, sumakdan foydalanish odatga kirgach, ikkinchi predmet ham yondosh holda jumboqlana boshlangan, natijada topishmoq yana to'lisha borgan:

Og'zida bor ozig'i,

Tagida bor qozig'i.

Davr o'tishi bilan "beshik", "ko'krak" va "tuvak" ham jumboqlanib, topishmoqning yanada murakkabroq namunasiga aylangan. Bunda jumboqlangan predmetlarning mantiqan o'zaro aloqadorligiga e'tibor berilgan:

Taqir-taqir taqirmon, uni toping, dilbarim.

Ichida bor mehribon, uni toping, dilbarim.

Og'zida bor ozig'i, uni toping, dilbarim. Tagida bor qozig'i, uni toping, dilbarim. Qozig' osti xurmacha, uni toping, dilbarim.

Ko'p predmetli topishmoqlar goho birgina savoldan iborat bo'lgani holda bir necha javobni talab qiladi: Dunyoda to'rt narsa yo'q.

Javobi:-Osmonning ustuni yo'q,

Hovuzning qopqog'i yo'q.

Ko'rpaning yengi yo'q, Oshpichoqning qini yo'q.



Ko'p predmetlilik topishmoqlarning eng murakkab turi chaldirmoqni yuzaga keltirgan. Chaldirmoqlar ham she'riy, ham nasriy shakllarda uchraydi. Nasriy chaldirmoqlar esa ertak, yoki masala shaklidadir: "Bir to'da g'oz uchib borar ekan.

Bir g'oz kelib: "Ey yuz g'oz, salomat bormisiz?" - debdi. Unda to'dadagi g'ozlardan biri aytibdi: "Biz yuz g'oz emasmiz, yana biz miqdori g'oz bo'lsa, yana bizning yarmimiz miqdori va yarmimizning yarmi bo'lsa, o'shanda sen ham qo'shilsang - yuz g'oz bo'lamiz". Havodagi g'ozlar qancha ekan? Masala tipidagi bu chaldirmoqning javobi: $36 + 36 + 18 + 9 + 1 = 100$.

Topishmoqlarda xalq turmushining barcha qirralari ifodalangan: ularda ijtimoiy davr va vaqt tushunchasi mavjud. Shu xususiyatiga ko'ra ularning qachon yaratilganini belgilash va o'sha davr voqeligiga baho berish mumkin: "Bit"ni yashirgan "Abdullaxon - beustuxon" topishmog'ida xalqqa og'ir jafolar ko'rgazgan XVI asrdagi Buxoro amiri zolim Abdullaxon I obrazi yaratilgan. Ijtimoiy tengsizlikka nafrat ifodasini Andijonda yashagan mashhur isqirt boy Samatjonga munosabat asosida yaratilgan "sichqon" haqidagi tubandagi topishmoqda ham ko'rish mumkin:

Tokchama-tokcha, Samatjon boyvacha.

O'zgalarni ezish hisobida dunyo orttirgan tekinxo'r Samatjon boyvachchaning sichqondan nima farqi bor? Topishmoqdagi ijtimoiy motiv mohiyatini ana shu istehzo tashkil etadi.

Yaratilish davri va mazmuniga ko'ra topishmoqlarni ikki guruhga ajratish mumkin:

An'anaviy topishmoqlar - xalqning uzoq o'tmishiga daxldor topishmoqlar silsilasi. Ularda ajdodlarimizning butun moziy davomidagi turmush tarzi, ijtimoiy- estetik qarashlarini ifodalovchi narsa va hodisalar jumboqlangan. Aytaylik, qachonlardir topishmoqlar kishilar o'rtasidagi ijtimoiy-siyosiy, ma'naviy-madaniy munosabatlarni aniqlashda vositachilik vazifasini bajargan. O'shanda topishmoqlar hozirgidek ma'naviy



o'yin xarakterida bo'lmagan, balki aqlni, kuch-g'ayratni sinovdan o'tkazish sharti sifatida xizmat qilgan. Topishmoqlar yordamida el-u yurtga boshliq (podshoh) tanlangan, jang-u jadallarda urushuvchi tomonlar lashkarboshlarining topishmoqqa bergan javobining to'g'ri yo noto'g'riligiga qarab, g'olib belgilangan va ortiqcha qon to'kishlar oldi olingan. O'shanda topishmoq javobini topolmagan tomon "shahar berdim" deb yengilganini tan olgan va g'olib istagan shahar, yo qishloqni o'z mamlakatiga qo'shib olgan. Hozirgacha topishmoq shartini topolmay yutqizganda "shahar berdim" deyishlari shundan qolgan. Hatto yigit-qizlarning bir-birlariga munosib umr yo'ldoshi tanlashlarida ham topishmoqlar bo'lajak kuyov uchun aql sinovi shartiga aylangan. Bu mulohazalarni xalq og'zaki ijodidagi ayrim afsona va ertaklar ham tasdiqlaydi. Chunonchi, yunonlarning Sfinks haqidagi afsonasida aytishilicha, dono Edip maxluq bergan topishmoqqa to'g'ri javob topgani tufayli nafaqat omon qoladi, balki boy va g'oyat go'zal Fiva shahriga hukmdor etib tayinlanadi. Yoxud, o'zbek xalqining "Dono qiz" ertagida podsho o'zi uylanmoqchi bo'lgan qizning aqlu zakovatini topishmoq orqali sinagach, so'ngra, unga uylanishga azm etganligi ifodalansa, qator sehrli ertaklarda bosh qahramon yovuz devlarni, jodugar kampirlarni topishmoq orqali mag'lub etib, o'z niyatiga erishganligi aks etgan. Xullas, an'anaviy topishmoqlar qadimiy qadriyatlarimizning betakror badiiy namunalari hisoblanadi, ulardan o'tmishdagi ajdodlarimizning ijtimoiy hayotdan orttirgan asriy tajribalari, tevarak-atrof va borliqqa doir fikr- mulohazalari, mushohadalarini bilib olish mumkin.

Yangi topishmoqlar. Bular bevosita an'navay topishmoqlar ta'sirida yaratilgan bo'lib, ularga xos an'anaviy shakl, badiiy usullar va jumboqlanish uslubini, asosan, saqlab qolgan. Ularda hamisha zamonaviy mavzuga murojaat yetakchilik qiladi. Bu esa topishmoq janri qismatida davomiylilikni ta'minlagan omil hisoblanadi.



Ularni aytishda xalq muayyan tartib-qoidaga, taqvimga rioya qilgan, chunki topishmoqlarni magik soʻz hosilasi deb tushungan. Chunonchi, ruslar xristianlik eʼtiqodiga koʻra, Iso tugʻilgan kunga bagʻishlab 25- dekabrda 5-6- yanvargacha oʻtkazadigan ikki haftalik “svyatki” bayrami davomida topishmoq aytishsa, oʻzbeklar va tojiklarda dehqonlar kuzgi yigʻim-terimni tugatgach, qishning uzun kechalarida aytishgan. Kunduzgi ishga xalal bermaslik uchun topishmoqni kunduz kuni aytish taʼqiqlangan. Ajdodlarimiz bugʻdoy koʻkarib unib-oʻsayotganda, daraxtlar gullab, meva tugayotganda, hayvonlar qishki uyqudan uygʻonganda ular haqida topishmoq aytilsa, topishmoqlarda taʼriflansa, ularga yovuz kuchlar hasad qiladi va zarar yetkazadi, deb irim qilishgan. Qishda esa yovuz kuchlar ham tirik tabiatni oʻlgan gumon qilib, uyquga ketgan, deb hisoblashgan. Shunday tasavvur va qarashlar topishmoq aytish taqvimini yuzaga keltirgan.

Topishmoqlar yozma badiiy adabiyotga ham samarali taʼsir koʻrsatib, mumtoz sheʼriyatda *lugʻz*, *chiston*, *muammo*, *taʼrix* va *muvasshah* singari janrlarning yuzaga kelishiga taʼsir koʻrsatgan boʻlsa, XX asrda oʻzbek bolalar sheʼriyatida adabiy topishmoqlar yozishning anʼanaviy tus olishini taʼminladi. Bu sohada Jahon otin Uvaysiy, Gafur Gulom singari zabardast shoirlar boshlagan anʼanani Shukur Saʼdulla, Ilyos Muslim, Adham Rahmat, Poʻlat Moʻmin, Safar Barnoyev, Tursunboy Adashboyev, Rauf Tolib va S.Gʻafurov singari bolalar adabiyotining turli avlodiga mansub ijodkorlar davom ettirmoqdalar. Ayniqsa, ulkan bolalar shoiri Quddus Muhammadiyning sheʼriy-adabiy topishmoq janridagi ijodiy izlanishlari gʻoyat samaradorligi bilan eʼtiborga loyiq. Shoir “Toping-chi?”, “Viz-viz”, “Oʻylab top”, “Buni toping bolalar, aytib bermang onalar” singari sheʼriy adabiy topishmoqlarida xalq topishmoqlariga xos anʼanaviy unsurlarni istifoda etish bilan cheklangan boʻlsa, “Militsioner amakim” asarida xalq posbonlariga xos xususiyatlarni jumboq holidagi taʼriflash



asosida kasbni sir tutadi va sharaflowchi ma'no beradi. Natijada, she'rning har bandi - bir jumboq tusini oladi. Olti band - olti jumboq shaklida jamlanib, yagona umumlashma poetik g'oyani aks ettiradi. Har bir bandda el soqchilarining ma'lum bir fazilati ta'riflanib, shu ta'riflarning kimga taalluqliligi sir tutiladi. Bunday jumboqning javobi har bir bandagi so'nggi misrada ochiladi:

Qomatiga kelishgan forma, pagoni,

Yonboshida charm, qinda nagani, Yigitlar arsloni, man-man degani, Bolalarim bilasizmi? Ayting kim? - Kamar taqqan militsioner amakim!

Shu zaylda shoir topishmoq janri kompozitsion tuzilishidan ijodiy foydalanib, she'riy adabiy topishmoqning yangi ichki namunalarini yaratishga muvaffaq bo'ldi.

Binobarin, xalq topishmoqlari qatorida bu xildagi adabiy topishmoqlardan ham yosh avlodga ta'lim va tarbiya berishda, didaktik va axloqiy maqsadlarda keng va samarali foydalanilmoqda. Topishmoq endilikda tom ma'noda, bolalar ma'naviy mulkiga aylandi va ularni hozirjavoblikka, topqirlikka, narsa va hodisalar mohiyatini teran anglashga, sezgirlik va sinchkovlik bilan kuzatishga o'rgatish uchun xizmat qilmoqda.

TEZ AYTISHLAR. O'zbekistonning turli joylarida "tural", "chalg'itma", "chalg'ituv", "chalish", "adashish" deb yuritiladigan bu folklor hodisasi keng tarqalgan. Tez aytish istiloh sifatida janrning birgina xususiyatini - bir nafasda shiddat bilan aytilishinagina ifoda etsa-da, tez aytishdan kuzatiladigan maqsad nimaligini anglatmaydi. Shunday cheklanganlikka egaligiga qaramay, ruscha "skorogovorka" istilohining tarjima ekvivalenti sifatida ilmiy taomilga singib ketgan.

O'zbek tilida mavjud turli atamalarda tez aytishdan kuzatiladigan ikki maqsad bo'rtib ko'rinib turadi: birinchisi, tez aytishdan murod - chalg'itish. So'zda chalish, yoki adashish deyilishi shundan. Ikkinchisi, tez ayta turib chalishish - tutilishga teng. Shu sababli tural deyilgan. Biroq chalg'itish ham, chalishish



ham, adashish ham, tutilish ham o'xshash tovushlardan iborat so'zlar, aniqrog'i, alliteratsiya zamiridagi so'zlar qatorini shiddat bilan bir nafasda aytish negizida voqe bo'lganligi tufayli tez aytish yetakchi xususiyatga aylanib, folklor hodisasini ifodalovchi istiloh darajasida barqarorlik kasb etgan.

Tez aytishlar aslida kattalar og'zaki ijodiga xos bo'lsa-da, mohiyatan bolalar nutqidagi kemptikliklarni bartaraf etishga qaratilgan. Bolalar tez aytish vositasida o'z ona tillaridagi tovush va so'zlarni ravon, burro, ochiq talaffuz etishni, tovushlarning ohangdorligini, so'zlarning nozik ma'no tovlanishlarini his va idrok qilish, anglash hamda ilg'ab olishni mashq qiladilar. Shu ma'noda ular tovush va so'z ustidagi poetik-mantiqiy mashqlar hisoblanadi.

Tez aytishlar bolalar ma'naviy ehtiyojlariga mosligidan ularni tezgina o'zlashtira borganlar, asta-sekinlik bilan o'zlari ham ularning bir qator yengil va oddiy namunalarini ijod qila boshlaganlar. Natijada, davrlar o'tishi bilan tez aytishlar bolalar folklori arsenaliga o'tib qolgan. Zotan, tez aytish nutq tovushlari alliteratsiyasiga asoslanuvchi folklor janri bo'lib, o'xshash tovushli so'zlar yoki so'z birikmalarining bir nafasda shiddatli aytilishi jarayonida u yoki bu tovush, yo so'z talaffuzida chalg'ish natijasida voqe bo'luvchi ma'no o'zgarishi negizida yuzaga keladi. Shu xususiyati tufayli o'tmishda tez aytish kattalar repertuarida uchragan va aksariyat holatlarda parnografik xarakterga ega bo'lgan. Bora-bora katta yoshli bolalar va o'smirlar repertuariga ko'chgan, ular bu xildagi tez aytishlarni o'yin shartiga aylantira borishgan, kim uni to'g'ri aytolmasa, chalishsa, o'sha yutqizgan sanalib, g'oliblar qo'ygan shartni bajargan, yoki o'yinda navbatda (galda) turgan. Tez aytishlar orasida 34, hatto 47 so'zli namunalari borki, ularni aytishda 7-12 yoshdagi bolalar nafasi yetmaydi. Binobarin, aytish mumkinki, XIX asrning 2-yarmi va XX asr boshlarida katta yoshdagi bolalar repertuariga o'tish jarayonida tez aytishlarda parnografik xususiyat so'na boshlagan. Bunda, ayniqsa, o'sha davrda kuchaya boshlagan



ma'rifatparvarlik harakati ta'siri muhim rol o'ynagan. Xususan, ta'lim jarayonida ulardan foydalanish istagi kichik va o'rta yoshdagi bolalar repertuariga o'tishiga yo'l ochgan. Natijada, tez aytish bolalar folklori doirasida yashay boshlagan. Buni ayrim ko'p so'zli tez aytishlarning turli yoshdagi bolalar repertuarida xilma-xil variantlarda uchrashi tasdiqlaydi. Chunonchi, "T" va "P" portlovchi undoshlari va "U" unlisi alliteratsiyasiga asoslangan "Bir tup tut" tez aytishi 28 so'zdan iborat.

Alliteratsion ritm u yoki bu tovushning to'g'ri va ravon talaffuzini ta'minlashga bo'ysunganidan, ularni shovqin solib shiddat bilan aytish (skandovka) zaruriyatga aylangan. Shu sababli tez aytishlarni kuylab bo'lmaydi. Bu xususiyat, ayniqsa, nasriy tez aytishlarda yanada ravshanroq tovlanadi, ularning aksariyati ko'p so'zli: har bir so'z o'zaro o'xshash tovushli bo'lganligidan ichki alliteratsion ohangdorligini yuzaga keltirgan. O'z navbatida, bu ichki turoqlanish asosida o'ziga xos poetik ritm hosil qilgan:

E jo'ra, bizning quyoshlamada quyoshmalashib ket,

Quyoshlamalashsang ham quyoshmalashib ket, quyosh-
lashmalashmasang ham quyoshmalashib ket.

Tez aytishda poetik ritm istak ohangiga ega. Umuman, nasriy tez aytishlarda poetik ritm xilma-xil ohanglarni (gumon, so'roq, buyruq, xabar) ifodalashi mumkin. Bu xususiyat ham she'riy, ham nasriy tez aytishlar uchun mushtarak bo'lib, ularning mazmundorligini, g'oyaviyligini ta'minlagan. Bunda talaffuzning aniq va ochiqligiga, poetik taktga, mantiqiy urg'uga alohida e'tibor berish zarur. Shularning birortasiga rioya qilinmasa, o'sha zahoti ritmdan chiqib ketadi, ma'no yoki mazmunda mantiqsizlik yuzaga keladi.

Nasriy tez aytishlarning shunday namunalari borki, ularda poetik ritmdan voz kechilgan, ijtimoiy mazmundorligini bo'rttiruvchi alliteratsion ohangdorlikkagina urg'u qilingan:



Namanganda usta Musa puch pistafurush bor ekan. O'sha usta Musa puch pistafurushning oltmish uch pud puch pistasi bor ekan. Oltmish uch pud puch pistasi bo'lsa ham o'sha usta Musa puch pistafurush, oltmish uch pud puch pistasi bo'lmasa ham o'sha Musa puch pistafurush.

Tez aytishda savdodagi qalloblikni fosh etish - yetakchi motiv; pistaning puchligini ta'kidlovchi "p" va "ch" tovushlari - alliteratsiya asosi. Binobarin, "puch pista" iborasi tez aytish uchun *muddao husni* - motivni ifodalovchi vositaga aylangan. *Muddao husni* ham she'riy, ham nasriy tez aytishlarda tugun vazifasini o'taydi. Ular motivnigina emas, balki qaysi tovushni alliteratsiyaga solishni, yoxud so'zni takrorlashni belgilovchi vosita sifatida so'z, yoki so'z birikmasi shaklida namoyon bo'ladi:

Qishda kishmish pishmasmish,

Pishsa kishmish qishmasmish,

Yoki:

Chustda usta Tursunmatning uchta tus tovug'i bor.

O'sha uchta tustovuq Chustdagi usta Tursunmatning uchta tustovug'imi yoki boshqa usta Tursunmatning uchta tusdagi tovug'imi?

Birinchi tez aytishda "kishmish" so'zi *muddao husni* bo'lib, "sh" undoshining alliteratsiyasiga zamin yaratgan va qish fasliga oid ma'lumotni tashigan. Ikkinchi tez aytishda "uchta tustovuq" birikmasi - *muddao husni*, "ch", "t", "s" undoshlari alliteratsiyasi shu negizda hosil qilingan. Tez aytishda bu ibora lutf san'atini yuzaga keltirgan; dastlab, tustovuqlar miqdorini - uchtaligini anglatga, keyin ularning rangi - uch tusdaligi ishoraga aylangan. Tovush alliteratsiyasi tez aytish ijrosi jarayonida shu nozik ma'noni ilg'ashga xalal yetkazgan. Natijada, chalg'ish hodisasi yuz bergan. Bu xildagi rang-barang tovush alliteratsiyalari, omonimlar, omofonlar, omograflar, paronimlar va taftologiyalar zamiridagi ma'no tovlanishlari pedagoglar va bolalar e'tiborini tortdi. XX asrning 30-yillaridayoq boshlang'ich



sinflarda ona tili va o'qish darslarida o'quvchilar talaffuzini burro qilish, tovushlarning nozik ma'nolarini fahmlashlari hamda farqlashlarini ta'minlashda tez aytishlardan didaktik maqsadlarda foydalanila boshlandi.

Bilim, ko'nikma va malakani rivojlantirishga yo'naltiruvchi savollar:

1. Qaytarmachoqlarning janriy xususiyati haqida fikr yuriting.
2. Yalinchoqlar janriy tabiati haqida so'zlang.
3. Hukmlagichlarning paydo bo'lish manbalari va ijro usulini tushuntiring?
4. Bolalar o'yin folklori nima?
5. Harakatli va ma'naviy(so'z) o'yinlar haqida ma'lumot bering?
6. Tez aytishlarning janriy xususiyati va uning mantiqiy mashq hisoblanishi sababini izohlang.
7. Ma'naviy o'yinlarning qanday turlari bor? Ular qanday poetik xususiyatlarga ega?
8. Alliteratsion ritm nima? Tez aytishlarning nasriy va she'riy namunalariga misol keltiring?

MAVZUGA DOIR TEST SAVOLLARI:

1. Tez aytishlar O'zbekistonning turli joylarida qanday yuritiladi va undan kuzatilgan asosiy maqsad nima?

- a) "chalg'itma", "adashish" shakllari uchraydi, maqsad: bir nafasda shiddat bilan ayta olish;
- b) "chalish", "adashtirish" deb yuritiladi, maqsad: alliteratsion so'zlarni aytish;
- c) "tutal", "chalish", "adashish", "chalg'ituv" deb yuritiladi, maqsad: bir nafasda shiddat bilan ayta olish va tez aytishda chalg'ish, tutilish;
- d) nafasni ushlab turishni mashq qilish



2. Topishmoqlarning paydo bo'lish davri va yetakchi manbalari qaysi javobda o'z aksini topgan?

- a) antik davr, xalqning turmush tarzi;
- b) qadimiy ajdodlarimizning animistik va totemistik qarashlari shakllana boshlagan zamonlar, ajdodlarning tabiat stixiyasi oldidagi ojizliklari, xalq ertaklari;
- c) o'rta asrlar, yozma adabiyotning takomillashuvi, xalq durdonalariga murojaat;
- d) XX asr boshlari, xalq og'zaki ijodini to'plash va o'rganish.

3. Topishmoqlarning tabiatiga xos xususiyat qaysi javobda to'g'ri ifodalangan?

- a) hayvonot va nabotot dunyosi, tabiat hodisalariga oid aniq va ko'z bilan ko'rish mumkin bo'lgan narsalarni ko'proq jumboqlashtiradi; yashiringan narsaning asosiy xususiyatlarini, eng muhim yetakchi belgilarini xoh ko'chma ma'noda, xoh o'z ma'nosida bo'lsin - aniq va ravshan izohlab beradi;
- b) har qanday topishmoq jumboq va javob qismlarining bir butunligidan iboratdir;
- c) barcha javoblar to'g'ri.

4. Tog'da talaymonni ko'rdim, Suvda sulaymonni ko'rdim, Tuzsiz pishgan oshni ko'rdim, Yumalab yotgan boshni ko'rdim.

Keltirilgan ikkala topishmoqda yashiringan predmet hamda ularning o'zaro tafovutlanuvchi xususiyati qaysi variantda to'g'ri aks etgan?

- a) birinchisida - egarli ot, ikkinchisida - bo'ri, baliq, sumalak, toshbaqa; o'zaro tafovuti - qofiyalanishida;
- b) birinchisida - ot, ikkinchisida - bo'ri, baliq, holvaytar, toshbaqa; birinchi 15 so'zli, ikkinchi 12 so'zli;
- c) birinchi- toshbaqa, ikkinchi- bo'ri, baliq, sumalak, toshbaqa; birinchi topishmoq bir predmetli, ikkinchi ko'p predmetli;
- d) biri she'riy, biri nasriy saj'da ifodalangan



5. “Bir tup tut” tez aytishi qaysi unli va undosh tovushlar alliteratsiyasiga asoslangan, necha soʻzdan iborat hamda u qaysi yoshdagi bolalar repertuariga xos?

a) “T” portlovchi, “R” undoshlari va “U” unlisi alliteratsiyasiga asoslangan. 27 soʻzdan iborat, maktabgacha tarbiya yoshidagi bolalar repertuariga xos;

b) “P” portlovchi undoshiga asoslangan, 28 soʻzdan iborat, kichik maktab yoshidagi bolalar repertuariga xos;

c) “T” va “P” portlovchi undoshlari hamda “U” unlisi alliteratsiyasiga asoslangan, 28 soʻzdan iborat, oʻrta va katta yoshdagi bolalar repertuariga xos;

d) “R” va “U” tovushlari alliteratsiyasiga asoslangan, 30 soʻzdan iborat, maktabgacha tarbiya yoshidagi bolalar repertuariga xos;

6. Qishda kishmish pishmasmish,

Pishsa kishmish qishmasmish.

- Bu tez aytishdagi muddao husni, tovush alliteratsiyasi hamda qanaqa maʼlumot tashiyotganligi qaysi javobda toʻgʻri ifodalangan?

a) “kishmish”, “sh” undoshi, qish fasli;

b) “pishmoq”, “m” undoshi, pishmaslik haqida maʼlumot;

c) “qish”, “sh” undoshi, kishmish haqida maʼlumot;

d) “q”, “sh”, “m” undoshlari alliteratsiyasiga bagʻishlangan

7. Topishmoqlarning yozma badiiy adabiyotga taʼsirini mumtoz sheʼriyatdagi qanday janrlar bilan asoslash mumkin?

a) lugʻz, chiston, muammo, taʼrix muvashshah;

b) chiston, masal, zarbulmasal, aforizm, lugʻz, tuyuq;

c) ruboiy, tuyuq, qitʼa, fard, chiston, lugʻz, maqol, chandish;

d) u faqat xalq ogʻzaki ijodidagina mavjud.



8. O'zbek bolalar she'riyatida adabiy topishmoq janri qaysi adiblar ijodida ko'proq uchraydi ?

- a) Navoiy, Uvaysiy, Q.Muhammadiy, Sh.Sa'dulla, G'G'ulom;
- b) P.Mo'min, S.Barnoyev, S.Ahmad, A.Obidjon, T.Adashboyev;
- c) A.Avloniy, Q.Hikmat, X.To'xtaboyev, R.Tolib;
- d) Sh.Sa'dulla, I.Muslim, A.Rahmat, P.Mo'min, S.Barnoyev, Q.Muhammadiy.

Tavsiya etilgan adabiyotglar:

- 1. Allayo-alla. O'zbek xalq allalari. To'plovchi va nashrga tayyorlovchi O.Safarov; -T.:O'qituvchi, 1999.
- 2. Afzalov M. O'zbek xalq ertaklari haqida. -T.:Fan,1964.
- 3. Berdiyev H., Rasulov R. O'zbek tilining paremiologik lug'ati. - T.:O'qituvchi,1989.
- 4. Boychechak. O'zbek xalq og'zaki ijodi. To'plovchi, nashrga tayyorlovchi O.Safarov. - T.,1984.
- 5. Galiyev Sh., O'zbek bolalar o'yin folklori. -T.:Fan, 1998.
- 6. Gorkiy M., Ertaklar haqida.- Kitobda: Adabiyot haqida. -T.O'zadabiynashr,1962, 319-322-b.
- 7. Jalolov G'. O'zbek ertaklarida janrlararo munosabat. -T.:Fan,1983.
- 8. Jahongirov G'. O'zbek bolalar folklori. -T.: O'qituvchi, 1972.



3-MAVZU: MUMTOZ ADABIYOTDA BOLALAR KITOBXONLIGI ASOSLARI

Reja:

1. *Bolalar kitobxonligining tabiati haqida ma'lumot*
2. *Alisher Navoiy asarlarining bolalar kitobxonligidagi o'rni*
3. *Muhammad Sharif Gulxaniy ijodi bolalar kitobxonligida*
4. *Alifbe manzumalar bolalarning dastlabki o'qish kitobi*

MAVZUGA DOIR TAYANCH TUSHUNCHALAR: *abitsedariy, mufradot, murakkabot, muqattaot, chiston, lug'z, hijo, abjad, yakka bayt, alifbe-manzuma, muvashshah, muammo, ta'rix, musaddas, musamman, hikoyat, maqolat, masal, harfiy san'atlar, alifbe-g'azal, alifbe-ruboiy, alifbe-muxammas, tanbih*

Bolalar kitobxonligi tabiati.

Bolalar kitobxonligi tushunchasi *ikki xil* ma'noviy ifoda kasb etadi. Keng ma'noda, umuman, *bolalarning kitob o'qish hodisasi*, ular o'qishiga mo'ljallangan barcha adabiy-badiiy, ilmiy-ommabop asarlar mutolaasi bolalar kitobxonligini tashkil qiladi. Ammo, bolalarga bag'ishlangan ijod namunalari hali mavjud bo'lmagan davrda, ilgaridan davom etib kelayotgan kattalar o'rtasidagi *kitobxonlik, qissaxonlikda* yoxud, didaktik



asarlar mutolaa qilishga harakat qilganlarki, buni bolalar kitobxonligining dastlabki ko'rinishi sifatida qayd etish mumkin. Kitobxonlik bu - birgalikda kitob o'qish yoki, kitob, kitobatchilik bilan bog'liq tushuncha. Bolalar kitobxonligi haqida munosabat bildirgan Safo Matchonov: "...kitobxonlik tor ma'noda kitob o'qishni bildirsa, keng ma'noda tanlab o'qish, his etish, anglash va fikr bildirish tushunchalarini o'z ichiga qamrab oladi. U badiiy adabiyotdan oziqlanadi, adabiy tanqid va pedagogika ko'magida yuksala boradi",- deb yozadi. Haqiqatan, kitobxonlik keng va tor ma'noda ham kitob mutolaasiga daxldor. Shu sababli "Kitob" turli tillarda har xil jaranglasa ham, mohiyatan bir tushuncha ifodalaydi. Masalan, qadimgi xitoycha va turkcha "*kuchnig*" - noma, dasxatlarni muqovalash, qadimgi skandinavcha "kenning" - o'rgatish, ossur tilida "kunukku"- nashr qilish, ruscha "kniga" (masalan, "Bibliya" yunoncha so'z bo'lib, "Kitoblar" degan ma'noni anglatadi) - asarlarning nashr etilishi (qadimda esa qo'lyozmalarni ham muqovalash) va nihoyat arabcha "ktob" - yozilgan, muqovalangan asar, ma'lum matnli varaqlardan iborat, juzlab tikilgan, muqovalangan, hajmi 48 sahifadan kam bo'lmagan bosma (qadim qo'lyozma ham) asar ekanligi ma'lum bo'ladi.

Demak, kitob insoniyat olamining yaratgan noyob mo'jizalaridan biri sifatida, ajdodlar aql-idrok kuchining qudratli quroli va ziyo chashmasi ekanligi oydinlashadi. Hamchunin, ilk qo'lyozmalar, kitobatchilik an'analari, adabiy-badiiy asarlar o'zbek bolalar kitobxonligining ibtidosidir. Jamiyatning bolalikka munosabati, farzand ta'lim-tarbiyasi haqida qayg'urish ilk kitoblardayoq ko'zga tashlangani shunday mulohazaga asos bo'ladi.

Zotan, o'ttiz asr muqaddam Movarounnahr zaminida vujudga kela boshlagan "Avesto" ana shunday kitoblarning ilk namunasi edi. "Avesto" tom ma'noda qadimgi tarixning buyuk sivilizatsiyasidir. U orqali juda ko'p ma'lumotlar, ajdodlarimizning eng qadimiy urf-odatlarini, diniy va dunyoviy



bilimlari, ta'lim- tarbiyaga oid qat'iy qonun-qoidalar, ota-ona va farzand, ustoz va shogird munosabatlari, qiz va yigit bolalarning o'rganishi joiz bo'lgan hunarlari, shuningdek, badiiy tafakkur namunalari insoniyat madaniyatining nodir durdonasi sifatida bizgacha yetib kelgan.

"Avesto"shunoslar, adabiyotshunoslar bu kitobning yaratilish tarixi, uning eramizdan oldingi IX asrda ilk kurtaklari bizning yurtimiz hududi - ko'hna Xorazm zaminida paydo bo'la boshlab, VI asrda uzil-kesil shakllangan mazdoparastlik dinining asoschisi Zardusht va uning ta'limoti haqida ko'plab ilmiy-badiiy risolalar yaratishgan. Jumladan, professor H.Homidiyning "Avesto saboqlari" risolasi e'tirofga sazovor. Risolada tarixiy shaxs Spitamon Zaratushtaning voyaga yetishi, tarbiyasi haqida ham so'z boradi. Ta'kidlanishicha, Purushasp o'g'lining tarbiyasi va muhofazasi bilan jiddiy shug'ullangan. Zardusht yetti yasharligidan o'n besh yasharligigacha donishmand, shoir Barzin Kuras qo'lida ilm oladi. Xususan, u ijtimoiy bilimlar, tabiatshunoslik, kalomi bade', notiqlik san'atini puxta egallaydi; ustozlari aytgan she'rlar, asotirlarni yod oladi; qabila bahodirlaridan jangovarlik, jahonpahlavonlik, chavandozlikni o'rganadi. O'n olti yoshida Zardusht beliga oqil va jasur yigit sifatida "mardlik kamari"ni boylaydi... Endi u nor tuyalarni boqishdan tashqari, otasi uyushtiradigan yig'inlarda, qavm mo'ysafidlarining bahslarida ishtirok etib, qabilalarning urf-odatlarini o'rgangan...

"Avesto" boshqa barcha diniy kitoblar singari qomusiy mohiyatga ega bo'lgan asar hisoblanadi. Jumladan, unda xotin-qizlar haq-huquqini e'zozlash, oila daxlsizligi va mustahkamligiga erishish, ota-onalarning farzand oldidagi, farzandlarning ota-ona uchun mas'uliyati, qizlarni oilaviy turmushga tayyorlash xususida ibratli fikrlar mavjud. Zardusht o'zining ta'limotida "Andishai nek" (pok e'tiqod yoki ezgu fikr), "Guftori nek" (to'g'ri, rost so'z yoki, ezgu kalom), "Kirdori nek" (



yaxshi amal yoki ezgu ish) birligiga suyanadi.

Muhimi, *ilk kitobxonlik* an'analari "Avesto" va unga oid tafsirnomalarni o'qish asosida yuzaga kelgan, maktab hodisasi ham o'z sarchashmasini shu kitoblar o'qiladigan va kuylanadigan ehromlardan boshlanganiga shubha yo'q. "Avesto"da tarbiyachilar, muallimlar, ustod-u mudarrislarlarning burchlari belgilangan, ular zimmasiga jamiyatning eng muhim yuki topshirilganligi qayta-qayta uqdirilgan, ularning faoliyatiga qarab "yaxshi" va "yomon" ustozlarga ajratib izohlangan, baho berilgan. Yaxshi ustozlar "sog'lom, aql-hushli farzandlarni, jasur, dono va turli tillarni biladigan o'g'il-qizlarni, elni balo-qazolardan himoya eta oladigan o'g'lonlarni, yaxshi kelajak, porloq hayotni ravshan ko'z bilan ko'ra oladigan avlodni" tarbiyalaydi. Shu sababli ustozlar Axuramazdaga yaqin, poktiynat kishilar sifatida alqanadi va ularning yoshlar qalbida hayotga muhabbatni singdirishdagi buyuk xizmatlari e'tirof etiladi. Yomon ustodlar esa hayotni g'amgin qiluvchi, hayot chirog'ini so'ndiruvchi, johiliyat sari yetaklovchi nodonlar sifatida qoralanadi.

"Avesto"da qiz bolalar tarbiyasiga alohida e'tibor berish lozimligi bir necha o'rinda maxsus ta'kidlangan: "O'g'il bolalarga nisbatan qiz bolalar ilmu donish o'rganishga jiddiyoq kirishsinlar. Zeroki, ular ota-ona xonadonida bo'lgan vaqtlarida ota ro'zg'orini tartibga solib, ziynat berib borsalar, jufti haloli manziliga borgach, bolalar tarbiyasi, ta'limi bilan, kelajak nasl tarbiyasi bilan mashg'ul bo'lmoqlari lozim bo'ladi"...

Qadimgi rus tarixining buyuk tadqiqotchisi akademik N.I.Konrad, adabiyotning paydo bo'lishi va rivojlanishida Gilgamish haqidagi epos, Injildagi tafsilotlar, "Mahabxorat", yoki "Illiada" matnlari katta "chashma" bo'lib xizmat qilganligini ta'kidlagan edi. "Qadimgi Eski dunyo, - deb yozadi olim, - yangi adabiyot uchun birinchi manba bo'lib xizmat qilgan".⁹

Shu nuqtayi nazardan qaralsa, "Avesto"dagi o'gitlar

⁹ Bu haqda qarang: EygypH.B. ugp. 3apy6e>i<Ha;i gemckaa OHTepamypa. - M.: AkageMua, 1998. -Cmp.7



mazmuni xalq maqollari, mumtoz adib va mutafakkirlar ijodi mag'ziga singdirilib, yosh avlod kamolotiga uzoq asrlar davomida munosib hissa qo'shib kelgan kitobxonlik namunasi hisoblanadi. O'rta Osiyo xalqlarining qomusiy kitobi "Avesto" qariyb ikki ming yillik (mil.avv. IX-VIII, mil. VIII asrlar) tarixida yosh avlod tarbiyasi, ilm-u ma'rifati uchun qanday yuksak ahamiyat kasb etgan bo'lsa, arablar istilosidan so'ng musulmonlikning muqaddas kitobi "Qur'oni karim" shunday ma'naviy komillik asosiga aylandi. Bolalik huquqlarining anglana borilishi oqibatida bolalar imkoniyatlarini hisobga olish zaruriyati tug'iladi. Natijada, VIII asrdayoq Eron pedagoglari tomonidan Qur'on negizida musulmonlikning asosiy hukmlarini qamrab oluvchi "Haftiyak" darsligi tuzilgan. Bu o'quv kitobi, salkam o'n to'rt asr davomida Eron, Markaziy Osiyo, Sharqiy Xitoy, Hindiston va boshqa musulmon o'lkalarida ilk alifbe vazifasini o'tab kelgan. Haftiyak - forsha tojikcha so'z bo'lib, Qur'onning yettidan biri degan ma'noni anglatadi. U o'tmishda Turkiston maktablarida ham o'quvchilar arab alifbosini o'zlashtirganlaridan so'ng bir-ikki yil davomida o'qitiladigan xrestomatiya va birinchi qo'llanma hisoblanadi. Binobarin, "Haftiyak" bolalarning ilk o'qish kitobi, kitobxonlik asosi, shuningdek, ularni Qur'oni karimni o'qishga shaylaydigan, uning ruhiga olib kiradigan dastur vazifasini o'tagan.

Jahon bolalar adabiyotida P.Vozdvijenskiyning "Injil" hikoyalari bolalar uchun" deb nomlangan kitobi juda mashhur. Muallifning o'zi bu haqda shunday yozadi: "Men Yangi va Eski Tavrotning barcha voqealarini juda sodda, bolalar tilida so'zlashga harakat qildim, bu kitobni o'zlari o'qishadimi, yoki unga onasi, katta opasi yoki savodli enaga o'qib beradimi, farqi yo'q; asosiysi, bolalar eng kichik yoshlaridan o'zlarining toza va beg'ubor qalblari bilan so'zlangan hikoyalarning mazmunini tushunib, anglab olishsin".

Ta'bir joiz bo'lsa, xuddi shunday xulosani o'zbek bolalar kitobxonligi tarixidagi qur'onxonlik, haftiyakxonlik, hadis-



xonlikka nisbatan ham aytish mumkin. Qur'onda barcha huquqiy va axloqiy masalalar umumiy tarzda bayon etilgan bo'lib, ularga aniqlik kiritish va izohlash uchun Muhammad (s.a.v.) o'z hadislarini aytgan. Bu hadislarini payg'ambar sahobalari, safdoshlari yodda saqlashga harakat qilganlar. Payg'ambar vafotidan so'ng esa hadislarini naql qilish odat tusiga kirgan. Islomni qabul qilgan xalqlar madaniy va g'oyaviy merosining ko'p unsurlari Islomga hadis shaklida o'tgan. Hadis yig'ish o'rta asr musulmon madaniyatining muhim xususiyati bo'lib, bilim izlashning asosiy mazmuni hisoblangan. Hadis har qanday ilmiy asarni asoslashning muhim qismi bo'lgan. Shu sababli xalq undan hikmatli so'z va matal sifatida ham foydalangan. Hadislarning ijtimoiy-axloqiy qimmati chuqur insonparvarlik mazmuni bilan yo'g'rilganidadir. Masalan, bolani tarbiyalashda ota-onaning burch va mas'uliyatlari "Yosh bolani yelkaga mindirish haqida", "Solih bola ko'zga shodlik, xursandlik keltirishga sababchidir", "Ota o'z farzandlariga odob o'rgatishi va yaxshilik qilishi haqida", "Yetim bolani tarbiyat qiluvchining fazilati haqida", "Yosh bolalar bilan hazillashish haqida", "Yangi pishgan mevani atrofdagi yosh bolalarga berish haqida" kabi hadislarda naql qilinsa, farzandning ota-onasi, qarindosh-urug'lari va umuman, kattalar oldidagi burch, mas'uliyatlari "Onani rozi qilish haqida", "Otani rozi qilish haqida", "Ota-ona keksaygan vaqtida xizmat qilib duolarini olmasdan jannatga kira olmagan kishi haqida", "Ota-onani so'kmaslik haqida"gi hadislarda o'z ifodasini topgan. Yoxud, Ismoil Al-Buxoriyning eng yaxshi ish - ochlarga taom, tanish-notanishlarga salom berish, eng yomon ish - nohaq qon to'kilishi, shuningdek, musulmonlarning bir- birlari bilan uch kundan ortiq arazlab, gina saqlab, gaplashmay yurishi mumkin emasligi haqidagi hadislar mazmun-mohiyatan hamon ijtimoiy-tarbiyaviy qimmatga ega.

Xullas, ajdodlar an'analari, ma'naviy boy merosi avlodlarga to'la-to'kis yetib borishi uchun ularni qanday bo'lsa shundayligicha bolalarga ham tushuntirish joizligi ayonla-



shadi. Bu jihatdan o'tmishda bolalar kitobxonligi namunasi hisoblanuvchi yana bir majmua - "Chor kitob" fikrimizni tasdiqlaydi. U bolalarning ilk o'qish kitobi sifatida forscha-tojikcha "chahor kitob" - to'rtta kitobning bir muqova ostidagi jamlanmasini anglatadi.

X-XV asrlar davomida fors-tojik, arab va turkiy tillarda Markaziy Osiyo xalqlari adabiyotlarida ham nasrda, ham nazmda pandnomalarning xilma-xil yo'nalishlari silsilasi yaratilgan. Ayniqsa, Kaykovusning "Qobusnoma", Yusuf Xos Hojibning "Qutadg'u bilig", Ahmad Yugnakiyning "Hibat ul-haqoyiq", Farididdin Attorning "Ilohiynoma", Sa'diy Sheroziyning "Guliston", Sayfi Saroyining "Guliston bit-turkiy", Abdurahmon Jomiyning "Bahoriston", Alisher Navoiyning "Hayrat ul-abror", "Mahbub ul-qulub", Husayn voiz Koshifiyning "Axloqi Muhsiniy" singari nasriy pandnomalari; shuningdek, Ahmad Yassaviy hikmatlari, Attorning "Pandnoma" va Sa'diy Sheroziyning "Bo'ston" manzumalari, Jomiy va Navoiyning "Arba'in" (she'riy hadis)lari esa nazmiy pandnomachilik sifatida yuksak e'tirofga sazovordir.

Muhimi, ularning aksariyati bolalar kitobxonligidan keng o'rin olgan. Ya'ni, bu pandnomalar ba'zan mavzu-mohiyatiga ko'ra, ba'zan esa bevosita atalganlik nuqtayi nazaridan bolalar adabiyotining tarixiy o'tmishiga daxldordir. Bu durdona asarlar uzoq asrlardan buyon farzand tarbiyasi uchun dasturulamal bo'lib, poklik, rostgo'ylik, insoniylik fazilatlarini singdirib kelmoqda.

Eski maktablarda Kaykovusning fors-tojik tilida bitilgan "Qobusnoma" asaridan keng foydalanilgani va u ham otaning farzandiga bag'ishlovi jihatidan bolalar kitobxonligi tarixida ayricha ahamiyat kasb etadi. Asar o'zbek tiliga birinchi marta 1860- yilda shoir va tarjimon, tarixnavis Muhammad Rizo Ogahiy tomonidan tarjima qilingan. U 44 bobdan iborat bo'lib, mo'jaz rivoyatlar, ixcham latifalar, kichik-kichik hikoyatlar tarzida berilgan, har bir hikoya mustaqil mazmun- mohiyatga



ega. “Qobusnoma”da ham jismoniy, ham aqliy tarbiyaning barcha qirralari teran tahlil etilgan, inson shaxsining shakllanishi uchun muhim detallarga e’tibor qaratilgan. Shu bois pandnoma farzandga mo’ljallangan esa-da, unda katta hayotiy tajribaga ega inson qarashlari didi, saviyasi, e’tiqodi va ijtimoiy mavqeyi, nuqtayi nazari ustuvor. “Qobusnoma” o’z davri xalq pedagogik qarashlarini umumlashtira olgan asar sifatida ham e’tirofga loyiq. Unda tilga olingan masalalarning ko’pchiligi hali-hanuz dolzarb ahamiyatini yo’qotmagan. Jumladan, asarning “Ota-ona haqini bilmak” (beshinchi bob), “Hunar fuzunliq bila baland qadr bo’lmoq” (oltinchi bob), “Suxandonlik bilan baland martabali bo’lmoq” (yettinchi bob), “Farzand parvarish qilmoq” (yigirma yettinchi bob) zikridagi axloqiy-estetik mohiyatga ega munosabatlar, yoxud insonning jamiyatdagi mavqeyini belgilovchi muhim omillar to’g’risidagi qarashlar jozibali hikoyatlar orqali mushohadalangan. Masalan, Kaykovus o’g’liga ikki tomon (ota va ona)dan ham nasl-nasabi pokligi va ulug’ligini tanishtirib, tushuntirar ekan, bu qadru qimmatni baland tutishini ta’kidlaydi va shunday uqtiradi: “Bu jahon bir ziroatgohdur, har nima eksang, shuni o’rsan va har na so’z desang, shuning javobin eshitursan. Degilkim, dunyo joyi foniy va oxirat saroyi boqiydur. Bu joyda iffatli, parhezkorlarning himmati sherlarning himmatidekdur, badkirdorlarning himmati itlarning himmatidekdur. It har saydnikim olsa, o’sha joyda yer, sher har saydniki olsa, boshqa joyda yer. Bu oriyat saroyi sening saydgohingdur va tangri taoloning ibodati sening saydingdur. Agar dunyo saroyida toat saydini inkor qilsang, oqibatining mujibi bo’lur”. Muallif bu orqali insonlarning o’z ezgu-amallari bilan ikki dunyo saodatiga erishishlariga umid qiladi. Kaykovus boshqa masalalar qatori farzand parvarishi zikrida alohida to’xtaladi. Chaqaloqqa eng avval yaxshi ism qo’yish, farzandni oqil va mehribon doyalarga topshirish, sunnat qilur vaqtida sunnat qilish, qudratiga loyiq to’y va tomosha qilish hamda o’qishni o’rgatish joizligi ta’kidlanadi. Shuningdek, farzandga



turli hunar, kasb, ilm o'rgatish haqida fikr yuritgan. Ota o'g'liga yana quyidagilarni alohida uqdiradi: "Bolalarga muallimlar adab bersunlar, toki sendin o'g'lingning ko'nglida gina qolmasin. Ammo uning ko'ziga o'zingni haybatlig' ko'rguzg'il, to seni xor tutmasin va hamisha sendin qo'rqib yursin. U bir narsani orzu qilsa, qudrating yetguncha undin ayamag'il, to tanga havasi bila sening o'limingni tilamasin... sen adab, hunar va donishni farzandingga o'zingdin meros qilg'il. Toki, uning haqin bajo kelturmish bo'lg'aysan..."

Shubhasiz, Unsurulmaoliy Kaykovus qarashlarida o'z davri, mavqeyi, ijtimoiy qatlami ta'siri yaqqol ko'rinadi. Shunday bo'lsa-da, mutafakkirning axloqiy qarashlarida hamma zamonlar uchun ibratli o'gitlar bisyor. Binobarin,

"Qobusnoma" hozirgi zamon pedagogikasining ham faol qo'llanmalaridan biridir. Zero, mumtoz bolalar kitobxonligi ana shunday pedagogik risolalar, pandnomalar bilan to'lisha borib, didaktik adabiyot namunalarini ham qamrab ola boshlagani ayonlashadi. Sa'diy Sheroziyning "Guliston" va "Bo'ston" forscha-tojikcha yaratilgan mumtoz kitobxonlik namunasi bo'lsa, Alisher Navoiyning didaktik asarlari turkiy bolalar kitobxonligidan keng o'rin olgan.

Alisher Navoiy - bolalar kitobxonligida

Inson axloqiy fazilatlarini, ta'lim-tarbiyasi Sharq adabiyotining yetakchi mavzu va mohiyatini tashkil etishi bejiz emas. Bu mavzudagi adabiyot-pandnomalardan tashqari, badiiy yuksak dostonlar, nasriy asarlarda ham "ma'viza", ya'ni o'git-nasihat xarakteridagi qismlar bo'lganligi adabiyotning didaktik tabiatini oydinlashtiradi. Inson odobi, ongi, ilm-u amali tufayli barcha maxluqotlarning afzali, sharifi deb ta'riflanishi turkiy adabiyotda Navoiy dahosi bilan boshlanadi. Qariyb olti asrdiki, Alisher Navoiy xalq faxri, tilimizning bayroqdori, she'riyat mulkining sultoni, madaniyat va ma'naviyatimizning



porloq quyoshi bo'lib kelayotir. "Yoshlarimiz Navoiyni qanchalik chuqur va puxta bilsa,-deb yozadi I.Haqqul,- ma'rifat, ezgulik, komillik sirlarini o'shancha kengroq egallaydi. Navoiyning so'zlari diliga o'rnashgan odam, o'zi istasin-istamasin, odamiylik sharafi va kuch-quvvatini idrok etadi. Navoiyni yetarli darajada bilish-adolat, diyonat va imon-e'tiqodning kuchiga ishonch demak". XV asrning so'nggi choragi, XVI asrdan e'tiboran Navoiy asarlarini o'qish o'ziga xos an'anaga aylana borgan. Sharq xalqlari kitobxonligida fors-tojik tilida shohnomaxonlik, sa'diyxonlik, hofizxonlik, rumiyxonlik, jomiyxonlik bilan birga, turkiy (eski o'zbek) tilidagi yassaviyxonlik, qissaxonlik yonida navoiyxonlik ham qaror topgan. Jumladan, bolalar kitobxonligida Navoiy asarlarining ayricha ahamiyati borligi bejiz emas. Ulug' mutafakkir yosh avlod tarbiyasi uchun alohida e'tibor zarurligini o'z dostonlari va asarlarida yorqin ifoda etgan. Xususan, "Xamsa"ning dastlabki uch dostoni - "Hayrat ul-abror", "Farhod va Shirin", "Layli va Majnun", shuningdek, "Mahbub ul-qulub", "Arba'in" (Qirq hadis)da shoirning axloqiy qarashlari o'z tajassumini topgandir. Navoiy "Xamsa"sidagi kirish dostoni "Hayrat ul-abror" (Yaxshilarning hayrati) falsafiy, ta'lim-tarbiyaga oid she'riy asar bo'lib, u Sharq adabiyotidagi xamsanavislik an'anasiga muvofiq yozilgan bo'lib, didaktik mazmundadir. Navoiy dostonining muqaddima qismidagi munojotlarda Allohning buyuk va beqiyos go'zalligini ta'rif va tavsif etish bilan birga, shoir barcha mavjudot orasida eng ulug'i, eng sharaflisi insondir, degan fikrni badiiy yuksak darajada ifoda etadi:

Barchasini garchi latif aylading, Barchadin insonni sharif aylading.

"Hayrat ul-abror" asarining boshlanishi uch hayrat tavsifidan iborat. Ularda tabiat, koinot va insonning ulug'ligi va go'zalligi tasvir etilgan. Bu uch mavjudotning yagonaligi, bir-biridan ajralmasligi, ularning hayratomuz darajadagi uyg'unligi uch hayratning asosiy mundarijasini tashkil etadi. 63 bobdan



tarkib topgan dostonning 21 faslini an'anaviy muqaddimaviy boblar, 40 bobini - 20 maqolat va 20 hikoyat, qolgan ikki bobini esa - xotima va bir hikoyat tashkil etadi. Dostondagi yigirma maqolat komil inson o'zida mujassam etmog'i lozim bo'lgan fazilatlar izhoridan iborat. Asarning bir necha boblari odob-axloq va ta'lim-tarbiya masalasiga bag'ishlangan. Navoiy bu dostonning oltinchi maqolatida odob va kamtarlikni ulug'lab, ta'lim-tarbiyaga doir qimmatli fikr va mulohazalarini bayon qilishi bilan birga, takabbur va odobsiz kishilarni qattiq qoralaydi. Shoir adablilik to'g'risida fikr yuritarkan, uni kichiklarga baxtiyorlik, ulug'larga yuksak martabalilik omili, deb biladi. Bunda tavoze' - kamtarlikni asosiy vosita sifatida talqin etadi. Alisher Navoiy axloqiy qarashlarini ifodalashda hayotiy detallardan keng foydalanadi: "Qachonki yangi chiqqan oy tavoze' saqlab, qaddini xam qildi, u kun sayin kamol topa boshladi. ...Osmon ham tavoze'ga rioya qilib egilgani uchun butun olam uning amriga buysunadi..." Hayo va adab insonning sharaf belgisi ekan, kulgi- adabsizlikning belgisi sifatida talqin etiladi. Shoir kaklikning qahqahasi ovchi tuzog'iga, g'unchaning ochilishi (kulib) xazon bo'lishiga, chaqmoqning kulgisi yerga pastlashishiga sabab bo'lganini tasviriy ufodalar orqali ko'rsatib beradi. Shuningdek, Alisher Navoiy kamtarinlik to'g'risidagi me'yorni shunday ko'rsatadi: qulga bek ortiqcha tavozu' korsatsa, o'ziga azob-uqubat iplarini orttirgan bo'ladi. Gadoning oldida sajda qilish marhamat emas; unga bir dirham bersang, bu unga nisbatan marhamat ko'rsatishdir. O'rindan turib bolaga joy berish ham adabdan emas; keksalar bu ishni adab hisoblashmaydi.

Shu tariqa, shoir adablilik shartlarini saqlashda har bir odamning darajasiga qarab bajarish loyqligini ta'kidlaydi. Jumladan, ulug' mutafakkir yosh bolaga nisbatan eng zarur ish, uni kichikligidan parvarish qilishdir, deb ko'rsatadi. Uning e'tiroficha, tarbiyaning biri bolaga yaxshi ism qo'yish bo'lib, uni nomi bilan chaqirganlarida uyaladigan bo'lmasligi kerak. Navoiy



bolaga ilmu-adab o'rgatish uchun muallim chaqirish lozimligini uqdirar ekan, shafqat qilish foydali, ammo ortiqchasi zarardir, deydi. Binobarin, har xil balolardan farzandini o'z mehri bilan asrashni ota-onaning tavoze'si hisoblasa, ota-onani hurmat qilish - "buni bajarish uning(farzand) uchun majburiyatdir",- deydi. Shoir katta-yu kichikka qarata ota-onaga xizmatni birdek qilish, xizmati qancha ortiq bo'lsa ham, kam deb bilishni o'z o'gitlarida ilgari suradi:

Boshni fido ayla ato qoshig'a, Jismni qil sadqa ano boshig'a.
Ikki jahoningga tilar sen fazo-

Hosil et ushbu ikkisidin rizo.

Tun-u kuningga aylagali nur posh,

Birisin oy angla, birisin quyosh.

Dostonning sakkizinchi maqolatida Navoiy yolg'izlikka nisbatan ko'pchilik- jamoatni ulug'lab, kishilarning bir-birlari bilan ahil, do'st bo'lishlarini istaydi. "Hayrat ul-abror"ning o'ninchi maqolati rostgo'ylik, halollik va to'g'rilikka bag'ishlangan. Shoir yolg'on so'zlashning yomon oqibatini "Sher bilan Durroj" masalida ovchining tuzog'iga tushgan Durroj obrazida hikoya qiladi.

Masalda keltirilishicha, bir beshada sher yashar, har gal bolalasa, chumolilar (mur) uning bolasini nobud qilaverganidan yurak oldirib qo'ygandi. Shu sababli:

Tishlabon ul moyai payvandini

Og'zida asrar edi farzandini.

Biroq shu "beshada" bir durroj ham yashar, hamisha sher vahmidan cho'chiyverganidan qo'qqisdan: "farr eta" uchar, bundan shervachcha seskanib ketardi. Bu holdan sher g'am chekardi, nihoyat sherning

Ko'ngli bu ishdin bo'lib ozorlik, Boshladi durroj bila yorlik.

Va unga boshiga har qanaqa tashvish tushsa, ko'maklashmoqqa so'z berib, qo'qqisdan uchaverib, uning bolasini qo'rqitmasligini shart qilib qo'yadi. Endi durroj uning yonida



cho'chimay, emin-erkin yashay boshlaydi. Hatto shu emin-erkinligiga ishonch hosil qilish uchun sherni sinamoqchi bo'lib, bir gal ovchi domiga tushdim deya faryod ko'taradi. Sher uni qutqarmoqqa borsa, faryod yolg'on bo'lib chiqadi. Durroj bu harakatini bir necha bor takrorladi. Shu sababli sher unga ishonmay qo'ydi, Boshqa bir mahalda durroj chindan ham sayyod domiga tushadi. Bu gal u:

Qichqiribon dom aro ul muftalo,

Necha dedi, dod meni tuttilo.

Sher qulog'iga yetib ul maqol, Savtini doyimgidek etti xayol. Ko'p eshitib erdi bu yolg'onini, O'yla gumon etti chin afg'onini. Har necha kim rost fig'on ayladi, Sidqini ham kizb gumon ayladi.

Shu tariqa, durroj o'z yolg'onining qurboni bo'ldi. Masaldan kelib chiqqan xulosa shu!

Ilm ahllariga bag'ishlangan o'n birinchi maqolatda ilm va ilm ahli, qalam ahli, el manfaati, savob va jaholat, xudbinlik va xudbinlarga munosabat kabi masalalar axloqiy tahlil etiladi. Navoiy bir musofir, kambag'al odamning chinakam ilm olishi uchun ne-ne muhtojlik, qashshoqlik, ochlik va sarson-sargardonliklar mashaqqatini bayon qilar ekan, ilmda sohibqiron bo'lguncha o'ttiz yillik davr o'tishini, shunda ham bitta-ikkitagina kamolot egasi bo'lib yetishishini asoslaydi. Ammo, uning ko'ngli ilm maskani, ilm dargohi, uning bir qatra vujudi ilm daryosiga aylangani ulkan muvaffaqiyat sifatida talqin etiladi. Alisher Navoiy olimlik martabasini ana shunday yuksaklikda ko'radi. U ilm ahli deganda ko'p tillarni va bilimlarni egallagan qomusiy olimlik sharafini nazarda tutib, ularning johillarga xizmat qilishini esa zolimlik, deb baholaydi.

Navoiy olimlar bilan jaholat egasi bo'lgan bek-u amaldorlarning surati va siyratini taqqoslarkan, hayotiy detallarni ayni muqoyasa sifatida eslatib o'tadi: "Egnidagi to'nida yuzta yirtiq bo'lsa ham, gulning to'ni yirtiq-yirtiq ekani ayb emas-



ku! Quyoshning yalang'ochligi uning ziynati-ku; bulutdan libos kiyganda esa, hamma yoqni qorong'ilik bosadi Er kishining sharafi kiyimda emas; dur sadafdan uzoq bo'lsa, bahosi kamaymaydi. Pashshaning ham ust libosi zarrin, ammo uning qo'nadigan joyi o'limtiklarning ustidir."

Darhaqiqat, ma'rifatparvar va buyuk shoir Alisher Navoiyning axloqiy- ta'limiy qarashlari hozirgi kunda ham shu jihatlari bilan o'z qadr-qimmatini saqlab kelmoqda. U o'z zamonidayoq yoshlarni ilm-hunar egallash, mehnatni sevishtga undab, o'rganilgan ilm va hunarni xalq, Vatan yo'lida sarf qilish zarurligini uqdirgan. Navoiy ta'limotida ilm-fanni egallash uchun yoshlikdan boshlab astoydil o'qish, o'rganish ta'kidlanadi. Bu jihat shoirning o'z hayotiy tajribasida ham yetakchi shiorga aylanganini, ya'ni juda yoshligidan ta'lim olgani, o'qishga berilganidan anglash mumkin. Qolaversa, 4-5 yoshlaridanoq ko'p she'rlarni yod bilganligi, Farididdin Attorning "Mantiq ut-tayr" ("Qush nutqi") asarini ham bolalik chog'laridayoq qayta-qayta o'qib, yod olgani bu fikrni asoslaydi. Alisher Navoiy umrining so'nggi damlarigacha iqtidorli yoshlarga, ma'rifatga katta e'tibor qaratganligini kuzatish mumkin. U mehnatkash xalq bolalarini o'qitish va tarbiyalash uchun maktablar ochish va madrasalar qurish to'g'risida g'amxo'rlik qilganligi, podsho Husayn Boyqarodan o'g'il va qiz bolalar uchun maktablar ochishni talab qilgani, shaxsan o'zi madrasalar qurishda tashabbus ko'rsatgani ham navoiyshunoslar tomonidan ko'p ta'kidlangan. Navoiyning fikricha, maktab xalqqa nur keltiradi, unga to'g'ri yo'l ko'rsatadi, bolalarni bilimli qiladi. U o'zining "Ixlosiya" madrasasi yonida maktab ochib, bolalarni o'qitish va tarbiyalash uchun zarur sharoit yaratib, buning uchun lozim bo'lgan mablag' ajratgani ana shunday e'tiborli dalillardan.

Navoiy dars beruvchini quyoshga o'xshatadi va bu quyosh o'z atrofidagi yulduzlarga nur sochadi, ya'ni mudarris "abjadxonalar"ga, hali ilmdan bexabar bo'lgan toliblarga ilm



nurini sochadi, ma'rifat beradi, deydi. Alisher Navoiy ta'lim-tarbiyaviy fikrlarini o'zi yaratgan badiiy asarlarida ko'proq barkamol insonni ifodalovchi ijobiy obrazlar yaratish orqali bayon qiladi. Navoiy aql kuchiga cheksiz ishonadi, komil ishonch bilan ilm-fanning xislati juda katta, deb hisoblaydi. Alisher Navoiy inson shaxsining kamol topishi bolalikdan boshlanajagini nazarda tutib, dostonlaridagi ayrim boblarni qahramonlarining bolalik tarbiyasiga bag'ishlaydi. Jumladan, Farhod va Majnun bolaligi tasviri bunga yorqin dalil bo'la oladi.

U axloqiy-ta'limiy qarashlarini butun hayoti va ijodiy faoliyatining sintezi hisoblanuvchi "Mahbub ul-qulub" ("Ko'ngillarning sevgani") pandnomasida yanada chuqurlashtirgan. Bu asar shoirning ustozlari Shayx Sa'diyning "Guliston" va "Bo'ston", Abdurahmon Jomiyning "Bahoriston" singari didaktik adabiyot an'alaridan ijodiy ilhomlanib yozilganidir. "Mahbub ul-qulub"da buyuk shoir va mutafakkirning jamiyatdagi turli qatlamlariga mansub shaxslar to'g'risida umr bo'yi qilgan kuzatuvlaridan kelib chiqqan xulosalari yakun topgan. Unda Navoiy yaxshi fe'l-xususiyatlarni sanab o'tgan, odamlar uchun foydali o'git va misollar keltirgan. Ayniqsa, o'gitlar shoirning barhayot da'vatlari tarzida navqiron avlodlarni asrlar osha barkamollik sari undab kelmoqda. Va aytish joizki, Navoiy asarlari xuddi shu nuqtayi nazardan nafaqat bugun, balki o'tmishda ham bolalar kitobxonligi asosi sifatida ma'lum va mashhur bo'lgan.

To'rt asrdan ziyodroq davr mobaynida Alisher Navoiy asarlarini xalqimiz qo'lyozma kitoblar (devonlar, bayozlar va tazkiralardan) o'qib o'rgandi, shoir g'azallari negizida yaratilgan qo'shiqlar ham navoiyxonlikda ayriча ahamiyat kasb etdi. Maktablarda ham, madrasalarda, davra va suhbatlarda ham shoir asarlariga rag'bat tobora kuchaya bordi.

Xususan, XIX asrning so'nggi choragidan e'tiboran shoir asarlarini ko'p sonli adadlarda toshbosma (litografiya) va



tipografiyalarda chop etish yo'lga quyilgach, bu jarayon yanada chuqurlasha va kengaya bordi. XX asrda Navoiy asarlarini o'qib- o'rganish o'rta va oliy maktab dasturlaridan keng o'rin oldi, asrning oxirlariga borib esa, bog'chalar ta'limi doirasiga ham kiritila boshlandi. Shu zaylda turli yoshdagi kitobxonning o'z Navoiysi qad rostlaydigan bo'ldi. Shu ehtiyoj "Xamsa" dostonlarining, shuningdek, "Lison ut-tayr" va "Mahbub ul-qulub" asarlarining hozirgi adabiy tilda qayta aytilgan nasriy bayonlari va tabdillarini yaratishga, qolaversa, kichik yoshdagi bolalarga mo'ljallangani "Qiziq hikoyalar" (1991) nashrini amalga oshirishgacha olib keldi.

Buyuk gumanist bolalarga kelajak sohiblari sifatida qaradi, shunga ko'ra ularning tarbiyasiga alohida e'tibor berish zarurligini uqtirarkan, bu sohadagi axloqiy qarashlarini "Xamsa" dostonlarida, xususan, dastlabki uch dostoni - "Hayratul-abror" ("Yaxshilarning hayrati"), "Farhod va Shirin", "Layli va Majnun"da, shuningdek, "Lison-ut-tayr" ("Qush tili"), "Mahbub ul-qulub" ("Qalblarning sevgani") hamda "Arba'in hadis" ("Qirq hadis") kabi asarlarida olg'a surdi. Bu asarlar bolalar navoiyxonligida ayricha mavqe hosil qilib keldi.

Alisher Navoiy komil insonning shakllanishi bolalikdan boshlanajagini nazarda tutib, Farhod va Majnunlarning bola sifatida ulg'ayish jarayonlarini ko'rsatishga alohida e'tibor berdi. Farhod tirnoqqa zor Chin mulkining shohi xonadonida tug'iladi, bu orziqib kutilgan xurramligu ushalgan armonning nishonasi edi. Shu sababli shoir murg'akkina chaqaloqni tubandagicha tanishtiradi:

Ko'zida ashk selidan asarlar, Damida oh dudidin xabarlar.
Muhabbat nuri olinda huvaydo, Jamolida vafo tug'rosi paydo.
Falak deb dard elining shohi oni, Malak deb dard o'ti ogohi oni.

Bu chizgilarda chaqaloqning kelajagiga daxldor bashorat tajassum topgan, ya'ni, yig'lab dunyoga kelgan bu chaqaloqning nafasida ne-ne mashaqqatlarni kechajagidan xabar berguvchi



ohlar tutuni o'rlab turgan ekan. Manglayida esa muhabbat nuri porlayotganidan, chehrasidan vafo tug'ro(tamga)sining barqi mavjud. Osmon uni barcha dardlilarning shohi timsolidagi farishta qilib yaratgan go'yo, u barchaning dardidan "ogoh" - xabardor o'g'lon bo'lib dunyoga kelgan. Shu bois uning nomi ham o'ziga mos bo'lmog'i, hadisda aytilganiday, o'z ota- onasidan oladigan birinchi mukofoti munosib ism bo'lmog'ini asoslarkan, shoir dastlab bunday o'g'ilga ota bo'lish nasib etgan shohning ruhiy holatini shunday ifodalaydi:

Ato ul durga chun nazzora qildi,
Sadafdek og'zi kulmakdin yoyildi.

Shundan so'ng shoir chaqaloqqa ism qo'yish tafsilotiga o'tadi. Unga tanlangan ism qismatiga daxldor besh so'zning bosh harflaridan tuzilgan: "firoq"dan - "f", "rashk"dan - "r", "hajr"dan - "h", "oh"dan - "o" va nihoyat, "dard"dan - "d" harflarining bir-biriga "murakkab" qilinishi asosida hosil bo'lgan, uni bunyodga keltirgan "ustodi ishq"ning irodasi shunday:

Anga farzona Farhod ism qo'ydi, Hurufi maxzanin besh qism qo'ydi. Firoqu rashku hajru oh ila dard, Biror harf ibtidodin aylabon fard. Borin ustodi ishq etgach murakkab, Tarakkubdin bu ism o'ldi murattab.

Ko'rinayotirki, chaqaloqning tug'ilishi - jismoniy hodisa bo'lsa, unga ism qo'yish - ma'naviy hodisa. Navoiy chaqaloqning jismoniy ulg'ayishini ma'naviy ulg'ayishga omixtalashtirgan holda tasvirlashga ayricha e'tibor berarkan, bunda dastlab, allaning nechog'li katta ahamiyatga egaligini ta'kidlaydi:

Arusi charx tun-kun doya kirdor, Bo'lib har tavri holidin xabardor. Beshik davrida chiniyu xitoyi, Bo'lib yuz no'sh lab dostonsaroyi. Ko'zining nozi eldin eltib uyqu. Anga uyqu keturmakka navogo'

Doya tun-kun uni parvarish qilib, "dostonsaro"lik, ko'zlariga noz uyquni chorlash uchun "navogu"lik qilib allalar aytib, quvnab-yashnab ulg'ayishiga ma'naviy asos



solganliklaridan u bir yoshni to'ldirganidayoq, oyoqda turadi: beshikni tark etib, mustaqil yura boshlaydi. Shu zaylda u hammaning suyumlisi bo'lib ardog'lanadi.

Bu yanglig' chun bir o'ldi yoshi oning,
Sharaf durriga yetti boshi oning.

Qadam urdiyu tarki mahd qildi, Kuyub emgak, yururga jahd qildi.

Falakning aylanishi tufayli u ana-mana deguncha uch yoshga to'lib, so'zlarni durday terib, ishq afsonalarini so'zlaguvchi bo'ldi. Shoir tasvirida uch yashar Farhod o'n yashar boladay fikr yuritishi bilan barchani taajjublantira boradi:

Chu uch yoshiga chekti davri aflok, Takallum qildi andoqkim duri pok.

So'z bori bo'lib afsonai ishq,

Malomu maskani koshonai ishq, Ajabdur uch yoshida o'zga atfol, Nechukkim o'n yoshida o'zga atfol .

Navoiy bola ma'naviy kamolotida ustoz-tarbiyachining rolini shu xilda baholaydi. Farhodning uch yasharligidayoq, bu qadar ham jismoniy, ham axloqiy- ma'naviy kamol topishida, albatta, unga murabbiylik qilgan doya va allalagan "navogo" hamda "dostonsaro"lar xizmati katta edi. Shu sababli endi unga saboq berish uchun "hakimi nuqtadon" kerakligini ota o'z vaqtidayoq tushundi:

Ato bu nav' ko'rgach ish hisobin, Munosib angladi ilm iqtisobin. Keturdilar hakimi nuqtadone, Bilik birla jahon ichra jahone

Farhod shu xilda nuqtadon ustoddan "falak mushkilotlari" va ularni yechish yo'llarini o'rganishga kirishdi, "quyosh yanglig' yorug'" fikri bilan "uchinchi oy ravon bo'ldi savodi". "Qur'on"ni yod oldi. Uning zehni shu qadar tez ediki:

Agar bir qatla ko'rdi har sabaqni,



Yana ochmoq yo'q erdi ul varaqni. Ne so'znikim o'qib ko'ngliga yozib, Dema ko'ngliki, jon lavhiga qozib. O'qub o'tmak, uqib o'tmak shiori. Qolib yodida safha-safha bori.

Alisher Navoiy ta'limni "o'qish va uqish" prinsipi asosida tashkil etishni bundan besh yarim asr muqaddam Farhodni tarbiyalash vositasi sifatida ko'rsatib o'tgan edi. Majnun tarbiyasida ham Navoiy shu yo'lning maqbulligini yana ta'kidlaydi. Majnunni ham 4-5 yoshlar oralig'ida bir "hunarvor ustod"ga berilganini, u ham bunda o'z qobiliyatini namoyish etganini shunday ifodalaydi:

Kun bor edikim besh-o'n sabaqni

Anglab evurar edi varaqni.

Navoiy bolalarni tarbiyalashda Farhod va Majnun timsollarida ideal namunalarni ko'rsatdi.

Alisher Navoiy ana shu axloqiy-ta'limiy qarashlarini butun hayoti va ijodiy faoliyatining sintezi bo'lgan "Mahbub ul-qulub" asarida yanada chuqurlashtiradi. Bu asar ustozlari Shayx Sa'diyning "Guliston", "Bo'ston" va Abdurahmon Jomiyning "Bahoriston" singari didaktik bitiklari an'alaridan ijodiy ilhomlanib yozilgan bo'lib, tarkibiy jihatdan uch qismdan iborat:

Birinchi qismi "Xaloyiq ahvoli va atfoli kayfiyatida" ("Kishilarning ahvoli, fe'l-atvori va gap-so'zlarining ahamiyati haqida") bo'lib, 40 fasldan tashkil topgan. Ularda jamiyatdagi turli ijtimoiy tabaqalar hamda ularning ijtimoiy mavqeini tavsiflash yetakchilik qiladi. Odil podsholar, beklar, nomunosib noyiblar (o'rinbosarlar), zolim podsholar, diyonatsiz sadrlar (mansabdorlar), maqtanchoqlar, yasovullar, lashkarlar, shayxul-islom, qozilar, qonunshunos muftilar, mudarrislar, tabiblar, mutasavvuflar (bularni nazm gulistonining xushovoz qushlari deb ataydi muallif), kotiblar, maktab ahli, mutrib va mug'anniylar, ashulachilar, qissago'ylar, va'zxonlar, munajjimlar, savdogarlar, kosiblar, xalq amaliy san'ati ustalari, mirshablar, zindoniylar, qorovullar, dehqonlar, bezorilar, g'arib va bechoralar, gadoylar,



qushchilar va ovchilar, uylanish va xotinlar, riyokor shayxlar, xarobot ahli rindlar haqida batafsil ma'lumotlar berarkan, feodal jamiyatga xos ijtimoiy tabaqalanish xususiyatlarini ochadi. Bunday vaziyatda Navoiy o'z zamonasining ulkan jamiyatshunosi sifatida gavdalanadiki, u bergan ma'lumot XV asrdagi ijtimoiy munosabatlar tarixini o'rganishda hamon qimmatli manba sifatida xizmat qiladi.

Navoiy iqtidorli o'quvchilarni, olimlarni, kotiblarni, shoirlarni san'atkorlarni hurmat qilishga chorlaydi. Uningcha, o'qish ham, o'qitish ham g'oyat mas'uliyatli ish, chunki beqiyos qunt, havas va g'ayratni talab etadi. Bolalarni savodli, bilimli qilish yo'lida o'qituvchi chekadigan zahmat ozmuncha emas. Binobarin, shogirdning burchi, garchi ustoz unga bir harf o'rgatgan esa-da, o'sha ustoz hurmatini joyiga qo'ymoqdan iborat. Shogird ustozni umr bo'yi izzat qilmog'i, unutmashligi lozim:

Haq yo'lida kim senga bir harf o'qitmish ranj ila, Aylamak bo'lmas ado oning haqin yuz ganj ila.

Asarning ikkinchi qismi "Hamida atfol va zamima hisol xosiyatida" ("Yaxshi fe'llar va xislatlar to'g'risida") tarzida nomlangan va u o'n bobdan iborat bo'lib, axloqiy masalalarga bag'ishlangan. Unda inson axloqi yaxshi fe'llar va yomon xislatlarga bo'lingan holda talqin qilinadi. Yaxshi fe'llar silsilasida tavba, qanoat, sabr, tavoze' va odob, ishq tavsiflanadi, ularning mohiyatini ochish niyatida kichik- kichik tamsiliy voqealar keltirilib, inson kamolotidagi ahamiyati ko'rsatiladi.

Asarning uchinchi qismi "Mutafarriqa favoyid va amsol surati" ("Turli foydali maslahatlar va maqollar") tarzida nomlangan bo'lib, 118 tanbihdan tashkil topgan. "O'zbek tilining izohli lug'ati"da "tanbeh" arabcha so'z bo'lib, "nojo'ya xatti-harakat uchun beriladigan ta'zir, koyish, ogohlantirish yoki jazo" tarzida izohlansa- da, Navoiyda u hikmat ma'nosida qo'llangan. Zero, ularda Navoiy umr bo'yi kuzatgan hayotiy tajribalarini



lo'nda, qisqa va obrazli qilib, aforistik darajada ifoda etgan. S.G'aniyeva to'g'ri qayd etganidek, bu tanbihlarda "odam va odamiylik haqida, chin insoniy fazilatlar to'g'risida asrlar mobaynida xalq tajribasi va bilimining qaymog'i sifatida yig'ilgan fikrlar, shuningdek, Navoiyning uzoq hamda murakkab hayot tajribalarining natijalari, xulosalari keltirilgandir. Navoiyning o'zi qayta-qayta takrorlagan "oz so'z - soz so'z" hikmatiga to'la rioya qiladi va hech qanday mubolag'asiz aytish mumkinki, deyarli har bir jumla ta'kid va tanbih aforistik xarakterga ega bo'lgan hikmat va donolik namunalarini yaratadi.

Bu tanbihlar keyinchalik "Navoiy aforizmlari" nomi ostida alohida terilib, 1947-yilda Hodi Zarif va 1961-yilda Y.Eshonqulovlar tomonidan kitobchalar shaklida nashr etilishi yosh avlod tarbiyasi uchun yuksak ta'limiy ahamiyatga ega. Ularda insonni sharaflash yetakchi motivdir. Binobarin, har bir tanbih mohiyati pirovad-oqibatda bir o'gitda jamlangan, ulardan qay birida zamona nosozligidan shikoyat qilinsa, qay birida insonni ilm olishga, kasb-hunar o'rganishga, hayotni va o'z salomatligini qadrlashga, mehnatsevarlikka, odillikka, halollikka, xullas, ezgulikka da'vat etuvchi motivlar yetakchilik qiladi. Shu sababli ulardan ayrimlarini keltirib o'tish foydadan xoli bo'lmaydi:

"O'ziga bino qo'ygan odam - aqlsizdir; o'ziga zeb bergan - beor, satangdir".

"Eshitmoq kishini boyitadi; ko'p gapirmoq sayozlatadi, ko'p gapirgan, ko'p yanglishadi. Ko'p yegan, ko'p yiqiladi. Tan kasalining asosi, ko'p yemakdir, qalb kasalining sababi, ko'p demakdir. Ko'p demak - o'zga mag'rurlik, ko'p yemak - nafsga bandalikdir".

"Takabburlik - shayton ishi va manmanlik - nodon ishi".

"Xudparastlikdan butparastlik yaxshiroqdir".

"Insoniyat bog'ining eng go'zal daraxti - ehsondir va odamiylik xazinasining eng bebaho gavhari ham ehsondir".



“Saxovatsiz odam - yog‘insiz bahor bulutiga va hidi yo‘q mushk-anbarga o‘xshaydi”.

“Himmat ahlining ixtisosi - saxovatdir”.

“Himmatsiz kish i-er sonida emas”.

“Oliyhimmat odam – balandparvoz lochindir; behimmat - sichqon ovlovchi kalxatdir”.

“Himmat egasi - qashshoq bo‘lsa ham tubanlik qilmas; himmatsiz odam - xazina topsa ham buyuklarga teng bo‘lmas”.

“Yaxshiliklarni topmoq - yedirmoqdir; ayblarni yashirmoq - kiydirmoqdir”.

“Aytur so‘zni ayt, aytmas so‘zdan qayt”.

Bular shoirning avlodlarga qoldirgan o‘gitlarigina emas, balki barhayot da‘vatlari bo‘lib, zamonlar osha navqiron naslni komillik sari undab kelmoqda.

Buyuk mutafakkir ana shunday o‘lmas g‘oyalar bilan kishilik jamiyatining yangidan -yangi avlodlari qalbiga yo‘l topib, mangulik kasb etib kelmoqda.

Muhammad Sharif Gulxaniy

XIX asrning birinchi yarmi Qo‘qon adabiy muhitida masal - tamsil janrida xalqchil asar yaratishga muvaffaq bo‘lgan shoirdir. Uning hayoti va ijodiga oid tadqiqotlardan ma‘lum bo‘lishicha, Gulxaniy tabiatan yumor va hajvg ustas, xalq urf-odatlarini va til boyliklarini, maqol, matal, naql va rivoyatlarni chuqur biladigan ijodkordir. U fors-tojikcha g‘azallarida Jur‘at taxallusini qo‘llagan bo‘lsa, o‘zbek kitobxonlariga Gulxaniy taxallusi bilan mashhur. Gulxaniy - olovqalb, majnunsifat ma‘nolarini bildiradi. Gulxaniyning eng muhim ijodiy fazilati shundaki, u XIX asr folkloristi sifatida o‘zbek xalqining donishmandligini ifoda etgan masallar, maqollarni to‘plab, o‘zining mashhur “Zarbulmasal” asarini yaratgan. Shoir uni yaratishda xalq og‘zaki ijodi bilan birga, buyuk hind masali “Kalila va Dimna”dan, Firdavsiy, Jomiy,



Hofiz Sheroziy, Shayx Sa'diy, Alisher Navoiy kabi mutafakkirlar asarlari an'analaridan keng foydalangan. Chindan ham jahon adabiyoti xazinasining noyob durdonasi sanalmish "Kalila va Dimna" qadimgi hind folklori zaminida vujudga kelgan. Uni hind podshohi Dobshalim uchun faylasuf *Beydabo* yozganligi naql qilinadi. Jumladan, kitob muqaddimasigi ayrim fikrlar e'tirofga loyiq: "Har bir xalqning olim va faylasuflari qanday vositalar bilan bo'lmasin, o'z orzu va istaklarini amalga oshirmoq, mavjud tartibni intizomga solmoq uchun hamisha fikr yuritganlar, har xil tadbirlar ila ish ko'rmoqchi bo'lganlar, bu haqda har xil asarlar yozmoqqa intilganlar. Shulardan biri qushlarning va yovvoyi, yirtqich hayvonlarning tilidan yozilgan, g'oyat chuqur ma'noli, nafis ramz va muammolarga to'la ushbu kitobdir... Olimlar bu yo'lni tanlab zo'r imtiyozga ega bo'lganlar: avvalo, bu bilan ular xohlagan so'zlarini aytib, har bir bobni orzu qilganlari darajada bezash imkoniyatiga ega bo'ldilar. Buning ustiga, ular shu yo'l bilan nasihat, hikmat, latifa va hazil-mutoyiba javohirlarini bir-biriga qo'shganlar, toki dono odamlar bu kitobni mutolaa qilib, foydalansinlar, nodon odamlar esa, uni afsona deb o'qisinlar.

Yosh shogirdlar esa, savodli bo'lmoq, ilm orttirmoq, naql aytmoq maqsadida bu kitobda yozilganlarni osonlik bilan yodlarida saqlab qolgusidirlar. Katta bo'lib, aql va tajriba egasi bo'lganlarida, yodlab olgan va esda saqlab qolgan naqlar ustida fikr yuritib, ularni tushunganlarida dillari naqadar foydali hikmatlar bilan to'lganligini ko'radilar va o'zlari kutmagan ulkan boylikka, bitmas-tuganmas xazinaga ega bo'lganlarini biladilar. Yoshlarning xursandligi katta bo'lganda otasidan meros bo'lib qolgan xazinani topgan va shu tufayli umrining oxiriga qadar qiyinchilik ko'rmasdan yashay olishini bilgan odamning sevinchiga o'xshaydi."

Ta'kidlangan jumalarni Gulxaniyning "Zarbulmasal" asari haqida ham aytish mumkin. Bu esa asarning yosh kitobxonlar uchun g'oyat muhimligini asoslaydi. Gulxaniy ham Yapaloqqush va Ko'rqush suhbatida ayrim hikoyatlar bayonini "Kalila va



Dimna" nadan topmoq joizligini ta'kidlaydi. "Zarbulmasal" Umarxonning amri, istagi bilan yozilganligi, u xalq orasida keng tarqalgan zarbulmasallarni - xalq maqollarini yig'ib, kitob holiga keltirish lozimligini aytgani hamda Gulxaniy shu nozik xizmatga loyiq, deb topilgani nazarda tutilsa, mazkur asarlarning maqsad-mohiyati juda yaqinligi oydinlashadi.

"Zarbulmasal" so'zi "zarb" va "masal" so'zlarining qo'shilmasidan iborat bo'lib, adabiy atama sifatida masal, maqol, matal keltirib so'zlamolikni anglatadi. Zero, undagi pand-namo hikoyatlar, xususan, majoziylik, qushlar, hayvonlar tilidan so'zlash, "Tuya bilan bo'taloq", "Maymun bilan najjor", "Toshbaqa va chayon", "Bozanda va Navozanda" kabi bir qancha masallar hamda xalq maqollarining keltirilishi bilan ham yuqorida zikr qilingan asardan ijodiy ilhomlanib yozilganligini tasdiqlaydi. Ammo, aytish joizki, "Kalila va Dimna" turli mavzudagi hikoyatlar zahirida qurilgan pand-u hikmatlardan, voqealar bayoni, maqollar ifodasi ham mumtoz adabiyotga xos yashirin, majozlar tilida so'zlashdan iborat. Undagi masallar garchi turli parrandalar, qushlar va yirtqich hayvonlar o'rtasidagi munozaralar, munosabatlar orqali hikoya qilinsa-da, yuksak andisha, falsafiy va purhikmat o'gitlar ustuvorlik qiladi. Gulxaniy esa feodal jamiyatining kishisi sifatida o'tkir satiraga keng o'rin bergan. Binobarin, "Zarbulmasal" majoz asosiga qurilgan qissa bo'lib, unda turmush voqea-hodisalari, turli ijtimoiy toifaga mansub kishilarning fe'l-atvorlari, bir-biriga munosabatlari qushlar, hayvonlar tilida bayon qilinadi. Muhimi, asarda xalq maqollari va naqlari (400 dan ortiq) keng o'ringa ega. Undagi asosiy voqea-hodisalar qushlar - hayvonlar timsollari orqali ifodalanganligi, bosh qoliplovchi hikoya boyo'g'li va Yapaloqqush hikoyasi bilan bog'lanib ketuvchi katta-kichik masal-hikoyalar ham keltirilganligi uchun adib uni "Zarbulmasal" deb nomlagan. Qushlar obrazi asarning asosiy mazmunini belgilaydi, hayvon-hasharot va kishi obrazlari qushlarning o'zaro suhbatlarida, ular tomonidan keltirilgan naql-u rivoyatlarda namoyon bo'ladi.



Asar sujetidagi voqealar xalq ertaklariga monand yozilgan: Yapaloqqush o'g'li Kulonkir sultonni uylantirish maqsadida o'z yaqini Ko'rqushni Boyqush huzuriga sovchilikka yuboradi. Boyo'g'lining nihoyatda go'zal, quyosh yanglig' Gunashbonu ismli qizi bor edi. Yapaloqqushning "har qancha qalin bo'lsa topilur" deya o'z tarafidan sovchilikka borishga unaganida, Ko'rqush quyidagi maqollar orqali unga gap uqtirmoqchi bo'ladi: "Bor maqtansa topilur, yo'q maqtansa chopilur", "Yolg'on masal turmas", "Uyat o'limdan qattiq", "Ermon yog'ochining egilgani - singani, er yigitning uyalgani - o'lgani", "Oyoq yugurigi oshqa, og'iz yugurigi boshqa..." Sen kim, Boyo'g'lining eshigiga kishi yubormoq kim? Hech bilmasmusenki, "Teng tengi birla, tezak qopi birla". Yapaloqqush: "Andin bizning nima kamligimiz bor?,- deganda esa Ko'rqush: "Maqtangan qiz to'yda uyalur", "O'zini maqtag'on o'lumning qarovuli". Sening ahvoling olamg'a ma'lumdir. "Oyni etak birla yashirsa bo'lurmi?", "Chumchuq semursa, botmon bo'lurmi?", "Olako'zanak ola bo'lsa ham, arslon bo'lmas, olato'g'anoq olg'ur bo'lsa ham, ahvoli ma'lum" kabi.

Ana shunday maqolli aytishuvlar, "sovchi"ning yo'ldagi hamsuhbatlari orasidagi masallar hikoyasi, bir-ikki bordikeldidan so'ng ming xaroba - chaldevor(chordevor) qalin badaliga Boyo'g'li rozilik beradi. Yapaloqqush shonu shavkat bilan to'y anjomlarini keltiradi, o'sha davrdagi quda-andachilikka xos hamma rasm-rusumlar, milliy odatlar bajo keltirilib, to'y marosimlari o'tkaziladi. Bu marosimlarda ikki tomondan juda ko'p qushlar - Ko'rqush, Hudhud, Turumtoy, Kordon, Bozanda, Navozanda, Anqo, Humo, Ukob, Lochin, Oqqush, Turna, G'oz, O'rdak, Suqsur, Kaklik, Bedana, Olato'g'anoq, Zarqaldoq kabilar qatnashadi va har biri o'ziga yarasha xizmatni ado etadilar. Farg'ona iqlimida xarobalar kam bo'lganligi uchun Movarounnahr iqlimidan (Buxoro amirligi) 1000 chordevor topishib, kelin Gunashbonu mahriga to'laydilar.

Ko'rinadiki, Gulxaniy asarda aniq makon (Ho'qand, Buxoro) va zamon (XIXasr), hayotiy voqelik (feodal jamiyatidagi



notenglik)ni hamda xalq an'alarining yaxshi-yomon qirralarini majoz va kinoya, so'z o'yinlari, kesatiqlar orqali bayon etadi. Garchi unda o'z yurti (Qo'qon) va uning xoni (Umarxon) ga sodiqlik, u boshqarayotgan yurtning boshqa hududlardan ko'ra obodroq ekanligiga ishora etilsa-da, Xolboqi misgar, Yodgor po'stindo'z, Muhammad Amin mufti, Otaboy amin, Sayid Azimxon, Eshon kalla haqidagi hajviy-rivoyaviy epizodlarni ochiq-oydin keltiradi.

Muallif o'z masallarida majoziy obrazlar orqali hukmron sinf vakillarini fosh qiladi, mamlakatga xarobalik, xalqqa qashshoqlik keltirgan o'zaro feodal urushlarga qarshiommaning noroziligini ifodalaydi. Shuning uchun Yapaloqqush va Boyo'g'lining bir-biriga quda bo'lishi voqeasini keltiradi. Bu ikki quda to'y bahonasi bilan mamlakatni xonavayron qiladi. Yozuvchi Ko'rqush, Hudhud, Kulonkirsulton, Sho'ranul, Malik Shohin va Kordonlarning bir-birlariga aytgan masallari, hikoyalari orqali asarning g'oyaviy mazmunini ravshanlashtiradi.

Gulxaniy "Maymun bilan najjor" masalida hunar va hunar ahlini ulug'laydi, qo'lingdan kelmaydigan ishga aslo urinib kulgi bo'lma, ko'r-ko'rona birovga taqlid qilib falokatga yo'liqma, degan fikrni maymun qismati orqali ko'rsatadi. Bu masal axloqiy tarbiyaviy mavzuda bo'lib, ishning mohiyatini bilmay, pala-partish kirishuvchi va oxirida o'zi sharmanda bo'lib qoluvchi kishilarga o'git-nasihat tarzida keltirilgan.

Mehnatkash xalqning og'ir hayoti va mehnati, huquqsizligi va nochorligi, ayanchli qismati esa "Tuya bilan bo'taloq"da badiiy tasvirlangan. Gulxaniy bu masalda Sarbon, Tuya va Bo'taloq orqali xususan, o'zi yashayotgan jamiyatdagi tengsizlikni, uning og'ir mashaqqatlarini bayon qiladi. Chunki xalq uchun "tirikchilik toshdan qattiq", Sarbon o'z g'amida, tuya og'ir yuk ostida, Bo'taloq esa ona sutidan mahrum.

Gulxaniyning "Toshbaqa bilan chayon" masalida esa bir-biriga zid va qarama- qarshi ikki obraz berilgan: toshbaqa -



aqli, farosatli, safarlarda ko'p yurib, ancha tajriba orttirgan, insofli, sodiq va qadrdon do'st timsoli, chayon esa uning ziddi. U boshqalarga yomonlik qilishdan huzur qiladi, yaxshilikni bilmaydigan kimsalarning ramziy obrazidir.

Gulxaniy qissadan hissa chiqarib, kishilarni hushyorlikka odamoxunlikka undab: "Aslning xatosi bo'lmas, nojinsning oshnosi bo'lmas", "Bo'ynida illati borning oyog'i qaltiraydi", - degan maqollarni keltiradi.

"Zarbulmasal" majoz va masallar, xalqning jonli iboralari asosiga qurilgan asar. Undagi she'riy va nasriy matnlar turli badiiy san'atlar vositasida ta'sirchan ifoda etilgan.

"Zarbulmasal" ham "so'z matosi qadim o'tmishda to'qilgani, ranginkamon rishtalari butun yer yuzini, go'zal so'z gilamlari bilan burkab chiqqan" yodgorliklarga monandligi jihatidan, nafaqat kattalar, balki bolalar ham zo'r qiziqish bilan o'qib kelayotganligi uning bolalar kitobxonligidagi muhim o'rnini belgilaydi. Umuman, asarda zarb, zarblash usulidan foydalanilgani uchun nomi "Zarbulmasal" hisoblangan bu asar tarkibida "Toshbaqa bilan chayon", "Tuya bilan bo'taloq", "Maymun bilan Najjor", "Kabutar bilan zog", "Yodgor po'stindo'z", "Dumsiz eshak", "Yolg'onchi tuya" kabi masallarning jami 15 dan ortiqligi ayonlashadi. Zotan, "Zarbulmasal" xalq orasida "Yapaloqqush hikoyasi" ham deyiladi.

Alifbe manzumalar (abitsedariy) ta'lim-tarbiya asosi.

O'tmishda eski maktablarda o'qish va yozishni o'rgatish bir necha bosqichli jarayonni tashkil etgan. Maktablar bo'lganki, faqat o'qishni o'rgatgan, maktablar bo'lganki, faqat yozishni o'rgatishga ixtisoslashgan.

Eski maktablarda yozuvni o'rganishda "hijo" yoki "tahajji" usulidagi uch bosqichga amal qilingan: birinchi bosqichda arab alifbosidagi har bir harfni alohida- alohida yozish mashq qilingan. Bu bosqich **MUFRADOT** davri deyilgan. Aytaylik, arab



alifbosida mavjud 28 harfning har biri to'rt shaklga ega; bu 112 harfiy belgi degani. Agar arab yozuvining yuzdan ziyod ko'rinishlari hisobga olinsa, bu harflarni ifodalovchi belgilar miqdori qanchaga yetishini tassavur qilish qiyin, albatta. Ammo har bir belgini chiroyli va yorqin, qiyomiga yetkazib yozishga, demakki, husnixat (kalligrafiya)ga alohida e'tibor qilingan. Shu vajdan mufradot davri birmuncha cho'zilgan.

Ikkinchisi - **MURAKKABOT** bosqichi deyilgan. Bunda harfni harfga old tomondan qo'shib yozish, ostki va ustki belgilarning to'g'ri ifodalanishiga alohida e'tibor qilingan. Shu zaylda harfni harfga qo'shganda hosil bo'luvchi hijolarni idrok qilish mashqi qiyomiga yetkazilgan.

Uchinchi bosqichda so'zni yozishga o'tilgan, bu **MUQATTAOT** davri deyilgan. Bu bosqichda o'quvchilar ikkiliklar, ruboiylar, qit'alar, tuyuqlar va g'azallarni ko'chirib yozishni mashq qilganlar.

Eski maktablarda uzoq asrlar davomida yozuv ana shu taxlitda o'rgatib kelindi. Bu esa, o'z navbatida, yozishning nazariy va amaliy asoslarini ishlab chiqish va takomillashtirishni taqozo etgan, natijada, shu yo'nalishdagi tajribalarni umumlashtiruvchi alifbo manzumalar yuzaga kela boshlaganki, bular abidsedariylar (yoki alifbo she'rlar) deb yuritiladi.

Alifbo manzumalari faqat xattotlik asrori bayonidan iborat, yoki xattotlik san'atini o'rganuvchilargagina mo'ljallanib qolmay, balki hammabopligi, umuman, yozuvni o'rganishni niyat qilgan katta-yu kichikka xosligiga ko'ra o'tmishdagi bolalar kitobxonligida ayricha o'rin tutadi. Aytaylik, ularda qog'ozning "abreshimiy", "nimkatoniy", "abri bahor", "hafrang" turlari va ularda yozish xususiyatlari, yozuv vositalari - siyoh, qora qamish, qalam, pargor (sirkul), mistar (transparent), qalamtarosh, qalamqat, xato ko'chirishganda uni yuvuvchi abr(shtrix) kabilarni qanday asrash va ishlatish, shuningdek, arab yozuvidagi har bir harfni qanday esda tutish, buning uchun



o'sha belgi tabiatda nimaga o'xshashligini eslash hamda o'sha harfiy belgi hajmi qanday bo'lishiga oid ma'lumotlar berilgan. Biroq, turkiyzabon bolalarning yozuvni o'rganishi uchun o'z tillarida yaratilgan bunday qo'llanmalar mavjud emas edi.

Shermuhammad Munisning "Savodi ta'lim" alifbo manzumi ana shu ehtiyojni qondirish yo'lida yaratilgan dastlabki asar hisoblanadi. U bolalar va yoshlarning xat-savod chiqarishlarini, ilm o'rganishlarini yengillashtirish maqsadida yozilgan. Munis an'anaga sodiq qolib, dastlab o'ziga yozuv qoidalarini o'rgatgan ustoz Ibn Hojibga minnatdorchilik bildiradi, so'ngra, asar yozishdan ko'zlangan maqsadini bayon qiladi:

Ko'p muddat erdi guruhi mushtoq, Ta'lim sumanbarig'a
ushshoq.

Mashq, etmak ishida xat bitarga, Ta'lim vuqufig'a yetarga.

Aylar edi xizmatim aro po'y,

Dilresh o'lib o'ylakim qalam mo'y...

Munis "ko'p muddat"dirki o'zbek maktablari uchun savod chiqarishga qulay tadrisiy qo'llanmalar yo'qligidan "xat bitish ta'limini vuqufiga yetkazish" qiyinligini, binobarin, shu holga xotima berish maqsadida bel bog'laganini uqtiradi:

Bilgancha surib qalamni har yon,

Ta'lim ishin aylar erdim oson.

Shundan so'ng shoir qalam va xat vasfiga o'tadi. Uningcha, qalam o'quv quroligina emas, balki yozuv vositasi bo'lganligi uchun ahamiyatli. Shu boisdan:

Zebo qamishini nayshakar bil, No'gida aning shakar samar bil. Harfidan oqib sharobi ma'ni, El andin erur xarobi ma'ni.

Qalam ilm ahli nasibasini butun qiladi, saltanatlar yumushini raqam qiladi. Xullas:

Olam ishi intizomi andin,

Olam elining nizomi andin.



Ul bo'lmasa - bo'lmagay kitobat, Bul bo'lmasa - qolmagay hikoyat...

Xat esa, aslida qalam “no'gidan” oquvchi “sharobi ma'ni”. Xat vositasidagina kishilik jamiyati yaratgan ilm-u hikmat avloddan avlodga meros bo'lib, yetib keladi:

Xatdur asbobi taroshi xoma,

Ziynat baxshi uzori noma.

So'z maxzanining nishonasi ham, Ma'no durining xazonasi ham. Har so'zki, ko'nguldan o'ldi mavjud Xat bo'lmasa - bo'lgay erdi nobud...

Munis o'quvchilarni chiroyli yozishga da'vat etar ekan, buning uchun, avvalo, xat yozish vositalari - qalam-u qalamtarosh, qalamdon-u qalamqat singari yozuv qurollarini ozoda, “taxt va shaxt” tutish zarurligini uqtiradi. Shundagina “xatti xub” - husni xatga erishish mumkin, deb hisoblaydi muallif:

Ey kim xatti xub erur taloshing, Bo'lsin bu sifat qalam-taroshing. Agar yaxshi yo'nilmasa qalamlar, Shak yo'qki, yomon tushar raqamlar.

352 satr (176 bayt)dan iborat manzumaning birinchi qismida ana shu masalalar xususida bahs yuritilgan. Masnaviy shaklida bitilgan asarning ikkinchi qismi arab yozuviga asoslangan o'zbek alifbosidagi 28 harfning shakli, ularning nimalarga o'xshashligi va imlo xususiyatlarini birma-bir ta'riflaydi. Bunda u harflar hajmini nuqtalar bilan belgilash an'anasidan voz kechmaydi; “Nuqta bilan o'lchamak shior et”,- deydi. Shoir ta'kidicha, “Ul qavmki xatga erdi voqe', Bu nuqta alardan o'ldi voqe'”. Muhimi, bunday usul harflar hajmi va shaklini qat'iylashtirishi, demakki, belgining har xilligiga chek qo'yilishi ayonlashadi. So'ngra, arabcha “alif”dan to “shin”gacha har bir harfni poetik ta'riflashga o'tadi:

“Ro” qomati ikki nuqta, ammo

Boshi biyik ermas, o'ylakim “zo”.



“Zo” uch nuqta-u lek sarkash,
Qilsa bo’lur oni qushga o’xshash.

Shoir har bir harfni o’quvchilarga shu xilda tanishtirar ekan, savod o’rgatishda badiiy-tasviriy vositalar, suvrat solishdan foydalanishni tavsiya etadi. Chunonchi, yuqoridagi misolda “z” (zo) harfi shaklan qushgao’xshashligi bilan o’quvchi zehnida tez o’zlashuvini ta’minlagan. Shunga o’xshash:

“Nun” olti nuqtadur, ey qarindosh,
Ikki oyoq, ikki tan, ikki bosh.

Uch nuqtadur ikki lab arosi, Ul nav’ki umqining binosi.

Buning ustiga “nun” shunaqa bir harfiy belgiki, boshqa bir qator harflarning shakliy ifodasida ishtirok etadi:

“Qof” avvali “fo” boshiga monand,
“Nun” halqasig’a va lek payvand.

Yoki:

Gar “lom”ni istasang murattab,
“Nun” birla alifni qil murakkab.

Shoir barcha harflarni ta’riflab bo’lgach, ko’nglidagi ulug’ niyati amalga oshganidan tasalli topib, asarining nomi va yozilish tarixini shunday izohlaydi:

Bu nomaki bo’yla topti tanzim,
Yozildi oti “Savodi ta’lim”.

Ta’rixi aning bu nav’ adodur, Hijrat chog’idinki, g’am fizodur.

Ming ikki yuz o’n to’qqiz edi yil, Dog’i ramazon uchinchisi, bil.

Go’yoki, chahorshanba erdi, Itmomi qalamga dast berdi.

Hijriy 1219-yil ramazon oyi uchinchi chorshanbasi melodiy hisobga aylantirilsa, 1804-yilning 4-dekabri kelib chiqar ekanki, bu asarning yozib tugallanganligi sanasidir.



Eng muhimi, Shermuhammad Munis shu asari orqali imlo masalalariga daxl qilib, harfiy belgining shakli, hajmi, yozilish tartibini qoidalashtirdi va o'quvchilarda yozish malakalarini shakllantirishga, shu yo'l bilan bu sohadagi har xillikka barham berishga urindi.

Maktab ta'limi jarayonida abjad hisobini o'rgatish ham birmuncha qiyinchiliklar tug'dirgan. Binobarin, shu qiyinchiliklarni yengish yo'lida abjad hisobida yechiladigan chistonlar yozish an'anaga aylana boshlagan. Bu sohada, ayniqsa, XVIII asrning oxiri va XIX asrning birinchi yarmida yashab ijod etgan zabardast shoira va novator muallima Jahon otin Uvaysiy alohida namuna ko'rsatgan.

Jahon otin Uvaysiy (1780-1845) zamonasining peshqadam ziyolilari mulla Siddiq va Chinni otinlar xonadonida tug'ilib tarbiya ko'rgan. U yoshligidayoq she'riyatga va maktabdorlikka havas qo'yadi. Otasi mulla Siddiq fors-tojik va o'zbek tillarida she'rlar yozgan. Qur'oni karimni qiyomiga yetkazib qiroat qilganligidan uni Hofiz bobo deb e'zozlaganlar. Onasi Chinni otin ham xat-savodli bo'lib, maktabdorlik qilgan, qiziga ham yozish va o'qitishni yoshligidayoq o'rgatgan. Hatto ba'zi hollarda o'zi yumush bilan band bo'lgan kezlarda qiziga xalifalik xizmatini buyurgan. Jahon ana shunday vaziyatda otinlik tajribasini to'plagan va maktabdorlik hadisini o'zlashtirib borgan. Xuddi shu faoliyati tufayli elga tanilgan, maktabdorligiga shoiraligi qo'shilib, Qo'qon xonligi muzofotida shuhrat qozongan, hatto dovrug'i Umarxon saroyigacha yetib borgan. Bu hol uni ulkan shoira Nodira bilan yaqinlashuviga yo'l ochgan.

Uvaysiy eri vafotidan so'ng Nodira taklifi bilan Qo'qonga kelgan.

A.Valixonovning shahodaticha, dastlabki paytlarda shoira haramda yashaydi. U haramdagi qizlar - kanizaklar orasida xat-savod o'rgatish hamda musiqiy ilmning amaliy jihatlaridan ta'lim berish bilan shug'ullanadi. Shoira asira



shogirdlari qismatiga achinarkan, ularni loaqal jamiyatdagi ana shu mavqelari mohiyatini mulohaza qilishga undovchi, shu asosda ijtimoiy ongilarini uyg'otishni ko'zlab bir qator chistonlar yozadi. U shogirdlarini mustaqil o'ylay bilishga, narsa va hodisalarni belgilariga qarab ajrata olish malakalarining shakllanishiga, sezgir va topqir bo'lishlariga erishmoq yo'lida izlanarkan, rang-barang mavzularda chistonlar bitib, ta'lim mazmundorligini chuqurlashtiradi, samaradorlikni oshiradi; bu esa uning maktabdorlik faoliyatida izlanganligi, qolaversa, eski maktablarda o'z zamonasidagi ta'lim tizimini takomillashtirish yo'lida ayrim islohotlarni amalga oshira olganligini ko'rsatadi. Chunonchi, uning anorga bag'ishlangan chistoni bu jihatdan alohida ahamiyatga ega. Shoir bu chistonni yaratishda Alisher Navoiyning shu nomdagi lug'zidan ijobiy ilhomlangan, deyish mumkin. "Badoye' ul bidoya" devoniga kiritilgan bu lug'z shoirning yoshligi davrida bitilgan:

Ne mijmardur, to'la axgar, vale ul mijmar andomi.

Erur sun' ilgidin gohe musaddas, gah musamman ham.

Chiqar ravzandin axgari dudi-yu bu turfakim, oning O'tiga dud yo'qtur, mujmarig'a balki ravzan ham. Otu mijmar dema, bor ul sadafkim, durlarin oning Evurdi qonga davroni mus'habid, charxi purfan ham. Agar bu nav' emas, bas ne uchun barmoq kuchi birla Bo'shar jismi, oqar qoni, anga majruh o'lib tan ham. Nechakim tab'i noridur va lekin me'da norig'a

Berur taskin, muning naf'in topibman voqian man ham.

E'tibor qilinsa, lug'zda dastlab anorning tashqi va ichki ko'rinishi tasvirlangan. Ya'ni, anor bamisoli "mijmar" - manqalday bo'lib, ichi "to'la axgar" - cho'g'. Shakli goho "musaddas" - olti qirrali, goho "musamman" - sakkiz qirrali. Manqallar ham odatda olti, yoki sakkiz qirrali shaklga ega holatda yasalgan. Biroq bu shunday bir manqalki, laxcha cho'g'ining tutuni va shu tutun chiqadigan "ravzan"i - tuynugi yo'q.



Uvaysiy ustozidan farqli o'laroq, anorni yashirarkan, unga to'rt satrda tavsif beradi: u anorni gumbazga o'xshatadi. Biroq bu shunday bir gumbazki, uning "eshigi, tuynugi" yo'q, lekin ichida "gulgunpo'sh qizlar" - anor donalari makon tutgan:

Ul na gumbazdir, eshigi, tuynugidan yo'q nishon, Necha gulgun, po'sh qizlar manzil aylabdur, makon. Sindurib gumbazni qizlar holidan olsam xabar, Yuzlarida parda tortig'liq, turarlar bag'ri qon.

Shoira talqinicha, gumbaz - zulm haddan kuchaygan Qo'qon xonligi mulki. Gulgunpo'sh qizlar anor donalari yanglig' bag'ri qonga aylangan va o'sha mulkda hukmron feodal munosabatlar asoratidan ezilgan xotin-qizlarning umumlashma obrazi. Ularning "yuzlariga parda tortilgan"- anor donalari ustidagi parda shunga ishora. Shoira ana shu "gumbazni sindirib", ular holidan xabar olmoq zarurligini uqdirayotir. Bu shoiraning ulug' jasorati ifodasi.

Bu chiston yechimini adabiyotshunoslar turlicha sharh-lashgan. Chunonchi, E.Ibrohimova yozadi: "To'rt misraga sig'dirilgan katta mazmunga anor ta'rifinigina emas, balki to'rt devor orasida ovoz chiqara olmasdan faryod qilayotgan, qavat- qavat niqob orasida yorug' olamni ko'rish imkoniyatidan mahrum etilgan millionlab mahzuma, munglig' ayollarning hayoti, taqdiri mujassamlashtirilgan. Bu yuzlariga parda tutgan bag'ri qonlar nidosi, noroziligi ifodasidir. Bunda shoiraning tutqunlikka qaratilgan, g'azabli isyoni mazmuni ham bor. Chunki xotin-qizlar ozodligi, erki haqida so'z bo'lishi mumkin bo'lmagan zamon ayoli - Uvaysiy mustahkam istehkomga (gumbaz) qamalgan qizlarning qora parda ortidagi qora taqdirini qoralaydi. Asar majoziy tasvirning yorqin namunasi ham bo'la oladi.

I.Haqqul esa, uning ijtimoiy-estetik mohiyatini yanada teranroq izohlab: "Eshik tuynugi, nishonasiz gumbaz - bu daahr, toza havolari so'rib olingan jamiyat. Inson farzandini qullikka



mahkum etgan, mute yashashga majburan ko'niktiruvchi feodal tuzum qafaslari. Shoirani shular ichidagi "gulgunpo'sh qizlar" - ayol huquqsizligi azobga soladi. She'rdagi "sindirib" so'zi - belgili so'z. Uvaysiy nega aynan shu so'zni qo'llagan? Har jihatdan buning sabablarini izohlash qiyin. Lekin bir narsa aniq; u "sindirib"da qay zaylda bo'lmasin, parchalanishga mahkum jamiyat tartib va qoidalariga o'zining keskin munosabatini singdirgan. "Yuzlariga parda tortig'liq, turarlar bagri qon"-o'tmishdagi xotin-qizlarning ham tashqi, ham ichki holatini bundan aniq, bundan chuqur ifoda etgan satr o'zbek she'riyati tarixida kamdan-kam topilsa kerak", - degan edi olim.

Bu fikrlarning to'g'riligini abjad hisobi asosida yechiladigan va "g'am haddin oshti" iborasini yashirgan tubandagi chistoni ham tasdiqlaydi:

Yolg'izimda uchradi: ul dev edi yoki pari, *Ming* boshi, *qirq* ergashi bor, yona *sakkiz* navkari. Holga kelmas, butni taqmas, barchasi jallodvash, *To'rti* chorlab, *o'nu ellik*, menga yuzlandi bari.

Birining qo'lida *uch yuz* xanjar-u *to'rt yuz* pichoq, O'ning og'zida buldur: "Pora qil!" - deb gaplari.

"Abjad" - harflar yig'masi hosilasi, arab alifbosida an'anaga ko'ra har bir harf bir raqam (son) qiymatiga ega. Yuqoridagi chistonning yechimi: "g'am haddin oshti!" iborasini beradi. Shoir bu iborani chistonda aks ettirib, o'zi yashagan ijtimoiy muhitdan noroziligini yorqin ifoda etgan, ayni choqda, o'z shogirdlariga ijtimoiy tengsizlikdan saboq berib, ular ongini uyg'otishni, ijtimoiy-siyosiy dunyoqarashlarini shakllantirishni ko'zlagan.

Shoirning "qalam", "qog'oz", "kamar", "o'qloq", "dutor", "sham", "ko'ylak", "qaychi" singari predmetlar, "uyqu", "yong'oq", "makkajo'xori", "daraxt", "qizil gul", "bog", "xok" (tuproq), "choy", "chakas", "kaklik", "ko'z", "to'y", "jon", "suv", "muhabbat", "tun" va "kun"ga oid chistonlari ham abjad hisobi asosida yechiladi:



Bog' oralab bir gule ko'rdim, ajoyib nogahon,
Yuz tani bor, yettis hoxi, o'n butoq bo'lmish ayon.

Yoproq'i o'ttiz, yigirma bandi, o'ttiz ildizi, Ey Falotun, tab' olim, aylagaysen imtihon.

Bu chistonning abjad hisobi bo'yicha yechimi "qizil gul" iborasini ifodalaydi.

Shoira bolalarda o'quv qurollariga havas uyg'otmoq va ularni sarishta- saranjom hamda ozoda tutmoqlarini ko'zlab, "qalam" va "qog'oz" haqida shunday chistonlar yaratgan:

Ul na qushdur: boshi yuzdir, qo'lga olsang xosiyat,

Oning o'ttizdir qanoti, yurmagidur ofiyat, Poyi qirq, abjad hisobi anda ermish bandi bog'. Baddin aylang xalos ul qushni, qilmang qabziyat.

Yoki:

Ul na shahredur, yigirma bob, bir bozori bor,

Bulbuli mingdur, ajoyib yeti gulzori bor?

Yona vasfi shahri Rumdur, hindular tutmish vatan, Tashna sursa, bog'i abjaddin chiqqan anhuri bor.

Bundagi sonlar ifodalan harflar jamlanganda, "qog'oz" so'zi kelib chiqadi.

Uvaysiy ellikka yaqin chiston yaratgan, shulardan o'n sakkiztasi shoiraning turli to'plamlari va ayrim tadqiqotlarda e'lon qilingan. Chistonlar xilma-xil mavzularda bo'lib, xalq ijodiyotiga xos topishmoq hodisasidan ijodiy ta'sirlanish samarasi sifatida yozilgan. Shoira bu xizmati bilan XIX asr o'zbek mumtoz adabiyotining janriy arsenalini boyitdi.

Anbar Otinning (1870-1915) "Yakka bayt"lari ham alifbe-manzumaning o'ziga xos namunasidir.

U arab harflari ifodalagan tovushlarni idrok etishni qulaylashtirishni ko'zlovchi to'rtlik, oltilik, sakkizlik va o'nlik shaklidagi poetik tizmalar bo'lib, qofiyalanuvchi so'zlarning oxirgi hijosida muntazam takrorlanib kelishi ritmik bir



butunlikni ta'minlab kelgan, bunga g'oyaviy-axloqiy ruhi qo'shilib, asarning kompozitsion yaxlitligiga erishilgan.

Odam ersang ma'ni bil dona-dona,

Vatan erur senga ikkinchi ona

So'zlamasdan oldin so'zingni sina Har bir so'zdir umring ichinda sina .

Shoira birato'la odamiylikning to'rt fazilatini ta'kidlayotir: birinchisi - odamiylikning bosh fazilati bama'niligida, farosatligida. Aksincha, bema'nilik va farosatsizlik - odamiylikka zid xislatdir. Ikkinchisi - Vatanni ikkinchi ona o'rnida idrok etish, uni chin dildan sevish muhofazasiga fidoyi bo'lishga shaylik ham odamiylikning ziynati. Uchinchi - so'zni amalda isbotlash va to'rtinchi - so'zda sobitlik, bular bari bir-birini to'ldiruvchi axloqiy mezonlar bo'lib, odamiylik tushunchasini mohiyatan ochishga xizmat qilgan. Harfdan harfga o'tgan sayin, shoira odamiylikning yangidan-yangi axloqiy jilolarini namoyish eta boradi.

“B” tovushi jilosidan odam adabiga zeb beruvchi axloqiy qarashini shunday tovlantiradi:

Ulg'ayursan sanda bor o'lsa adab,

Ulg'ayursan sanda yor o'lsa adab.

Odam ersang, tashqi surat berma zeb, Ona yurtingga hamisha ayla zeb.

Shoira tashqi ko'rkkga oro berish odamiylikka kirmasligini, ichki go'zallikning afzalligini, Vatanni obod qilish chinakam insoniy burchligini shu yo'sinda ta'kidlayotir. “B” tovushi bahonasida shu g'oyani umumjahoniy darajaga ko'taradi. Dunyoda yaxshi nom qoldirish uchun yaxshi ishlar qilish zarurligini uqtiradi.

Shu tariqa, g'oyaviy-badiiy barkamol alifbe-manzuma namunasini yaratib, el farzandlarining tezroq xat-savod egallashlariga munosib hissa qo'shgan. Binobarin, bunday



alifbe-manzumalar XX asrda bolalar she'riyatida yuzaga kelgan alifbe she'rlar-abidsedariylar uchun an'anaviy zamin vazifasini o'taganligi bilan ham qimmatlidir.

Bilim, ko'nikma va malakani rivojlantirishga yo'naltiruvchi savollar :

1. Alisher Navoiy asarlarining bolalar kitobxonligidagi o'rniga munosabat bildiring.

2. "Hayrat ul-abror" dostonidagi hikoyat, maqolat va masallar, hikoyalar mazmunini tushuntiring.

3. "Mahbub ul-qulub" pandnomachilikdagi qanday an'analari asosida yozilgan va uning mazmun-mundariyasi nimadan iborat?

4. O'zbek tilida bitilgan ilk alifbo-manzuma qaysi?

5. Mumtoz she'riyatdagi harfiy san'atlar, abjadxonlik va ularning ko'rinishlari haqida nimalarni bilib oldingiz?

6. Alifbe manzumalar(abitsedariylar) haqida nimalarni bilasiz va ularning ko'rinishlari haqida ma'lumot bering.

7. Eski maktablarda o'qish va o'qitishning bosqichlari qanday usullarda olib borilgan?

8. Mufradot nima? Misol keltirib tushuntiring.

9. Murakkabot nima? Uni izohlang.

10. Muqatta'ot haqida ma'lumot bering. U eski maktablarning qanday bosqichi hisoblanadi?

11. Abjadxonlik nima va u qanday o'rganilgan? Shu usulda yechiladigan chistonlarga misol keltiring?

12. "Savodi ta'lim" risolasi qanday asar? Uning muallifi kim?

13. Shermuhammad Munis boshlang'ich sinflarda o'qish va yozishni o'rgatishda nimalarga e'tibor qaratgan va bu haqda qanday manzuma bitgan?

14. "Chiston" so'zining lug'aviy ma'nosi va uning yana qanday nomlar bilan yuritilishi, an'aviyligi haqida mulohaza yuritish.



15. Jahon otin Uvaysiy chistonlaridan misol keltirib, tahlil qiling.

16. Anbar Otinning “Yakka bayt”lari qanday asar?

17. Alifbe- g’azal, alifbe-ruboiy, alifbe-muxammaslarga munosabatingiz?

18. Uvaysiy chistonlarida abjad hisobining qo’llanilishi va ular yechimining tarbiyaviy ahamiyati haqida qanday tasavvurga egasiz?

Tavsiya etilgan adabiyotglar:

1. Alisher Navoiy. Hayrat ul-abror. Nasriy bayon. - T., 1967.
2. Alisher Navoiy. Mahbub ul-qulub. - T., 1983.
3. Alisher Navoiy. Lison ut -tayr. - T., 1984.
4. Alisher Navoiy. Qiziq hikoyatlar. - T., 1991.
5. Aliqulov H., Omonboyev R. Jomiy va Dovoniy ta’lim-tarbiya haqida. - T., 1984.
6. Abdurahmon Jomiy. Bahoriston - T., 1979.
7. Abu Ali ibn Sino. Salomon va Ibsol. - T., 1980.
8. Anbar Otin. She’rlar. Risola.-T.,1970.
9. Imom Ismoil al-Buxoriy. Hadis.4 jildlik - T.,1991.
10. Kaykovus. “Qobusnoma”. - T.,1986.
11. Murodov A. O’rta Osiyoda xattotlik san’ati tarixidan. - T.:Fan, 1971.
12. Uvaysiy. Ko’ngil gulzori - T.,1983.
13. Uvvatov U. Imom Ismoil al-Buxoriy. Risola. - T.,1988.
14. Chor kitob. Olim Bo’ri tarj. - T.:Cho’lpon, 1992.
15. Shermuhammad Munis. Savodi ta’lim. - T.,1997.
16. Qodirova M. XIX asr o’zbek shoiralari ijodida inson va xalq taqdiri. -T. :Fan, 1977; yana: Uvaysiy. - T.:Fan, 1983.



4-MAVZU: O'ZBEK BOLALAR ADABIYOTINING SHAKLLANISHI

Reja:

1. Milliy uyg'onish harakatining bolalar adabiyotini yuzaga keltirishdagi roli
2. Abdulla Avloniy - islohotchi pedagog va bolalar shoiri
3. Hamza Hakimzoda Niyoziy - ma'rifatparvar bolalar shoiri
4. Elbek - bolalar shoiri, nosiri va islohotchi muallimi

MAVZUGA DOIR TAYANCH TUSHUNCHALAR: *jadid, usuli savtiya, alifbo, masal, allegoriya, rus-tuzem, devon, g'azal, poema, "Chig'atoy gurungi", jurnalistika, nazm, obraz, ramz.*

Milliy uyg'onish harakatining bolalar adabiyotini yuzaga keltirishdagi roli. O'lkamizning ilmiy-ma'rifiy taraqqiyoti tarixida buyuk islohotlar ko'p kuzatilgan. Miloddan yetti asr ilgari Xorazm zaminida yuzaga kela boshlagan "Avesto" ming yildan ziyodroq vaqt mobaynida O'rta Osiyo xalqlarining nafaqat diniy, balki ma'naviy-ma'rifiy mayog'i bo'lib keldi. IX-XI asrdayoq yurtimizdan yetishib chiqqan Forobiy, Xorazmiy, Ibn Sino, Abu Rayhon Beruniy, Abulqosim Zamaxshariy, Imom Ismoil Buxoriy singari o'nlab mutafakkir allomalarning ilmiy-badiiy merosi nafaqat bizning, umuman, insoniyatning ma'naviy-madaniy taraqqiyoti uchun bebaho xazina sanaladi. Shuningdek, temuriylar davrida ilmiy kashfiyotlari bilan jahonga



dong taratgan Mirzo Ulug'bek, Ali Qushchi, Qozizoda Rumiy ilm-ma'rifat olamida yakdillik bilan e'tirof etiladi. Alisher Navoiy, Zahiriddin Muhammad Bobur kabi mutafakkirlarning so'z va qalam sehri ham dunyo tamaddunida alohida o'ringa ega.

XIX asrdagi O'rta Osiyoning Buxoro amirligi, Xiva hamda Qo'qon xonligidagi iqtisodiy, siyosiy, ma'naviy-ma'rifiy, diniy inqiroz va nizolarning oqibati, o'lkaning jaholat va mustamlaka botqog'iga botirgan edi. XX asr Sharqining eng mashhur, eng taraqqiyparvar harakati - jadidchilikka asos solgan Ismoilbek Gasprali to'g'ri e'tirof etganidek: "Shijoat maydonida Temurlarning, Shayboniylar ismi-shariflari unutilgani kabi ilm maydonida Ibn Sinolar, Farobiylar, maorif maydonida Ali Qushchi, Ulug'beklar yoddan chiqib, butun Movarounnahr bir xonaqoyi parishon va diyori darveshon o'lmish edi. Ilm, hilm, maorif izzat-nafs va haysiyat (hurmat-e'tibor) riyokorlikka aylangan edi..."

Alal-oqibat XIX asrning 90-yillarida yangi usuldagi maktablar tizimi Turkistonga ham yetib keladi. 1893-yili Ismoilbek Gaspralining o'zi Buxoroga kelib, amir bilan uchrashadi va yangi maktab ochishga muvaffaq bo'ladi. Chor hukumatining maqsad va intilishlariga zid bo'lgan bunday maktablar Turkistonning boshqa o'lkalarida ham birin-ketin ochila boshlaydi. Ma'lumotlar shuni ko'rsatadiki, 1907- yili Turkistonda 30 ta jadid maktabi bo'lib, 1300 nafar bola o'qigan. Rost, 1884 -yilda Toshkentda birinchi rus-tuzem maktablari ochilgan edi. 1892- yilda o'lkada ularning soni 21 taga yetgan bo'lsa, 1917 yilning boshlarida 170 tani tashkil qilgan.

Shunday bo'lsa-da, "ikki buyuk asr oralig'i"da o'zbek bolalar adabiyotining chinakam mohiyatiga mos qiyofasi *uch asosiy voqelik* asosida qad rosladi. **Birinchisi**, davr adabiy hayotining yangilanishiga ko'ra, Xorazmda Ogahiy, Bayoniy kabi ijodkorlar tashabbusi bilan tarjima maktabining maydonga kelishidir. Shu munosabat bilan o'nlab asarlar fors tilidan tarjima



qilindi. Toshkentda mashhur hind eposi “Kalila va Dimna”ni Fazlulloh Almaiy (1852-1891), arab ertaklari “Ming bir kecha”ni Sidqiy Xondayliqiy (1884-1934) forschadan o‘zbekchaga o‘giradilar. Shuningdek, Murodxo‘ja domla tomonidan Sa‘diy Sheroziy “Guliston”ining yangi tarjimai amalga oshiriladi. Natijada, XIX asrning 80- yillarida L.N.Tolstoy, 90-yillarda A.S.Pushkin, A.A.Krillov nomlari badiiy tarjimalar orqali o‘zbek o‘quvchilariga tanila bordi. Keyinchalik bu adiblarning asarlari jadid maktablari darsliklariga ham kiritilgan.

Ikkinchisi, XX asr boshlaridagi ma’rifatparvar pedagog va adiblar Saidrasul Aziziy, Munavvarqori Abdurashidxonov, Abdulla Avloniy, Hamza Hakimzoda Niyoziy, Mahmudxo‘ja Behbudiy, Sadriddin Ayniy, Abdurauf Fitrat, Elbek va boshqa o‘nlab ziyolilarning “usuli jadid” maktablarida tahsil oluvchi o‘zbek o‘quvchilari uchun yaratgan ellikdan ortiq alifbo va o‘qish kitoblari bu jarayonni yuzaga chiqishiga asos bo‘ldi. Bu darsliklar avvalo, bolalarbop maxsus asarlar ijod etish an’anasini boshlab berganligi bilan diqqatga sazovor. Negaki, xalq bolalarini ma’rifatli qilishni ko‘zlab ochilgan yangi usuldagi maktablar uchun o‘zlari tuzgan “Kitobat ut-atfol” (Behbudiy), “Birinci muallim”, “Ikkinchi muallim”, “Turkiy guliston yoxud axloq”, “Maktab gulistoni” (Avloniy) “Yengil adabiyot”, “Qiroat kitobi”, “O‘qish kitobi”, (Hamza), “Tahsib us-sibyon” (“Bolalar tarbiyasi”), “Qiz bola yoki Xolida” (S.Ayniy), “O‘qu” (Fitrat) singari darsliklarda hayotiy voqelikning badiiy ifodasida bolalarning yosh xususiyatiga alohida e’tibor qaratiladi. Bu haqda adabiyotshunos olim R.Barakayev kengqamrovli ma’lumot beradi.

Bundan tashqari, mustaqillik yillarida B.Qosimov, O.Sharafiddinov, N.Karimov, Sh.Rizayev, H.Boltaboyev singari yetuk adabiyotshunos olimlar hamda yosh tadqiqotchilar tomonidan jadid adiblarining faoliyati teran tadqiq etildi. Milliy uyg‘onish, millatning o‘zligini anglash jarayoni mazkur davr adabiyotining ruhi va mazmunini tashkil qilganidek, o‘zbek



bolalar adabiyotining rasman qaror topishi ham umumadabiy hodisaning yangi bir qirrası sifatida maydonga keldi.

Uchinchisi esa o'zbek bolalar matbuoti inkishofi va ularning yosh avlodga alohida ta'siri hodisasidir. 1919-yildan e'tiboran yosh kitobxonlarni bir maslakka uyushtirish, tarbiyalashda matbuotning roli kata bo'lgan. Garchi 20-yillardagi adabiy-badiiy jurnallarning faoliyati birmuncha qisqa bo'lgan esa-da, ularning bolalar adabiyoti rivojiga qo'shgan hissasi diqqatga sazovor. 20-yillar o'zbek bolalar adabiyoti matbuot sahifalarida tug'ilganligi, ular ta'lim-tarbiyani jonlantirishda samarali ta'sir ko'rsata olganligini ta'kidlovchi e'tiroflar talaygina.

Hqiqatan, 1919-yil 23-mayda Samarqanddagi 1-totor bilim yurti o'quvchilari tomonidan chiqarilgan "Bolalar yo'ldoshi" jurnali o'z faoliyatini shunday da'vat bilan boshlagan edi: "Majalla ikki bo'lak berilib, avvalgi bo'lagi o'quvchilar qalami ila olib borilur, keyingi bo'lagi o'quvchilar to'ldira olmaganda yozuvchilar to'dasi (hay'at tahririyati) qo'lindan o'tkazilur va mumkin bo'lgan qadar o'quvchilarga o'rin ko'proq beriladir... Turkiston o'lkasidagi yosh o'qituvchilar, albatta, bu zo'r tilak ila maydonga qo'yilgan majallaga tovush bersunlar". Nashrlar atrofiga uyushgan Sadriddin Ayniy, Rahim Mahmudiy, Abdulxabir Abdulla o'g'li, Abdurashid Abdujabbor o'g'li kabi yozuvchi va shoirlar bolalar hayotiga oid maqola, hikoya va she'rlar yozib turishgan.

Manbalarda shu yili yana bir jurnal chiqqanligi qayd etiladi: "1919 yil may oylarida, - deb ma'lumot beradi Q.Oripov, - "Yosh sharq" nomli jurnal bosmadan chiqadi. Bu jurnalga Finkel-shteyn muharrirlik qiladi, jurnalning redkollegiyasida mahalliy yoshlardan Rahim Inomov, Botu va boshqalar bor edi. Biroq bu yoshlar jurnali birinchi sonidan so'ng gazetaga aylantirildi". Ziyo Said, Botu, Akmal Ikromov, A'zam Ayub, Usmonxon, Julqunboy, Mirmulla, Cho'lpon, Elbeklar gazeta bilan hamkorlik qilib, uning 5-dan 10-sonigacha chiqarishga muvaffaq bo'ladilar.



1921-yilning martida xalq maorifi komissarligi tomonidan “Bolalar dunyosi” nomli yana bir jurnal chop etilgan. Ushbu nashrning yetakchi maqsadlari bolalar va o’smirlarning qiziqishlari hamda yangicha qarashlarini targ’ib etish bo’lgan. U “yosh o’qituvchilar orasida ong-bilim tarqatuv yo’lida chiqarilaturg’on o’zbekcha bolalar jurnali” edi.

Bundan tashqari, o’sha yillarda Davlat nashriyoti tomonidan bolalar uchun “Sharq chechagi” nomli yana bir jurnal chop etilgan. Biroq unga doir ma’lumotlar Bois Qoriyev (Oltay)ning dissertatsiyasidagina uchraydi. “Bolalar dunyosi” jurnalining, - qayd etilgan mazkur tadqiqotda, - 3-4-sonlari birga “Sharq chechagi” nomida chiqdi. Bu sonda Andersening “Margaritka”, “Qush qo’shig’i” sarlavhali hikoyalarining tarjimai berilgan. Yana, Yoqub Fayziyning “Kichkina yozuvchi” hikoyachasi, A.Qodiriyning “Julqunboy” imzosi bilan “Tayoq maktabi” sarlavhali asarlari e’lon qilindi”¹⁰.

Bu dalillar nashr sahifalarida ko’proq badiiy ijod namunalari berilgani, ular asosan, bolalarga mo’ljallab yozilganini asoslaydi. Masalan, Abdulla Qodiriyning “Julqunboy” imzosi bilan yozilgan “Tayoq maktabi”da eski maktab o’quvchisi Muxtor timsoli, uning obrazi orqali ilm dargohlaridagi ichki tartiblar, o’qitish usullarining qoniqarsizligi, domlalarining tayoqli munosabati real aks ettirilgani qayd etilgan.

Turkistonda bolalar jurnallarining uzviy nashri 1929-yildan boshlangan. “O’zbekiston Maorif xalq komissarligi tomonidan chiqarilgan oylik badiiy, tanqidiy-bibliografik “Yosh kuch” jurnali” shu ma’nodagi dastlabki nashrdir. Uning maqsadi va yo’nalishi quyidagi murojaatnomada ayonlashadi: “Bolalar! Qo’lingizda bo’lgan jurnalimiz sizlarni to’plashda, uyushtirishda, tarbiyalashda kattako’makchidir. Jurnalga mushtariy bo’lishingiz yetmaydi. Unga yozuvchi bo’lib, har xil she’r, hikoyacha,

¹⁰ Qoriyev B. (Oltay). 20-yillar o’zbek adabiyotining asosiy xususiyatlari (shu davr jurnallari asosida): filol. fanl.nomz. diss. - T., 1967.



maqolalar berib turish uchun yozg'uvchi yosh kuchlar jurnal tegrasiga to'planishlari kerakdir."¹¹

Shuningdek, 1929-yilda "O'zbekiston Markazqo'mi qoshidagi firqa bolalar tashkiloti Markaziy byurosining fikr tarqatuvchisi" sifatida ish boshlagan "Lenin uchquni" (1991-yildan "Tong yulduzi") gazetasini ham uzluksiz nashr sifatida e'tirof etish mumkin. Muhimi, shu kabi bolalarga ixtisoslashgan gazeta-jurnallar faoliyati, so'ngra, 1925-27-yillardan boshlab "O'zbek seksiyasi" nashriyotining (O'zGIZ) chet el va qardosh xalqlar bolalar adabiyotidan tarjima asarlar nashr eta boshlagani, qolaversa, S.Ayniy, A.Qodiriy, G.G'ulom, G'ayratylarning bolalar uchun yozgan asarlari o'zbek bolalar adabiyotining takomili uchun mustahkam poydevor vazifasini o'taydi. Qolaversa, o'z davrida Shokir Sulaymon va G'ayratiy kabi iste'dodli adiblar bolalar uchun ko'plab hikoyalar va she'rlar yozgani diqqatga sazovor. Binobarin, o'zbek bolalar adabiyotining shakllanishida o'qish kitoblari, xrestomatiyalar, teatr asarlarining ham ahamiyati katta bo'lgan.

Ta'kidlash joizki, o'tgan asrning 20-yillarida maktab darsliklari va matbuot sahifalarida e'lon qilingan bolalar adabiyoti namunalari hodisaning muayyan tizimlashuvini boshlab bergani bilan e'tiborlidir. Binobarin, o'zbek bolalar adabiyoti - *she'riyati, nasri* va *dramaturgiyasi* o'tgan asrning 20-yillarida shu zaylda qaror topib ulgurdi. A.Qodiriyning "Uloqda", "Jinlar bazmi" hikoyalari yosh qahramonlar ruhiyati talqiniga ko'ra bolalar adabiyoti hodisasining ehtiyoji bilan paydo bo'lgani-da, shu haqiqatni oydinlashtiradi.

XX asrning arafasi va boshlarida o'zbek bolalari uchun ixtisoslashgan maxsus badiiy adabiyot yaratish harakati shu tariqa yuzaga kelib, izchil tusga kira boshlagach, Sirojiyning "Bolalar adabiyoti to'g'risida bir fikr" ("Maorif va o'qitg'uvchi" jurnali, 1921-yil, 3-son, 30-31-b.), "Qizil o'zbek matbuotida

¹¹ Ramzi M. Armug'on // Yosh kuch. - 1929. - № 1. - B. 1.



bolalar adabiyoti” (“Zarafshon” gazetasi, 1924-yil 21-iyun, 157-son), Zarif Bashirning “Bolalar adabiyoti kerak” (“Turkiston” gazetasi, 1923-yil, 27-aprel), G’ozi Olim Yunusovning “Bolalar adabiyoti haqida” (“Maorif va o’qitg’uvchi” jurnali, 1925- yil, 3-son), Shokir Sulaymonning “Bolalar adabiyoti nashr qilish kerak” (“Qizil O’zbekiston” gazetasi, 1926- yil, 30-sentabr, 224-son) maqolalarida yigirmanchi yillar bolalar adabiyoti oldida turgan muhim vazifalar xususida fikr yuritilgan. Nihoyat, bolalar adabiyotiga avvalo, shu olam vakillari uchun maxsus yaratilgan asarlar sifatida qarash an’anaga aylandi. Bunda, jahon va rus bolalar adabiyotining ilg’or an’analari, boy tajribalarining ta’siri ham katta bo’ldi. Nihoyat, *bolalar olami va qiziqishlari, yosh xususiyatlari, didi va tiliga mos, tafakkuri va tasavvuriga xos tarzda yaratilgan badiiy ijod namunalari alohida yo’nalishni tashkil etish darajasiga erishadi.*

Shuni alohida ta’kidlash joizki, o’zbek bolalar adabiyotining ilk qadamlari dastavval, o’qish kitoblari bag’rida tug’ildi. Chunki boshlang’ich sinflarning o’qish darslari o’z mohiyati, maqsad va vazifalariga ko’ra ta’lim tizimida alohida o’rin tutadi; uning zaminida o’quvchilar savodxonligini ta’minlash bilan birga, ularni badiiy adabiyotning sehirli olamiga olib kirish ko’zda tutiladi. Bu jihat ilk darsliklardananoq an’anaga aylanib kelayotir, desak xato bo’lmaydi. Adabiyotshunos R.Barakayev o’zbek adabiyotidagi bolalar uchun maxsus yaratilgan ilk alifbo Saidrasul Aziziyning “Ustodi avval” (1902) kitobi ekanini ta’kidlaydi. Shundan keyin esa Oktabrgacha (1917-yil, oktabr - O.S., B.J.) islohotchi pedagog va adiblarning ellikka yaqin nomdagi alifbo va o’qish kitoblari nashr qilinganini qayd etadi. Bunda Munavvarqori Abdurashidxonovning “Adibi avval”(1907), “Adib us- soniy” (1909), Serikboy Oqayevning “Xrestomatiya, ya’ni terma kitob” (1911), Qori Usmon ibn Abduxoliq Shoshiyning “Ta’limi avval”(1910), Mulla G’ulomiddin Akbariy (Kabirzoda)ning “Ta’limi soniy”(1912), Abduvahob ibn Abdullo Ho’qandiyning “Tahsili alifbo” (1912),



Muhammadjon Rasuliyning “Bolalar bog‘chasi” (1915), Muhammadamin Faxriddinovning “Rahbari soniy” (1916) singari alifbo va o‘qish kitoblari, nihoyat, Abdulla Avloniy va Hamza Hakimzoda Niyoziy darsliklarini birma-bir sanab o‘tadi. Ularning umumiy xususiyatlari haqida esa: “Yuqorida nomlari zikr etilgan alifbo va o‘qish kitoblari deyarli to‘lig‘icha **badiiy matnlardan** tashkil topgani sababli ularni istisnosiz, **badiiy adabiyot namunalari** sifatida ham tadqiq etish joiz”, - degan mulohazani ilgari suradi. Hamchunin, bu tipdagi kitoblarning paydo bo‘lishini **o‘zbek bolalar adabiyotidagi haqiqiy tug‘ilish**, deb hisoblaydi olim (ta’kid bizniki - O.S., R.B., B.J.). Bunday e’tirofni yana bir manba tasdiqlaydi: “10-yillarning boshida (1910- yillar - O.S., R.B., B.J.), - deb yozadi B. Qosimov, - bemalol aytish mumkinki, yangi adabiyot shakllanib ulgurgan edi. Bu borada 1901-yilda chop etila boshlagan Munavvarqorining “Adibi avval”, “Adibi soniy”, Saidrasul Aziziyning “Ustozi avval” (1902), Aliasqar Kalininning “Birinci muallim”, “Ikkinchi muallim”, Rustambek Yusufbekovning “Ta’limi avval”, “Ta’limi soniy” kabi darslik va darslik-majmualari, xususan, ulardagi ixcham didaktik she’r va hikoyalar yangi adabiyotning shakllanishida ilk tajriba vazifasini o‘tadi.”

Darhaqiqat, milliy uyg‘onish harakatining o‘zbek bolalar adabiyotini yuzaga keltirishdagi roli ham aslida shunday darsliklar va badiiy ijod namunalarining alohida o‘rni bilan belgilanadi. Zero, o‘zbek bolalar adabiyoti tarixini yoritishda o‘tgan asr boshlarida yetishib chiqqan ko‘pgina **ma’rifatparvar adiblar faoliyati** va ularning **darsliklari** muhim ahamiyat kasb etadi.

Munavvarqori Abdurashidxonov (1878-1931). Munavvar - “nur olgan”, “nurli” degani. Bu so‘zni ziyoli o‘rnida ham qo‘llaydilar. Qori - Qur’onni maromiga yetkazib o‘qiydigan kishilarga nisbatdir.

Munavvarqori o‘z nomiga munosib, maktab-maorif islohoti, milliy maktab yaratish, chet elga bolalarni o‘qishga



yuborish, boylarning boshini qovushtirib, maorifga xizmat qildirish, turli xayriya jamg'armalari tuzish kabi faoliyatida ham, adib va murabbiy sifatida ham ziyo tarqatuvchi zot edi. Ta'kidlash joiz, Munavvarqori boshqa jadid adiblariga nisbatan, juda kech - 1999-yilning aprelida oqlandi. Shungacha u haqda xorijda maqolalar yozilgan, xolos. Faqat istiqloldan keyingina B.Qosimov, S.Xolboyev, S.Axmedov, I.Abdullayev, N.Avezov, N.Ergashova kabi tadqiqotchilar maqolasida adibning jadidchilik, ma'rifatparvarlik hamda pedagogik faoliyati keng o'rganila boshlangan. Bu haqda B.Qosimov shunday yozadi: "Munavvarqori yaqin tariximizning eng yorqin shaxsiyatlaridan. U millatning uyg'onishiga yordam beradigan deyarli hamma soha bilan shug'ullandi. Lekin ulardan uchtasi ajralib turadi. Bular: maorif, matbuot, siyosiy faoliyat". Darhaqiqat, muallimlik uning birinchi kasbidir. Munavvarqori 1901-yilda Toshkentda birinchilardan bo'lib "usuli jadid" maktabi ochadi. Bunda uning darsliklari alohida qiymatga ega. U madrasalarda asosiy darslarni arab tilida emas, balki ona tilida olib borish, diniy saboqlar bilan birga, ijtimoiy fanlarni o'qitish masalasini kun tartibiga qo'yadi. Usuli jadid maktablari faoliyatini teran o'rganib, ongda, fikrlashda, maorifda o'zgarish yasamay turib, jaholatdan qutulib bo'lmasligini birinchilar qatori anglab yetadi. Munavvarqori madrasalarda yillar mobaynida o'qitiladigan bilimga tez, oson va yengil olib boradigan yo'lni topish haqida qayg'uradi. U yangi qo'llanmalarni, fundamental, zamonaviy pedagogika asosida kichik maktab-madrasalarni tashkil etishni xohlardi.

Munavvarqori usuli jadid maktablari uchun suv va havodek zarur bo'lgan darslik va dasturlarni ishlashga kirishadi. 1907-yilga kelib "Adibi avval" darsligini yaratdi. O'zbek tilining deyarli ilk alifbolaridan bo'lgan bu kitob Saidrasul Aziziyning "Ustozi avval" darsligi bilan oldinma-ketin bosilib chiqadi. U tez orada Turkistondagi barcha maktab o'qituvchilari tomonidan yaxshi kutib olinadi va amaliyotga tatbiq qilinadi.



Islahotchi pedagog 1912-yilga kelib, o'quvchilarga husnixat, jug'rofiya, islom tarixi, turk qavmlari tarixi fanlarini o'qita boshlaydi, maktab ostonasiga qorovul qo'yib, ijtimoiy sohalaridan saboq beradi.

Uning "Adibi avval" alifbe va "Adibus-soniy" o'qish kitoblari darslik-majmua yo'sinida yozilgan bo'lib, ko'plab she'r va ixcham hikoyalarni o'z ichiga olganligi bilan diqqatga sazovor. Ular mavzusiga ko'ra rang-barang: ko'pchiligi axloqiy- tarbiyaviy, tarixiy, ijtimoiy mavzuda bo'lib, yo'nalishiga ko'ra, ibratomuz pandlardan tashkil topgan; tili sodda, o'qilishi qiziqarli.

Xususan, "Adibus-soniy" boshlang'ich sinf o'quvchilariga alifbedan keyingi o'qish kitobi ekanligi sababli bevosita kichkintoylar didi, tiliga mos, sodda usulda yozilgan. O'sha davr alifbo va o'qish kitoblarining o'ndan ortiq ro'yxati nazarda tutilsa, Munavvarqori darsligi kichkintoylar yosh xususiyati inobatga olinib yozilgan dastlabki o'qish kitobi ekanligi oydinlashadi.

"Adibus-soniy"da bolalarni kindik qoni to'kilgan ona-Vatanga mehr-muhabbat ruhida tarbiyalash, Vatan tuprog'ini, uning benazir tabiatini to'lib-toshib kuylash ruhidagi hikoyatlar alohida o'rin egallaydi. Muhimi, bunday matnlar bolalarbop ifoda uslubiga egaligi bilan e'tiborni tortadi. "Adib us-soniy"dagi matnlarning ba'zilari mumtoz adabiyotdan davom etib kelayotgan va xalq orasida ancha mashhur rivoyatlar ("Iskandar Zulqarnayn", "Odob", "Iskandar ila Arastu", "Yolg'onchilik zarari") bo'lsa, ayrimlari rus adabiyotidan qilingan tarjimalar ("Ikki yo'ldosh")dir. Shu bilan birga, o'qish kitobidan bolalar olami, ularning turli fe'l- atvoridan hikoya qiluvchi didaktik matnlar ("Ko'r ila do'xtir", "Orif ila Sodiq", "Ahmad ila onasi") ham o'rin olgan. Darslikdagi hikoya va she'rlar, qissadan hissa tariqasida keltirilgan baytlar esa uning bolalar adabiyoti namunasi sifatida o'rganishga ham asos bo'ladi.

Mahmudxo'ja Behbudiy (1875-1919). Mahmudxo'ja Behbudiy XX asr bo'sag'asidagi Turkistonning orzu-armonlaridan biri sifatida maydonga keldi.



U o'z davrining ijtimoiy-siyosiy harakatlarida faol qatnashgan eng yirik namoyandasi, yangi zamon o'zbek madaniyatining asoschisi edi. Turkiston jadidlarining tan olingan rahnamosi, mustaqil jumhuriyat g'oyasining yalovbardori, yangi maktab g'oyasining nazariyotchisi va amaliyotchisi, o'zbek dramachiligini boshlab bergan birinchi dramaturg, teatrichi, noshir, jurnalistdir. U

tariximizningg'oyat og'ir va murakkab davrida yashadi. Mahmudxo'ja Behbudiy 1875- yilning 19-yanvarida Samarqand yaqinidagi Baxshitepa qishlog'ida ruhoniylar oilasida dunyoga kelgan. Behbudiy dastlab Samarqand madrasasida, so'ngroq Buxoroda tahsil ko'rgan. An'anaviy tahsildan so'ng o'z ustida qunt va sabot bilan ishlash orqali u qozi, mufti darajasiga ko'tariladi. Mahmudxo'ja dunyoqarashining shakllanishida esa Rusiya jadidchilik harakatining asoschisi Ismoilbek Gaspinskiyning xizmati katta bo'lgan.

1899-1900- yillarda Behbudiy buxorolik do'sti Hoji Baqo bilan haj safariga chiqadi. Safar yangi maktab haqidagi qarashlarini mustahkamlaydi. Uning tashabbus va g'ayrati bilan 1903-yilda Samarqand atrofidagi "Halvoyi", "Rajab amin" qishloqlarida yangi maktablar tashkil topadi. Adib ushbu maktablar uchun darsliklar tuzishga kirishadi.

Behbudiy Turkistonda jadidlar harakatining yetakchi vakillaridan biri sifatida savodsizlik, johillik, qoloqlik, madaniyatsizlikka qarshi qizg'in kurash olib bordi. Maktab maorif ishlarini rivojlantirish g'oyasini targ'ib etish Behbudiy faoliyatining tub asosini tashkil qiladi. Behbudiy Buxoroda amirlik tuzumiga ma'lum bir islohotlarni kiritish va shu bilan milliy madaniyatni rivojlantirishni istagan.

O'tgan asr boshlarida Turkiston uchun shunday oyna kerak ediki, toki undan millat o'z qabohatini ham, malohatini ham ko'ra olsin. Mana shu ehtiyoj va zarurat Behbudiyni teatr va matbuot sari boshladi. "Padarkush" shu tariqa maydonga keldi.



Muallif “Milliy fojia” atagan 4 manzarali bu drama jaholat va nodonlik haqida, o‘qimagan bolaning buzuvchi yo‘llarga kirib, o‘z otasini o‘ldirgani haqida hikoya qiladi.

Behbudiyning publitsist sifatidagi faoliyati adib iste’dodining juda yorqin bir qirrasini tashkil etadi. U o‘z umri davomida yuzlab maqolalar yozdi. O‘zining Millat va Vatan, jamiyat va axloq haqidagi fikrlarini ko‘proq maqola va chiqishlarida ifoda etdi.

Millati, Vatanining taqdiriga befarq bo‘lmagan jadidchilik harakatining rahnamosi Mahmudxo‘ja Behbudiy ham maktab, ham madrasalardagi ta’lim tizimini, o‘qitiladigan fanlarini, darsliklarini islomiy, sharqona an’analarni saqlagan holda isloh qilish tarafdori edi. Shu maqsadda u “Muntaxabi jug‘rofiyai umumiy” (“Qisqacha umumiy geografiya”), “Kitobat ul-atfol” (“Bolalar maktubi”), “Tarixi muxtasari islom” (“Islomning qisqacha tarixi”), “Amaliyoti islom”, “Madxali jug‘rofiyai umroniy” (“Aholi geografiyasiga kirish”), “Muxtasari jug‘rofiyai rusiy” (“Rossiyaning qisqacha geografiyasi”) kabi oltita darslik yaratdi. Bular ilk o‘zbek maktablari uchun tuzilgan darslik va qo‘llanma sifatida emas, til, yozuv, madaniyatimiz taraqqiyoti nuqtayi nazaridan ham muhim ahamiyatga ega. Mahmudxo‘ja Behbudiy “Kitobat ul-atfol” darsligida qator muammolarni ko‘tarib chiqqan va ularning yechimi bilan bog‘liq fikr - mulohazalarni bildirgan. Adib tildagi qorishqlikdan voz kechib, o‘zbek tilining hamma uchun tushunarli bo‘lishini ta’minlashga harakat qilgan. Behbudiy birinchilardan bo‘lib, tilimizga punktuatsiya - tinish belgilarini olib kirdi.

“Kitobat ut-atfol”da o‘nta rumuz - tinish belgi keltirilgan. Behbudiy tinish belgilariga ularning ahamiyatini tushungan mutaxassis sifatida munosabatda bo‘ldi. Rumuzlar:

Alomati savol - [?]

Alomati nido, taajjub, xitob - [!]

Alomati mutariza - [O]



Alomati mummayiza -[“”]

Ikki soʻzni farq qilaturgon alomat - [-]

Alomati murodofot, yaʼni ikkisi bir pogʻonada - [-]

Ozgina turmoq uchun - [.]

Bayon va tafsil uchun- [:]

Notamom soʻzlar, kinoya, mubham va mahzuflar alomati -[...] Soʻzni oxiri yoki vaqti tom alomati- [-]

1. Nuqta [.] - yozuv belgisi sifatida qadimgi arab manbalariga borib taqaladi. U oʻzbek tilida XIX asrning 2-yarmidan boshlab ishlatila boshlangan. Behbudiy mazkur tinish belgisini ishlatish oʻrniga koʻra: “Soʻzni oxiri yoki vaqfi tom alomati” deb nomlagan. Haqiqatda ham ushbu belgi tinch ohang bilan aytilgan darak, buyruq gaplar oxirida qoʻyiladi.

2. Soʻroq belgisi [?]ning kelib chiqishini lotincha “questio”- soʻroq soʻziga bogʻlaydilar. Soʻroq maʼnosida mazkur soʻzning birinchi harfi “Q” ishlatila boshlangan. Keyinchalik hozirgi belgisi holatiga kelib qolgan. Oʻzbek matnlarida 1885-yildan “Turkiston viloyatining gazet”da uchragani, 1900- yildan muntazam ishlatila boshlagani ayonlashadi. Mahmudxoʻja bu tinish belgini ishlatish oʻrni, mohiyatiga koʻra “Alomati savol” deb nomlaydi.

3. Undov [!] belgisi oʻzbek tiliga rus tilidan oʻtgan. Mutaxassislarning fikricha, u lotincha “lo” soʻzidan kelib chiqqan boʻlib, unga nuqta qoʻyilishi bilan hosil boʻlgan. Bu tinish belgisining zarurligini anglagan holda Behbudiy uning ishlatish oʻrni va mohiyatiga koʻra “Alomati nido, taajjub, xitob” deb nomlaydi va targʻib qiladi.

4. Koʻp nuqta [...] - XIX asrning 2- yarmidan boshlab oʻzbekcha matnlarda ishlatila boshlangan. 1876-yildan eʼtiboran “Turkiston viloyatining gazet”da muntazam qoʻllangan. Behbudiy esa mazkur belgini ishlatishdan kelib chiqib “Notamom soʻzlar, kinoya, mubham va mahzuflar alomati” deb nomlaydi.



Bunday nomlanish o'quvchiga mazkur tinish belgisidan qachon, qay o'rinda foydalanish savodini ham beradi.

5. Vergul [/] - tinish belgisi sifatida G'arbiy Yevropada XIV asrdan boshlab ishlatila boshlangan. O'zbekcha matnda XX asr boshlaridan boshlab uchraydi. Ma'lumki bu tinish belgisi uyushiq bo'laklarini hamda qo'shma gap tarkibidagi sodda gaplarni, qolaversa, undalma, kiritmalarni ajratish uchun ishlatiladi, mazkur tinish belgisi yarim to'xtamni talab qiladi. Shuning uchun Behbudiy vergulni "Ozgina tinmoq uchun" deb ataydi.

6. Ikki nuqtaning [:] yozma nutqda ishlatish zaruriyatini Behbudiy to'g'ri aniqlagani holda "Bayon va tafsil uchun" deb nomlab, rasmiy tinish belgi sifatida e'tirof etadi.

7. Tire [-] belgisini jahon tilshunosligiga N.M.Karamzin (XVIII asrda) kiritgan. U o'zbek yozuviga XIX asrning 70-yillaridan "Turkestantskoye vedomosti" gazetasining ta'sirida ishlatila boshlangan. Behbudiy mazkur belgini "Ikki so'zni farq qilaturg'on alomat" deb ataydi. O'rni kelganda ta'kidlash lozimki, bu tinish belgi Behbudiy ta'kidlaganidek, faqat ikki so'zni farq qilishda ishlatilish bilan cheklanmay, dialogik nutqda, ko'chirma gapli qo'shma gaplarda, bog'lovchisiz qo'shma gaplarda, qolaversa, uyushiq bo'laklar va umumlashtiruvchi so'zlar o'rtasida ishlatiladi.

8. Qavs [()] o'zbek yozuvida XIX asrning oxirgi choragidan boshlab, aniqrog'i, 1873-yildan "Turkiston viloyatining gazetisi"da ishlatilgan. Behbudiy bu belgini "Alomati mu'tariza" deb amaliyotga rasmiy tinish belgisi sifatida targ'ib qila boshlagan.

9. Behbudiy "Alomati mummayiza" deb nomlagan qo'sh-tirnoq belgisini [" "] amaliyotga rus olimi professor A.A.Borsov kiritgan. O'zbek yozuvida esa, u kiritish belgisi sifatida XIX asrning 80-yillaridan boshlab uchraydi.



Mana shu kabi muammolarning ildizini anglagan Behbudiy “Kitobat ul- atfol”ni yaratdiki, maktab yoshidagi o‘quvchilarning hujjatchilik bilan tanishuvlari, bunda eski, tushunarsiz, an’anaviy usul va yo‘llardan voz kechib, yangi uslub va tahrirdagi hujjatlarni yozishni o‘rganishlarini tavsiya qiladi.

Darslikdagi bu maqsad keyinchalik badiiy matn va she‘rlarni ifodali o‘qish, his-tuyg‘uni ta’sirchan ifoda etish yo‘lida alohida xizmat qilgani diqqatga sazovor.

Sadriddin Ayniy (1878-1954). Ustod Sadriddin Ayniy-ni bolalar uchun ijod etishga ma’rifatparvarlik faoliyati boshlab kelgan edi. U zullisonayn (ikki til egasi) adib sifatida ma’lum va mashhur. Sadriddiy Ayniy ham jadid ma’rifatchilik harakatining yorqin namoyandalaridan biri bo‘lib maydonga chiqqan. Adib vatandoshlarini uyg‘otishning yagona yo‘li - ularni o‘qish va o‘qitishga jalb qilish, deb tushundi; o‘zi eski maktab va madrasalarda uzoq yillar tahsil ko‘rgani, uning barcha mashaqqatlarini anglab yetganligi sababli usuli jadid maktablari haqida ko‘proq bilishga intiladi.

1903-yilda Samarqandga borib, Mahmudxo‘ja Behbudiy tashabbusi bilan tashkil etilib, o’sha davrda dovruc yoygan Abdulqodir Shakuriyning “usuli jadidiya” maktabini ko‘radi, undagi o‘qish va o‘qitish jarayonlari bilan tanishadi. U yerda va Buxoroda o‘zi ko‘rgan tatarcha maktablar tajribasiga asoslanib, do’sti Abdulvohid Munzim bilan hamkorlikda 1908-yilda shunday maktab ochishga muvaffaq bo‘ldi.

Ayni choqda Ismoil Gaspiralining “Xo‘jayi sibyon” (“Bolalar muallimi”) va Mahmudxo‘ja Behbudiyning “Kitobat ut-atfol” (“Bolalar kitobi”) darsliklaridan ilhomlanib, shuningdek, “Chor kitob” hamda Shayx Sa’diyning “Guliston”, Abdurahmon Jomiyning “Bahoriston”, Alisher Navoiyning “Mahbub ul-qulub” asarlariga xos an’analardan ijodiy foydalanib, 1910-yilda “Tahzib us-sibyon” (“Yoshlar tarbiyasi”) darsligini yaratadi. Muallifning e’tiroficha, “bu adabiy kitob xarakterida bo‘lib, bolalarni xiyla



zavqlantirar edi”. Darslik o’qituvchiga metodik maslahat beruvchi (“Ogoh etish”) uqtirishi bilan boshlanib, dastavval “Tarbiyali bola” sarlavhali didaktik maqola berilgan. So’ngra, shu didaktik maqoladagi fikrlar “Hikoyat”, “Odobli bola”, “Ota-ona” va “Savol-javob” sarlavhali maqolalarda rivojlantirilgan. Chunonchi, “Hikoyat”da Yo’ldosh ismli o’quvchining yolg’onchiligi, har gal qalamini o’zi sindirib, boshqa biror safdoshi boshiga qo’yib, uni gunohkorga chiqarish bilan shug’ullanishi, har qancha nasihat qilinsa-da, qulog’iga olmagani, baribir yolg’on tuhmat qilishdan toymay, oxiri safdoshlari muallim va mudarris bo’lib yetishganlari holda u hammol va mardikor bo’lib yashashga mahkum bo’lgani bayon qilingan.

“Odobli bola” didaktik maqolasida odob va odoblilik qoidalari tushuntirilsa, “Ota-ona” didaktik maqolasida farzandning ota-ona oldidagi burch va mas’uliyati haqida so’zlanadi. So’ngra, “Savol” sarlavhasi ostida she’riy topishmoq berilib, uning birinchi bandida ona fazilatlarini, ikkinchi bandida ota fazilatlarini jumboqlanib, o’sha fazilatlar tafsilotiga ko’ra jumboqlarni yechish o’quvchi zimmasiga yuklanadi. Jumboqlanish esa mumtoz she’riyatdagi chistongo’ylik an’analari asosida voqe bo’lib, shu xususiyati bilan bolalarni qiziqtiradi, o’ylashga majbur qiladi. Bola mustaqil fikr qila turib, chistonda onaga xos fazilatlar jumboqlanganini anglab yetadi va uning javobi ona ekanligini aniq topadi. Shu tariqa, bola tarbiyasida ota-ona va maktab hamkorligi masalasi alohida ta’kidlanadi. Muallif “Ustoz-muallim” rukniga mansub “Maktab”, “Savol-javob”, “Marhamatli Ahmadjon”, “Maktab qoidasi haqida hikoyat”, “Maktab vasfiga oid masnaviy”, “Maktab qanday bo’lishi kerak?”, “To’g’rigo’y va o’g’ri bola”, “Tosh hikoyati”, “Aqlli odam va baland baxt egasi”, “Badbaxt odam”, “Arabbek va ukalari hikoyati”, “Arabbek chorbog’i”, “Aqlli bola”, “Esli bola”, “Hikoyat”, “Muallim va shogird hikoyati” va “Hikoyat” singari didaktik maqolalar va she’rlarda bu muddaoni oydinlashtiradi.



S.Ayniy tojik va o'zbek maktablari uchun talay alifbe, o'qish kitoblarini tartib berdi. Jumladan, "Qiz bola yoki Xolida" (1922), birinchi sinf uchun "Soli naxustin" ("To'ng'ich yil", 1924), "Tojik alifbesi" (1927), "Qiroat kitobi" (1930), Ismoilzoda, Payrav Sulaymoniy va Rahim Hoshimlar bilan hamkorlikda birinchi bosqich maktablar va texnikumlar uchun "5 dar 4" qiroat kitoblarini (1931) tartib berdi.

Bu darsliklar orasida "Qiz bola yoki Xolida" qizlar maktabiga mo'ljallangan bo'lib, o'zbek tilida yozilganligi bilan ajralib turadi. Bu axloqiy-adabiy asar adibning yangi zamon maktablari uchun tuzgan birinchi darsligi edi.

"Qiz bola yoki Xolida" o'ttiz darsga mo'ljallangan. Har bir dars materiali o'ziga xos adabiy-axloqiy lavha shaklidir. Ularda nazariy bilimning amaliyot bilan aloqadorligi, mehnatning foydasi va mehnatsevarlik, xotin-qizlarning jamiyatdagi roli va boshqa qator masalalar to'g'risida bahs yuritilib, muallif ular talqini jarayonida Xolida shaxsining kamol topishini ko'rsatishga harakat qiladi.

Asarning asosiy qahramoni - Xolida. Darslikdagi 16 lavhada bevosita uning xulq-atvori, ishlari va boshqalarga munosabati haqida gapirilsa, 10 lavhasida o'qishi va tarbiyasi xususida to'xtalgan. Umuman, Xolida oilada, maktabda va tabiat qo'ynidagi faoliyat jarayonida ko'rsatilib, inson shaxsi shakllanishida bu uch omilning ta'siri badiiy tarzda gavdalanitiriladi.

Darslik qizlar maktabida o'qishga mo'ljallanganligi bois, dastlabki uch lavhasida qizlarning jamiyatdagi o'rnini ifodalovchi umumlashtiruvchi saboq beriladi: "Qiz bola ota-onaning eng sevuqli bir mevasidur.

Qiz bola ota-onaning qayg'ulik chog'larida eng mehribon bir sirdoshidir.

Qiz bola qavmu qarindoshlarining obro'yi va nomuslaridir.
Qiz bola uyning ziynati va xonadonning davlatidir.



Qiz bola yurtning bog'i va butun el-u ulusning chi-rog'idir..."¹²

Ayniy odobli bo'lmoq yaxshi bo'lmoqning bosh sharti ekanligini 2- va 3- darslarda o'rganiladigan "Adabli qiz bola" va "Yaxshi qiz bola" lavhalarida tushuntirib o'tgach, keyingi darslarga mo'ljallangan lavhalarda Xolidani harakatga soladi. Olti yashar Xolida ota-onasining yakka-yu yagona qizi bo'lganidan bir qadar taniqli, injiqroq va o'zgalarni nazarga ilmaydigan bir qiyofada kitobxonga ilk bor tanishtiriladi: "Xolida qabatma-qabat kiyimlarni kiyib, halqa va uzuklarni taqib, yasanib yurar va boshqa qizlarni nazari ilmas edi. Chunki odamning odamligi kiyim bilan deb gumon qilar edi"(10-b). U ilk bor oddiy mashkobning qizi Fotima bilan to'qnashib, asl haqiqatni anglab olishga muyassar bo'ladi. Xolidada o'qishga, ilm olishga havas uyg'onadi, mehnatsevarlik, insondo'stlik fazilatlarini shakllana boradi. "Xolida xat va savoddan bo'lak narsani istamaydur", "Xolida maktabga boradir", "Xolida shohi va baxmal kiyimlarini sug'urib tashlaydur", "Xolida qo'l ishlarini o'rganadur", "Xolida tikish tikadur", "Xolida Qunduzni o'limdan qutqaradur" va boshqa qator lavhalarda Xolidaning inson sifatida shakllanishi ko'rsatilgan. Har bir lavhada turli mavzudagi suhbatlar yo muallimaxonimning shogirdlariga o'giti, yo Xolidaning mulohazalari, yoki Xolida haqidagi hikoyalar tarzida berib boriladi. Masalan, "Sog'liqni saqlamoq kerak" sarlavhali lavhada o'qiyimiz: "Muallimaxonim o'z shogirdlarining ilmlarini ko'paytirishga va axloqlarini tuzatishga qancha g'ayrat ko'rsatsa, alarning sog'liqlarini saqlashga ham o'shancha harakat qilar edi. Bu to'grida aytar edi: "Qizlarim! Odam bolasi kasal bo'lg'andan keyin, ko'p azoblar chekar, tabibga borar, bir talay jamalg'a tortar, ota-onasini, og'a-inisini, qavmi-qarindoshlarini qayg'uga solar, shuning ila barobar yo sog'ayur, yoki yoshlik chog'inda o'lub ketar. Shuncha azob va uqubatlardan qutulishning birdan bir yo'li: sog'liqni saqlashdir"(18-bet.) Yoki, "Mashhur xotinlar"

¹² Ayniy S. Qiz bola yoki Xolida. Toshkent. 1964. 9-bet



lavhasida shunday hikoya qilinadi: “Bir kuni Xolidaning otasi bozordan yangi bosilib chiqqan

“Mashhur xotinlar” otli kitobni keltirdi. Xolida ushbu kitobni bir-ikki qatla diqqat bilan o‘qib chiqdi. Ushbu kitobda yozilgan xabarlariga ko‘ra Islom dunyosida ancha mashhur xotinlar o‘tgan ekanliklari, she‘r aytg‘onlar sakson to‘rt nafar, mudarris bo‘lib dars aytg‘onlar yigirma to‘rt nafar, xalqqa va‘z so‘ylab, xalqni to‘g‘ri yo‘lg‘a undab yurg‘anlar yigirma sakkiz nafar ekan...” (21-bet.)

“Qiz bola yoki Xolida” asarini shu fazilatlariga ko‘ra professor I.Braginskiy povest deb ataydi va hatto uni adibning “Tahsib us-sibyon”idagi “Xonadoni xushbaxt” hikoyasining mantiqiy davomi sanaydi.

Adabiyotshunos P.Shermuhamedov esa bu darslik haqida: “S.Ayniyning bu lavhalarini badiiy asar deyish mumkin emas, chunki bu yerda bolalar xarakteri hayotiy to‘qnashuvlar, ruhiy holatlar orqali ochilmaydi, faqat maqola uslubida avtorning qarashlari bayon qilinadi, xolos”,- deb ta’kidlaydi¹³. Rost, “Qiz bola yoki Xolida” avvalo, darslik tarzida yozilgan. Unga badiiy jihatdan mukammal qissa talabidan yondashib bo‘lmaydi. Qolaversa, yangi o‘zbek adabiyotining ilk namunalari, qissa va hikoyalari ham shu kabi didaktik ifodalar, bayon uslubiga xos bo‘lgan. Darslikning bolalar uchun mo‘ljallanganligi nazarda tutilsa, bu tabiiy. Ammo shunisi muhimki, bolalar adabiyoti shu qolipda qolib ketmadi. Badiiy, janriy ko‘lamiga ko‘ra o‘zining mustaqil o‘zanlarini topa bordi. Binobarin, “Qiz bola yoki Xolida” bolalar nasrining shakllanishi va rivojlanishiga munosib hissa bo‘lib qo‘shildi.

XX asrning 30-yillaridagi bolalar adabiyotiga nazar solinsa, ijod ahlining maktabga ijodiy munosabati birmuncha jonlanganligini kuzatish mumkin. Buning sababini sho‘rolarning maktabni qayta qurish, umumiy majburiy boshlang‘ich ta’limga

¹³ Qarang: O‘zbek bolalar adabiyoti va adabiy jarayon. T.: “Fan”, 1989. -B.33.



o'tish, savodsizlikni ommaviy ravishda tugatishga qaratilgan siyosati bilan izohlash mumkin. Aftidan, xuddi shu holat Ayniyga eski maktabdagi o'qitish jarayonini eslatgan ko'rinadi. Va u 1933-yilda "Eski maktab" avtobiografik qissasini yozdi. Dastlab tojik tilida bitilgan bu qissa 1935-yilda alohida kitob shaklida bosildi, so'ngra, qayta-qayta nashr etilib, maktab darsliklariga kiritildi. Ayniy bu asarini 1938-yilda o'zbek tilida qayta ijod qildi. Hozirga qadar uning o'zbekcha nusxasi o'n martadan ziyod qayta nashr etildi.

Asar o'tmishdagi eski maktablarda amal qilingan ta'lim va tarbiya tizimining mohiyatini badiiy obrazlarda gavdalantirib, sarguzasht shaklida - avtobiografik yo'sinda ifodalab berdi. Zero, uning o'zi eski maktabning barcha achchiq-chuchugini tatib ko'rgan edi. Shu sababli qissa markazida uning o'z obrazi turadi. "Eski maktab" qisasida o'tmishdagi diniy maktab hayotining haqqoniy tasvirini yaratib bergan. Asarda yosh Sadriddinning hayoti aks etadi. Bu avtobiografik qissada eski usuldagi maktabda berilgan ta'limning qoloqligi va tan jazosidan bolalarning azoblanishi; domlaning layoqatsizligi va qo'polligi, shogirdlarning befoyda o'yin va mashg'ulotlar bilan shug'ullanishlarini tasvirlab, muallif o'tmishda bolalik davrining befoyda va zerikarli o'tganidan afsuslanadi.

Eski maktablarda bolalar to'rt yasharligidan boshlab qatnashishi mumkin bo'lgan. Sadriddin ham maktabga to'rt yasharligidan qatnay boshlagan. Lekin ota-onasi uning maktabda qiynalayotganini ko'rib, to olti yoshigacha maktabga uzatmaydilar. Eski maktabxonalar uy xonalari kabi yorug' va tinch bo'lmay, torgina bir xonadan (hujradan) iborat bo'lgan. Ularga tuynuklardan ozgina yorug'lik kirib turgan, xolos. Shu torgina, xira xonada uch yuz uylik Sektare qishlog'ining to'rt yashardan o'n ikki yashargacha bo'lgan barcha bolalari saboq olishgan. Undan tashqari, Sektare xo'jalar qishlog'i bo'lgani uchun "Tabarruk" qishloq hisoblanganidan, atrof qishloqlardagi



ba'zi "ixlosmandlar" ham o'z bolalarini bu maktabga yuborganlar. Maktabxonada bolalar Ayniy ta'biri bilan aytganda "amir zindonida qamalgan bandilar kabi" bir-birovlarini bosib, tiqilib, qiynalib tahsil olishgan.

Eski maktablarning sharoitini real aks ettiruvchi bu tasvirni o'qigan hozirgi yoshlar beixtiyor o'zlariga o'qish, bilim olish uchun yaratilgan qulay imkoniyatlar, yorug' va keng sinf xonalari, turli xil darsliklar, o'tirishga mo'ljallangan o'rindiqlar, doska eng muhimi, ularning barchasi bepul tashkil qilinganligini ko'z oldilariga keltirishlari va bundan ta'sirlanishlari tabiiy.

Ushbu kitobni o'qigan o'quvchi o'z davri maktablarini beixtiyor qissada tasvirlangan maktabga qiyos qilar ekan, istiqlool davri yoshlariga uning barkamol avlod bo'lib ulg'ayishi uchun beqiyos imkoniyatlar yaratib berilganini yanada chuqurroq his etadi. O'z Vatani bilan faxrlanish, ozod va mustaqil, farovon va baxtiyor hayotdan minnatdorchilik hissi ortadi.

Serqirra faoliyat sohibi bo'lgan Sadriddin Ayniy faoliyatida pedagoglik ham o'ziga xos o'rin tutgani bois, u o'z davrining maktab va madrasalari hayotiga alohida qiziqish bilan qaraydi hamda ular haqida ko'rgan-kechirganlarini "Eski maktab", "Esdaliklar" singari asarlarida alohida tasvirlab ko'rsatdi.

"Ko'p asrlik o'zbek adabiyoti tarixida, - deb yozadi professor N.Karimov,- XX asr adabiyoti alohida ahamiyatga ega. Milliy uyg'onish adabiyoti yoki jadid adabiyoti atamalari bilan tilga olinib kelayotgan bu davr, avvalo, Mahmudxo'ja Behbudiy, Fitrat, Hamza, Abdulla Qodiriy, Cho'lpon singari o'lmas ijodkorlarning nomlari bilan bog'liq. Bu ulug' zotlar, birinchi navbatda, shoir yoki yozuvchi bo'lganlari holda XIX asr oxiri, XX asr boshlarida vujudga kelgan yangi ta'lim tizimi, milliy matbuot va teatr san'atiga ham asos soldilar".

Darhaqiqat, olim yuqorida zikr etgan allomalar serqirra adib, islohotchi ma'rifatparvar, ta'bir joiz bo'lsa, o'zbek bolalar adabiyoti uchun ham hissa qo'shgan ilg'or ziyolilar



edilar. Jumladan, **Abdurauf Fitrat** (1886-1938) siymosida nafaqat yangi o'zbek adabiyoti asoschilaridan biri, dramaturg, shoir, nosir, balki, zabardast olim va fidoyi pedagog, yoshlar rahnamosini ko'rish mumkin. U 1913- yilda Istanbuldan Buxoroga maorif homiysi, ma'rifiy g'oyalari bilan qaytib keladi. Biroq o'z maqsadlarini bu davrda mutaassiblik avj olgan Buxoroda amalga oshirolmagach, Shahrisabz va Karkida yangi maktablar ochish bilan shug'ullanadi. Ayni paytda, yangi maktablar uchun darsliklar ham yozadi. Fitratning 1917- yilda tartib bergan "O'qu" (Boku) darsligi ibtidoiy maktablarning so'ng sinfi uchun mo'ljallangan. Unda boshlang'ich sinf o'quvchilarining yosh xususiyatlari, qiziqishlari inobatga olinib, talay lavhalar, mashq(tamrin), ibratomuz hikoyat va savol-javoblar berilgan. Ba'zi matnlar esa badiiy-tasviriy jihatdan ahamiyatga esga. Aytaylik, darslikdagi "Yurtimiz, Arslon bilan Botir" sarlavhali matnida obrazli vositalar yuksak mahorat bilan go'zal va ta'sirli bayon etilgan. Bunda sharqliklarga xos odob-axloq belgilari badiiy talqin etiladi; unda hikoyaga xos tasviriy detallar talaygina. Xususan, muallif poklikka yo'g'rilgan tongning bolalar qalbida farahbaxsh tuyg'u uyg'otishi, Arslon va Botirning yarim kechadan buyon dalada qo'sh haydayotgan "sevukli otalari Hasan boboga salom berib, qo'lini o'pib, duosini olib kelish uchun" otlanishlarini, bunda ota-o'g'il munosabati, ularning bir- birlari oldidagi burch va mas'uliyat milliy qadriyat tarzida ulug'lanishini tasviriy ifodalarda bayon etadi: "Hasan bobo ham endigina namoz o'qib bo'lib, qiblaga qarab, bolalarining haqiga duo qilayotgan edi. Ikkigina ho'kizi boboning duosiga omin, deya turgan kabi yonida boshlarini egib turgan edilar" tarzidagi voqelik bayoni ota duosining ulug'ligini obrazli ifodalayotir. Fitrat bolalarga mo'ljallangan mazkur hikoyasida kundalik voqealar, dolzarb mulohazalarni ham xalq ertaklariga monand obrazli bayon etishga erishadi. Aka-ukalar otalarining duosini olgach, uyga qaytayotib, o'ng qo'ldan "Voy, tangrim!" degan tovushni eshitib to'xtaydilar. Qarasalar, "Qurigan yog'ochning ko'lankasida,



yirtiq bir choponni yuzlarigacha tortib o'tirgan va ehtimolki, qattiq bir isitma tutgan bir xotin"ga ko'zlari tushadi. Ramzlardan iborat bu detallarga, chunonchi, "qurigan yog'och"- qulatilishga mahkum etilgan mustabid tuzum; "ko'lanka"- millatning erkli turmushiga soya tashlagan ijtimoiy tuzum; "yirtiq chopon"- mazlum o'lka qiyofasi; "isitmali xotin"- dardchil Turkiston timsoli ekanligiga, harqalay, bolalarning idroki hali yetmasligi ayon. Shu sababli muallif bolalar tabiatiga xos ketma-ket savol berish detalidan foydalanib, mavzu mohiyatini oydinlashtirishga erishadi. Botir va Arslonning: "Onajon! Nima bo'ldi sizga?"; "Biron o'g'lingiz yo qizingiz yo'qmidimikim, kelib qo'lingizdan tutib, holingizni so'rsin?"; "Qanday tosh yurakli ekan ular?" kabi so'roqlariga javoban "ayol"ning: "Men butun O'zbekistonning, chig'atoylarning onalari erurman, o'tim Turkistondur",- deyishi yozuvchi badiiy niyatini oydinlashtirishga xizmat qilgan. Millat yoshlarining ilmsizliklari va jaholat oqibatida "ona"ning shunday ahvolga tushganini anglab yetgan o'g'lonlar yaxshi o'qishga bel bog'laydilar. Shu ma'noda Arslon va Botir obrazlarini ham ramziy ma'no tashishi anglashiladi. Zotan, Abdurauf Fitrat o'sib kelayotgan yosh avlodga o'z yurti, mamlakatini mustamlakadan qutqarish, dardiga darmon bo'lishlarini shu tarzda uqtiradi.

Yetuk satirik va tarixiy romannavis adib **Abdulla Qodiriy** (1894-1938) ham o'z davrida bolalar hayotini aks ettiruvchi hikoyalar yozgan. Uning Julqunboy taxallusi bilan yozilgan "Tayoq maktabi"da yangi maktabning afzalligi, uning bolalar tarbiyasida tutgan roli, eski maktabning qiyinchiliklari bolalar tili orqali qiziqarli tasvirlansa, "Uloqda" hikoyasining qahramoni o'n ikki yasharli Turg'un chavandozdir. Hikoyadagi yosh Turg'un ta'rifi, bolalik zavqi, uning yangi kiyim kiygandagi quvonch va g'ururi tabiiy tasviri bilan e'tiborni tortadi. Shuningdek, xalq orasida keng tarqalgan uloq o'yinining yetuk chavandoz darajasi o'smir Turg'un his-tuyg'ulari, ruhiy olami, sevinchu shodligi orqali ifodalanishi voqea tasviri emas, ruhiyat va xarakter holati tasviri ustuvorligiga ko'ra XX asr boshlaridagi o'zbek



hikoyachiligidagina emas, bolalar nasrida ham jiddiy yutuq, deyishga asos bo'ladi. Adibning "Jinlar bazmi" asari ham bola tilidan hikoya qilingan. Unda bolalarcha qo'rquv hissiyotlari, tuyg'ulari real aks etgan.

"Ushbu hikoyani necha bor o'qib chiqmaylik,- deb yozadi adabiyotshunos S.Mirvaliyev,- hamisha yoshlikning qandaydir asov to'lqinlari bilan qayta-qayta uchrashgandek bo'lamiz; ...xususan, asar qahramoni holatlari biz boshimizdan kechirgan hayot - turmush manzaralaridek jonli, ishonarli va tabiiy, ayni chog'da jozibali".

Darvoqe, aynan bolalikdagina barcha sirli tilsimlar, ajoyibotlar olami, g'aroyib voqealar haqiqiy tuyuladi. "Jinlar bazmi"ning dastlab, bolalarga alohida zavq bag'ishlashi, fantastik ertaklarga xos qiziqarliligi ham shundan. Agar hikoyada yoshgina murg'ak bola tasavvuri teran aks etmasa, ehtimol, uning ta'sirchanligi ham bu qadar tabiiy chiqmas edi. O'quvchi ko'proq hikoyachi (O'sarqul) emas, bu voqeani tinglagan ("Otam bu hikoyani boshlagan vaqtda mening vujudimni qo'rquv o'rab olar edi-da, ichimdan "Meni ham shunday jinlarga yo'liqtirma"- deb tangriga yolvorib qo'yar edim") bola holatini yorqin ko'radi, qo'rquvdan titrayotgan, rangi oqarib, ko'rpa ostiga bekinib olgan bolakay ahvolini his qiladi. Yozuvchi ushbu voqea tafsilotlarini shu qadar teran, yorqin bo'yoqlarda chizadiki, chindan ham o'sha kichkintoy bola yosh Abdulla obrazini, ruhiyatini aks ettirganday tuyuladi. Shu sababli, "Menga qolsa, - deb ta'kidlagan edi S.Mirvaliev bu asar haqida - uni avtobiografik hikoya ham derdim".Olim muallif tasvirlagan joy - bog'-ishkomlar, ovloq jin ko'chalar, pastqam dala hovlilarni adib yoshligida yashagan uyga o'xshatadi. Demak, bu ham yozuvchi tasvirining aniqligi, ishonarliligi va ayni paytda bolalik xotiralarining uyg'oqligi dalolatidir. Binobarin, adabiyotshunos P.Shermuhamedov ham "Uloqda" va "Jinlar bazmi" hikoyalarining bolalar adabiyoti taraqqiyotiga muhim hissa bo'lib qo'shilganini o'rinli e'tirof etadi.



Binobarin, XX asrning birinchi choragini tom ma'noda, o'zbek bolalar adabiyoti va adabiyotshunosligi shakllanib, yosh nihol singari bo'y cho'za boshlagan davr, deb aytishga asos bor. Ayni paytda uning tadrijiy taraqqiyotida **bir tomondan** ma'rifatparvarlik g'oyalari zamirida paydo bo'lgan milliy uyg'onish va jadidchilik harakati, **ikkinchidan** uzoq asrlik mumtoz adabiyoti an'alarining qayta tiklanishi, **uchinchidan**, rus bolalar adabiyotida kattalar yozuvchisi sifatida tanilgan M.Gor'kiy, M.Mayakovskiy, A.Tolstoy, A.Bryusov, A.Benua, I.Repin singari san'at arboblarning bolalar uchun yozgan asarlarining o'zbek bolalar adabiyotiga qilingan tarjimalar ta'sirida, M.Behbudiy, Abdulla Qodiriy, Abdurauf Fitrat, S.Ayniy, Elbek kabi adiblarning bolalarbop hikoya, qissa va darsliklar yaratishi, **to'rtinchidan**, ilk o'qish kitoblaridagi she'r, hikoya, masal kabi janrlarning vujudga kelgani, shuningdek, bolalar *dramaturgiyasi, publitsistika va adabiyotshunosligi* kabi alohida-alohida tarmoqlari qaror topa boshlagani muhim omil bo'la olgan. Ta'kidlangan ijod yo'nalishlari keyinchalik har biri mustaqil adabiy sohalar sifatida taraqqiy etgan bo'lsa-da, ularning barchasi avvalo, bolalarga bag'ishlangan va ular haqidagi ijod namunasi ekanligiga ko'ra umumiydir.

Bu davr **o'zbek bolalar dramaturgiyasining** shakllana boshlagani ham alohida ta'kidga loyiq. G'ulom Zafariyning o'tgan asr 20-yillarida ijod etgan bir pardali yoki bir ko'rinishli pyesalari bolalar dramaturgiyasining **ilk qadami** sifatida qayd etiladi. Bu haqda M.Olimova, B.Imomov kabi adabiyotshunos olimlarning e'tirofi e'tiborga loyiq: "U 20-yillarning dastlabki kunlaridan boshlab, - deb yozadi tadqiqotchilar G'Zafariy haqida, - bolalar uchun kichik-kichik sahna asarlari yaratishga kirishdi. Adib ularda xalqchil kuy-qo'shiqlardan, bolalar olamida tarqalgan o'yin usullaridan mo'l-ko'l foydalandi. Bolalarning farahli tabiat quchog'ida shod-xurram yashashlarini sahnaviy



usullar yordamida jonlantirdi”¹⁴. Jumladan, G‘ulom Zafariyning dastlabki pyesalaridan biri “Tilak”dir (1922). U bolalarni ilm olishga, o‘zaro do‘stona yashash, birodarlik, zamonaga munosib ma‘rifatli bo‘lishga da‘vat etadi. Muallif asar qahramoni Murodning o‘y-fikrlarini ochishda, uni individuallashtirishda sirli-romantik usullarni qo‘llab, sahnaviylikka, ta‘sirchanlikka erishgan. Umuman, o‘zbek bolalar dramaturgiyasining 1920-80- yillardagi namunalari, ularning ayrim xususiyatlari haqida tasavvurga shu tariqa ega bo‘lish mumkin. G‘Zafariyning 1915-1926-yillarda yozgan “Bahor”, “Binafsha”, “Quyvon”, “Rahimli shogird”, “Mozorlikda”, “Erk bolalari”, “Tatimboy ota” singari bir pardali “operetta”lari bolalar va yoshlar hayotidan olingan bo‘lib, ular o‘zbek adabiyoti tarixida bolalar musiqali dramasi dastlabki namunalari ekanligini professor N.Karimov ham alohida ta‘kidlaydi¹⁵.

Ta‘bir joiz bo‘lsa, bu jihatlar o‘zbek bolalar adabiyoti hodisasining to‘la-to‘kis qaror topganligi va uning turli tarmoqlari ham ko‘zga tashlanayotganidan dalolat edi. Shu ma’noda, bolalar adabiyotining mavjud ahvoli va uning oldida turgan zarur vazifalarning o‘sha davr matbuotida muhokama etilishi (bu yuqorida zikr etilgan edi) o‘z navbatida, **bolalar adabiy tanqidchiligi**ni ham boshlab berdi.

“Eng nozik, eng qiyin nuqtalardan biri, - deb yozadi Sirojiiy o‘zining bir maqolasida, - bu haqda bolalarning tushunchalariga, ko‘rishlariga, yoshlariga qarab va bolalar tili bilan anglata olmoqdir... buning uchun bolalarga asar yozadiganlar, avvalo, haqiqiy bolalik davrini o‘tkazib, u davrdan qolgan jonli sezgilarni tinglamakka majburlar; ikkinchidan, bolalar ruhiyati bilan yaqindan tanish bo‘lishi, ya’ni, tarbiyachi bo‘lish

¹⁴ Bu haqda qarang: B.Imomov, QJo‘rayev, H.Hakimova. O‘zbek dramaturgiyasi tarixi. Toshkent, “O‘qituvchi”, 1995. -B. 205.

¹⁵ Qarang: Karimov N. XX asr adabiyoti manzaralari.Toshkent, “O‘zbekiston”, 2008. -B.167.



shartdir”¹⁶. Yoki, Abdurahmon Sa’diyning fikrlarida ham o’sha davr adabiyotshunosligidagi dolzarb muammo ilgari surilgan: “Bolalarning o’z turmushlari, o’z tillari, o’z erklari, o’z qiziquvlari bordir,- deb yozadi muallif. - Bularning ruhi ham kattalarnikidan farq qiladi. Ularning adabiyotlari ham shunga muvofiq bo’lishi kerak”¹⁷.

Ijodkor tanlagan uslub asar tilining yoqimli, ta’sirchan chiqishiga qarab baholanishi, bolalarbop asarlarda fikrni bola tafakkuriga muvofiqlashtirib, sodda ifodalash ularning o’ziga xos uslubini belgilashi haqida adabiyotshunos H.Yoqubov ham to’xtalaib o’tgan. Olimning ta’kidicha, g’oyaviy boylik va murakkablik, aniq va tugal fabula, ritmik harakatni sodda ifodalagan, mayin yumorni ishlata bilgan tilnigina bola tili, deb qayd etish mumkin¹⁸.

XX asr boshlaridagi o’zbek bolalar adabiyotining maydonga kelishi, ravnaq topishida davr ijtimoiy muhitining ta’siri ham katta bo’lgan. B.Qosimov ta’biri bilan aytganda, zamon yangilanish zamoni edi. Millat yashamoqchi bo’lsa, hamma narsani - maktab-maorifdan jamiyat idora tuzumigacha yangilamog’i, o’zgartirmog’i lozim bir davrda o’zbek bolalar matbuoti, adabiyotiga ham asos solingani oydinlashadi. Tezkorlik bilan yangi avlod tarbiyasiga kirishmoqning yagona yo’li sifatida ularga mo’ljallangan matbuot va adabiyotga ehtiyoj katta bo’lgan. Shu tariqa, ma’rifatparvar pedagoglarning darsliklari, yetuk adiblarning bolalarga bag’ishlangan didaktik hikoyalaridan **bolalarga mo’ljallangan maxsus adabiyot** sari jadal qadam tashlandi. Natijada Abdulla Avloniy, Hamza Hakimzoda Niyoziy kabi ijodkorlar ham bolalar shoiri sifatida tanildilar.

¹⁶ Qarang: O’zbek bolalar adabiyoti va adabiy jarayon. T.: “Fan”, 1989. -B.

¹⁷ O’sha joy

¹⁸ Yoqubov H. Bolalar adabiyoti sifatini ko’taraylik. // Sovet adabiyoti. - 1936. - N° 6. - B. 15.



**Abdulla Avloniy -
islohotchi pedagog va bolalar shoiri
(1878-1934)**

XX asr boshlari atoqli ma'rifatparvarlaridan biri Abdulla Avloniydir. Adib hayoti va ijodi sho'ro davrida izck rganilmadi. Istiqlol yillaridagina uning serqirra ijodi va faoliyatiga xolis bho beridi. Nijd, Abdu Avloniy ma'rifatparvar shoir va adib, islohotchi pedgog, drmurg, o'zbek mtbuoti inkishofi, jadidchilik harakati namoyandasi,davlat va jamoat arbobi sifatida qayta tanildi. Bunda, soha tadqiqotchilari, xususan, B.Qosimov, N.Karimov, R.Barakayev kabi olimlarning hissasi kattadir.

Addulla Avloniy arab va fors tillarini yoshlikdagi mustaqil mutolaa vaqtida egallagan. U matbuot ishlarida faol ishtirok etish bilan birga "Adabiyot yoxud milliy she'rlar" nomli to'rt qismdan iborat to'plamning birinchi kitobini "Birinchi muallim" va "Ikkinchi muallim" deb nomlaydi. A.Avloniyning darsliklari mundariyasi, ularning mazmuni, ta'lim-tarbiyaviy jihatlari ko'plab tadqiqotlarda tilga olingan. Uning bolalar adabiyotiga qo'shgan benazir xizmati esa o'sha darsliklardagi she'rlari, hikoyalari, matn va masallarining bolalarbopligidadir.

Jumladan, shoirning "Ikkinchi muallim"dagi "Maktabga da'vat" she'rida muallif bevosita yosh kitobxonga murojaat qiladi:



Boqdi gunash panjaradan bizlara, Yotma deyur barcha o'g'il qizlara. Nolayi faryod qilib barcha qush: Maktabingiz vaqti, deyur sizlara. Boshladi har kim o'z ishin ishlara, Siz-da turing, maktabingiz izlara. Siz-da kitoblarni oling shavq ila, Tez yuguring, ilm yo'lin gezlara.

She'rda tong otishi, uyqudan uyg'onish vaqti yetganligi o'z ma'nosidan tashqari, ramziy ma'no ham tashiydi. Avvalo, erta tong quyoshi shiringina uxlab yotgan kichkintoy o'g'il-qizlarni nurlari bilan erkalab uyg'otarkan, ularni tong qushlaru - chug'urchuqlar, bolari-yu buzoqlardan andaza olishga, ularning kundalik "mashg'ulot"lari bor bo'lgani kabi o'quvchilar ham kitob-daftarini qo'lga olib, ilm yo'lini izlashga borishlari lozimligi uqdiriladi. Shuningdek, she'r mazmunidan gunash-quyosh hurlik va ozodlik ramzi, uyqu esa jaholat, g'aflat timsoli bo'lib, bolalar uyg'onishga, o'zligini anglashga da'vat etilayotir, degan ma'no ham anglashiladi. Shu sababli shoirning "Ikkinchi muallim" darsligidan joy olgan "Maktab" she'rda yosh avlod - maktab o'quvchilariga shunday murojaat qilinadi:

Maktab berur Qur'on siza,

Maktab berur **iymon** siza, Maktab berur **huron** siza, G'ayrat qilub o'qing, o'g'lon!

Maktabdadur ilmu kamol, Maktabdadur husni jamol, Maktabdadur **milliy xayol**, G'ayrat qilub o'qing, o'g'lon!

Shundan ham ko'rinaduki, Avloniy she'rda o'z qarashlarini ham singdira olgan. She'r barmoq vaznida yozilgan bo'lib, to'qqiz banddan iborat. Avloniy an'anaviy muqaddimadan so'ng, yangi usuldagi maktab ta'rifini keltiradi. She'rning har bir misrasida maktabga rang-barang tavsif beradi. "Maktab" so'zi she'r davomida yigirma yetti marta jaranglab, har band oxirida o'g'lonlarning unda g'ayrat bilan o'qishi uqtiriladi. She'rning birinchi bandi a-a-a-a shaklida qofiyalangan bo'lsa, qolgan bandlarining dastlabki uch misrasi o'zaro qofiyalanadi, to'rtinchi



misra esa birinchi bandga mos ravishda takrorlanib, ritmik, kompozitsion butunlikni ta'minlaydi:

Maktab uyi - dorulamon,
Maktab hayoti jovidon,
Maktab safoyi qalbi jon,
G'ayrat qilib o'qing, o'g'lon!

She'rda maktabning eng osoyishta, tinch va xotirjam, yoshlar hayotining mazmuni, huzurbaxsh uy ekanligi, shuningdek, musaffolik, samimiylik, beg'uborlikka yo'g'rilgan bolalik ramzi ham teran ifodalangan. Aniqrog'i bu ta'riflarning barchasi yaxlit holda bolalik timsolini oydinlashtiradi. Zotan, maktab va bola (o'g'lon) obrazi she'r davomida egizak tushuncha sifatida yangraydi, go'yo. Shu tariqa, maktabning barcha mo'jizalari, chunonchi, doruladab (odob-axloq uyi), Ollohning ehsoni, ajib gulzor singari o'ziga maftun qilishi, dur-u gavhar manbai, jannat eshigini ochuvchi, jaholatdan yiroqligi (qo'yingchi, yigirma yetti sifati) kabilar bola tafakkurida yangi olam yarata oladi. Shoir bu she'rda ma'naviy san'atlardan *tansiq us-sifotdan* keng foydalangani oydinlashadi.

Muallifning "Maktab gulistoni" kitobidagi "Maktab" she'rda ham ushbu fikr mantiqan davom ettiriladi:



MAKTAB

Maktabdur oftobi jahon saodating, Maktabdur osmoni zamon
sabovating, Maktabdur joyi dilkash, shirin maqomdur,
Maktabdur behishtu jannat qur tabiating.





Firdavsi jinon maktab, nodonlarga jon maktab, Bilgan kishiga qadrin, bir dorulomon maktab. Johillara g'am maktab, yalqovlarga kam maktab, Husnixat kishilarga chin ruhi ravon maktab.

Jonim, o'qungiz maktab, boru yo'qingiz maktab, Sizlar uchun, avlodim, bog'u guliston maktab.

Shunga o'xshash, "Maktab" nomli she'r A.Avloniyning "Adabiyot yoxud milliy she'rlardan 2-juzv" kitobida ham uchraydi. Unda maktab ta'rifining yanada yangi qirralari bo'rtib turadi:

Ko'rinadiki, she'rlar mavzu jihatdan bir, ammo ularning talqini, badiiy ifodasi murakkablasha borgan. Birinchi she'rda shoir yosh kitobxonni o'qishga, ilm-ma'rifatga targ'ib qilsa, ikkinchi she'rda maktabning kimlarga foyda-yu qanday kishilarga zarar ekani qiyoslanadi; uchinchi she'rda esa maktabning alohida manfaatlari xususida emas, umummillat va yurtga keltiradigan foydalari tilga olinadi.

Darhaqiqat, maktab mavzusi birgina Avloniy she'riyatida emas, balki, o'tgan asr boshlaridagi har bir ziyoli, ijodkor va ma'rifatparvar adib uchun dolzarb edi. Abdulla Avloniyning she'rlarida esa aynan maktab yoshidagi kichkintoylar tasavvuri, qiziqishlari, tili va tushunchasi ustuvor. A.Avloniy bolalarga samimiy fikrlarini o'ynoqi satrlarda tasvirlash bilan birga, Vatan va uning qismati bilan bog'liq jiddiy mulohazalarini bayon etadi. Shoir Vatan ta'rifini boshlab, "Tog'laridan konlar chiqar, Yerlaridan donlar chiqar, Havosi o'ta yoqumlik, Cho'llari bor toshlik, qumlik, Toshkand emas, toshqand erur, Kesaklari gulqand erur", deya bolalarda ona diyorga katta mehr uyg'otishga erishadi. Jumladan, "Vatan" nomli she'rda onayurtning noz-ne'matlari, boyliklari ta'rif-tavsif etiladi. Shu bilan birga, onaday aziz, mushfiq go'sha haqida lirik qahramon - yosh avlodning qayg'uli nidosi aks etadi:

Onamizsan! Bizning mushfiq onamizsan! Javlon urib yashaydurgon xonamizsan! Seni sotmoq mumkinmidur, o'zing



o'yla, Tiling bo'lsa, hasratlaring tuzuk so'yla!.. Sotib-sotib qoladurmiz g'amga botib, Boyqush kabi vayronada yotib-yotib.

Shoir o'tmishda ma'rifat gulshani bo'lgan yurtimizning jaholat botqog'iga botganidan afsuslar chekib, Vatan tobora vayronaga aylanayotgani, ilm-ma'rifatga oshno bo'lishgina kishilarni bu g'amdan qutqazishini ta'kidlaydi. Umuman, Avloniy "Birinch muallim" va "Ikkinchi muallim" kitoblarida yosh kitobxonlar tafakkuriga mos ilm xosiyati va ilmsizlik oqibati to'g'risida pandnoma tarzidagi satrlarni bitgan bo'lsa, "Maktab gulistoni"dagi she'r, hikoya va masallarda ijtimoiy dolzarb muammolarni ham qamrab olgani ayonlashadi. Zero, bunday she'rlar orqali yosh avlodni ma'rifatga da'vat etish bilan birga, ularni vatanparvar, o'z millatiga, yurtiga sadoqatli qilib tarbiyalash maqsadi ham ko'zlangan.

Ma'rifatparvarlikning yetakchi prinsiplari mazlum xalqni uyg'otish, ilm- ma'rifat nuridan bahramand qilish, o'zligini tanitish sari yetaklashda aks etar ekan, bunda asosiy e'tibor bolalarga qaratilishi aniq. Chunki jaholat botqog'iga botib bo'lgan avom xalqni uyg'otish va qayta tarbiyalashdan ko'ra qalbi va ongi toza, pokiza yosh avlodni avval boshdan to'g'ri tarbiyalash osonroq va maqbul yo'l bo'lsa kerak. Ammo "Turkiston maktablarida o'z ona tilimizda yozilgan mukammal "Axloq" kitobining yo'qligi, afrodi millatning shunday bir asarga tashna va muhtojligi" Avloniyga qattiq ta'sir qiladi. "Shuning uchun ko'p vaqtlar tajriba so'ngidan adibi muhtaram Shayx Sa'diy usulinda yozmakni, garchi og'ir ish bo'lsa ham" o'ziga muqaddas bir vazifa deb hisoblagan Avloniy "Turkiy guliston yoxud axloq" asarini yozib tugallaydi va 1913- yilda chop ettiradi.

Asar "insonlarni yaxshilikg'a chaqirguvchi, yomonlikdan qaytarguvchi bir ilm" Axloq xususidadir. Biroq "Turkiy guliston" Shayx Sa'diy "Guliston"iga shunchaki nazira yoxud ergashish natijasi emas, balki o'z davri va kitobxoni xususiyatlarini to'la hisobga olgan tom ma'nodagi yangicha bir asar hamdir.



Chunonchi, Shayx Sa'diy "Guliston"ida odamlar nasl-nasabi va rutbasiga ko'ra toifalarga ajratilib, har bir toifaga xos bo'lgan xususiyatlar haqida alohida boblardagi hikoyatlarda fikr yuritilgan bo'lsa, "Turkiy Guliston"da muallif yosh kitobxonlari saviyasini hisobga olib, umumlashma komil inson xususida fikr yuritadi. Avloniy nazdida bani Odam shohmi-gadomi, boymi-kambag'almi jamiyatdagi ijtimoiy mavqeidan qat'iy nazar, avvalo, Inson farzandi va insoniylikni belgilovchi sifatlar shu sababli ham barcha uchun mushtarakdir.

U insonga xos xulqni ikkiga - yaxshi va yomonga ajratadi. "Yaxshi xulqlar" deb nomlangan birinchi qismida u 31 fazilat, "Yomon xulqlar" deb atalgan ikkinchi qismda esa 20 illatga ta'rif beradi. O'z mulohazalarini dalillash uchun Qur'on oyatlari va hadislarini, shuningdek, mashhur mutafakkirlarning fikrlarini keltiradi. Har bir axloqiy kategoriyaga o'z munosabatini bildirgach, o'sha fikr mazmunini ifodalovchi bayt, yo biror maqol - hikmat ilova qiladi. Biroq muallif inson xulqini shunchaki ikki guruhga ajratib tasnif qilish bilan cheklanmay, "bu sanagan yomon xulqlarning fanoliklarini, yuqorida sanagan yaxshi xulqlarning go'zalligini insof muvozanasi ila o'lchab, vijdon muhokamasi ila tahqiqlab, yaxshilarini tanlab amal qilmak, yomonlarini anglab hazar qilmak lozimdur"-deydi.³³ Ko'rinadiki, Avloniy insonning izzati, dunyoning lazzati yaxshi so'zlarni eshitib va ko'rib undan ibrat olish, yomon xulqlarni bilib olgach, ulardan o'zini tiymoq zarurligini uqdirib, yosh avlodni insoniylik sari yetaklaydi. Shu sababli muallif har bir yaxshi yoki yomon xulq xususida fikr yuritar ekan, uning sifatlarini bittalab sanaydi, fikr dalili uchun o'tmish donishmandlari hikmatlaridan misollar keltiradi hamda "qissadan hissa" tariqasida she'riy xulosa bilan yakunlaydi.

Jumladan, sabr xususida Avloniy shunday deydi: "Sabr deb boshimizga kelgan balo va qazolarga chidamli bo'lmakni



aytilur. Har bir ishda sabr va sovuqqonlik ila harakat qilmak lozimdur. Chunki boshimizga keladurg'on balo va qazo, zahmat va mashaqqatlarning barchasi janobi haqning irodasi ila o'ldig'i uchun bularg'a sabrsizlik qilgan kishilar ajr va savobdin quruq qolurlar. Sabr insonlar uchun buyuk bir fazilatdurki, janobi haq sobirlarni suyar. Qur'oni karim ichida ko'p yerda sabrni, sobirlarni madh qilmishdur. Shariati islomiyada janobi haq tarafidan kelgan balo va qazog'a sabr qilmoq farzi ayndur.

Inson har bir ishni sabru matonat ila yurutsa, maqsudiga tinch va rohatda borub yetar. Hamisha saodatda yashar.

Sekin borgan kishi maqsuda yetgay, Shoshub besabrlar kaj yo'lga ketgay. Agar sabring bo'lsa nafsingga yo'ldosh, Seni tavfiqi rabboniga eltgay.

Avloniy shu tariqa har bir yaxshi xulqni ta'rif-tavsif etib, bayt orqali xulosalagach, unga asos bo'luvchi hadislardan ham namunalar keltiradi. Masalan, "Ilm imonli kishilarning muhibi, hilm homiysi, aql dalili, yaxshi amal sarmoyasi, muloyimat volidi, afv axavoni, sabr hokimi vijdonidur", "Arablar "assabru miftohul-farah - sabr shodlig'ning kalididur", - deyurlar" kabi. Nihoyat, maqolat oxirida quyidagi baytlar ham beriladi:

Sabr ila har mushkil ish zoyil bo'lur, Sabr edan maqsudina noyil bo'lur. Har kishida bo'lmasa sabri jamil, Nafs ko'yina yurub, soyil bo'lur. Sabr qilsang, g'o'radan halvo bitar, Sabrsizlar o'z oyog'idan yitar".

E'tibor berilsa, "Sabr" xususidagi maqolat muxtasar bo'lsa-da, tugallangan bir asar. Zero, uning birinchi qismida sabrga umumiy ta'rif beriladi, ikkinchi qismida nima uchun sabr qilish kerakligi izohlanadi, uchinchi qismida sabrning fazilatlarini ta'riflanadi. Muallif yosh kitobxonni sabr ne'matidan bahramand bo'lishga tashviq qilar ekan, inson boshiga keladigan balo-qazolar tasodifiy emas, balki Olloh tomonidan yuboriladigan sinovlar ekanligi, shu sinovlardan sabr qilib,



chidam bilan o'ta olgan kishigina ajru savobga doxil bo'lishi, ikki dunyo maqsadiga yetishi mumkinligini alohida ta'kidlaydi. Fikr dalili sifatida hadisi sharifdan keltirilgan misol va arab maqoli esa yosh kitobxon nazdida bu fikrlarni yana bir karra tasdiqlaydi. Avloniy fikrning aqlga, she'rning esa qalbga ta'sir etishini hech qachon xotiridan faromush qilmaydigan ijodkordir. Maqolatdagi she'rlar shu ma'noda, yosh kitobxon qalbiga, yuragiga ta'sir qiladigan shifobaxsh malham vazifasini o'taydi. Bundan tashqari, shuni ham ta'kidlash joizki, maqolatdagi har bir jumla o'zicha tugallangan tezisdir. Muallif sabrning fazilatlari to'g'risidagi tezislarni o'rta tashlar ekan, har birini alohida-alohida ta'kidlashni ham unutmaydi. "Sabr qilsang g'o'radin halvo bitar, sabrsizlar o'z oyog'idan yitar" degan xalq maqoli esa sabr haqidagi fikrlarning yakuniy xulosasi, qaymog'i sifatida yosh kitobxon qalbiga teranroq singishi aniq.

Avloniy bola kamolotida tarbiyaning roli juda kattaligini tushunadi va "Tarbiya biz uchun yo hayot, yo mamot, yo najot - yo halokat, yo saodat - yo falokat masalasidir" - degan chuqur ma'noli so'zlari bu fikrning naqadar muhimligini, ta'limni tarbiyadan, tarbiyani esa ta'limdan ajratib bo'lmashligini tasdiqlaydi.

Demak, maktabga endigina qadam qo'yan yosh bola dastlab alifboni o'rganadi, alifbodagi ilm-ma'rifat va odob-axloqqa bag'ishlangan kichik asarlarni o'qishga kirishadi va shu bilan o'zida bani Odamga xos bo'lgan eng yaxshi xususiyatlarni kamol toptira boradi, shuning bilan birgalikda imon-e'tiqodini shakllantirish maqsadida diniy ta'limotni ham o'rgana boradi.

Avloniy tarjimonlik faoliyati bilan ham izchil shug'ullanib, I.A.Krilovning 21 masali, K.D.Ushinskiyning 7 ta, Lev Tolstoyning 11 ta kichik asarini o'zbek tiliga tarjima qilgan.



U yangi maktablar uchun o'quv kitoblari yozib, nashr qildirgan. Jumladan, "Adabiyot yoxud milliy she'rilar" to'rt qismdan iborat, "Birinchii muallim" (1911 y.), "Ikkinchi muallim" (1912 y.), "Turkiy guliston yoxud axloq" (1913), "Maktab guliston" (1915 y.), "Mardikorlar ashulasi" (1917 y.) va boshqa darslik va o'qish kitoblarini yaratgan.




Avloniy maktablar ochish, xalqni savodxon qilish, o'zbek xotin-qizlarini o'qitish, o'qituvchilar va ziyoli kadrlar tayyorlash bilan ham shug'ullanadi. U 1923- 24-yillarda eski shahardagi xotin-qizlar va erlar maorif bilim yurtlari mudiri, 1924-29 yillarda Toshkent harbiy maktabida o'qituvchi, 1925-34-yillarda O'rta Osiyo universiteti, O'rta Osiyo Qishloq xo'jaligi maktabida, O'rta Osiyo Davlat universitetida dars beradi. Pedagogika fakultetining til va adabiyot kafedrasii professori va mudiri bo'lib ishlaydi. U 1933-yilda 7-sinf uchun "Adabiyot xrestomatiyasi" tuzib, nashr ettirdi. Avloniy "Hijron", "Nabil", "Indamas", "Shuhrat", "Tangriquli", "Surayyo", "Shapaloq", "Chol", "Ab", "Chig'aboy", "Abdulhaq" taxalluslari bilan tanqidiy va ilmiy maqolalar, 4000 misradan ortiq she'r ijod qilgan.

Avloniy 1927-yilda "Mehnat qahramoni" unvoni bilan taqdirlandi. 1930- yilda unga "O'zbekiston xalq maorifi zarbdori" faxriy unvoni berildi. U 1934- yil 25 avgustda vafot etdi.

Hozirda Toshkent ko'chalaridan biri, Respublika o'qituvchilar malakasini oshirish markazi va mahallalardan biri



uning nomida. Respublika o'qituvchilar malakasini oshirish markazida Abdulla Avloniy muzeyi tashkil qilingan. Uning pedagogik qarashlari bugungi kunda o'zbek milliy maktabini yaratishda muhim ahamiyat kasb etadi.



**Hamza Hakimzoda -
ma'rifatparvar bolalar shoiri (1889-1929)**

Ilmning ahamiyatini, inson hayotida ma'rifat tutgan yuksak maqomni tasvirlashga yo'naltirilgan adabiyot ma'rifatchilik adabiyoti hisoblanadi. O'zbek adabiyotida juda qadim zamonlardan buyon ma'rifatni tarannum etishga alohida e'tibor berilgan. Bu yo'nalishdagi adabiyot XIX asrning ikkinchi yarmi, XX asr boshlarida qayta rivojlandi. Muqimiy, Furqat, Zavqiy, Avaz O'tar, Avloniy, Fitrat, Qodiriy, Cho'lpon singari yozuvchilarimiz shu adabiyotning vakillari sifatida shuhrat topdilar. Hamza Hakimzoda Niyoziy ana shunday adiblardan biridir. U 1889-yili Qo'qonda tug'ildi. 7 yoshidan maktabda xat-savod o'rgana boshlaydi. Maktabni bitirgach, madrasaga va I.V.Orlovning kechki rus-tuzem maktabiga o'qishga kirdi. Hamza madrasada o'qigan chog'laridayoq Firdavsiy, Hayyom, Sa'diy, Nizomiy, Hoqoniy, Jomiy, Fuzuliy, Bedil va boshqalarning ulkan she'riyati bilan tanishdi, shuningdek, Sharq olimlarining asarlarini o'qidi. 1908- yilda Hamza ota-onasining noroziligiga qaramay,



madrasani tashlab ketdi. Uning o'zi yozganidek, ota-onasining o'jarligi, ma'murlarning zulmi, kambag'allik tufayli dunyoviy bilimlarni egallash to'g'risidagi orzusini amalga oshira olmadi.

Hamza Hakimzoda Niyoziy bor-yo'g'i 40 yil umr ko'rgan bo'lsa-da, butun hayotini xalqqa xizmat qilish uchun bag'ishlagan olovqalb shoir va dramaturgdir. Shu bilan birga u tarbiyachi, murabbiy, jamoat arbobi sifatida nom qoldira oldi. Hamza o'z xalqiga ilm-ma'rifat tarqatish uchun, xalqining ozod hayot kechirayotganini ko'rish uchun shaxsiy manfaatlaridan butkul voz kecha olgan yozuvchidir.

Hamza o'zining pedagogik faoliyatini 1910-yilda Toshkentda Qashqar mahallasida maktab ochib, bolalarni o'qitishdan boshlaydi. Shu yilning oxirlarida u Qo'qondagi mahalliy rus-tuzem maktabida muallim bo'lib ishlaydi va 1911- yilda yangi maktab ochib, ta'lim-tarbiya ishlariga ba'zi o'zgartirishlar kiritadi. O'quvchilarning o'rganayotgan materialni quruq yod olishi foydasiz ekanligini aytib, sinfdan tashqari mashg'ulotlarga ko'proq e'tibor beradi, ona tili darslarini ko'paytiradi, yangi darsliklar yozadi. Biroq bolalarning o'quv qo'llanmalari, oziq- ovqat va kiyim-kechak bilan to'liq ta'minlanmagani bu xildagi maktablarning ishlashida katta qiyinchiliklar tug'dirardi. Ammo Hamza "Jamiyati xayriya" tashkil qilib maktabini saqlab qolish uchun kurashadi. Uning ishlari haqidagi shov- shuv Qo'qon shahridan tashqariga ham tarqala boshlaydi. Mahalliy ma'murlar bunday "xavfli ta'lim-tarbiya manbai"ga toqat qilolmaydilar va 1913-yilda maktabni yoptirishga muvaffaq bo'ladilar. Hamza o'z ona yurtini tashlab, chet elga ketishga majbur bo'ladi. 1913-1914-yillarda Hamza Afg'oniston, Hindiston, Suriya, Turkiya mamlakatlarida, Makkada sayohatda bo'lib, bu mamlakatlardagi o'zgarish va yangiliklar bilan tanishadi.

Hamza 1914-yilda Qo'qonga qaytib keladi va kambag'al yetim bolalar uchun maktab ochishga harakat qiladi. Nihoyat,



“Dorul yatim” ya’ni, “Yetimlar maktab”ini ochadi. Maktab Qo’qonda 1914-yil sentabrdan ishga tushadi. Unga Qo’qonning har tarafidan kelgan faqir va yetim bolalar pulsiz qabul qilinib, hatto ba’zi bechorahollarga daftar ham berilgan.

Hamzaning “Doril yatim” maktabi uchun o’zbek tilida tuzgan darsligi tabiatga, yo xalqlar tarixiga oid hikoyalardan iborat bo’lgan. Shunga ko’ra, ruhoniylar uni ollohga va podshoga qarshi chiqishda ayblaydilar. Ko’p o’tmay, “Doril yatim” maktabi yopib qo’yiladi, Hamza esa siyosiy jihatdan ishonchsiz va milliy ozodlik harakatining ishtirokchisi degan mulohaza bilan mirshabning maxfiy nazorati ostiga olinadi.

Hamza 1915-yilda Marg’ilonga keladi. U oshkora ravishda yangi maktab ochishga, lekin ehtiyot bilan ish ko’rishga harakat qildi. Shu tariqa, Marg’ilonning tinch va xilvat ko’chasida yangi maktab paydo bo’ladi. Uning binosi Qo’qondagi maktab binosidan ham yomonroq edi.

Hamza ta’lim-tarbiya masalasini nazariy jihatdan ishlab chiqish bilan birga, Turkistonda maktablarni qayta qurishning amaliy masalalarini hal qilishda faol qatnashdi. U 1916-yilda Zavqiy, Ahmad Aliyev va boshqa jamoat arboblari bilan birgalikda “Farg’ona vodiysidagi musulmon aholi orasiga xat-savod yoyish jamiyati”ni tuzadilar. Jamiyat pul to’plab, boshlang’ich maktablar ochadi. Ularda darslar o’zbek tilida olib borildi.

Hamza boshlang’ich sinf o’quvchilariga mo’ljallangan darsliklari hamda she’rlari bilan o’zbek bolalar adabiyotining rivojiga katta hissa qo’shgan. Uning o’zi tashkil qilgan yangi usuldagi maktab talabalari uchun yozgan “Yengil adabiyot”, “O’qish kitobi”, “Qiroat kitobi” darsliklari, ularga kiritgan she’r, hikoya va masallari, ta’limiy-ma’rifiy ahamiyatga ega asarlari shu jihatdan e’tiborli. Ayniqsa, shoirning o’quv qurollari madhiga bag’ishlangan she’rlari, “Bolaning yomon bo’lmog’iga sabab bo’lgan onaning jazosi” hikoyasi, “Toshbaqa bilan chayon” masali bolalar yosh xususiyatlariga muvofiqligi bilan diqqatga sazavor.



Niyoziyning “Yengil adabiyot”ida ilm va jaholat muqoyasasiga oid ko‘plab she‘rlar mavjud. Masalan, quyidagi she‘rda ilmni jannatning eshigini ochuvchi, xazinaning yo‘lini ko‘rsatuvchi porloq nur sifatida, maktabni esa insonning ilm- ma‘rifat nuridan bahramand bo‘lib, olim bo‘lishidagi dastlabki bosqich - beshik sifatida tasvirlaydi:

Ilm - jannat eshigi, Xazinaning teshigi, Insonni olim qilan,
Maktab erur beshigi.

Bu ifoda jaholat bilan muvoziy qo‘llanilib, jannat va do‘zax, xazina va jahannam, olimlik va so‘qirlik, maktab va g‘aflet singari zid ma‘noli tushunchalar orqali realistik mohiyat kasb etadi.

Jahl - do‘zax eshigi,

Jahannamning teshigi,

Bog‘lab solan ko‘zingni, G‘aflet erur beshigi .

So‘ngra, olimlik xosiyati va johillik kasofati aniqroq ko‘rsatib beriladi:

Olim bo‘lsak dunyoda,

Kelur har ish bunyoda, Biz ham suv ostin kezub, Ham
ucharmiz havoda.

Johil qolsak dunyoda,

Xo‘rlik kelur ziyoda,

Hayvon kibi yuk tashub, Cho‘l kezarmiz piyoda.

Demak, shoir yosh avlodlarining bir kuni olimlar qatoridan o‘rin olishiga, hatto suv osti va osmonda kezaigan bilimdon bo‘lishiga ishonadi. Kelajakka ishonch ruhi adibni bolalar uchun ko‘plab darsliklar, ijtimoiy-siyosiy mavzuda, dunyoviy ilm, kasb-hunarni o‘rganishga undovchi she‘rlar bitishiga turtki bo‘ladi. Shoirning “Qalam” she‘ri qasida tarzida yozilgan. Lirik qahramon maktabga kelib, qalamga oshno bo‘lgani va shu tufayli aqli raso, ilm-u adab egasi bo‘lib, barcha orzu umidlari ro‘yobga chiqqanini ta‘rif-tavsif etadi:



O'qudim, chiqdi savodim ham xatim yaxshi bo'lub, G'ayratimga yarasha ishlar mango qildi qalam.

Harna kim yozmish qalam so'zidin also chiqmadim, Ul mani ham aytganim axir bajo qildi, qalam.

Shoir bolalarni maktabga qiziqtirish, o'quv qurollariga havas uyg'otish borasida ilmning xosiyatini teran idrok etadi. Yosh qahramon tilidan "Bor edi ko'nglumda bo'lmoq podsholik orzu, O'tmadi fursat, bu hojatim ravo qildi qalam. Bir gadoni o'g'li erdim podsho qildi qalam",- deya ma'rifatni ulug'laydi. Natijada shoir she'ri va talqinidan insonning jamiyatdagi mavqeyi, qanday inson bo'lib yetishuvi ilm sharofatidan ekanligi anglashiladi.

Hamzaning bolalar uchun yozgan yana bir she'ri "Bir kishining bor edi to'rt bolasi" deb nomlanadi. Aslida bu mavzu o'tgan asr boshlaridagi o'zbek bolalar adabiyotida alohida yo'nalish sifatida ko'zga tashlanadi. O'sha davr o'qish kitoblaridagi axloq-odob mavzusi insoniylikning turli yaxshi va yomon jihatlarini qamrab olgan. Saxiylik va baxillik, to'g'ri so'zlik va yolg'onchilik, mehnatsevarlik va dangasalik, sabr va sabrsizlik, qanoat va ta'magirlik, sadoqat va bevafoqlik, adolat va jabr-zulm singari insoniylikning qarama-qarshi qutblarida turgan o'nlab fazilat va illatlarning yaxshi-yu yomon jihatlari xususida fikr yuritilib, yaxshisidan o'rnak olishga, yomonidan hazar qilishga undovchi she'r, hikoyalarga keng o'rin ajratilgan. Hamzaning yuqoridagi she'ri shu mazmunni o'zida ifoda eta oladi. Unda hikoya qilinishicha, bir oilaning to'rt farzandi bo'lib, uylariga kelgan mehmonning puli yo'qoladi. U pulni hech biri oldim demaydi, barchasi ko'rganim yo'q deydi. Shunda ota bolalarni tergash befoydaligini anglab, hiyla ishlatishga majbur bo'ladi: to'rt bolasini ham bir uyga qamab, oldiga qora kuya qo'yadi va deydi:

Kimki rost esa gar so'zi,

Qora bo'lur o'zicha ikki yuzi;



Kimni agar yolg'on erursa so'zi, Bor-yo'g'i qora bo'lur o'ng yuzi.

Bolalarning kattasi pulni olganligi uchun bu hiylani tushunmay, o'ng yuzim o'zicha qora bo'lsa, chap yuzimni o'zim qora qilay, deb kuyani surkaydi. Ota bolalarni tashqariga chiqarganida kattasining chap yuzi qoraligini ko'radi, qolganlarining yuzi esa oq bo'ladi. Shunda kimning o'g'ri ekanligi bilinib, xolaning puli qaytib beriladi. Shu tufayli bu fe'lini tashlagan bolani shoir yosh kitobxonlarga ibrat qilib ko'rsatar ekan, qissadan hissa tariqasida:

Kimi bo'yla xiyonat qilur,
Bir kuni o'zini shuyla xijolat qilur,-
deb ta'kidlaydi.

Hamza Hakimzodaning tugallanmay qolgan "Qiroat kitobi" Avloniyning "Turkiy Guliston"iga hamohang bo'lib, uning mantiqiy davomi, hatto ma'lum jihatlardan uni to'ldiruvchi asar. "Turkiy Guliston"da avval yaxshi xulqlar, keyin yomon xulqlar xususida alohida fikr yuritilgan bo'lsa, "Qiroat kitobi"da har bir yaxshi xulq va uning ziddi bo'lgan yomon xulq xususida ketma-ket fikr yuritiladi, ma'lumot beriladi. Mavjud qo'lyozmada Hamza Hakimzoda Niyoziy kibr va tavoze', baxil va saxiy, kizb va siddiq, shitob va sabr, zulm va rahm, xiyonat va sadoqat mavzularini qalamga olgan. Biroq "Sadoqat" sarlavhasi qo'yilgan bo'lsa- da: "Endi sadoqatni xudo xohlasa, ikkinchi kitobdan boshlab o'qursiz", - deb izoh berilgan.

"Qiroat kitobi"dagi har bir mavzu bir darsga mo'ljallangan. Shuningdek, mavzuga hikoyat keltiriladi. Darslik bu jihati bilan Alisher Navoiyning "Hayrat ul-abror"idagi maqolat va hikoyatlarga ham o'xshab ketadi.

H.H.Niyoziyning "Mevalar mojarosi" turkumidagi she'rlari ham bolalarbopligi bilan diqqatni tortadi. Unda bolalarga xos xarakter-xususiyatlar, chunonchi, maqtanchoqlik, baxillik,



manmanlik, chaqmachaqarlik, mushtumzo'rlik odatlari mevalar mojarosi misolida ko'rsatib berilgan.

Bundan tashqari, Hamza xalq orasidan turli mazmundagi qo'shiq va ashulalarni yig'ib, ularning ayrimlari uchun o'z davri hayot voqealarini aks ettiruvchi matnlar yozgan. Hatto u yozgan qo'shiqlarning ayrimlari hajviy holatni ifodalaydi. Shoirning bunday she'rlari uning "Oq gul", "Qizil gul", "Yashil gul", "Pushti gul", "Sariq gul", "Safsar gul" kabi ramziy nomlar bilan nashr ettirilgan "Milliy ashulalar uchun milliy she'rlar majmuasi" kitobidan o'rin olgan. Hamza folklorga xos nozik poetik uslub elementlarini chuqur o'zlashtirib, ulardagi ilg'or gumanistik g'oyalarni rivojlantirdi.



Elbek

- bolalar shoiri va islohotchi pedagog (1898-1938)

O'tgan asrning 20-yillarida chinakam shakllanish jara-yoniga kirgan o'zbek bolalar adabiyotida **Elbek**ning o'ziga xos o'rni bor. Qatag'onlik davri o'zbek adabiyotining ko'zga ko'ringan vakillaridan biri Elbek – Mashriq Yusupovdir. U 1898-yilda Toshkent viloyati Bo'stonliq tumanining Xumson qishlog'da tavallud topgan. Muallimlik uni ham badiiy ijod, ham ilmiy ijod sari yetakladi. Badiiy ijodga havas unda, o'z e'tiroficha, 14 yoki 15 yoshdalgida uyg'ongan bo'lsa-da, 1917- yildan boshlab yozuvchilikka chinakamiga beriladi. U elga dardkashlikni ko'zlab, Elbek taxallusini qo'llab, she'rlar va hikoyalar yoza boshlaydi.



Uning “Armug‘on” (1921), “Ko‘zgu” (1925), “Yolqinlar” (1927), “Sezgilar” (1927), “Bahor” (1929), “Mehnat kuylari” (1930), “She‘rlar” (1934), “Chirchiq bo‘ylarida” (1935), “G‘unchalar” (1935) kabi masal va she‘rlar to‘plamlari, “Qo‘shchi Turg‘un” (1925), “Dadamat” (1936) hikoyalar majmualari, “Tozagul” (1934), “Bog‘bon”, “Etik”, “Mergan” (1935) poemalari alohida kitoblar tarzida arab hamda lotin alifbolarida bosilib chiqdi. Uning she‘rlari “Chig‘atoy gurungi” uyushmasi tomonidan chop etilgan “O‘zbek yosh ijodkorlari” (1922) to‘plamidan joy oldi. Yangi-yangi she‘r, hikoya va maqolalari o‘sha davr matbuotida tez-tez bosilib turdi, o‘zi ham o‘zbek matbuotining faol namoyandasiga aylanib “Inqilob”, “Maorif va o‘qitg‘uvchi”, “O‘zbekiston sovet adabiyoti”, “Bilim o‘chog‘i”, “Yangi yo‘l”, “Alanga”, “Uchqun” (Buxoro Xalq Respublikasi Maorif nazorati organi) singari qator jurnallarni tahrir hay‘ati ishida qizg‘in qatnashdi, shu zaylda Respublika matbuotining yuzaga kelishi va shakllanishida, o‘zbek jurnalistikasining qaror topishi va rivojlanishiga munosib hissa qo‘shdi.

Elbek o‘zbek tili xalqimiz milliy qiyofasini ifoda etishi uchun astoydil kurashdi, bu tilni kamsituvchilarga qarata 1922-yilda shunday satrlarni bitgandi:

Mungli qushim, sayrab-sayrab kel, anglat: Kimlar erur turk tilini sotuvchi!

Bulbul kabi sayrab turg‘on bu tilni Uyalmayin bu o‘lkadan otuvchi.

Boldan totli, jondan tunuk turkchani Tushunmaydi xo‘rlab-xo‘rlab yotg‘uchi Ochunlarda boyligini ko‘rmasdan

Kimdir bunga: “Yordi, yormas degan!” Mungli qushim, ularni qo‘y, sen sayra, Turk tilining dong‘in chiqar ko‘klarga...

“Til” she‘ridan keltirilgan parchadan anglashtirayotirki, unda ifodalangan g‘oya istiqlol yillarida ona tilimizga Davlat tili maqomi berilgach, dolzarbligi yanada oshdi.

Elbek o‘zbek xalqining boy og‘zaki ijodiyotini to‘plash va o‘rganish ishiga tilshunos-muallim sifatida Turkiston



Maorif Xalq Komissarligi qoshidagi O'zbek bilim hay'atida ishlagan kezlaridayoq kirishgan edi. U Bo'stonliq atroflaridan turli qo'shiqlar, laparlar, og'zaki drama, maqol va matallar, topishmoqlarni maroq bilan to'pladi. Shu kuzatishlari jarayonida xalq adabiyoti juda boy bo'lishi bilan birga o'z davri va o'sha zamon kishilarining turmushlarini o'z ichiga olgan qimmatli adabiy vasiqalardir, degan xulosaga keldi. Binobarin, ularni to'plash, nashr etish va o'rganishga jadal kirishishi zarurligini anglab, to'plagan xalq topishmoqlari, maqollari va qo'shiqlarini jamlab, 1923-yilda "Topishmoqlar, maqollar va ashula to'plami" nomi ostida nashr ettirdi. Bu kitob g'oyat qizg'in kutib olindi, unga O'zbekistonning boshqa joylaridagi folklor namunalarini qo'shish istagini ifodalovchi takliflar ham bo'ldi. Bu taklifni inobatga olib, Elbek Sirdaryo, Buxoro, Farg'ona, Xorazm va Samarqand shahar va qishloqlarini kezdi, folklor asarlarini yozib g'oyat yangidan to'plagan materiallarini qo'shgan holda 1928-yilda G'ulom Zafariy bilan hamkorlikda "Ashulalar" to'plamini nashrdan chiqardi, 1936-yilda yana yangi materiallarni qo'shib, shu to'plamni uchinchi nashrini amalga oshirdi.

Elbek xalq ertaklarini to'plar va o'rganar ekan, ularga o'zi tarjima qilgan A.S.Pushkinning "Baliqchi va baliq haqidagi ertak", "Oltin xo'roz", "Pop va uning xizmatkori Balda haqida ertak" kabilar tajribasi asosida yondashib, ertak sujetini nazmda bayon etish an'anasi o'zbek bolalar dostonchiligini yuzaga keltirishiga tatbiq etdi. Bu jihatdan uning 1935-yilda chop etilgan "Ertaklar" to'plamini tashkil etuvchi "Kambag'al yigit va par dasturxon", "Erksiz folchi", "Omonat" she'riy ertaklari dalil bo'ladi.

"Erksiz folchi" she'riy ertagida ijtimoiy motiv ustuvor. Xalqning "Soxta folbin" ertagi sujetini nazmda bayon etish asosida bitilgan bu she'riy ertakda nochorlikdan soxta fol ochish evaziga tirikchilik qilishga uringan, ammo kutilmagan omadi bilan podshoning yo'qolgan xachiri va qaroqchilar xazinadan o'margan bir qop oltinni topib nazarga tushgan, nihoyat yolg'oni



chinga aylanib saroy folbini sifatida izzat-ikrom qozonsa-da, erkidan ayrilib tahlkada yashashga mahkum bo'lgan folbin qismati ko'rsatilgan. Folbin o'zining yolg'ondakam folchi ekanini har qancha takrorlamasin, na podshoh, na saroy ahli unga ishonishmaydi, uning yolg'on gapini esa rost o'rnida qabul qilishadi. Elbek bu bilan saroyning yolg'on va ig'volar maskaniga aylanganini, unda yolg'on rost o'rnini tamoman egallaganini fosh etadi.

Elbek o'zbek bolalari xalq qo'shiqlarini to'plash va nashr etishning ham tashabbuskorlaridan bo'lgan. Uning 1937-yilda e'lon qilingan "Bolalar qo'shig'i" to'plami o'zbek folklorshunosligi tarixidagi dastlabki urinish samarasi sifatida ahamiyatlidir. To'plamda 18 ta bolalar qo'shig'i jamlangan.

Elbekning boshlang'ich maktab bolalari uchun darslik va o'quv qo'llanmalari tuzish tajribasi bolalar yosh xususiyatlari va qiziqishlarini inobatga olgan holda badiiy asarlar yozish iqtidorini, demakki, bolalar shoiri va bolalar yozuvchisi sifatidagi iste'dodini shakllantirishda muhim omil bo'ldi. Bu jihatdan "Bilim" darsligining ikkinchi kitobida keltirilgan "Odamlarning kuchi nimada?" hikoyasi e'tiborga loyiq:

Odam miltiq, tuzoq, qarmoq, ketmon yasaydi. Yirtqich hayvonlarni topib otadi. Tuzoq qo'yib, qushlarni ilintiradi. Qarmog'iga tiqish uchun ketmon bilan yer kovlab, qurtni topadi va baliqni suvdan ilintirib oladi: odamning kuchi yasagan qurollarida."

Yoki Elbekning "Yo'ldoshning tegirmoni", "Totli sho'rbo" va "Jo'jalar" hikoyalari ham qator fazilatlariga ega. Chunki "Yo'ldoshning tegirmoni"da bolalar ijodkorligi o'yin jarayonida ochib beriladi:

"O'qur choq" to'rtligi esa parallelizm negizida bitilgan bo'lib, axloqiy-didaktik mazmunga ega. Butun to'rtlikda "qanot" so'zi rang-barang ma'noda tovlanadi:

G'oz qanoti oq bo'lur, Er qanoti ot bo'lur. Bolalarning qanoti - Maktabda o'quv bo'lur.



She'ning voqeaband mazmunga ega bo'lishi - unda epiklik alomatini ta'minlabgina qoldirmaydi, balki uning bolalarbopligini, aniqrog'i, undagi mazmun va obrazlarning "ko'rimliligini"- bola idrokiga mosligini belgilaydi. Shuni ta'kidlash joizki, Elbek butun faoliyati davomida 30 dan ziyod masallar yozadi va shu asosda o'zbek masalchiligining rivojlanishini yangi bosqichga olib chiqdi. Elbek bu masallarni yaratishda xalq og'zaki ijodi, o'zbek mumtoz adabiyoti va I.A.Krilov masalchiligiga xos an'analardan ijodiy foydalandi. Chunonchi, "Sichqon xotinning qiz uzatishi", "Qora qushlar ila toshbaqalar" masallari uchun "Kalila va Dimna"da mavjud bo'lgan sichqon xotinning qiz uzatishi, qarg'a va toshbaqa sujetlaridan foydalangan. "Olaqarg'a va Qurbaqa" masalini esa I.A.Krilovning "Qarg'a va Tulki" masalidan ijodiy ta'sirlanib yozgan. Zotan, u I.A.Krilovning "Fil va Laycha", "Ko'zgu va Maymun", "Tulki va uzum", "Eshak bilan bulbul", "Bo'ri bilan Turna" masallarini o'zbek tiliga o'girish jarayonida mahorat sirlarini o'zlashtirgan, lekin o'ziga xos ijod yo'lidan borgan.

"Olaqarg'a va Qurbaqa" masalida maqtovdan taltayib ketib, o'ljasidan ajralib qolgan Olaqarg'aning gumrohligidan kulinadi. Olaqarg'a Qurbaqani tutib olib, daraxt shoxiga qo'narkan, Qurbaqa undan qutilishni ko'zlab, Olaqarg'ani maqtay boshlaydi:

Dedi: - Ey barcha qushning sen go'zali!

Dunyoda ko'rmadim men senday qushni... Senga teng yo'q yerda emas, ko'k ustida, Qani biroz sayrab bergil, men eshitay.

Olaqarg'a bunday maqtovdan erib ketib, sayramoqqa kirisharkan, og'zidan Qurbaqa tushib ketadi va suvga sho'ng'ib undan qutuladi.

Shoir maqtanchoqlik fojeasini boshqa bir asari - "Sholi va Kurmak" masalida ham ochib beradi. Masal Sholi va Kurmak orasidagi munozara asosida qurilganligidan, mumtoz adabiyotimizdagi munozara janriga hamohang. Lekin undan keltirib chiqarilgan boshg'oya - sholikorni qadrlash, shu asosda



sholikorlik mehnatiga muhabbat uyg'otish motivi masalga xos mantiqiy yakun tarzida namoyon bo'ladi.

Elbek bolajonlar uchun talay quvnoq she'rlar yozib, "Ko'zgu", "Yolqinlar", "Bahor", "G'unchalar" singari to'plamlarida e'lon qildi. Bu she'rlarida kichkintoylarni tabiat bilan tanishtirishga, ularda hasharotlarga, o'simliklarga, qushlarga mehr-muhabbat tuyg'ularini uyg'otish evaziga Vatanni sevish sabog'ini berishga intildi. Masalan, "Lolazorda" she'ring lirik qahramoni Lola olgan taassurotini shunday ifodalaydi:

Chiqqan edim dalaga,
Ko'zim tushdi bolaga.
Bordim-da, uzdim-oldim,
Oy, qiziq holga qoldim!

"Laylak"she'ri bolalar va Laylak o'rtasidagi savol-javob negizida qurilgan. Unda bolalarning:

- Nega doim turmaysiz,
Bizlar bilan yurmaysiz?
degan savoliga Laylak shunday javob qiladi:
Nima qilay, do'stlarim,
Qish hech meni qo'ymaydir.
Undan qochib ketmasam,
Qornim hech ham to'ymaydir.

Shoir she'rda Laylakning yil fasllariga xos turmush tarzida haqida ma'lumot berish evaziga jonli hayot manzaralarini yaratgan. "Quyon" she'rida esa holat manzarasi g'oyat jonli chizilgan:

Seskanib ketdi Quyon,
Qaradi u yon-bu yon.
Yuragi duk-duk etdi
Sakradi, chopdi-ketdi.



Shoir qishning poetik qiyofasini aniq va tiniq chizadi:

Oq to'nin kiyib

Qish bobo keldi.

Barchani tiyib, Yugurib-yeldi. Oq kapalakdek, Qorlar uchishdi, Qop-qora yerni O'pib quchishdi.

Ko'rinadiki, qish sururi shu qadar sodda va ravon ifodalangan. O'zbek bolalar she'riyatida qish - Qish bobo qiyofasidagi badiiy obraz shaklida shu she'rdan boshlangan deyish ham mumkin.

Bilim, ko'nikma va malakani rivojlantirishga yo'naltiruvchi savollar:

1. Milliy uyg'onish harakati nima va uning o'zbek bolalar adabiyotini yuzaga keltirishdagi roli.
2. Milliy matbuotda bolalar adabiyoti haqidagi bahslar qachon boshlangan?
3. Abdulla Avloniy nega ilk bolalar shoiri va islohotchi pedagogi sifatida e'tirof etiladi?
4. Hamza - ma'rifatparvarlika dadiyotining taniqli namoyondasi ekanligini asoslang?
5. "Turkiy guliston yoxud axloq"- pedagogik risolasining ta'limiy-axloqiy pandnoma ekanligini oydinlashtiring.

A.Avloniy ijodi bo'yicha tezkor savollar:

A.Avloniy maktab o'quvchilari uchun qanday darsliklar yozgan?

J: "Birinch muallim", "Ikkinchi muallim"(1912), "Tarix", "Turkiy Guliston yoki axloq" (1913) kabi zamonasi uchun muhim va zarur bo'lgan darsliklarni yozgan.

U qanday taxalluslar bilan she'r, hikoya, feleton va kichik hajmdagi dramatik asarlar yozgan?



J: A. Avloniy “Nabil”, “Shuhrat”, “Abdulhaq”, “Indamas”, “Tangriquli”, “Shapa-loq”, “Chol”, “Ab”, “Chig’aboy” taxalluslari bilan asarlar yaratgan.

A. Avloniyning qanday dramatik asarlarini bilasiz?

J: “Pinak”, “Advokatlik osonmi?”, “Ikki muhabbat”, “To’y”, “S’ezd”, “Layli va Majnun”, “Biz va siz”, “Portugaliya inqilobi”

A. Avloniy qaysi tillarni bilgan?

J: A. Avloniy fors, rus, ozarbayjon, arab tillarini bilgan.

A. Avloniyning fasllarga bag’ishlab yozgan she’rlari qaysilar va ularga misollar keltiring.

J: Uning fasllarga bag’ishlangan “Bahor”, “Yoz”, “Kuz”, “Qish” kabi she’rlari bor.

A. Avloniyning hayoti va ijodiy faoliyati haqida kimlar kitob yozganlar?

J: A. Boboxonov, M. Maxsumov “Abdulla Avloniy”, B. Qosimov “Abdulla Avloniy” (adabiy pedagogik portretlar), U. Dolimov “Ma’rifat darg’alari” va boshqalar.

A. Avloniy rus adibi I. A. Krilovning qaysi asarlarini o’zbek tiliga tarjima qilgan?

J: U I. A. Krilovning 21 masalini o’zbek tiliga tarjima qilgan. Jumladan, “G’ayrijins ittifoq”, “Tulki ila serka”, “Maymun ila ko’zoynak”, “It ila yo’lovchi”, “Qarg’a ila zag’izqon” kabilar.

Adib “Turkiy guliston yoxud axloq” asarida o’z fikrlarini va mulohazalarini dalillash uchun mashhur muta-fakkirlardan kimlarning fikrlarini keltiradi?

J: Avloniy o’z mulohazalarini dalillash uchun Aristotel, Platon, Gippokrat, Mirzo Bedil, singari mashhur mutafakkirlar fikrlarini keltiradi.

Avloniy “Muxtasar tarixi adabiyoti va tarixi Islom” asarida qaysi payg’am- barlarning qissalarini bayon etgan?



J: Avloniy “Muxtasar tarix adabiyoti va tarixi Islom” asarida odam alayhissalomdan Muhammad alayhissalomgacha o'tgan payg'ambarlarning qissallari va zuhuri islomni bayon etgan.

A. Avloniy bilan bog'liq joylarni bilasizmi?

J:Avloniy nomida bir qator maktablar bor. O'zbekiston yozuvchilari uyushmasi bolalar adabiyoti bo'yicha uning nomida mukofotta'sis etgan. Toshkentdagi yirik ko'chalardan biri, Respublika o'qituvchilar malakasini oshirish, markaziy institut va mahallalarning biri uni nomida.

Qaysi yozuvchining asari A.Avloniyga bag'ishlangan?

J: Tohir Malikning “Qaldirg'och” (“Savohil”) qissasi.

Mavzuga oid test savollari:

1. O'zbek bolalar adabiyotini yuzaga keltirgan asosiy omillar qaysi javobda to'g'ri ko'rsatilgan?

a) XX asr boshlaridagi “usuli savtiya” maktablari o'quvchilariga mo'ljallangan alifbo va o'qish kitoblari (majmualar) maydonga kelib, ularga tom ma'nodagi o'zbek bolalar adabiyotining tug'ilishi deb qarash mumkin.

b) XX asrdagi maktab darsliklari

c) Turkiston dajadidchilik harakatining ommaviylashuvi

d) adabiy jarayon..

2. XX asr boshlaridagi o'zbek ma'rifatparvarlik harakatining yetakchi namoyandasi, Toshkentdagi “usuli savtiya” maktablarining asoschilaridan biri, o'zbek bolalar adabiyoti taraqqiyotiga samarali hissa qo'shgan shoir qaysi javobda keltirilgan?

a) Hamza Hakimzoda Niyoziy;

b) Abdulla Avloniy;

c) Sadriddin Ayniy;

d) Mahmudxo'ja Behbudiy.



3. “Adabiyot yoxud milliy she’rlar” nomli to’rt qismdan iborat to’plami muallifi va uning darsliklari qaysi javobda ko’rsatilgan.

a) Hamza, “Milliy ashulalar uchun milliy she’rlar”, “Yengil adabiyot”;

b) Ayniy, “Tahzib us- sibyon”, “Qiz bola yoki Xolida”;

c) Abdulla Avloniy, “Birinchi muallim” “Ikkinchi muallim”;

d) Abdurauf Fitrat, “O’qu”.

4. *Firdavsi jinon maktab, nodonlarga jon maktab,
Bilgan kishiga qadrin, bir dorulomon maktab.*

Ushbu misralar bilan boshlanuvchi she’r va to’plam nomi hamda muallifi to’g’ri ko’rsatilgan javobni aniqlang?

a) “Yengil adabiyot”, “Maktab”, Hamza

b) “Turkiy guliston yoxud axloq”, “Maktab”, Abdulla Avloniy;

c) “Maktab gulisnoni” kitobidagi “Maktab”, A.Avloniy.

d) “Tahsib us-sibyon”, “Maktab”;

5. Ma’rifatparvar adib Hamzaning bolalar uchun tashkil qilgan maktabi, darsliklari qaysi qatorda to’g’ri ko’rsatilgan?

a) Yetimlar maktabi, “Tarbiyat ut- atfol”, “Maktab gulistoni”;

b) “Dorulyatim”, “Yengil adabiyot”, “O’qish kitobi”, “Qiroat kitobi”;

c) Mardikorlar maktabi, “Uchinchi muallim”, “Yengil adabiyot”;

d) Ishchilar maktabi, “Milliy ashulalar uchun milliy she’rlar”.

6. “Bolaning yomon bo’lmog’iga sabab bo’lgan onaning jazosi” hikoyasi qaysi ma’rifatchi adib qalamiga mansub?



- a) Hamza;
- b) Ayniy;
- c) Avloniy;
- d) Elbek.

7. “Tahzib us-sibyon” darsligi muallifi va nashr etilgan yili to‘g‘ri ko‘rsatilgan qatorni aniqlang.

- a) Ayniy, 1930 yil;
- b) Hamza, 1910 yil;
- c) Ayniy, 1910 yilda;
- d) Avloniy, 1913 yil.

8. Ayniyning 1920-yillarda nashr etgan asar nomi va uning yo‘nalishi qaysi javobda to‘g‘ri ko‘rsatilgan.

- a) “Alifbo”, husnixatni o‘rganishga;
- b) “Qiz bola yoki Xolida” qissasi, qizlar maktabiga mo‘ljallangan;
- c) “Tarbiyali bola”, axloq-odob o‘rganishga;
- d) “Odobli bola”, odob o‘rganishga.

9. Ustod Ayniyning maktab va tarbiya mavzusi ilgari surilgan asarlari qaysi javobda to‘g‘ri.



- a) “Qullar”, “Doxunda”, “Sudxo‘rning o‘limi”;
- b) “Odina”, “Buxoro inqilobi tarixi”;
- c) “Guli surx”, “Kulliyot”;
- d) “Eski maktab”, “Yetim”, “Esdaliklar”.

10. 1919-1921-yillarda nashr etilgan bolalar matbuoti namunalari qaysi javobda to‘g‘ri ko‘rsatilgan

- a) “Yosh kuch”, “Tong yulduzi”, “Xurshid”, “Shuhrat”
- b) “Bolalar yo‘ldoshi”, “Bolalar dunyosi”, “Sharq chechagi”.
- c) “Samarqand”, “Oyna”, “Bolalar tovushi”, “Taraqqiy”
- d) “Gulxan”, “G‘uncha”, “Donovord”, “Kamalak”



Abdulla Avloniy ijodining janriy arsenal:





Tavsiya etilgan adabiyotlar:

1. Avloniy Abdulla. Turkiy guliston yoxud axloq. - T: O'qituvchi, 1992. -B. 62
2. Avloniy Abdulla. O'son, millat! Nashrga tayyorlovchi va so'z boshi muallifi B. Qosimov, Sh.Rizayev - T.: Sharq, 1993. -B. 144
3. Abdulla Avloniy. Tanlangan asarlar. Ikki jildlik, 1-2-jildlar. T.: Ma'naviyat, 1998.
4. Barakayev R. O'zbek bolalar adabiyoti va Abdulla Avloniy.-T.: Fan, 2004.
5. Niyoziy H.H. Mukammal asarlar to'plami. 4 tomlik, 2-tom.Pedagogik risolalar. -T.:Fan, 1980; yana: Bolaning yomon bo'lmog'iga sabab bo'lgan onaning jazosi. MAT, 2-t. -T.,1981
6. Qosimov B. Milliy uyg'onish. T.: Ma'naviyat, 2002.
7. Qosimov B. va boshq. Milliy uyg'onish davri o'zbek adabiyoti. -T.: Ma'naviyat, 2004.
8. Tohir Malik. Qaldirg'och, qissa. - T.: Yosh gvardiya, 1987. -B.236
9. Qosimov B., Dolimov U. Ma'rifat darg'alari. - T: O'qituvchi, 1990.-B. 26 - 102.
10. Ozbek bolalar adabiyoti antalogiyasi. 1-qism. She'riyat. - T.: O'qituvchi, 2006



5-MAVZU: BOLALAR ADABIYOTI RIVOJLANISH SARI

Reja:

1. Adabiy ertak va uning bolalar adabiyoti taraqqiyotiga ta'siri.
2. H.Olimjon - bolalarning ertaknavis adibi.
3. G'G'ulom - bolalar shoiri va nosiri.
4. Oybekning bolalik olami.

MAVZUGA DOIR TAYANCH TUSHUNCHALAR: poeziya, proza, dramaturgiya, matbuot, adabiy ertak, ertak qissa, avtobiografik qissa, biografik qissa, masal, ertak- doston, tasvir, bayon, talqin, bolalarcha tafakkur

Asosan, she'riyat va hali hikoyachilik doirasida qolib kelayotgan bolalar adabiyoti 30-yillarga kelib, xalq ijodiyotiga keng va chuqur murojaat qilishga kirishib, o'z janriy imkoniyatlarini **adabiy ertakning she'riy ertak, nasriy ertak, ertak qissa, dramatik ertak** singari xilma-xil oraliq shakllari bilan boyitish hamda to'ldirishga muvaffaq bo'la boshladi. Aslida XIX asrning so'nggi choragi va XX asrning 10-yillarida fors-tojik shoiri Ubayd Zokoniyning "Mushuk ila sichqon" qissasi(Xislat tarjimas), rus adabiyoti namoyondalari I.A.Krilov, A.S.Pushkin, L.N.Tolstoy, K.D.Ushinskiy masallari, ertaklari va hikoyalarining o'zbek tiliga o'girila boshlanganligi, shuningdek, Said Rasul Aziziy va Abdulla Avloniylarning voqeaband she'rlari, masallari hamda Hamzaning xalq rivoyati asosida yozilgan "Bolaning



yomon bo'lmog'iga sabab bo'lgan onaning jazosi" she'riy ertagi, qolaversa, Abdulla Qodiriyning 20-yillarda xalq ertagi ruhida yozilgan "Jinlar bazmi" va Abdurauf Fitratning "Qiyomat" nasriy adabiy ertaklaridan o'z sarchashmasini olgan folklor sujetlari negizida bolalarbop asarlar yozish va shu asosda realistik o'zbek bolalar adabiyotini shakllantirish va rivojlantirish harakati 30-yillar arafasi va davomida chinakkam yangi bosqichga ko'tarildi. Buning bir qancha sabablari va omillari bor edi.

Birinchidan, xuddi shu yillarda o'zbek folklorshunosligi ancha jonlangan edi, xalq qo'shiqlari va dostonlari qatorida ertaklarni yozib olish va nashr etishda samarali natijalarga erishila boshlandi. Bu ishda Elbek, G'ulom Zafariy va Shukur Sa'dulla singari bolalar adiblari ancha faollik ko'rsatdilar. Ayniqsa, Elbek bolalar folklorini to'plash yo'lida qizg'in izlandi, 1937- yilda o'zi to'plagan asarlar asosida tartib bergan "Bolalar qo'shig'il" to'plamini nashr ettirdi.

Ikkinchidan, 30-yillarning boshlarida "Bolalarga ertak kerakmi? Sehrli- fantastik ertaklar ular tarbiyasiga zararli emasmi?"- degan mavzularda boshlangan qizg'in bahs xalq ertaklariga munosabatni yanada chuqurlashtirishga xizmat qildi. Natijada, xalq ertaklari sujetlarini turli shakllarda ijodiy interpretatsiya qilish va shu asosda bolalarni xalq fantaziyasi olamiga olib kirish bir muncha jonlandi. Bu hol bolalar epik poeziyasining yuksalishi va dramaturgiyasining oyoqqa turishiga ijobiy ta'sir ko'rsatdi. Sirasini aytganda, bolalarga atalgan badiiy adabiyot yaratish an'anasining dastlab, adabiy ertak shaklida Daniel Defo, Jonatan Svift, Jan de Lafonten, Sharl Perro, Erix Rapse, aka-uka Yakob va Vilgelm Grimmilar, Vilgelm Gauf, Hans Kristian Andersen, Karlo Kollodi, V. Jukovskiy, P.Yershov va boshqalar ijodiyotida keng miqyosda namoyon bo'lganligi va o'zbek bolalar adabiyoti vakillarining ular tajribalarini ijodiy o'zlashtira boshlashlari jarayon qiyofasini belgilay berdi. Natijada, folklor va yozma bolalar adabiyoti munosabatlari ikki tomonlama chuqurlashishga kirishdi.



Folklor va yozma adabiyot orasidagi bilvosita aloqa esa bolalar adabiyotida folklorizmlarning xilma-xil ko'inishlarini yuzaga keltirdi va bolalar adabiyotining xalqchillashuvini, g'oyaviy-badiiy barkamollashuvini, qiziqarliligi va tabiiy soddaligini ta'minladi. Shu tariqa o'zbek bolalar adabiyoti ham folklorga tayangan holda shakllana va rivojlana bordi.

Shuni ta'kidlash joizki, o'zbek bolalar adiblari xalq ijodiyoti namunalari to'plash, nashr etish va bolalarga moslashtirish, folklordagi janriy rang-baranglik va ifodaviy vositalardan ijodiy foydalanishda, asosan, tubandagi ikki yo'nalishda amal qildilar:

Birinchi yo'nalish - folklor namunalari (ertaklar, masallar, rivoyatlar, latifalar va hokazolarni) bolalar yoshi, saviyasi va ruhiga moslashtirib qayta ishlash yoki tabdil (interpretatsiya) qilish. Bu ijodiy jarayonning bosh sharti -asarning xalqchil ruhiga putur yetkazmagan holda g'oyaviy-badiiy barkamolligini ta'minlash va shu asosda axloqiy-tarbiyaviy qimmatini oshirish hisoblanadi. Jumladan, xalq ertaklarini bolalarga moslashtirib qayta aytish an'anasi jahon xalqlari, xususan, rus bolalar adabiyotida anchagina tajribaga ega. Shukur Sa'dulla ana shu ilg'or tajribani o'rganish asosida nafaqat o'zbek, balki, boshqa xalqlar ertaklarini ham bolalarga moslashtirib tabdil qilishda ma'lum natijalarga erishdi. Bu jihatdan, ayniqsa, uning 30-50-yillardagi izlanishlari samarali bo'ldi. Bu davrda u ellikdan ortiq xalq ertagini bolalarga moslashtirib, qayta ishladi va kichkintoylarga tortiq etdi. Bular "Ikki sandiq" (1945,1948), "Yoriltosh", "Uch tulki" (1947), "Qarg'aboy" (1948), "Tulki bilan turna" (1951), "Maqtanchoq quyon" (1953), "Ayyor tulki" (1955), "Ohanrabo" (1959) singari rasmiy kitobchalar tarzida nashrdan chiqdi. Sh.Sa'dulla xalq ertaklarining kompozitsion soddaligiga, xalqchilligiga, g'oyaviy yo'nalishiga putur yetkazmay, zamon talablari doirasida axloqiy-tarbiyaviy qimmatga molik bo'lishiga diqqat qildi. Natijada, ertaklar turli yoshdagi kichkintoylar uchun "hayot darsligi" vazifasini o'tay boshladi. Bu jihatdan adibning maktabgacha tarbiya yoshidagi bolalar uchun "Och



bo'ri", "Chol bilan bo'ri", "Sholg'om", "Bo'g'irsoq", "Bo'ri va echki bolalari", "Qarg'a va qo'zi" kabi ertaklarni qayta ishlashdagi xizmatlari e'tiborga arzigulikdir.

Ikkinchi yo'nalish - folklor sujetlari asosida she'riy, nasriy va dramatik asarlar ijod etish, yoki stilizatsiya xarakteridagi folklorizmlar. Bu yo'nalish barcha xalqlar bolalar adabiyotlari ravnaqida yetakchi omillardan hisoblanadi.

Folklor janrlarining kompozitsion qulayliklari - omma-viyiligi bolalarga atab yoziladigan asarlar uchun g'oyat muvofiqdir. Bolalar adiblari bu haqiqatni chuqurroq anglay borganlari sari ko'proq ijodiy kamolotga erishayotirlar. Ular xalq sujetlariga monand sujetlar o'ylab topa boshladilar. Bunday to'qima adabiy sujetlar ko'pincha hayot voqeligini doim kuzatish va undan oziqlanishning, shuningdek, biror maqol va matalning mazmunini voqeaband tafsilot vositasida kichkintoylarga yetkazish niyatining natijasi bo'lib tug'iladi. Bu esa ularning xalq sujetlari negizida yozilgan asarlardan farq qiluvchi xoslik belgisi sanaladi. Shu sababli bunday asarlarni janr e'tiborlariga ko'ra adabiy ertaklar, doston-ertaklar, adabiy masallar, adabiy latifalar deb atash to'g'riroqdir. Bu jihatdan, ayniqsa, adabiy ertaklarning bolalar poeziyasini taraqqiy ettirishdagi roli katta bo'ldi. Kichkintoylarni voqeligimiz ruhiga olib kirishda, ularga hayotdan saboq olishni va odam tanishni o'rgatishda S.Jo'raning "Qaldirg'och", Z.Diyorning "Yuksak tog', keng o'tloq va mard o'rtoq haqida qissa", Q.Muhammadiyning "Qo'ng'izoy va sichqonboy", "Sandal va pechka", "Chivin urishqoq va shamol polvon haqida", "Dono bobo va uning 101 nevara-chevaralari", Sh. Sa'dullaning "Bir tuxum tarixi", "Bir yallachi va bir o'yinchi", "Yalqov ayiq", "Ravoch haqida ballada", "Qurumsoq", Po'lat Mo'minning "Kecha, bugun va erta haqida ertak", "Tish cho'tka, paroshok va atirsovun ertagi", "Gaz polvon ertagi", Safar Barnoyevning "Oltin shahar haqida afsona", "Vijdon", "Qo'g'irchoqlar podshosi", Tunsunboy Adashboyevning "Nur daryo", "Uch bo'taloq va sirli qovoq", Miraziz A'zamning "Chumolioy bilan arioyning



sayohati”, “Erk qushi”, Anvar Obidjonning “Odil Burgutshoh va Zamburug’ laqabli josus haqida ertak”, Tohir Qahhorning “Ko’zga ko’rinmas maxluq”, Hamza Imomberdiyevning “Ajdaho komida”, Muhammadjon Rahmonning “Momoqaymoq”, Nurali Qobulning “Odam, oyqortog’ va daydi shamol haqida ertak” kabi ko’pgina adabiy-she’riy ertaklarining axloqiy-estetik qimmati kattadir. Bu asarlar o’zbek bolalar epik poeziyasining xalqchil zamonaviy namunalari hisoblanadi.

Shuni ta’kidlash joizki, XX asrning 60-80-yillarida bolalar adabiyoti vakillarining folklorga ijodiy munosabati yanada chuqurlasha bordi. Bu davrda ular folklorning qator janrlariga xos shakl va ifoda usullarini ijodiy o’zlashtirishga alohida rag’bat ko’rsata boshladilar, natijada, bolalar epik poeziyasida she’riy adabiy ertakning qator ichki ko’rinishlari bilan birga adabiy topishmoq, adabiy tez aytilish, adabiy latifa, prozada esa adabiy nasriy ertak, ertak-qissa singari oraliq shakllar yuzaga keldi. Nasriy adabiy ertak janrida T.G’oyibov, P.Muhammadyorova, A.Abdurazzoq, M.Murodov, A.Irisov, Y.Shukurov, Y.Sa’dullayeva, S.G’afurov, R.Farhodiy va R.Tolibovlar izlangan bo’lsalar, A.Obidjon “Dahshatli Meshpolvon” (1989) ertak-qissasini yaratib, janrning yangi voqelik asosidagi jilosini ta’minladi. Bugina emas, u “Pahlavonning o’g’irlanishi”, “Qo’ng’iroqli aldoqchi”, “Qorinbotir” singari ertak-pyesalari bilan folklor sujetlari tipidagi zamonaviy bolalar dramaturgiyasini boyitishga hissa qo’shdi. Bu jihatdan u Po’lat Mo’minning “Qovoqvoy bilan Chanoqboy”, “Suqatoy va Konfetboy”, “Ona bolam deydi, bola onam deydi”, G’ani Jahongirovning “Ajoyib urug’”, O.Tolibov va I.Ahmedovlarning “G’ayrat va g’aflat”, Ergash Raimovning “Qorboboning yangi yil sarguzashtlari” va Rahim Farhodiyning “O’tkir shoxli buqacha” singari ertak-pyesalarida ko’ringan salbiy xarakterdagi stilizatsiyalash usulini yanada chuqurlashtirdi va bu an’ananing hayotiyiligini ta’minladi. Bu ertak-pyesalarda nafaqat sujet qurilishida, balki obrazlar xatti-harakatlarida, nutqida, xilma-xil ifodaviy vositalarda ertaklarga xos fantastik unsurlar, tasviriy vositalar yetakchi taomilga aylangan.



Hamid Olimjon bolalarning ertaknavis shoiri (1909-1944)

Atoqli o'zbek shoiri **Hamid Olimjon** "bolalik kunlari" danoq xalq ijodiyotiga mehr qo'yganligini faxrlanib kuylaydi. Bora-bora folklor "fikrini tortib", butun umrga unga mahorat sabog'i, tadqiqotlar va betakror asarlar yaratish manbaiga aylanib qoldi. Jumladan, uning xalq shoiri Fozil Yo'ldosh o'g'li, Abdulla



shoir, Islom Nazar o'g'li bilan doimiy ijodiy muloqotlari, qator xalq dostonlari, ayniqsa, qahramonlik eposi "Alpomish"ni nashrga tayyorlashi va ular ustidagi kuzatishlari folklarga ijodiy munosabatini yanada chuqurlashtirgan ilhom manbai vazifasini o'tadi.

Qolaversa, u bolalarga mo'ljallab yozgan "Lola", "Vatan", "Ona va o'g'il", "Hulkarning she'ri" va "Samolyot" singari qator she'rlarida xalq ijodiga xos obraz, motiv, ohang va janr stilizatsiyasi unsurlardan mahorat bilan foydalandi.

H.Olimjon umr bo'yi xalq ertaklarini tinglashdan tolmasdi. Bu haqdagi iqrorlarini "Ona" she'rida "Faqat sevadi-yu ertak aytadi" deya ifodalasa, "O'zbekiston" she'rida "Ertaklarga quloq tutardim" tarzida e'tirof etgan, nihoyat "Oygul bilan Baxtiyor" ertak-dostoni debochasida tinglagan ertaklari va ulardan olgan taassurotlarini yaxlitroq umumlashtiradi: "Uyqusiz tunlarim"da "ko'p ertak eshitgandim" deya "o'sha damlar"ning sururini qayta tuyadi. Eshitganlari esa "O'zi uchar gilamlar, "Tohir-Zuhra", "Yoriltosh", Oyni uyaltirgan qosh, O't bog'lagan qanotlar, Beqanot uchgan otlar, Baxtiyor bilan Oygul, So'ylaguvchi devorlar, Bola bo'p qolgan chollar". Ana shu ertaklar uning fikrini tortgan, "havasini ortirgan", pirovard-oqibatda, uning san'atkor bo'lib shakllanishida ta'sir ko'rsatgan va nihoyat uning o'zida ham "Totonggacha so'ylasam ertak" ("Savol") degan ijodiy niyatni uyg'otgan edi. Bu niyat 30-yillarning ikkinchi yarmiga kelib shoirga tinchlik bermay qo'ydi, natijada uning o'zbek bolalar dostonchiligi taraqqiyotiga jiddiy ta'sir ko'rsatgan va o'zbek bolalar epik poeziyasida yangi bosqichni boshlab bergan "Oygul bilan Baxtiyor" (1937) hamda "Simurg' yoki Parizod va Bunyod" (1939) ertak-dostonlari birin-ketin dunyoga keldi. Bu asarlar o'zbek bolalar epik poeziyasida yangi oraliq janr - ertak-doston shaklining qaror topishidan tashqari, folklardan ijodiy o'rganish va o'zlashtirishning ham yorqin namunalari bo'ldi. Natijada,



o'zbek bolalar epik poeziyasida shakliy izlanishlar tobora chuqurlasha bordi va bolalar dostonchiligi bag'rida maqol-ertak, masal-ertak, naql-ertak, ertak- doston, rivoyat-ertak va she'riy latifa singari xilma-xil oraliq janrlarda asarlar yaratish an'anaviy tus ola bordi.

Aslini olganda, Hamid Olimjon bu ertak-dostonlarini bolalar uchun yozmagan, albatta. A.S.Pushkin ham o'z ertaklarini yozganida shunday yo'l tutgani ma'lum. H.Olimjon Pushkinning ertaklari ustidagi ijodiy izlanishlariga xos tajribalariga suyanib, adabiyotning mehnat ahli turmushiga kengroq va chuqurroq singishini, butun ommaning kitobxon bo'lishini nazarda tutib, shu ommabop janrga qo'l urgan edi. Binobarin, ertak-dostonlar yozilgan tarixiy sharoitga nazar solinsa, shoir izlanishlari-ning ijtimoiy-estetik mohiyati yanada ravshanlashadi. Shoir bolaligida tinglagan ertaklar silsilasida qolib ketmadi, o'z asari sujeti ustida ishlashda "Malikai Husnobod", "Susambil" ertaklari sujetlari, shuningdek, "Erni-er qiladigan xotin", "Qahramon", "Yaltillama sopol tovoq" ertaklari motivlari, hatto "Chambil qamali" va "Jizzax qo'zg'oloni" (Fozil Yo'ldosh o'g'li asari) kabi xalq dostonlaridan ham ijodiy ta'sirlandi.

Chindan ham ertak-dostonda muhabbat va baxt tarixi emas, balki unga erishish uchun kurash tarixi ertaknamo yo'sinda ifodalangan. Bu kurashga jamiyatda xotin- qizlar mavqeini tiklash motivi ham hamohang. Shu sababli asar voqealari markazida Oygul obrazi turadi, u voqealarni harakatlantiruvchi kuchni boshqaradi. Bu g'oya- ertak-doston asosi bo'lgan "Malikai Husnobod" ertagining bosh g'oyasi. Ko'rinadiki, xalqning o'zida bu g'oya feodal munosabatlar jarayonida qadimdan yuzaga kelgan. Ijtimoiy tengsizlik hamma zamonlarda ayollarni o'z huquqlarini tanishga undagan va bu xalq ijodida xilma-xil janrlardagi asarlarda, jumladan, "Malikai Husnobod" ertagida ham aksini topgan. Oygul xalq ertaklarida hamma zamonlarda o'z erki, o'z huquqi, o'z muhabbati uchun kurashib kelgan



ayollarning umumlashma obrazi darajasiga ko'tarilgan. U podsholar taklifini rad etar ekan, shunchaki o'z ijtimoiy mavqeidangina kelib chiqmaydi, balki podsholarning zolimligi, xalqni istibdodga giriftor etganligi, ma'naviy subutsizligini ko'zga tutib, shunday yo'lni tanlaydi. Shu xususiyatiga ko'ra u asardagi talqinda hatto

Baxtiyordan ham faolroqdir. Rost, u podachi Baxtiyorni ijtimoiy kelib chiqishi jihatidan o'ziga tengligi uchungina emas, balki ham jismoniy, ham ma'naviy barkamolligi uchun ixtiyor etdi: Chunki u:

Go'zal edi va chinor Qomatiga edi zor. Ko'kraklari butun bir Oftobni yashirardi. Tanlariga bir umr O't lovullab turardi. Qilichday o'tkir edi, Rustam kabi zo'r edi..

Baxtiyor xuddi shu fazilati bilan Oygul qalbini zabt etgandi va shu fazilatlari tufayli uning dilidagi orzularni ro'yobga chiqarishga ko'makdosh bo'la olardi. Chindan ham asarda shu nuqtadan e'tiboran Baxtiyor Oygul istaklarining ijrochisiday harakat qiladi. Ular hamkorlikda Susambilda "Yangi bir dunyo qura" boshladilar. Nihoyat: Oygul himoyasida,

Baxtiyor soyasida Susambilda erkin, shod, Yashar edi xaloyiq. Uni butun odamzod Xayol qilishga loyiq.

Insoniyat tarixi hamisha erk va adolat uchun kurashdan iborat bo'lib kelgan, xalq ijodiyotida ham, mumtoz adabiyotda ham bu kurash turli shakllarda, jumladan, ozod va farovon yurt shaklida, Forobiyda esa "ideal shahar" tarzida ifodalanib kelingani nazarda tutilsa, H. Olimjon kishilikning shu asriy g'oyasini o'sha an'anaviy mantiq doirasida talqin qilganligi ravshanlashadi.

"Oygul bilan Baxtiyor" - jabrdiyda xalqning o'z haq-huquqi, erki yo'lidagi kurashini ifodalasa, "Simurg' yoki Parizod va Bunyod"- mehnat ahlining halolligini, so'zi va ishida sobitligini, mardligini, o'z insoniy tuyg'ularining chinakam e'zozkori ekanligini tarannum etadi. Sirasini aytganda, bu



ertak-doston uchun manba vazifasini o'tagan "Simurg' afsonasi" O'rta Osiyo xalqlari, ayniqsa, o'zbek va tojik folklorida qadim zamonlardan beri mashhurdir. U "Mahiston afsonasi" nomi bilan ham yuritilgan. Og'izdan-og'izga ko'chib yurgan bu afsonani ulug' Firdavsiy birinchilardan bo'lib, yozma adabiyot mahsuliga aylantirgan. Simurg' bilan bog'liq epizod "Shohnoma" tufayli xalq ijodiyotida keng tarqalgan "Rustam" ertagida qayta ishlanib, jozibasi yanada oshgandir. Simurg' bu ertakda dunyoda bo'ladigan voqealarni o'z vaqtida bilib turadi: Zolning tug'ilish muddati, uning olamdagi voqealarni o'n yil ilgari biladigan hukamo bo'lishi va ming yil yashashini shu Simurg' bashorat qiladi. Xalqning tabiat stixiyalari sirlarini oldindan bilish istagi Simurg' obrazida ana shunday ifodalangan edi.

Simurg' - afsonaviy bahaybat qush. Uning yordamida ertak qahramoni eng mushkul, hatto uddalash amrimahol bo'lgan ishlarni bajaradi, olis masofalarni ko'z ochib yumguncha bosib o'tadi. Yer ostidagi qahramon uning ko'magida yer yuziga chiqadi. Lekin unutmazlik lozimki, Simurg' har qanday qahramonga darrov ko'maklashavermaydi. U yaxshilik ko'rgach, javob qaytaradi. Bunda an'anaviy motiv - uning bolalariga tajovuz qilmoqchi bo'lgan ajdar yoki ilonni o'ldirishi shart. Shu yaxshiligi evaziga Simurg' qahramonning fidoyisiga aylanadi.

Simurg' - antropomorfizm hodisasi mahsuli. Odam qiyofasiga kira oladigan, odamday harakat qila oladigan va so'zlashadigan xususiyatlari qahramonlarga g'oyat qo'l keladi. U evrilish xususiyatiga ega: istasa - kesakka aylana oladi, istasa - qanoti o'tkir qilichga aylanib, tog'ni kesadi. Xalq orzularining ramzi bo'lgan bu qush Murg'ufarmon, Ko'ktubulg'on nomlari bilan ham yuritiladi. Mahmud Qoshg'ariy turkiy xalqlar yozma adabiyotida bu xususda ilk ma'lumot berganlardan bo'lsa kerak: "Ko'ktubulg'on - bir qushning nomi. Aytishlaricha, bu qushning ikki qanoti po'lat bo'ladi va u qanoti bilan toqqa urilib, bir tomondan boshqa tomonga o'tadi".



Shundan boshlab, bu afsonaviy qush turlicha g'oyalarni talqin etishda vositachilik qildi. Buni Ibn Sinoning "Tayr risolasi", Fariddidin Attorning "Mantiq- ut-tayr", Alisher Navoiyning "Lison-ut-tayr" asarlaridagi talqinlar dalillay oladi.

H.Olimjon "Oynai jahonnamo", "Botir oshiq" singari ertaklar sujetlaridan ham ijodiy foydalanib, tamoman yangi mazmundagi ertak-doston yaratdi. Bunda unga Pushkinning xalq ertaklaridagi ijtimoiy motivni kuchaytirish an'anasi yordam berdi. A.S.Pushkin "Oltin xo'roz"da shohning g'ofilligidan, "Shoh Saltan"da esa, uning ma'naviy buzuqligidan kulib, ertaklaridagi ijtimoiy motivning o'tkirligiga erishgan va shu usulda zulmkorlar qiyofasini fosh etgan edi. H.Olimjon ham "Oygul bilan Baxtiyor"da shohni zulm saltanati tirgagi sifatida ko'rsatsa, "Simurg' yoki Parizod va Bunyod"da subutsizligini namoyish etadi. Shoir bu ertak-dostonida yovuzlik va subutsizlik hukmronligidagi muhitda voyaga yetgan Parizodni asarning markaziy obrazlaridan biri sifatida bo'rttiradi. Shu zaylda asl afsonada go'zallik va sevgi timsoli bo'lgan Mahiston o'rnida H. Olimjon g'oyaviy niyatiga mos toshbag'ir Parizod obrazi maydonga kelgan.

Parizod - xudbin va dumog'dor xon qizi. Xon saroyidagi barcha pastkashliklar muhitida shakllangan. Shu sababli "qalbi marmarday sovuq" bu qiz "tishidan zahar tomgan, ishidan o'lim yoqqan, shoxi osmonda, tirnog'i qonda" bo'lgan dev bilan xufya oshno edi. Shu pastkashligi, boylikka o'chligi va kambag'alni nazariga ilmaganligi tufayli Bunyodni ham seva olmasdi. U va'dada ham noshud. Bunyodni o'limga ro'para qilib, aslida unga tegishga rozi bo'lmay, shunchaki undan qutilmoq vajidan va'da bergan edi. U shu qadar yuzsizki, devni yengib kelgan g'olib Bunyodga shu niyatdagina va'da berganligini tan oladi:

Cho'ponni sevolmadim, Hech ko'ngil qo'yolmadim. G'urbatga qorganimning, Devga yuborganimning Sababi shunda edi, Ko'nglim tugunda edi.



O'lib ketar deb edim, Chirib ketar deb edim.

Qancha botir bo'lsang ham,

Zo'r bahodir bo'lsang ham, To'shaging xas deb bildim,
Aslingni past deb bildim, Sevolmadim seni men, Chunki men
xon qiziman .

Xon qizi surbetlik bilan otasining xonligidan kerilarkan, o'zini aslzoda hisoblab, oddiy mehnatkashlar "aslini past" deb qaraydi. H.Olimjon Parizod timsolida feodal ierarxiyasida hukmron doiralardagi dumog'dor va subutsiz xotin- qizlarning salbiy umumlashma namunasini yaratdi.

Bunyod - Parizodning antipodi, aslzoda emas, oddiy cho'pon. Ishida ham, so'zida subuti butun. Shartning og'ir-yengilini bilmaydi, ezgulik yo'lida o'limdan qaytmaydigan bahodir. U - xalq pahlavoni. Nomining "gapiruvchiligi" ham shu niyatning ifodasi. G'oyat kamtar va kamsuqum inson. Oriyat va nomusni baland tutadi. Hatto so'zida tuturiqsiz Parizod hayosizlarcha uni tahqirlab, otasining vaziriga tegib olganini aytganida Bunyod "o'tda tutaqib"

Ne aytarin bilmasdan, Tili so'zga kelmasdan.. Parizodni, xonni ham, Ikki nomard jonni ham Qilichdan o'tkazmoqqa, O'limga yutqizmoqqa shaylanganida ham qasos o'tida yonib, saroydan mardona chiqib ketadi. Parizod shart qo'ygani uchun yovuz devni o'ldirganligini ta'na qilmaydi, aksincha bu, garchi shoir biror ishorada aks ettirmasa-da, eldoshlarini yovuzlikdan qutqazgani uchun shunday yo'l tutadi va g'azablansa-da, hech narsa demay chiqib ketadi. Ammo:

Bevafo xon qizini,

Nomard xonning o'zini, Unutmadi hech qachon .

Xuddi shu tuyg'u uni kelajakdagi kurashlarga chog'lashi muqarrar. Ertak- doston shu xildagi umidbaxsh ruh bilan yakun topadi.

Bu o'rinda shuni ta'kidlash zarurki, butun ertak-doston davomida Simurg' Bunyodga birgina epizodda - devni yengishi-



ni ta'minlashidagina ko'maklashsa-da, aslida bu voqealar drammatizmni avj nuqtaga chiqarib, tugunni yechishga ochqich vazifasini bajargan hal qiluvchi epizoddir. H.Olimjon shunga urg'u berib, asariga "Simurg' yoki Parizod va Bunyod" deya nom qo'ygan. Binobarin, asar nomini qisqartirib yoki shoirning ayrim majmualarida bo'lganidek, "Semurg'" tarzida chalkashtirib yozishi noto'g'ridir. Negaki, afsonaviy qush nomi - Simurg' bo'lib, o'ttiz qushni anglatadi, forsha Semurg' esa - uch qush ma'nosidadir. Bunda miqdordagi farq Simurg'ning bo'rttirma timsolini dalillashini unutmash lozim.

Xullas, H.Olimjonning "Oygul bilan Baxtiyor", "Simurg' yoxud Parizod va Bunyod" ertak-dostonlarida xalq ertaklarining vorisi sifatida ish ko'rdi, xalq ertaklarining ijtimoiy-axloqiy mundarijasini xalqona ohang va poetik vaznda realistik ifoda etdi. Shu sababli bu asarlar hamon sevilib o'qilmoqda, ular asosida sahna asarlari, kinofilmlar yaratilib kelinmoqda. Jumladan, "O'zbekfilm" tomonidan 1972-yilda yaratilgan "Simurg'" ertak-filmi o'zbek bolalar badiiy filmlarining yorqin namunasiga aylanib qoldi.

Xulosa qilib aytish mumkinki, xalq ijodiyotiga xos ifoda usuli, sujet qurilishi, kompozitsion aniqlik, obrazlilik, tilning soddaligi va boshqa unsurlardan ijodiy foydalanish o'zbek bolalar adabiyoti realizmini, xalqchilligini, janriy xilma-xilligi, g'oyaviy-badiiy ko'lamdorligi va saviyasini ta'minlamoqda. Akademik S.Mamajonov yozganidek: "Xalq ijodi yozuvchilar uchun xalq tarixini, kurashini, uning maqsad va ideallarini, ruhi, ongi, psixologiyasi va xarakterini, uning boy tilini o'rganish manbai bo'lmoqda; xalq bilan, hayot va zamon bilan uzviy bog'lanishda ma'lum ma'noda g'oyaviy-estetik ko'priklardan biri bo'lib xizmat etmoqda".

Shunday xizmati tufayli o'zbek bolalar adabiyoti tobora teranlashmoqda va hayajonbaxshligi kuchaymoqda. Binobarin, bu jarayonni chuqur va har taraflama tadqiq qilish - o'zbek bolalar adabiyoti kamolotining ufqlarini ochishga yo'l ko'rsatishi aniq.



G'afur G'ulom

- bolalar shoiri va nosiri (1903-1966).

Akademik shoir G'afur G'ulom kattalarning ardoqli adibi bolishi bilan birga, bolalarning ham sevimli ijodkoridir. G'afur G'ulomning bolalar adabiyotiga aloqasi haqida so'z yuritilar ekan, dastavval, uning bolalar uchun maxsus yaratgan asarlarini tilga olish joiz. Zero, "Mukofot" (1940), "She'rlar" (1946), "Tongotar qo'shig'i" (1949), "Bari seniki" (1953), "Bir g'uncha ochilguncha" (1955), "Siz mening yoshligimsiz" (1958) singari she'riy to'plamlarda shoir yosh avlodni, jumladan, o'z farzandlarini ham eng yaxshi umuminsoniy qadriyatlar ruhida tarbiyalashga ahd qilgan talabchan va mehribon murabbiy, farzandlari kamolidan faxrlanayotgan va Vatan kelajagini ishonchli qo'llarga topshirayotganidan qalbi quvonchlarga to'liq mehribon ota sifatida namoyon bo'ladi.

U XX asrning 20-yillaridan 60-yillarigacha bolalar uchun she'rlar, hikoya va o'kinchlari, quvonchlari ifoda etilgan edi. Ayni damda nasriy asarlaridan "Netay" 1930-yilda, "Tirilgan murda" 1934-yilda, "Yodgor" 1936-yilda, "Shum bola" 1963-yilda chop qilindi. G'afur G'ulomning she'riy to'plamlarini nashr ettirish shoir vafotidan so'ng to'xtab qolmadi. 1969-yilda "Bayram maktubi", 1970-yilda "O'ylashni o'rganamiz", 1983-yilda "Farzandlarimga" she'riy to'plamlari bosildi. Zero,



Gʻafur Gʻulomning bolalarga atalgan asarlarisiz oʻzbek bolalar adabiyotini tasavvur qilib boʻlmaydi. Gʻafur Gʻulom mutafakkir va faylasuf shoir sifatida bolalar yurt kelajagi ekanini, ularning kamoli xalq kamoli ekanini his qiladi, shu tuygʻularni sheʼrlarida goh bola boʻlib, ularning dunyosini yoritisa, goh kattalarning bolalarga munosabatlarini aks ettirdi.

Gʻafur Gʻulom bolalarga kattalarning munosabatini “Charogʻlarim- qarogʻlarim”, “Aziz avlodlarimizga”, “Mening bir satrim”, “Oʻqing qizlar”, “Chiroy”, “Siz mening yoshligimsiz”, “Sen salomat boʻlsang bas” kabi sheʼrlarida ifodalar ekan, oʻzining bolaparvar shoir ekanini namoyish qila olgan. U xalq shoiri sifatida yurtimizning har bir bolasini oʻylagan, ularning har birining kelajagi uchun qaygʻurgan desak mubolagʻa boʻlmaydi. Gʻafur Gʻulom: “Men,- deya yozgan bir xatida, - avvalo, bolalar deganimda oʻz bolalarimni oʻylaganim yoʻq. Butun respublikamizni oʻz oilam deb, respublika bolalarini oʻz bolalarim deb bilaman. Demak, ular uchun yozganim yozgan”.

Maʼlumki, har bir asar oʻz davrining mahsuli va unda qay darajadadir shu davr xususiyatlari aks etadi. Binobarin, Gʻafur Gʻulomning yuqorida tilga olingan toʻplamlaridagi asarlar ham bundan mustasno emas. Ushbu toʻplamlardagi bir qator sheʼrlar garchi shoʻro mafkurasi taʼsiridan xoli boʻlmasada, toʻlaligicha olganda, shoir ijodiyotida sof lirika ustuvorlik qiladi. Uning bolalar adabiyotimiz bolalarga moʻljallangan alohida adabiyot sifatida endigina atak-chechak qilayotgan oʻtgan asrning 30-yillarida yaratilgan sheʼrlarida tarbiyaviylik - pand-nasihad, axloq-odob ruhi hamda fan-texnika yutuqlari targʻibi xarakteridagi maʼrifiylik yetakchilik qilsa, 50-60-yillarda yaratilgan asarlarida axloqiy-maʼrifiylik bilan bir qatorda, bola tabiatining turli qirralarini kashf qilish va oʻziga xos olamini yaratishga intilish koʻzga tashlanadi.

“Ikki yoshlik” (1935), “Tursunali nega varrakdan aynidi?” (1937), “Yasha deyman, oʻgʻlim” (1939) sheʼrlarida fan-



texnika yutuqlarini eski turmush tarzi bilan qiyoslash orqali yosh avlodni ilm-fan nuridan bahramand bo'lishga chorlash, chaqiriq ruhi ustuvor. Bu o'rinda shuni ham qayd etish kerakki, 30-yillar o'zbek adabiyoti, xususan, she'riyatida "agitka"lar ruhidagi targ'ibiy-tashviqiylik ko'zga yaqqol tashlanib turadigan xususiyatlardandir. Biroq hatto shu targ'ibiy- tashviqiylikda ham haqiqiy shoir asaridagi badiiyat ajralib turadi. Binobarin, "Ikki yoshlik" she'ridagi ilm-fan targ'ibi shunchaki eski turmush tanqidi yoxud yangi hayot maqtovi emas, balki yangi maktablarda turli sohalar bo'yicha fan asoslarini egallayotgan farzandlarning kelajakda yangi va yaxshi hayotni qurishi kerak bo'lgan, har tomonlama kamol topgan insonlar bo'lib yetishuviga ishonch ruhi bilan to'liqdir. "Yasha deyman, o'g'lim" she'ri shu jihatdan oldingi ikki she'rning mantiqiy davomiday yangraydi. Uchuvchi bo'lib, ko'klarga uchishga, yulduzlarni quchishga, sovuq Arktikalarni o'zlashtirishga otlangan, uchqur xayoli ko'klarda parvoz qilayotgan o'g'il orzu-niyatlari va farzandi kamolidan faxr tuyg'usi she'rni yolg'inlantirib turadi:

- Dada, men osmonga uchar bo'lsam, Cheki yo'q ko'kni ham quchar bo'lsam, Yulduzdan-yulduzga ko'char bo'lsam, Sen tubida qolib ne deysan?

- Yasha, deyman, o'g'lim!

G'afur G'ulom - donishmand shoir. U bolalarga, yosh avlodga katta ishonch bilan qaragan.

Yetimlik mavzusi G'afur G'ulom ijodida ko'p uchraydi. Negaki, shoirning o'zi yetimlik jabrini tortgan inson. U to'qqiz yoshda otasiz qoladi, o'pka shamollashidan vafot qilgan otasi to'rt norasidaga G'afurni bosh qilib ketdi. Kenja singlisi endi olti oylik edi. U tirikchilikning qaynoqli, alamnok ko'chalariga kirib chiqar ekan, yashashni o'rgandi. Oqibat hayot kurashlardan iboratligini angladi. Yetimlik nochorligini, amlarini "Netay" qissasida Netay fojeasi taqdiri yordamida aks ettirgan bo'lsa, "Shum bola"da Qoravoy o'g'il bola-ku, deb hisobladi, uni yaxshi



hayotdan umidvor qilib yaratdi. Qoravoy hayot unga behisob azoblar tayyorlasa ham, qaddini rostlab, yo'lida davom etdi. Bu ma'lum ma'noda G'afur G'ulomning o'zi edi. G'afur G'ulom yangi davlat yetimlarga e'tibor qilayotganini, o'zbek yetimparvar xalqligini ko'rib, "Yodgor"da boshqacharoq yetimlikni tasvirladi.

G'afur G'ulom umrining oxirigacha yetimlik og'riqlarini unutmadi. Nasrida aks ettirganidan tashqari, she'riyatida ham yetimlikni ifodaladi. Shoir bolalarga "kelajagim, keragim" deb murojaat qilar ekan, yuragi ham bolalarniki ekanini ta'kidlaydi. Shoirning yetimlik motivi mavjud she'rlarida bugungi bolalikka shukrona bor. Istiqlof davrining katta-yu kichigi bu she'rlarni o'qib, bugungi bolalik uchun mustaqil Vatandan, ozod davlatdan minnatdor bo'lsa arziydi. Shoir o'z asarlarida hajvdan mahorat bilan foydalangan. "Shum bola"dagi fojeali bolalikni ham shu qadar satira va yumorga o'raganki, asardagi qayg'uli voqealarni ko'rib turib ham kulaverasiz.

"Nortojining kurak tishi" va "Ahmad yomon bola emas-ku, ammo..." she'rlari esa bolalarni toza-pokiza yurishga chorlovchi asarlardandir. Ushbu she'rlarda G'afur G'ulomning maktabgacha va kichik maktab yoshidagi bolalarga mo'ljallab asar yaratishdagi mahorati bor-bo'yi bilan namoyon bo'lgan. Hazil-mutoyiba vositasida kir-chir yuruvchi bolalarni chimdib olish va toza-pokiza yurishga undash har ikkala she'rning asosini tashkil qiladi. Tishini tozalashga erinadigan, "yuzini haftada arang yuvadi"gan olti yashar Nortojining tishi og'rib qolishi va do'stlarining uning og'ziga "ekskursiya" qilishlari tasvirlarini shoir nihoyatda jonli, tabiiy yaratgan. She'rda ijodkorning hajviy portret yaratish mahorati e'tiborga sazovor:

Nortojining hozir yoshi oltida,
Biroq chollar kabi kemshik bechora;
Bir parcha go'sht yoki non yeb qo'ydimi,
Kechgacha tish kovlab, bo'lar ovora.



Endigina olti yoshga kirgan Nortojining kemshikligi “ta’rifi”dan boshlangan she’r to’rtta kurak tishining chirib, darz ketgani, tishlari past-balandligidan “so’yloq” degan nom olgani, “s” bilan “sh” harfini aytolmay, so’z o’rniga tili hushtak chalishigacha mufassal tasvirlanib, portret chizgilari tobora mukammallashtirib boriladi:

“Nortojining kurak tishi”

*Oldingi to’rtta kurak tishining Sog’i yo’q
— hammasi chirik, dars ketgan.*

*Ba’zisi juda past. ba’zisi baland. Ba’zisi
lab yular-misli tikan.*

*Nortoji o’zi sho’x, erinchoq bola - Yuzini
haftada arang yuvadi.*

*Ko’cha ham kuylarda chang tuproq kechi
“Olapar”. To’rtko’zni doim quvadi.*

Ayniqsa, Nortojining og’ziga “ekskursiya” tasviri jonliligi bilan yosh kitobxon e’tiborini qozonishi shubhasizdir:

Bolalar birma-bir tekshiradilar:

- Voy-bayov! Bunisini qarang, o’rtoqlar!

Tishlarda istagan narsa topilar:

Jiydami, o’rikmi, pista po‘choqlar.

Ayniqsa, oldingi kurak tishida

Bir hafta burungi ovqat qoldig’i;

Yonida, boshida, oralg’ida

Saqich bo‘laklari, tuxum sarig’i.

Nortojining og’ziga “ekskursiya” o’zining tabiiyligi, hazil-mazax ruhidaligi bilan yosh kitobxonga qiziqarli, ibratli va axloqiy-tarbiyaviy ahamiyat kasb etadi.

Mana yarim asrdirki, uning satira va yumor bilan sug’orilgan bolalarbop she’rlari bolalarni ham, kattalarni ham birday kuldiradi va tarbiya qiladi.



50-60-yillarda bolalar uchun yaratilgan ko'plab she'rlarida G'afur G'ulom, avvalo, mehribon ota sifatida namoyon bo'ladi. "Bu yil birinchi sinfga kiradigan o'g'il-qizlarimga atab yozgan she'rim", "Yana bir qutlug' kun", "Quyoshning yorug'ligi barcha xalqqa barobar" she'rlarida o'sib-unib kelayotgan farzandining maktab ostonasiga ilk bora qadam qo'yayotganidan faxrlanish, uning ilm cho'qqilari va kasb-hunar asoslarini egallagan, axloq-odobli, komil inson bo'lib yetishuviga ishonch tuyg'ulari barq ura, "Navqiron naslimiz sinov oldida", "Oltin medal", "Imtihon" she'rlarida maktabni tugallab, mustaqil hayotga yo'llanma olayotgan, oliy o'quv yurtlariga kirib, xalqimizga munosib farzand bo'lish tuyg'ulari bilan yonayotgan yosh avlodga, farzandlariga oq yo'l tilayotgan mehribon padar qiyofasi namoyon bo'ladi.

Sizsiz kelajak yo'q, siz axir xalqning

Ming yilni ko'rajak qarog'larisiz.

Sizsiz yorimaydi osmonda Zuhra,

Zamonlar tongining charog'larisiz,-

satrlarida barq urib turgan ana shu ishonch, faxr tuyg'ulari yosh kitobxon ma'naviy- axloqiy kamolotida o'ziga xos o'rin tutishi shubhasizdir.

G'afur G'ulom bolalar uchun yaratgan asarlarning yana bir qirrasini ulardagi hayotga endigina kirib kelayotgan yosh bola obrazining o'ziga xos shakl va yo'sinlarda tasvirlanishi bilan xarakterlidir. "Qushchalar she'ri", "Dadam va men", "O'ylashni o'rganamiz", "Kekkeymachoq Sobirjon", "Ahmadjon - fotograf", "Chaqchaqlashaylik" she'rlarida yosh bolaning o'ziga xos ma'sum, beg'ubor, samimiy dunyosi yaratiladi.

"O'ylashni o'rganamiz" she'rida Muxtorjon olti yashar singlisi Munisxon bilan o'ylash haqida suhbatlashadi, unga o'ylashni o'rgatmoqchi bo'ladi:

- Mana, men o'ylayapman...

- Nimani o'ylayapsan?



- Juda ko'p o'ylayapman:

Morojniydan tog' bo'lsa.

Nuqul gilos bog' bo'lsa, Bir qozon qaymoq bo'lsa, Tuyaday pishloq bo'lsa...

Bu - o'g'il bolaning beg'ubor dunyosi, cheksiz-chegarasiz xayollarining bir qirrasi. Darhaqiqat, muzqaymoqni yomon ko'radigan bola bormi?

Akasidan o'ylashni o'rgangan Munisxon esa:

Bitta qo'g'irchoq bo'lsa,

Kaliti buzilmasa,

Ko'zini yumganida

Meni ham ko'rib tursa... - deb orzu qiladiki, bu - qiz bolaning o'ziga xos dunyosi, o'ziga xos qiziqishlari olami.

Aka-singilning o'ylashlari davom etaveradi, o'rtada ozgina bahs ham kelib chiqadi. Singlisiga yanada jiddiyoq o'ylashni o'rgatmoqchi bo'lgan Muxtorjonning "Sen oyi bo'lasanmi?" - degan savoliga Munisxon "Sen-chi?";- deb javob qaytaradi. Jahli chiqqan Muxtorjon:

- Men qiz bola emasman,

Qizlar oyi bo'ladi.

Men katta bo'lganimda, Besh yuzga kirganimda Katta dada bo'laman, - deb javob beradi. Haqiqatan ham "Sen oyi bo'lasanmi?";- degan savoldan qaysi o'g'il bolaning jahli chiqmaydi?! Shu sababli ham "katta dada bo'lganida yuzta qizi bo'ladigan" Muxtorjon qizlarining otini "Punis" qo'yadi. Akasining zardasiga Munisxonning javobi ham tappa-tayyor. U "oyi bo'lganida mingta o'g'li bo'ladi, oti Puxtor bo'ladi". Ushbu kichik she'rda G'afur G'ulom yosh bola dunyosini, fikrlash tarzini, obrazini ulkan mahorat bilan yaratgan.

"Chaqchaqlashaylik" she'rida yana o'sha - ozgina maqtanchoqroq, ozgina hovliqmaroq, ozgina vahmachiroq bola-



kaylar dunyosi yaratiladi. Yozgi ta'tildan qaytib, maktabda o'qishlarini boshlagan bolalarning har biri yozda nima ish qilgani, qayerda dam olgani-yu nimalarni ko'rgani haqida navbati bilan gapirib beradi:

Ahmad, Meli, Jo'rayov Tyan-Shanga chiqibdi, Nishon kaltak tiqibdi. Tusharda o'n bo'ringing Qazibdilar go'rini.

Yog'lab turib tayoqni Savabdilar ayiqni.

Shu tarzda boshlangan suhbat (chaq-chaq) to'xtovsiz davom etaveradi. Har bir bola yozda ko'rsatgan 'karomat'lari haqida shu tariqa lof ura boshlaydilar. Oysha o'z qo'ltig'ida o'n besh jo'ja ochib, jo'jalarga "A" va "V" vitaminlarni don o'rnida berib, uch kunda jo'jalarini tovuq-xo'rozga aylantiribdi, Zokir boqqan baliqlar akvariumga sig'may, devorni yorib chiqib, daryo izlab yig'labdi va hokazo.

Aytish kerakki, bolalarning beg'ubor, o'ziga xos sodda olamini yaratishga bag'ishlangan shu tarzdagi asarlar jahon bolalar adabiyotida alohida o'rin tutadi. G'afur G'ulom esa ushbu she'rlari bilan o'zbek bolalar adabiyotida "Lofchilar- aldoqchilar" turkumida o'ziga xos olam yaratadi.

G'afur G'ulomning bolalar shoiri va nosiri qiyofasiga otalik va murabbiylik tuyg'ulari chuqur singib ketgan. Bunda yetimlikda kechgan bolalik xotiralari ta'siri ayricha rol o'ynaganini alohida ta'kidlash joiz. Shu holat uni qo'lga qalam olib, ilk she'rini yozishga undagan edi. "Bir kuni, - deb yozgan edi u o'zining "Kechmish va kechirmishlarimdan" xotiranomasida, - bolalar bog'chasidagi yetim bolalardan 15 tasini bizning internatga o'tkazdilar. Men bu go'daklar bilan birga tunab qoldim. Kechasi uxlamay, kuzatuvchilik qilib chiqdim. Shu kecha o'z yetimligim, boshimdan kechirganlarim va shu yetim bolalar ahvoli... to'g'risida she'r yozdim. Shu she'rimni birinchi she'rim desam bo'ladi". O'sha ilk she'ridayoq u bolalarning ham hazrati Odam farzandi ekanligini, binobarin, ular ham insonday yashash va ulg'ayish huquqiga ega ekanliklarini ularning o'z tillaridan favqulodda bir ko'tarinkilik bilan ifoda etgan edi.



Biz Odam bolasimiz,
Odamning donasimiz.

Biz o'sib ulg'ayamiz, Olim bo'lish g'oyamiz.

G'afur G'ulom yetimlikda ulg'ayganini umr bo'yi unuta olmadi. Yetimlik uni o'ksik qalb sohibiga aylantirgan va mudom ta'qib etganligi tufayli bolalarga atab qaysi mavzuda she'r yozmasin, o'sha zahoti xotirasi qatlaridagi yetimlik armonlari uyg'onishi tabiiy edi. Kattalar uchun yozilgan va XX asr o'zbek she'riyatida voqeaga aylangan "Sen yetim emassan"da ham, bolalarga atab bitilgan "Bayram maktubi" va boshqa qator she'rilarida ham bu holni kuzatish mumkin. Jumladan, "Bayram maktubi"da o'qiyimiz:

O'ttiz sakkiz yil burun

Bugungi siz bilan teng O'n to'rt yoshlarda edim. Tongsiz, uzun kechqurun Qora qo'ynin ochar keng Ko'z o'ngida uchurum. Maktab qayoqda deysiz? Nonning hatto o'zi yo'q, Bo'z yaktak, yirtiq ishton, Eshiksiz, o'tsiz, nursiz, Vayronalar qup-quruq, Xalq tentirar parishon Oq podshoning urushi Yurtni yergacha toptab, Tekkan edi tinkaga.

Och qo' shinning yurishi

Yer yuzini gur o'rtaib, O'xshardi alangaga.

Qonxo'r fashistlar ming-minglab bolalarni ota-onalaridan ayro etib, yetim qoldirayotganidan jirkangan shoir yana o'sha "o'ninchi yillar sargardonligi"ni eslamay, o'tolmaydi:

Yetimlik nimadir- Bizlardan so'ra.

O'ninchi yillarning

Sargardonligi; Isitma aralash Qo'rqinch tush kabi Xayol ko'zgusidan O'chmaydi sira Men yetim o'sganman, Oh, u yetimlik...

Voy bechora jonim, Desam arziydi, Boshimni silashga Bir mehribon qo'l, Bir og'iz shirin so'z Nondek arzanda.



Men odam edim-ku...

Inson farzandi...

Sen yetim emassan,
Tinchlan jigarim,
Quyoshday mehribon.
Vataning — onang,
Zaminday vazmin-u.



Mehnatkash mushfiq
Istagan narsangni tayyorlaguvchi
Xalq bor — otang bor.
Cho'chima, jigarim,
O'z uyingdasan.

Umuman, bu she'r yaratilganidan buyon baralla jaranglab, o'z vaqtida jangchilar uchun umid va ularning O'zbekistonga evakuatsiya qilingan yetim farzandlari uchun tasalliga aylangan bo'lib, xalqimiz mehru oqibatining tarannumidan bitilgan. Shu muqaddas adabiy hujjat bor ekan, bolajon xalqimizning yetimparvarlik jasorati tarixining bu yorqin sahifalarini hech kim na o'chira oladi va na o'zgartira oladi.

G'afur G'ulom o'z she'rlarida bolalik olamini tarannum qilar ekan, quyidagilarni amalga oshirdi:

1. Har bir she'rda bolalarning kelajagi ulug' bo'lishiga ishonch bor. G'afur G'ulom faylasuf shoir sifatida yosh avlodga ishonch bildirish, ularni ruhlantirish juda muhimligini angladi. Shu boisdan "Yasha, deyman, o'g'lim!", "Bari seniki" deb xitob qildi.

2. G'afur G'ulom bolalardagi kamchiliklarni yumor yordamida ko'rsatib berdi. "Nortojining kurak tishi", "Ahmadjon fotograf", "Ahmad yomon bola emas, ammo..." kabi she'rlari bolalar hajviyotining o'lmas namunalaridir.



3. Shoirning deyarli har bir she'rida Vatan madhi bor, uning she'rlari yosh avlodni vatanparvarlik ruhida tarbiyalay oladi.

4. G'afur G'ulom yosh avlodning komil bo'lishida ilm, maktab, ustoz yetakchi o'rin tutishini she'rlarida yorqin ifoda etdi.

Umuman, G'afur G'ulom bolalarga yuzlab she'rlar hadya qildi. Uning "Sen yetim emassan", "O'ylashni o'rganamiz", "Bari seniki" kabi she'rlari dunyo bolalar adabiyoti xazinasiga qo'shilishiga loyiq she'rlardan bo'lsa, maktabgacha va kichik maktab yoshidagi bolalar uchun yaratgan asarlari orasida o'yin qo'shiqlari ham alohida mavqe' kasb etadi. "Oq terakmi, ko'k terak", "Chitti gul", "Buni toping, qizlarim" she'rlari xalq og'zaki ijodidagi o'yin va topishmoq-qo'shiqlar asosida yaratilgan asarlar sifatida bolalar adabiyotimiz xazinasini boyitishga xizmat qiladi.

Shuningdek, G'G'ulomning o'smirlar kitobxonligining asosini tashkil etgan "Netay", "Yodgor" va "Shum bola" qis-salarida ham shu muammo tahlil qilinadi. Adib bu asarlarida yetimlikni keltirib chiqargan sabab va oqibatlarga badiiy nazar solish yo'lidan boradi. Zero, otasi yo onasi (ba'zan har ikkovi) dan bevaqt ajralib, o'gay ota yoki o'gay onadan shafqat emas, shafqatsizlik ko'rgan bolakayning achchiq va alamli qismati shunday foje' qismatdir. Bunday holatda yetimning o'gayligi birmuncha shaxsiy fojea sanalishi mumkin. Ammo G'afur G'ulom masalani shu holda yechish yo'lidan bormagan, aksincha, u o'tmishdagi nobop tuzum va bemehr jamiyatning shafqatsizligi ham o'lganni tepkilab, yetim-yesirlarga o'gaylik qilishi fojeasini ochishga harakat qildi va aytish mumkinki, bunga muvaffaq ham bo'ldi. Bu jihatdan Netay va Shum bola - Qoravoyning yetimlik qismati talqini e'tiborni tortadi.



“Shum bola”



“Shum bola” kinofilmidan lavhalar



Adibning “Shum bola” qissasida o‘zbek xalqining o‘tmishdagi og‘ir hayoti, xususan, o‘smirlarning qarovsizligi, ularning bir parcha non deb darbadar kezishlari achinarli nasvirlansa, ba’zi obrazlarning harakatlari kulgi ostiga olinadi.

“Yodgor” qissasida esa yetimlik sujetni harakatga solgan motiv. Unda yetim go‘dak Yodgorning qismatiga munosabat hal qiluvchi rol o‘ynaydi. S.Mamajonov to‘g‘ri ta’kidlaganidek: “Yodgor” ma’lum jihatidan poetik ramzli nom. Go‘dak Yodgor asarda tasvir obyekti bo‘lmasa ham yozuvchi uchun yangi insoniy munosabatlarni ko‘rsatib berishda vosita rolini o‘ynaydi. Bu go‘dak Mehri va Jo‘ralar, ularning ota-onalarining qalb dunyosini ochib beruvchi bir kalitdir, shu go‘dak asar voqeasini yaratadi, konfliktga keskin tus beradi, syujetni o‘stiradi va



uni ikkiga bo'lib tashlab, keyin yana bir-biriga qo'shadi, shu go'dak xarakterlarni rivojlantiradi, ochadi. U asardagi voqealar va odamlarni bir-biri bilan munosabatga kirituvchi, asarning hamma bo'lagini yozuvchining ko'rish markaziga bog'lab, tortib turuvchi magnitdir: Mehrining o'z sevganiga shu go'dak xalaqit beradi. Jo'raning "aybsiz aybdor" bo'lib, onasi, aka va ammalari oldida ta'naga qolishida shu go'dak sababchi bo'ladi, xuddi shuningdek, Jo'raning insoniyligini ochib beruvchi, Saodat sevgisini sinovdan o'tkazuvchi va Mehriga hayot haqiqatini tushuntirgan ham shu go'dak - Yodgordir.

G'afur G'ulomning o'zbek bolalar adabiyotiga qo'shgan hissasi benihoya salmoqli ekanligi shubhasiz. Uning ko'plab she'riy va nasriy asarlari bolalar adabiyotimiz xazinasiga munosib ulush bo'lib qo'shildi. Yozuvchining "Shum bola" va boshqa bir qator nasriy asarlari tom ma'noda bolalar adabiyotimiz durdonalari hisoblanadi. Hatto G'afur G'ulom bolalar uchun "Shum bola"dan boshqa asar yaratmaganida ham shu birgina asari bilan o'zbek bolalar adabiyotida o'z o'rniga ega bo'lgan ijodkor sifatida manguga qolishi aniq edi.

Tom ma'nodagi badiiy asar davrlar to'foniga bardosh berib asrlardan- asrlarga o'taveradi. G'afur G'ulom ijodida ham ana shunday haqiqiy badiiyat mahsullari ko'plab topiladi va ushbu asarlar barcha davrlarda yosh avlod ma'naviy kamolotiga xizmat qilaveradi.

G'afur G'ulom - yetuk bolalar shoiri. U haqqoniy hayot tasviri asosida bolalar ta'lim-tarbiyasiga muhim hissa qo'shdi. Shoir ijodida o'z davri mafkurasi sezilsa-da, u boqiy she'rlar yaratib, davrlardan osha bildi, istiqlol davrida ham bolalarning sevimli shoiriligicha qoldi.

Oybekning bolalik olami (1905-1968). O'zining roman va qissalari, ilmiy-nazariy, siyosiy, badiiy publitsistik asarlari, tarjimalari, ajoyib she'rlari, dostonlari, hikoyalari bilan o'zbek adabiyoti xazinasini boyitgan atoqli so'z san'atkorlaridan



biri - Muso Toshmuhammad o'g'li Oybek bolalar adabiyoti taraqqiyotiga ham munosib hissa qo'shgan adibdir. U yaratgan she'r va hikoyalar, qissa va dostonlar bolalar ma'naviyatiga samarali ta'sir etib, yosh avlod estetik didining shakllanishida katta rol o'ynamoqda. "Gunafsha" (1926), "Bolalikni eslab" (1926), "Shaharcha bolalariga" (1934), "Shoirning bolaligi" (1937), "Eski va yangi bolalik" (1937), "Odobli Tursun", "Ahmadjon bog'bon" (1971) kabi she'riy kitoblari, "Zafar va Zahro" (1953), "Haqgo'ylar" (1976), "Bobom" (1957) kabi dostonlari, "Alisherning yoshligi" (1967) qissasi, "Globus" hikoyalar to'plami, "Bolalik" kabi asarlari ayniqsa xarakterlidir.

Yozuvchi Oybekning bolaligi ham barcha mehnatkash xalq bolalari kabi kechadi. U yoshlikdan uy-ro'zg'orga qarashish, guzardan narsa olib kelish, suv tashish, o'tin yorish, qor kurash kabi yumushlarni bajaradi. Barcha bolalar kabi bahor vaqtlarida tomma-tom oshib, varrak uchirar, dovuchcha qoqar, qish bo'lsa oshiq o'ynar, xo'roz, tuxum va it urishtirishlarda qatnashar, yoz kunlari onasining pinjida qarindosh-urug'larining uylariga "mehmon"ga borar, hayit, sayil va boshqa milliy bayram kezlarida esa o'zida yo'q sevinib dor o'yini, xalq qiziqchiliklarini, ko'ngil ochar tomoshalarni ko'rishga muyassar bo'lar edi. Keyinchalik "Shaharcha bolalariga", "Shoirning bolaligi" she'rlarida shu manzaralar o'z aksini topadi. Oybekning bolalar va o'smirlarga bag'ishlangan she'riy asarlarida bugungi qaynoq hayot, ilm, hunar va mehnatga bo'lgan muhabbat, vatanparvarlik, jamoatchilik, ijtimoiy burchni anglash kabi xususiyatlar aks etgan. Bu fazilatlar o'sha davrda Oybek asarlarining yetakchi mavzuiga aylanadi. Shoir g'oyaviy-badiiy kuchli she'rlar bilan birga, bolalar va o'smirlar hayotini tasvirlovchi hikoyalar ham yozdi. 1981-yilda adibning "Globus" nomli to'plami bosilib chiqdi. Bunda Oybekning shu vaqtgacha e'lon qilinmagan "Gulnor opa" (1930), "Fonarchi ota" (1930), "Singan umid" (1930), "Tillatopar" (1930) hikoyalari ham chop etilgan.

Oybek Pokiston bolalari hayotiga bag'ishlangan "Qonli barmoqlar" (1962) hikoyasini yozdi. Hikoyada Pokistonda



tinchlik uchun kurashuvchilardan qanday qasos olinayotganligi, ularning bolalari ko'chalarga chiqarib tashlanayotganligi, tilanchilikka va malaylikka mahkum etilayotganligi tasvirlanadi. Yozuvchi buni asar qahramoni to'qqiz yoshli Alining sarguzashtlari orqali aks ettiradi. Oybek hikoyada Alilarning yashash sharoitini va qanday kun kechirishini quyidagicha hikoya qiladi: "Gorishov Lohurning bag'ridagi bir daha. Lohur - qo'shiqlar, gullar diyori. Gorishov esa dahshat! Ali bu xaroba - vayronalar ichida yuguradi. Ko'cha, yo'lka deydigan narsa yo'q, tutash xaroba kulbalar. Shunday xaroba kulbalarning birida Ali bilan onasi, otasi qamalgandan so'ng haydalib, ko'chaga tashlangan edi". Pokiston shaharlarining ko'cha-ko'yalarida to'da-to'da tilanchi bolalar yuradi. Gadoylar odatda "baxshish" deyilsa, o'zlarini tomdan tashlab yuborishga tayyor ekanligi hikoyada bo'rtib turadi. Ali bir parcha non qidirib, besh-olti kundan buyon rastalarni kezib yurganida gulobchi do'kondor uni chaqirib "jahl aralash dedi: "Mana bu yashiklarni bo'shat!" Buning evaziga esa haq to'lashga va'da qiladi. Ali: "rostdanmi?"- deb so'raydi va do'kondorning "ha" degan tovushini eshitgach, bola uzun xo'rsindi, jilmaydi. Kir, kalta ko'ylagining yenglarini shimarib, ishga tushdi". Ali yashiklardagi siniq gulob shishalarini tashiydi: "Siniq, cheti uchgan shishalar va berahm quyoshning issig'i xunob qilar, kichik barmoqlari tilingan, qo'llari qon. Ammo och, tentirab yurishdan charchagan bola bu xizmatdan vaqti xush edi. Isqirt, juldur, cho'pday oriq bolalar Alining qonagan qo'llariga tikildilar. Bolalar unga ko'mak bermoqchi bo'lganlarida u "rahmat", deb javob berdi. Ali och-nahor, barmoqlarini shisha siniqlari kesib achitishiga, bir parcha non topishning nihoyatda azob-uqubatlari va mashaqqatlariga qaramay, do'kondor gulobchining og'ir ishini bajardi. Do'kondor bir qutini ochib, yupqa "chapatti" nonni uloqtirdi. Ali ilib oldi, quvonib dedi:

- Darrov borib, ayamga beraman, u kasal!
- Aya, men keldim, non topib keldim. Turing, non yeng, non...



Kampir onasining yuzini ochdi:

– O‘tdi olamdan!

Dard bilan, yo‘qchilik bilan, ochlik bilan, g‘am bilan hamisha kurashgan bu g‘arib ayolning yuzida baxtsiz hayotning eng so‘nggi nafasida o‘lim bilan kurash dahshati ko‘rinar edi”...

Bu hayotiy parcha faqat pokistonlik Alining hayoti uchun xos hodisa bo‘libgina qolmay, balki kambag‘al mehnatkash bolalarining hayoti uchun ham tipik hol edi. Kitobxon Alining sarguzashtlari bilan tanishar ekan, unda oddiy insoniy huquqlardan ham mahrum etilgan bolaning ayanchli taqdiri orqali yovuzlikka nisbatan nafrat tuyg‘ulari shakllanadi. Muhimi shundaki, hayotda doimo yovuzlik bilan ezgulik orasida tinimsiz kurash borishini, bu kurash insonlarni ulug‘ ishlarga otlantirishi mumkinligini his qiladilar.

Oybek buyuk o‘zbek shoiri Alisher Navoiyning bolalik yillari haqida hikoya qiluvchi “Alisherning yoshligi” qissasini (1967) ham yozadi. Ulug‘ Navoiy Oybekning sevimli siymolaridan biri edi. Bu haqda adib maqolalaridan birida shunday hikoya qiladi: “Navoiy she‘riyati va Navoiy obrazi hamisha kuchli bir quyosh kabi ko‘nglimni tortar edi. O‘z asarlarimda Navoiy obrazini yaratishga zo‘r mayl va istagim bor edi. Yoshligimdan beri Navoiyning o‘lmas, adabiy she‘rlarini sevib o‘qir edim, uning jozibali g‘azallari borgan sari ko‘nglimga singib bordi, shakl va mazmunlari yuragimni maftun etdi... U mening ko‘nglimda, yodimda edi, butun borlig‘imni band etgandi. Yursam-tursam hamisha Navoiyni o‘ylar edim. Uning ma‘nodor, aqlli ko‘zlari hamisha xushfe‘l, rahmdil, olijanob qiyofasi, asl pok, ulug‘ qalbini his etardim, ko‘z o‘ngimda ko‘rardim...” Oybek 1928-yildan boshlab Alisher Navoiy ijodini chuqur o‘rganishga kirishdi. U dastlab, Navoiy ijodiga doir ko‘pgina ilmiy maqolalarni o‘qib o‘rganadi. Keyinroq “Navoiy”, “Guli va Navoiy” dostonlarini nashr ettiradi. Davlat mukofotiga sazovor bo‘lgan “Navoiy” romanida ulug‘ shoir va mutafakkir hayotining kamolot



davri tasvirlanadi. “Alisherning yoshligi” qissasida Hirotdagi (taxminan 1447-1452- yillar) tarixiy voqealar, shahzodalarning Shohruh vafotidan keyingi o‘zaro taxt uchun kurashlari va shu davrda o‘tgan Alisherning bolalik (to‘rt yoshdan boshlab) yillari haqida hikoya qilinadi. Qissada Alisher obrazining takomili o‘sha vaqtdagi tashqi muhit voqealari va ziddiyatlari bilan uzviy aloqada tasvirlanadi. Hukmron doira orasida mavqei ancha baland bo‘lgan G‘iyosiddin va Gulbegim bekaning oiladagi samimiylıkları, o‘zlarini sipo ham oqilona tutishlari, farzandi Alisherning ham jismoniy, ham aqliy tomondan kamolotida muhim rol o‘ynaganligi haqqoniy tasvirlanadi. Yosh Alisher xarakteridagi o‘ziga xos xislatlar uning bolalik chog‘idanoq namoyon bo‘lgan edi. Alisher siymosiga xos bo‘lgan aqllilik, kattalarga bo‘lgan samimiy hurmat, she‘riyatni nozik his etish, g‘azallarni g‘oyat maromiga yetkazib, ifodali o‘qish, ayniqsa, “ot choptirishdan fikr yuritish yaxshiroqdir chamamda”, deyishi kitobxonda katta taassurot qoldiradi. Alisherning keyinchalik buyuk davlat arbobi, ulkan shoir darajasiga yetishishida bu kabi fazilatların o‘zigina yetarli asos bo‘lib xizmat qilmadi, albatta. Oybek Alisher xarakterining shakllanish jarayonini har bir epizod, suhbat, yordamchi obraz va qahramonlar munosabati orqali ham badiiy asoslay olgan. Alisherning o‘qishga - maktabga bo‘lgan havasini adib uning tilidan: “Ov qilmoq merganlik - ermak narsa, lekin eng zo‘r zaruriyat maktabdir. Turmushning ko‘p sirlarini maktab o‘rgatadi”, deb uning ilmga bo‘lgan qiziqishini tasvirlaydi. Shu bilan birga uning ota-onasi, qavm-qarindoshi va boshqalarning suhbatı, shoirlarning g‘azallari Alisherga katta ta’sir etganini qayd etadi. Adibning “Bolalik” qissasi avtobiografik xarakterga ega bo‘lib, uning markazida yosh Musaning sarguzashtlari yotadi. Bola obrazining hayotdagi asosi adib Oybekning o‘zidir. Asarda Musavoyning yetti yoshgacha bo‘lgan davrdagi xakteri sho‘xlik, tegajoqlik, tinib-tinchimaslik va o‘yingaroqlikdan tashqari, ochiq ko‘ngil, dangalchi o‘tkir zehnliligi Oybekona tasvirga ega. “Bolalik” qissasida Turg‘un,



A'zam, Ahmad, Qodir, Hoji, Sobir kabi Musavoyning tengqurlari va o'rtoqlarining obrazlari ham berilgan. Ularning har biri o'z shaxsiy qiyofalariga ega. Oybek o'sha davr tashvishlari bolalar hayoti va taqdirida ham ma'lum darajada aks etganligini mahorat bilan tasvirlaydi. Xulosa qilib aytganda, Oybek yuqoridagi kabi asarlari bilan o'zbek bolalar adabiyotining shakllanishi va yuksalishiga katta hissa qo'shdi. U o'zining bunday asarlari bilan bolalar adabiyotining sevimli kuychisiga aylanib qoldi.

Bilim, ko'nikma va malakani rivojlantirishga yo'naltiruvchi savollar:

1. Xalq ertaklarining adabiy ertakka o'sib chiqish omillari nimada? Bu an'ana qachon boshlangan?
2. O'zbek bolalar adabiyotidagi folklorizm va stilizatsiya namunalari munosabat bildiring.
3. H.Olimjonning ertaknavislik faoliyatini izohlang, she'riy-adabiy ertaklaridan misol keltirib, tahlil qiling.
4. Sh.Sa'dullaning "Och bo'ri, sho'x qo'zi va qirchang'i" she'riy ertagi qanday usulda yaratilgan? Undagi folklorizm hodisasi haqida mulohaza yuriting.
5. "Sholg'om", "Bo'g'irsoq", "Bo'ri va echki bolalari" kabi xalq ertaklari negizida yaratilgan adabiy ertaklar va ularning mualliflari to'g'risida nimalarni bilasiz?
6. Janr, sujet, motiv yoxud obraz stilizatsiyasining sintezlashuvi deganda nimani tushunasiz? Misollar yordamida izohlab bering.
7. H.Olimjon "Oygul bilan Baxtiyor" ertak-dostonini yozishda xalqning qaysi ertaklari va dostonlari sujeti va motivlaridan ijodiy foydalangan?
8. "Simurg' yoki Parizod va Bunyod" ertak-dostoni uchun xalqning qaysi ertagi va afsonasi manba vazifasini o'tagan?
9. Oybekning bolalar adabiyotidagi o'rni?
10. "Qonli barmoqlar"da qaysi xorij bolalari hayoti aks etgan?



11. Biografik va avtobiografik asarlar haqida ma'lumot bering.

12. G'afur G'ulomning "O'ylashni o'rganamiz" she'rida qanday ifoda ustuvor?

13. G'G'ulomning yumoristik she'rlaridan birini tahlil qiling?

14. G'G'ulom qissalarida yetimlik motivi va jamiyatning bolalikka munosabati ifodasi qaysi qissalarida ko'zga tashlanadi?

Mavzuga oid test savollari:

1. "Zafar va Zahro", "Haqgo'ylar", "Bobom" dostonlari muallifini aniqlang.

- a) Sulton Jo'ra;
- b) G'G'ulom;
- c) Zafar Diyor;
- d) Oybek.

2. Oybekning avtobiografik qissasi qaysi javobda to'g'ri?

- a) "Alisherning yoshligi";
- b) "Bolalik";
- c) "Zafar va Zahro"
- d) "Shoirning bolaligi"

3. Oybekning biografik qissasi qaysi javobda to'g'ri?

- a) "Alisherning yoshligi";
- b) "Bolalik";
- c) "Zafar va Zahro";
- d) "Shoirning bolaligi".

4. Oybekning xorijlik bolalar hayotidan hikoya qiluvchi qissalari qaysi qatorda to'g'ri krsatilgan?



- a) "Alisherning yoshligi", "Haqgo'ylar";
- b) "Qonli barmoqlar", "Zafar va Zahro";
- c) "Bobom", "Bolalik";
- d) "Singan umid", "Tillatopar".

5. Oybek buyuk mutafakkir Alisher Navoiy ijodini o'rganishga kirishgan davri va Navoiy haqidagi asarlari qaysi javobda to'g'ri?

- a) 1940-yildan, "Navoiy" romani, "Alisherning yoshligi", "Bolalik", qissalari;
- b) 1960-yillardan, "Guli va Navoiy", "Navoiy", "Bobom" dostonlari;
- c) 1928-yildan, "Navoiy", "Guli va Navoiy" dostonlari, "Navoiy" romani, "Alisherning yoshligi" qissasi;
- d) "Husayn va Navoiy", "Alisher navoiy" qissalari.

6. "Bolalik" qissasidagi Musa obrazining hayotdagi asosi qaysi javobda to'g'ri?

- a) adib Oybekning o'zi;
- b) adib Oybekning bobosi;
- c) adib Oybekning ukasi;
- d) adib Oybekning otasi.

7. Hamid Olimjonning bolalar va o'smirlar kitobxonligiga daxldor asarlari mundarijasini aniqlang;

- a) "Oygul bilan Baxtiyor", "Semurg'" ertak dostoni;
- b) "Hulkarning she'ri", "Samolyot", "Lola", "Vatan", "Ona va o'g'il" she'rlari;
- c) "Jangchi Tursun", "Zafar dostoni";
- d) a va b javoblar

8. Hamid Olimjon xalq og'zaki ijodi ta'sirida qaysi dostonlarni yaratdi?

- a) "Jangchi Tursun", "Semurg'";
- b) "Oygul bilan Baxtiyor";



c) "Semurg' yoki Parizod va Bunyod";

d) b va c javoblar.

9. H.Olimjon "Oygul va Baxtiyor"ni xalq og'zaki ijodidagi qaysi ertak asosida yozgan?

a) "Malikayi Husnobod";

b) "Malikayi Turandot";

c) "Gulqahqah";

d) "Uchar gilam";

10. "Oygul va Baxtiyor" ertak dostonidagi Darxon kim va u nima uchun isyon ko'taradi?

a) Oygulning otasi, ozodlik uchun jabr-zulmga qarshi ozodlik uchun kurash olib borgan isyonchilarning boshlig'i;

b) Jambil xonining zolimligini fosh etib, ozodlik yo'lida qurbon bo'lgan mehnatkash xalq vakili;

c) Jambil elining xoni;

d) a va b javoblar.

Tavsiya etilgan adabiyotlar:

1. Jumaboyev M. Bolalar adabiyoti. Darslik. - T.: O'qituvchi, 2002.

2. Jumaboyev M. Bolalar adabiyoti. Darslik. - T.: O'qituvchi, 2011.

3. O'zbek bolalar adabiyoti va adabiy jarayon. - T.: Fan, 1989.

4. O'zbek bolalar adabiyoti antologiyasi. Ikki jildlik. 1-2-jild - T.: O'qituvchi, 2006.

5. O'zbek bolalar adabiyoti. Maqolalar. - T.:Yosh gvardiya, 1969.

6. Oybek. Bolalik. - T., 2005; yana: Alisherning yoshligi. - T., 2007

7. Ravshanov P. Bolalikning sehrli olami. - T.: Yosh gvardiya, 1985; yana: Tarix badiiyati. - T., 1989

8. Olimjon H. Oygul bilan Baxtiyor. - T.: Yulduzcha, 1988.



VII. BOLALAR ADABIYOTI RIVOJLANISH BOSQICHIDA

Reja:

1. *Sulton Jo'ra - o'smirlar kuychisi.*
2. *Zafar Diyor - kichkintoylar shoiri.*
3. *Quddus Muhammadiy – bolalarning tabiatshunos shoiri.*
4. *Shukur Sa'dulla - bolalar shoiri, adibi va dramatik pe'salar muallifi.*

MAVZUGA DOIR TAYANCH TUSHUNCHALAR: *p'esa, ertak-drama, kompozitsiya, motiv, ertak-qissa, hajviy hikoya, she'riy imzo, epigrama, portret- she'r, topishmoq she'r, chistonnavislik, doston-ertak, masnaviy, poetik shakl, epik poeziya, personaj, fanatizm, punktuatsiya.*



Sulton Jo'ra - o'smirlar kuychisi (1910-1943)

Sulton Jo'ra XX asrning o'ttizinchi yillaridan o'zbek bolalar adabiyotini rivojlantirish, yuksaltirish uchun kurashgan



adiblardan biri edi. Sulton Jo'ra navqiron avlodning otashin do'sti bo'lib mehnat, mardlik va baxtiyor yoshlik kuychisi sifatida tanildi. U o'zbek bolalar adabiyotining bunyodkorlaridan biri edi. 15 yillik ijodiy faoliyati davomida "She'rlar" (1933), "Fidokor" (1939) va "Moskva" (1941) singari uchtagina she'riy to'plamini hayotligida o'zi chop ettirgan bo'lsa, keyinchalik uning butun ijodiy merosi "Havorang gilam" (1553), "Ochiq chehralar" (1959), "Yomg'irdan so'ng' (1965), "She'rlar" (1973), "Qaldirg'och" (1981), "Sog'inchli salom" (1988), shuningdek, rus tilidagi "Rojdenie istini" (1961) va "Otkritoe litso" (1986) kabi o'nlab to'plamlar holida kitobxonlarning ma'naviy mulkiga aylantirildi.

Sulton Jo'ra 1910-yilning 15-yanvarida Buxoro amirligidagi Shofirkon tumanining Qog'oltom qishlog'ida kambag'al dehqon oilasida dunyoga keldi. O'z tarjimayi holida yozganidek, 3-4 yasharligida ota-onasi o'lib, qarindoshlari qaramog'ida qoladi. Hamqishlog'i bog'bon Abdurauf Dushanboyev xonadonida asrandi o'g'il bo'lib, uning xizmatini qila turib, qishloq masjidi huzuridagi eski maktabda savod olishni ham unutmaydi. Bu davrda ukasi Saidni olis Qazalidagi qarindoshlari olib ketsa, opalari Xadicha, Fotima va Osmanurlar birin-ketin turmushga chiqib, turli manzillarda yashay boshlashadi. Shu zaylda bo'lajak shoirning oilasi parokanda holda turmush girdobiga sho'ng'iydi. Sulton 14 yoshga to'lgach, Buxoro shahrida yashayotgan opasi Fotima Jabborovani qora tutib, Buxoroga keladi. Opasini topgach, bir muddat unikida yashab, shahardagi yetti yillik maktabda o'qiy boshlaydi. Uni 1927-yilda tugatib, Buxoro pedagogika bilim yurti (sobiq xalq maorifi instituti -Innapros)ga o'qishga kiradi. Bu yerdagi jo'shqin hayot uning g'ayratiga g'ayrat qo'shadi, ijodkorlik salohiyatini harakatga keltirdi. "Yulduz" taxallusi bilan bilim yurti devoriy gazetasida dastlabki she'riy mashqlarini e'lon qilib turadi. Bilim yurtida birga o'qigan sinfdoshi Qurbon Badaliyning xotirlashicha, Sulton Jo'ra "ayniqsa, she'riyatga, p'esalardagi rollarni ijro etishga juda qiziqar, shuningdek,



musiqiy asboblarni yaxshi chertar va nihoyat, chaqqon futbolchi ham edi”.

Bilim yurtida 1928-1929-yillarda “Bilim uchquni” nomida ta’lim-tarbiyaviy, adabiy-fanniy oylik jurnal chiqarib turilgan; bu jurnalda Jalol Ikromiy, Tuyg ‘un, Ziyo Ikromiy, Hakim Homidiy, Kunashboev, Mavlon Ikromiy kabi talaba-ijodkor yoshlar qatorida Sulton Jo’raning ham asarlari bosilib turgan. Chunonchi, uning “Erk qizi” she’ri shu jurnalning 1929-yilgi qo’shma sonida bosilgan. Lekin uning matbuotda bosilgan dastlabki she’ri “Mehnat qo’ynida” deb atalib, 1927- yilda “Yangi yo’l” jurnalida bosilgan edi. Binobarin, uning she’rlari ana shu davrdan e’tiboran “Buxoro axbori” gazetasi va turli jurnallarda tez-tez ko’rinadigan bo’ldi.

Sulton Jo’ra 1930-yilda bilim yurtini muvaffaqiyatli tugatib, shahardagi 3-yetti yillik maktabda o’zbek tili va adabiyotidan dars bera boshladi.

1933-yili Andijon viloyatining Izboskan tumanida yashab ishlayotgan opasi Fotima va pochchasining chorlovi bilan ular oldiga ko’chib bordi. Dastlab 17- maktabda o’qituvchilik qila boshladi. U Andijondagi faoliyati haqida avtobiografiyasida quyidagilarni arz etadi: “1938-yil 18-sentabrda Andijonga kelib, xotin-qizlar bilim yurtiga til va adabiyotdan o’qituvchi bo’lib kirdim. 1934-yilda Andijon kechki pedinstitutining geografiya fakultetiga kirib, 1940-yil yanvarida uni tugatib chiqdim (chunki u vaqtda litfak- (adabiyot fakulteti - O.Safarov va boshq.) yo’q edi). Til va adabiyot sohasida mustaqil o’z ustimda ishlab, kechki institutda lektorlik qildim”.

Shoir ijodini maxsus o’rganib, nomzodlik dissertatsiyasini yozgan Nabijon Qobilov aslida uning ana shu ma’ruzalarini tinglagan shogirdi edi. U Andijon xotin- qizlar bilim yurtida o’qitgan yana bir shogirdi, keyinchalik taniqli folklorshunos bo’lib yetishgan filologiya fanlari doktori, professor G.Musina



ustozi fazilatlarini shunday xotirlaydi: “Men Andijon pedagogika bilim yurtida o‘qib yurgan vaqtimda hurmatli Sulton Jo‘ra bizga o‘zbek tili va adabiyoti fanlaridan dars berar edi. Studentlar o‘rtasida: “Kimda-kim Sulton Jo‘radan ta‘lim olsa, u albatta, tilchi, adabiyotshunos, yoki shoir bo‘lib yetishadi”, - degan gap yurar edi”. Bu shunchaki gap bo‘lmay, ayni haqiqatning e‘tirofi ekanligini u o‘qitgan talabalar safidan M.Mirzayev, G.Musina, H.Razzoqov singari taniqli filolog olimlar-u Mahmud Jalil, Sotti Mamajon kabi shoirlarning yetishib chiqqani yaqqol tasdiqlaydi. Sulton Jo‘ra ayni paytda qizg‘in adabiy-ijodiy faoliyat bilan ham shug‘ullanib, zamonasidagi ijtimoiy hayot muammolariga bag ‘ishlangan she‘rlar, she‘riy ertaklar, dostonlar, ballada va dramatik asarlar yozdi. Bu asarlarida Vatan va uning tabiati, mehnat va uning zavqi, xotin-qizlar ozodligi va quvnoq bolalikni sharafladi. Aytish mumkinki, bu davrda u g‘oyat faol ijodkor sifatida nainki Andijonda, balki butun respublikada ham tanildi va e‘tirof etila boshlandi. Buni G‘afur G‘ulom bosh-qosh bo‘lib, 1939-yilda Toshkentda uning adabiy kechasi o‘tkazilishi, qolaversa, shu yili Moskvada bo‘lgan o‘zbek adabiyoti va san‘ati dekadasida yetuk shoir va adiblar safida qatnashuvi hamda “Hurmat belgisi” ordeniga sazovor bo‘lishi dalillari yaqqol tasdiqlaydi. Gap shundaki, 1940-yilgacha, shoirning o‘zi “birinchi she‘riy to‘plamim” deb e‘tirof etgan “Fidokor” to‘plami nashr etilishigacha u asosan, davriy matbuotda bosilgan she‘riy va publitsistik asarlari bilan shunday e‘tibor qozona olgan edi. Rost, bu asarlarning kattagina qismi katta yoshdagilarga mo‘ljallangan esa-da, u bolalar va o‘smirlarni ham unutmadi, ular uchun g‘oyaviy- badiiy jihatdan yetuk asarlar yozib, bolalar va o‘smirlar kuychisi sifatida tanildi. U turli yoshdagi bolalar ruhiy olamini nafis his qila olganligi sababli ular xarakteridagi tabiiy soddalikni, tinib- tinchimaslikni, ayrim hollarda yolg‘onchiligu dangasalikni yorqin ifoda eta oladigan “Lola”, “Oy nechta”, “Cho‘ntak”, “Mamatning kechirmishlari”, “Yolg‘onchi”, “Qarzdor”, “Kimning xati chiroyli”, “Yaxshi” va “A‘lo”ning



maqtovi”, “Harflar parade”, “Tinish belgilarining majlisi” kabi XX asrning 30-yillaridagi o‘zbek bolalar she’riyatining betakror namunalarini yaratdi.

Aytaylik, “Harflar parade” she’rida lotin yozuvidan kirill yozuviga o’tishning madaniy hayotimizdagi muhimligini bolalar qalbiga singdirishni ko’zlasa, “Tinish belgilarining majlisi” asarida tilshunoslikning tarkibiy qismi bo’lgan punktuatsiyaning mohiyatini badiiy obrazlar orqali tushuntirish nazarda tutilgan. Binobarin, bunday she’rlar g’oyat katta ilmiy va amaliy ahamiyatga ega. Shoir majoziy obrazlardan mohirona foydalanib, har bir tinish belgisining o’ziga so’z beradi, ular o’z vazifalarini g’oyat aniq ta’riflashadi. Ayni chog’da tinish belgilari o’zlarini o’rinli ishlata olmagan o’quvchilardan o’pkalab ham oladilar. Bu esa shoirning yengil yumor bilan sug’orilgan qochirimi edi. She’rning yutug’i shundaki, asarda tinish belgilari o’z vazifasini bayon qila turib, shu qoidaning isbotini ham namoyon qila olgan:

- O’rtoq rais, endi menga navbat bering, -
Deb so’z oldi kichik to’qmoq - bizning vergul.

– Gar undalma gapda kelsa qoq o’rtada

Uning ikki yonboshida men jo’rttaga:

“Qani endi undalmaxon, qochib boqchi”- , Deb bo’lurman, yubormayin unga soqchi. Gar undalma gap so’nggida kelsa, u choq, Undan oldin qo’yilurman, tushun, o’rtoq!

Shoir har bir tinish belgisining ko’rimli obrazini yaratadi. Undov belgi - mirzaterakka, nuqta - koptokka, so’roq belgisi - o’roqqa, vergul - to’qmoqqa, qo’shtirnoq - qiziqchilarga, tire - gugurt cho’piga o’xshatiladi. Hatto, nuqtaning grammatik mohiyati “fikrlar stantsiyasi”ga tenglashtiriladi. Bunday she’rlardan albatta, o’quvchilar estetik zavq olishdan tashqari, ilmiy ma’lumotga ham ega bo’ladilar.

Sulton Jo’ra kichkintoylar tabiatidagi beg’uborlikni ko’pgina she’rlarida samimiy ifodalaydi. Jumladan, “Ikki baho”,



“Cho‘ntak”, “Qarzdor”, “Mamatning kechirmishi” kabi she‘rlarda ayrim bolalar xarakterida sodir bo‘luvchi illatlarni yumor yordamida aks ettiradi.

“Shoir qisqa umr ko‘rib, nihoyatda oz fursat ijod qilganiga qaramay, adabiyotda o‘z izini qoldirdi. U G‘afur G‘ulom, Hamid Olimjon, Uyg‘un, Maqsud Shayxzodalar shogirdi edi. Ammo faqat ustozlardan o‘rganib qolmay, o‘ziga xos she‘riyat bilan maydonga chiqdi.

Uning she‘riyati bir butun holda erk va kurash to‘g‘risidagi o‘ylardan iborat bo‘lib, asosan, qahramonlik mavzusiga bag‘ishlangan”,- deb yozadi shoirning hamyurti Omon Muxtor Sulton Jo‘ra tavalludining yetmish yilligi munosabati bilan nashr etilgan “Qaldirg‘och” kitobining “Jo‘shqin kunlar shoiri” deb nomlangan so‘zboshisida. Haqiqatan ham shoir she‘riyati o‘zining mana shu xususiyatlari bilan ajralib turadi. Muhimi, u endi boshqa janrlarda ham barakali ijod qilish bilan birga, xalq ertaklari negizida she‘riy-adabiy ertaklar yarata boshladi.

Shoir yosh kitobxonlar uchun yirik badiiy asarlar ham ijod etgani diqqatga sazovor. Uning “Qaldirg‘och”, “Zangori gilam” she‘riy ertaklari va “Bruno” poemasi o‘zbek bolalar she‘riyati taraqqiyotida muhim ahamiyatga ega. “Yolg‘onchi” dostonida maktabda yomon o‘qiydigan No‘monjonning ota-onasini aldashi, o‘qituvchi esa ularni maktabga chorlab bergan xatlarini har gal yirtib tashlashi, nihoyat, o‘qituvchisining o‘zi ular uyiga kelib, No‘monjon xatti- harakatlarini fosh etishi va o‘z yolg‘onlari oqibatidan izza bo‘lgan lirik qahramonning tuzalish sari yuz tutishi ifodalangan. “Qaldirg‘och” ertagida yurt sog‘inchi, “Zangori gilam” ertagida esa erk uchun kurash motivlari in‘ikos topgan.

Shoir “Bruno” poemasida ulug‘ italyan olimi Jordano Brunoning o‘lmas obrazini yaratdi. “Bruno” poemasi nainki shoir ijodida, balki XX asrning 30-40- yillaridagi o‘zbek poeziyasida ayricha mavqega ega bo‘lgan asardir. Shoir ijodiy



merosi tadqiqotchisi N.Qobilovning shahodaticha, unda bu asarni yozish ishtiyoqini shoir hali Andijon kechki pedagogika instituti geografiya fakultetida o'qib yurgan kezlarida professor Leonovning buyuk italyan olimi Jordano Bruno haqida o'qigan ma'ruzalari uyg'otgan. Shundan so'ng Sulton Jo'ra Bruno ilmiy faoliyati haqida xilma-xil materiallar to'plab o'rgana boshlaydi, nihoyat, 1937-yilda "Bruno" poemasini yozishga kirishib, tugagan har bir bobini safdoshlariga o'qib berib, ular fikr-mulohazalari asosida yana qayta ko'rib, asarini mukammallashtira boradi. 1940-yilda esa uni "O'zbek adabiyoti" (hozirgi "Sharq yulduzi") jurnalida e'lon qiladi. Dostonni sinchiklab o'qish esa shuni ko'rsatadiki, unda shoir hamma zamonlar uchun dolzarblik qimmatini yo'qotmagan fan va diniy fanatizm, fan va diniy aqidaparastlik o'rtasidagi kurash mavzusini asos qilib olgani ko'zga tashlanadi. Dostonda umuman, dinni qoralash ko'zlanmagan, balki har qanaqa zulmu taaddi, zo'ravonlik bilan reaksiyon mohiyatini namoyon etgan diniy ekstremizm va uning qabih tarafdorlarini fosh etish ruhi ustuvorligini payqash qiyin emas. Yana unutmaylikki, shoir bu muammoni aql-zakovat bilan nodonlik, ezgulik bilan yovuzlik, haqiqat bilan yolg'on, hur fikrlilik bilan aqidaparastlik, erkinlik bilan tutqunlik o'rtasidagi shafqatsiz kurash negizida hal qilishga uringan. Bunda fan va diniy fanatizm o'ziga xos niqob vazifasini o'tagan.

Sulton Jo'ra o'rta asrlarda Yevropa tarixida kechgan voqelikka murojaat qilarkan, o'zbek adabiyotiga tamoman yangi mavzu xorijda yashovchi xalqlar turmushi mavzusini olib kirdi. Shu tariqa, italiyalik buyuk astronom, matematik va faylasuf olim Jordano Brunoning (1548-1600) fojeali qismati doston sujetiga asos qilib olindi.

Shoirning bolalarga atab yozgan "Yolg'onchi" (1941), "Zangori gilam" (1940) she'riy ertagidan tashqari "Karim va Qunduz" (1939) poemasi, "Parvoznoma" (1939) balladasi, "Qaldirg'och" (1939) she'riy ertaklari dolzarb mavzudaligi,



siyosiy, badiiy puxtaligi va katta salmog'i bilan shoir ijodining kamolotiga guvohlik qiladi.

Shoirning "Karim va Qunduz" poemasi o'zbek xalqining baxtiyor hayotini tasvirlashga bag'ishlangan. Shoir o'zbek xalqining realistik obrazini yaratish bilan o'sha davrlarda yuz bergan muhim o'zgarishlarni ko'rsatib beradi.

Shoir poema qahramoni Normat otaning fojiali sarguzashtini hikoya qilish bilan o'tmishdagi suv tanqisligi, suv uchun bo'lgan qonli mojarolar manzarasini, mehnatkashlarning og'ir hayot manzaralarini tasvirlab beradi. Rost, sho'ro davrida yer-suv mehnatkashlar qo'liga o'tdi. Suv haqidagi jirkanch fojeali hodisalar orqada qoldi. Ammo, ekin maydonlarining kengayishi, gigant xo'jaliklar tuzilishi orqasida suvga bo'lgan talab kuchayib, suv tanqisligi hamon sezilib turardi. Poema qahramonlari Karim va Qunduz shijoati, mehnatsevar, tadbirli kishilar ekani, Normatning keksaligiga qaramay kuch-g'ayratga to'laligi, kanal qazuvchilar ro'yxatiga birinchilardan bo'lib yozilishi ibratga sazovordir.

Sulton Jo'raning "Parvoznoma" balladasi ham fan va din o'rtasidagi muammoni ifodalovchi asardir. Asarning lirik qahramoni uchishga orzumand bo'lgan xalqdir. O'tmishda bu orzu faqat afsonalarda: goh "Semurg' qush", goh "Uchar ot", yoki "Uchar gilam"larda o'z ifodasini topganini shoir turli xalq afsonalari misolida hikoya qiladi.

Eng muhimi shundaki, shoirning hamma janrdagi asarlari o'ziga xos g'oyaviy teranlik, badiiy yuksaklikka ega. Sulton Jo'ra asarlari keng kitobxonlar ommasi tomonidan qizg'in qarshi olinishi va sevilib o'qilishi - shoirning xalq didiga kira biluvchi mahorat egasi ekaniga jonli guvohdir.

Sulton Jo'raning "Zangori gilam" she'riy ertagi folklor motivida betakror liro-epik asar yaratishning yorqin namunasidir. Ertak ikki qismdan iborat bo'lib, uning birinchi qismida o'zbek va tojik xalqlari o'rtasida keng tarqalgan



“Havorang gilam” (“Zangori gilam”) nomli ertak syujetidan keng foydalaniladi. Asar voqeasi ertaklardagidek:

Bor ekan-da yo‘q ekan,

Och ekan-da to‘q ekan,-

degan an‘anaviy zachindan boshlanadi. Unda zulm o‘chog‘i bo‘lgan boynikida xizmat qiluvchi Rahim ismli cholning hayoti, adolatsizlik tufayli boshiga tushgan jafoli kunlar tasvirlanadi.

Cholning Qorasoch ismli qizi va xotini bo‘lib, bular chor-nochor kun kechiradilar. Rahim boyning qo‘lida arzimagan ish haqi evaziga ishlab, oilasini zo‘rg‘a boqardi. Biroq ular “yarim och yirtiq – juldir ust-bosh” bilan yursalar-da, do‘st va inoq yashardilar. Ammo bularning bisotida bor-yo‘g‘i birgina gilami bo‘ladi. Gilam juda chiroyli edi. Havorang tog‘lar, yam-yashil shinam bog‘lar, firuza, shisha osmon, unda nur sochgan oy va yulduzlar, gullarning suratlari ipak bilan solinganidan ular gilamga qarab zavqlanardilar. Shu gilamdan dillari orom olib yashar edi. Rahim gullarni sevgandek, gilamni ham sevar, ko‘z qorachig‘iday asrar edi. Lekin ochko‘z boy kambag‘alning birgina gilamiga suq ko‘zi bilan qaraydi. Cholning “bitta-yu bitta gilam, u mening ko‘z nurginam”, - deganiga qaramay, shu gilam tufayli uni quvg‘in qiladi, Rahimning oilasi boshiga ko‘p jafolar soladi, o‘zini zindonga tashlaydi. Rahim boyning xizmatkori Mamat yordamida zindondan qochadi. Zindondan chiqqandan so‘ng na kulbasini, na xotini va na qizini topadi. Shundan keyin boshini olib, chiqib ketadi. Tog‘dagi bir g‘orda asalarilar-u, yovvoyi echkilar va tog‘ burguti yordamida, hamdardligida umr kechiradi. Kunlar ketidan kunlar o‘tadi. Asarning finali, ya‘ni yakuni shoirning shu turkumdagi boshqa epik asarlari singari tugaydi. Rahim ajoyib voqeaning guvohi bo‘ladi. U jahonni larzaga soluvchi ulkan bir xalq qurilishini, yangi - o‘zgacha hayotiy manzarani ko‘radi, ular cholga o‘zining zangori gilamiga o‘xshab ko‘rinadi. Chol hayron, boy qo‘lida ishlab yurgan odamlar bir-biridan xushchaqchaq, qo‘li- qo‘liga tegmaydi. Rahimning hayrat bilan bergan savoliga shunday javob qilishadi:



Shu on keng dala birdan:

Dedi: "Sizmi gapirgan?"

Hozir yer dehqonniki! Endi yangi qonun-ku! Qilinib katta bir jang, Boylar etilmishdir tang!.. "

Nihoyat, Rahim o'lkada katta bir o'zgarish ro'y berganini, ozodlik uchun qonli janglar bo'lganini, qizi xalqning o'zi xo'jayin bo'lgan xo'jalikka rahbarlik qilayotganini ko'rib, ko'zi sevinch yoshlariga to'ladi.

Cholning qizi Qorasoch bilan uchrashuv epizodi juda ta'sirli qilib tasvirlangan. Qishloq kengashining raisi qilib saylangan Qorasoch huzuriga Rahim cholni keltiradilar. Boy o'rnida yosh ayol o'tirganini ko'rgan chol hayron bo'lib qoladi: "Tili burro, boshiga qizil durra o'ragan" qiz cholning ko'ziga tanish ko'rinadi.

Qiz ham issiq boqish-la, Cholga mehr bag'ishlab, Qaradi-yu qoldi tek, Va to'satdan turib tik Dedi: "Oh, jonim dadam!" (Hayron qoldi bor odam)

Chol ham qizini - Qorasochni taniydi, boshi toshdan bo'lgan bolam deb alqaydi, o'zi singari och-faqlarning bunday hayotga erishishlariga ishongisi kelmaydi. Yangi hayotga erishish tarixlarini qizi otasini uyiga etib ziyofat bergandan keyin asta-sekin tushuntirib beradi. Asar sho'ro davri mahsuli bo'lganligi uchun albatta, shoir baxtli hayotning asoschisi sifatida Leninni ko'rsatadi va uni olqishlaydi. Shu o'rinda, "Zangori gilam" she'riy ertagining mana shu oxirgi qismi g'oyaviy jihatdan eskirganligini ham ta'kidlab o'tishga to'g'ri keladi.

Yozuvchi xalqning qudrati buyuk kuch ekanini, haq o'z o'rnida qaror topishini yuksak ta'sirchanlik bilan tasvirlaydi. Rost, asarga bugungi kun nuqtayi nazaridan qaraydigan bo'lsak, undagi g'oyalarning ba'zilari eskirganligi, davr esa o'zgarib, qarashlar ham yangilangani uchun unga boshqacha baho berish lozimligini ta'kidlab o'tish joiz. Bugun boylarga,



umuman, o'tmishga qarash, baho berish tubdan o'zgardi. Shoir o'z davrining farzandi, o'z zamonasining g'oyalari bilan to'yingan asarlar yaratishga haqli, shuning uchun Sulton Jo'raning asarlardan ba'zi bir jihatlariga shu nuqtayi nazardan munosabat bildirish joiz. Shunga qaramay, "Zangori gilam" ertagida bugun ham, bundan keyin ham kitobxonga ozuqa beruvchi fazilatlar talaygina. Ulardan birinchisi, insonning erk, ozodlik uchun kurashi masalasi. Shunga ko'ra, she'riy-adabiy ertakdagi Rahim chol uning qizi Qorasoch va boshqa personajlar ozodlikni sevuvchi, erkka intiluvchi, ezgulik uchun kura-shuvchi qahramonlar sifatida qadrlidir.

"Zangori gilam" she'riy ertagi shu nomdagi xalq ertagi sujetini qayta tabdil qilish asosida yaratilgan.

Umuman, ertak yangi zamon voqeligini ma'qullash ruhida bo'lib, shoirning yuksak saviyadagi folklorizm yaratish evaziga o'zbek bolalar epik poeziyasiga yangi poetik shakllar va obrazlar kirita olganligidan dalolat beradi.

Xalq og'zaki ijodi o'zining o'ta xalqchilligi, chuqur mazmuni, hayotiyligi, til va uslub ravonligi, badiiy barkamolligi bilan qadrlanadi. Xalq badiiy ijodining bolalar uchun eng zarur xususiyatlari uning namunalari sujetidagi voqealar sehrli hodisalar, ajoyib-g'aroyib obrazlarga nihoyatda boy bo'lishi va har bir bola uchun yangi bir olam hisoblanishidadir. Folklor asarlarining tili, badiiy uslubi juda sodda va ravon bo'lganligi uchun yosh kitobxon o'qishi, tushunishida qulaylik tug'dirishi tabiiy. Shuning uchun bolalar shoirlari xalq og'zaki ijodining mana shu fazilatlariga katta e'tibor berib ijod qildilar. Bu esa ular asarlarining xalqchillik ruhini oshirishga yordam beradi.

Sulton Jo'ra xalq ijodidan - folklor asarlaridan mohirlik bilan foydalanadi. U afsonaviy epos va ertaklar motivini real hayot lavhalari bilan to'ldiradi. Aytaylik, "Jannat" ertagida afsonaviy tasvirlar sujet uchun asos bo'lgan bo'lsa, "Zangori gilam"da muallif bosh qahramon Rahimning birinchi qismdagi



jafoli hayotini tasvirlashda xalq ertagi sujetidan keng va unumli foydalanadi. Rahimning keyingi hayoti, ya'ni avvalgisiga qarama-qarshi bo'lgan baxtli hayoti aniq va real hayot zaminida tasvirlanadi. Ko'rinib turibdiki, muallif folklor asarlarining quli bo'lib qolmagan, balki, undagi manzara, sujet va tasviriy vositalarni ijodiy qo'llagani holda o'z asarlariga sayqal beradi.

Shoir ertakda o'zi ko'p murojaat qiladigan qarshi qo'yish usulidan, shu bilan birga ramziylikdan unumli foydalanadi. Zangori gilam chol uchun og'ir va mashaqqatli hayotda birdan-bir ovunchoq zavq-shavq manbai edi. Gilamidan ajralgan chol ozodlikdan, erkidan ham ajralib tutqunlikda qoladi. Do'stlarining yordamida zindondan qutulgan Rahim chol yangi hayotga erishgan odamlar makoni - o'z qishlog'iga kelar ekan, eng avvalo, "Hovli o'rtasidagi qayrag'och qoshidagi" o'sha zangori gilamiga ko'zi tushadi. "Do'ndiq-do'ndiq bolalar, go'yo g'uncha lolalar" o'ynayotgan gilamga hayratlanib tikiladi. Gilam (ayniqsa, uchar gilamlar) xalq ertaklarida qahramonlarni sehr-jodu vositasida bir mamlakatdan boshqasiga bir zumda eltib qo'yuvchi bir vosita hisoblansa, Sulton Jo'ra uni ozodlikka eltuvchi, ezgulikka boshlovchi detal sifatida tasvirlaydi. Haqiqatan ham shu gilam tufayli Rahim chol qizini topadi, xalqning ezgulik topganini boylarning zulmidan ozod bo'lganini bilib oladi.

Shoirning mahorati shundaki, zangori gilamni shunchalik go'zal va samimiy ta'riflaydiki, yosh kitobxon ko'zi o'ngida havorang tog'lar, yam-yashil shinam bog'lar, firuza - shisha osmon, osmondan nur sochgan Oy va yulduzlarning barchasi ipak bilan solingan ko'p asl va go'zal yagona gilam yorqin gavdalanadi. Gilam Rahimga yetti avloddan meros qolgan, shuning uchun "gullar namni sevgandek" u gilamini sevadi.

Sulton Jo'ra - xayoloti kuchli ijodkor, qahramonlarning kiyimlari, yurish-turishlari asardan asarga o'tishlarida fantastika elementlari keng qamrovli ekani ko'rinadi. Bu asarni bugun o'qigan o'quvchi shoirning orzu-xayollari qaysidir ma'noda ro'yobga chiqqanligini anglab yetadilar.



Shoir Sulton Jo'ra mohir tarjimon ham edi. U tatar xalq shoiri Abdulla To'qayning bolalarga atalgan "Echki bilan qo'y haqida ertak" asarini o'zbekchaga o'girib, bolalar adabiyotimizni qardosh xalqlar mumtoz asarlari hisobiga boyitdi. Sulton Jo'ra so'zi bilan ishi bir inson edi. Shu sababli ikkinchi jahon urushi boshlanib, fashistlar xalqimizning boshiga olamshumul kulfat solganda ko'ngillilar safida janggohga otlandi. Qalam-u qurol bilan jang qiladi. Otishmalar ostida okoplarda "Chavandoz", "Pulemyotchi ovozi", "To'pchi Muhammad",

"Nayzamiz", "Berlin aptekasida", "Qahramon qo'chqor", "Sog'inib", "Jahon seni olqishlar" singari ikkinchi jahon urushi davridagi o'zbek harbiy she'riyatining sara namunalarini yaratdi. Ularda o'zbek jangchilarining jasoratini kuylab, g'alabaga ishonchlarini mustahkamladi. Sulton Jo'ra 1943-yilning 14-noyabrida

Belorussiyaning Gomel viloyatiga qarashli Borshchevka qishlog'ida bo'lgan shiddatli jangda halok bo'ladi. U jangda ko'rsatgan jasorati uchun vafotidan so'ng "Ikkinchi darajali Vatan urushi" ordeni bilan taqdirlangan.



Zafar Diyor (1912-1946)

O'zbek bolalar she'riyati taraqqiyotida yorqin iz qoldirgan kichikintoylarning sevimli shoirlaridan biridir. U 1912-yilda Namangan viloyatining hozirgi Chust tumaniga



qarashli Samsotqepa qishlog'ida dehqon oilasida tug'ilgan. 1916-yilda Zafarlar oilasi Toshkent shahriga ko'chib keladi. Zafarning otasi dala ishlarida, onasi esa bosmaxonada mehnat qiladilar. 1927-yilda Zafar to'liqsiz o'rta maktabni bitiradi va Samarqanddagi Narimonov nomli pedagogika texnikumiga o'qishga kiradi. Uning dastlabki she'riy mashqlari bilim yurti devoriy gazetasi sahifalarida ko'rina boshlaydi. O'tgan asrning 20-yillar oxiri va 30-yillarning boshlarida hozirgi "Tong yulduzi" gazetasida, "Yosh kuch" jurnallarida she'rlari chop etila boshladi. Shoir o'z asarlarida kichkintoylarning orzu-umidlari, armonlari, kattalarga berayotgan yordamlari, do'stliklari zo'r muhabbat bilan kuylanadi.

Zafar Diyor XX asrning 30-yillar bolalar adabiyotida o'z ovozigacha ega bo'lgan ijodkori edi. U 34 yil umr ko'rgan bo'lsa-da, shu qisqa davr mobaynida bolalar adabiyotimiz sahifalarini bezaydigan ko'plab she'rlar yaratishga erishgan.

U o'zbek bolalar adabiyotida maktabgacha va kichik maktab yoshidagi bolalarga mo'ljallangan yangi yo'nalishning tom ma'nodagi yaratuvchilaridan biri edi desak, yanglishmaymiz.

Zafar Diyorning ijodi 1928- yildan boshlangan. 1932-yilda chop etilgan ilk she'rlar to'plami "Qo'shiqlar"da Ona-Vatanni kuylash va vatanparvarlik, yaratuvchilik mehnati hamda yangi hayot qurilishidagi yutuqlar, yoshlarning mardonavor kurashi madh etilgan. Vatanparvarlik hissi bilan sug'orilgan "Tantana" (1938), "She'rlar" (1939), "Muborak" (1940), "She'r va hikoyalar" (1940) kabi to'plamlari nashr etilgan.

Zafar Diyor ijodida yosh avlodni ma'naviy kamolot sari yetaklash, ilm-fan yutuqlarini egallashga targ'ib qilish mavzulari yetakchi mavqe kasb etadi. "Serquyosh o'lka" va "O'zbekiston" she'rlari ona-Vatan go'zalliklarini kuylash va yosh avlodni vatanparvarlik ruhida tarbiyalashga xizmat qilsa, "Muborak" va "Zafar nishonasi" she'rlarida yaratuvchilik mehnati bilan Vatan shuhratini oshirishga xizmat qilayotgan xalqning halol mehnati



natijasida kun sayin gullab-yashnayotgan ona-Vatan kuylanadi. “Kel, uchaylik Shimolga”, “Po’lat qanotlar” (1937) she’rlari yosh avlodni mard va jasur, qiyinchiliklardan qo’rqmaydigan qilib tarbiyalashda katta ahamiyatga ega. “Mashinist”(1936) dostonida mehnat jarayonida tarbiyalanayotgan yangi avlod timsoli yaratilgan. “Burgut”, “Madrididan kelgan mehmon”, “Yangi ertak”, “Toshxon bilan Moshxon”, “Yuksak tog’, keng o’tloq va mard o’rtoq haqida qissa”, “Kichkina bog’bon” singari ertak va dostonlari esa bir jihatdan, o’zbek bolalar adabiyotida adabiy ertak va doston janrining shakllanishida o’ziga xos o’rin tutsa, ikkinchi tomondan xalq og’zaki ijodidan ta’sirlanish, o’rganish mahsuli sifatida e’tiborga sazovordir. “Kitob, mening do’stim” (1939), “Birinci qadam” she’rlari o’z davrining o’quvchilarini ilm-fan nuridan bahramand bo’lishga undaydigan eng sara asarlardan hisoblanadi. “Archa qo’shig’i” (1938), “Bahor” (1939), “Bahor keldi”, “Gunafsha”, “Qushlar qo’shig’i”, “Qanotli do’stlar” kabi asarlari yil fasllari, tabiat va hayvonot dunyosi tasviriga bag’ishlangan, Vatan go’zalliklarini ko’z-ko’z qilish ruhidagi asarlardir.

Shoirning Ikkinchi jahon urushi davrida yozgan “Bizning oila”, “Bizning qurolimiz” she’riy to’plamlariga kirgan “Ona qo’shig’i”, “Qurol bering menga ham”, “Oppoq bolam”, “Poyezd ketar frontga” singari she’rlarida xalqimizni nemis- fashist bosqinchilariga qarshi kurashga chorlash, vatandoshlarimizning frontdagi qahramonligi o’z aksini topgan bo’lsa, “9 may”, “Tabassum” she’rlari g’alaba nashidasi sifatida yangraydi.

Shoir vafotidan so’ng, 1948-yilda chop etilgan “Chaman” nomli she’, ertak va dostonlar to’plami maktabgacha yoshdagi bolalarga bag’ishlangan. Zafar Diyorning bolalarga atalgan she’rlari yosh avlod ma’naviy kamolotini ta’minlash, vatanparvarlik tuyg’usini tarbiyalash va shakllantirishda ulkan badiiy vosita bo’lib xizmat qiladi.

Zafar Diyorning ijodiy yo’li XX asrning 30-40-yillariga to’g’ri keladi. Bu davr adabiyoti haqida fikr yuritganda, avvalo,



badiiy adabiyot to 'lalgicha sho'ro siyosati manfaatlariga bo'ysundirilganini ta'kidlash joiz. Ijodkorlar xohish-istaklaridan qat'iy nazar, xalq xo'jaligining barcha sohalaridagi yutuqlar, ilm-fan, madaniyat va ma'rifat sohalaridagi ijobiy natijalarni sho'rolar tuzumining afzalliklari sifatida madh etishga majbur bo'ldilar. Zafar Diyor ijodi ham bundan mustasno emas. Biroq har bir ijodkor asarlari orasida tom ma'nodagi badiiyati, samimiyati, badiiy adabiyotning estetik-ma'rifiy mohiyati birinchi o'ringa qo'yilganligi bilan ajralib turadigan asarlar bo'ladiki, ular davrlar buhronidan omon-eson o'tib, bir umr kitobxonlarni eng yaxshi insoniy fazilatlar ruhida tarbiyalashga, umrboqiy qadriyatlarini kuylashga, sharaflashga xizmat qilaveradi. Zafar Diyor ijodida ham shunday asarlar oz emas. Ularda ota-bobolarimizning yaratuvchilik mehnatini madh etish, yosh avlodni otalar ishiga sadoqat ruhida tarbiyalash manfaatlarini yetakchi mavqe' kasb etdi. Jumladan, "Po'lat qanotlar", "Lola", "Parvoznoma", "Qahramonning o'limi", "Taygada suhbat" she'rlari qahramonlik haqidagi eng yaxshi, g'oyaviy-badiiy puxta she'rlardan hisoblansa, "Kitob, mening do'stimsan!", "Birinchi qadam", "Lager qo'shig'i", "Bog'chamiz", "Sentabr qo'shig'i" she'rlari yosh avlodni ilm-ma'rifat nuridan bahramand bo'lish sari yetaklashga xizmat qiladi.

"Bog'chamiz", "Birinchi sentabr", "Sentabr qo'shig'i", "Birinchi qadam" she'rlari bog'chadan ilk bora maktab sari yo'l olayotgan bolalar tilidan yozilgan. Ularda maktab va o'quv qurollariga muhabbat, savod o'rganish quvonchi va bir yosh ulg'ayish mas'uliyati o'z aksini topgan. "Lager qo'shig'i" va "Kanikul kunlari" she'rlarida esa yozgi ta'tilda oromgohlar quchog'ida o'ynab-kulib dam olgan, yangi kuch-g'ayratga to'lib, qadrdon maktabi sari oshiqayotgan o'quvchilar quvonchi tuyg'ulari aks etgan. Jumladan:

Yashna, Vatan,

Jon Vatan

Senga sharaf-shon Vatan.



Sensan

Bizning onamiz,

Hadya senga jon va tan,-

satlari bilan boshlanadigan “Vatan” she’rining ushbu quyma misralarida shoir qalbidan jo’shib chiqayotgan ezgu tuyg’ularini yosh kitobxonga yetkazish uchun mazmunga mos shunday o’ynoqi shakl topganki, ohangdorlik, vaznlardagi hissiy ko’tarinkilik yosh qalb urishining durkun zarblariga hamohang tushayotganday bo’ladi. She’rning ohangdorligini ta’minlaydigan badiiyat unsurlaridan takror san’ati “vatan” va “sen” so’zlarini 4 martadan takrorlash orqali yaratilgan bo’lsa; tajnis san’ati “jon” (birinchi o’rinda ko’chma ma’nodagi, erkalashni ifodalaydigan “jonim”, ikkinchi o’rinda esa o’z ma’nosida) va “vatan” (birinchi o’rinda o’z ma’nosida, ikkinchi o’rinda “va tan” so’zlari yordamida so’z o’yini) so’zlari vositasida yaratilgan. Binobarin, ana shunday badiiyat unsurlari, bir jihatdan, ijodkor mahoratini belgilovchi qirra bo’lsa, ikkinchidan, she’rning ham shakl, ham mazmun jihatidan baquvvat, puxtaligini ta’minlagan.

“Vatan” she’ri Ikkinchi jahon urushi yillarida yozilgan. Ma’lumki, har bir davrning o’z yetakchi mavzulari bo’ladi. Bu mavzularda yaratilgan asarlar qimmatiga esa, avvalo, konkret davr voqeligini qay darajada jonlantira olganligi bilan o’lchanadi. Shu ma’noda Ikkinchi jahon urushi davrining asosiy mavzusi ona Vatan madhidir. Shu davrda yaratilgan Ona-Vatan mavzusidagi asarlarda o’sib-ulg’ayib kelayotgan yosh avlodni tug’ilib-o’sgan, kindik qoni to’kilgan ona tuproqqa sadoqat ruhida tarbiyalash, uning har bir qarichini avaylab-asrashga o’rgatish ruhi ustuvorlik qiladi.

Biroq Vatan mavzusi Zafar Diyor ijodiga urush munosabati bilangina kirib kelgan tasodifiy mavzu emas. Uning “Serquyosh o’lka”, “O’zbekiston’ singari she’rlari serquyosh O’zbekistonning umumlashma poetik timsolini yaratishga bag’ishlangan. Bundan tashqari, o’ttizinchi yillarda bitilgan bir qator she’rlarida



diyorimiz go'zalliklarini butun olamga ko'z-ko'z qilgan, yosh avlodni ona-Vatanni yanada yashnatish uchun yaratuvchilik mehnati sari chorlagan yil fasllari Vatan go'zalligi bilan hamohang tasvirlanadi. Tabiat va hayvonot dunyosi tasvirida ham o'zgacha bir mehr barq urib turadi. "Yanvarda", "Archa", "Archa qo'shig'i", "Bahor yaqin", "Navbahor", "Bahor keldi", "Bahor keldi, o'rtoqlar", "Gunafsha", "Qushlar qo'shig'i", "Qanotli do'stlar" singari she'r va qo'shiqlar shular jumlasidandir.

"Archa qo'shig'i" (1938) she'rida yangi yil archasi atrofida quvna b o'ynayotgan bolalar shodligi, xursandchiligi tarannum etiladi. Shuni ham aytish joizki, shu she'r o'zbek adabiyotidagi archa bayrami, yangi yil archasi tasviriga bag'ishlangan ilk asarlardandir. Chunki yangi yilni bezatilgan archa atrofida o'yin- kulgi bilan kutib olish ham aslida o'ttizinchi yillarda joriy etilgan, O'zbekiston hayoti uchun esa bu umuman yangilik edi. Demak, bu ham she'riyatning hozirjavobligini, she'r qimmatini ko'rsatadigan misollardan. She'r bolalar tilidan yozilgan bo'lib, ularning baxt, quvonch qo'shig'i kabi yangraydi:

Chaman-chaman bog'larning,

Bizlar jambil, rayhoni.

Bizning quvnoq qo'shiqlar, Jaranglatar har yonni.

Haqiqatan ham, farzandlarimiz "chaman bog"ning obod Vatanimizning eng go'zal va so'lmas gullari "jambil, rayhon"laridirlar. Faqat ulargina "quvnoq qo'shiqlar" aytib, "har yonni jaranglatib", baxtli yoshlikni madh etishlari mumkin. Mana shu faxriyaning bolalar tilidan aytilishi va "jambil, rayhon" singari takrorlanmas o'xshatishlar esa she'r samimiyati va g'oyaviy-estetik ahamiyatini yanadi oshirgan, yosh kitobxonga to'la yetib borishini ta'minlagan. Bu fikr "Bahor" (1939) she'rida yanada yorqinlashtirilgan. Gul Vatan, gulzor Vatan bahorda yanada ko'rk ochishi, uning farzandlari gulu bulbullari erkinlikni, baxt-saodatni kuylashi she'rning boshidan oxirigacha qizil ip bo'lib o'tadi:



Yana gulga
To'lgay Vatan,
Biz qo'ynida yayraymiz;
Gul novdaga
Qo'nib turgan
Bulbul kabi sayraymiz...
Biz shu ko'rkam
Gulbahorning
Go'zal asl gullari!

Shu ruh tabiat go'zalliklarini Vatan go'zalligi bilan bog'lab tasvirlash shoirning bu mavzudagi deyarli barcha she'rlariga xos bo'lgan xususiyatlardandir. Ushbu she'rda ham yosh bolaning o'sib-unib kelayotgan beg'ubor gulga, Vatanning ushbu gullar bilan yanada chiroy ochgan gulzorga, farzandlarimizning Vatan go'zalliklarini kuylashdan charchamaydigan bulbulga o'xshatilishi to'la ma'noda o'zini oqlagan, she'r badiiyatini oshirishga xizmat qilgan.

Shuningdek, Zafar Diyorning hayvon va parrandalarga bag 'ishlangan she'rlarida ham shunga o'xshash ikki maqsad ko'zga tashlanadi. Ularning birinchisi bolalarga hayvon yoxud parrandalarning o'ziga xosliklari haqida ma'lumot berish bo'lsa, ikkinchisi bolalarni tabiat va hayvonot dunyosiga mehribon bo'lish, ularni avaylab-asrash va ko'paytirish hamda do'st bo'lishga undashdir. Har ikkala maqsad ham aslida tarbiyaga borib taqaladi. Tarbiyaning quruqdan quruq pand-nasihat tarzida emas, balki go'zal badiiy shaklga solingan she'r tarzida berilishi maqsadga tezroq yetkazishi va yosh kitobxonning badiiy didini ham charxlashini iste'dodli san'atkor to'g'ri anglagan va asarlarida aks ettira olgan ham.

Ma'lumki, bolalar adabiyoti bir vaqtning o'zida ham estetik, ham ma'rifiy ahamiyat kasb etadi. Binobarin, u yosh avlodni



ilm-fan nuridan bahramand qilish orqali ma'naviy kamolotga yetkazish manfaatlariga mas'uldir. Bolalar adabiyotimizda ushbu mavzudagi asarlar yetakchilik qilishi ham shu boisdan. Bu asarlarda ilm-ma'rifat ta'riflanadi, unga hamdu-sanolar o'qiladi. Ular orasida Zafar Diyorning "Kitob, mening do'stimsan!" (1939) she'ri alohida o'rin tutadi. She'r bola tilidan hikoya qilinishi, chuqur samimiyati va o'ynoqiligi, ravonligi va musiqiyliigi, bolalarbopligi bilan ajralib turadi.

Zero:

Gulshan aro men ila

Suhbatlaring chiroyli, Katta-kichik el aro Ulfatlaring chiroylik! - deyish faqat kitobga o'rtoq bo'la olgan bolagagina xosdir. Har bir to'rtlikdan so'ng takrorlanuvchi:

Shuning uchun deymanki, Kitob, mening do'stimsan! naqaroti esa she'r ohangini yanada musiqiylashtirgan, kitob yaxshi sifatlar jamuljami ekanligi ta'kidini yanada asoslagan. Ushbu she'rdagi jonlantirish san'ati (kitob bilan suhbat) she'r badiiyatiga ko'rk bo'lib tushganki, bu badiiyat unsurlari birlashib, shoir ijodiyotining betakror namunasi bo'la oladi.

Zafar Diyorning 30-yillar ijodiyotida satirik, yumoristik va allegorik tarzdagi didaktik asarlar ham alohida o'rin tutadi. Bunda, avvalo, yumor va majoziylikda bolalar adabiyotining ba'zi o'ziga xosliklari namoyon bo'lishining ta'siri ko'rinadi. Shuningdek, satira va yumorning tarbiyada katta o'rin tutishi ham ijodkorlarni ulardan unumli foydalanishga undagan bo'lish tabiiy bir holdir. "Zarar emasmi?" she'ri bu mavzudagi asarlar orasida ajralib turadi. Unda bolalar quvnoq kulgi bilan toza-ozoda yurishga, shaxsiy gigienaga amal qilishga o'rgatiladi va nuqsonlarini tuzatishga undaladi.


Ikkinchi jahon urushi davrida she'riyat bolalar adabiyotining yetakchi janri sifatida kichiklar ruhiy dunyosini chuqur ifodalay oldi. Zafar Diyor bu yillarda "Bizning qurolimiz"



(1941), “Bizning oila” (1942), “Sovg’a” (1944) singari she’riy to’plamlarni yaratdi. Bu to’plamlardagi kelajakka ishonch ruhi bilan sug’orilgan qator asarlarida shoirning front va mamlakat ichkarisidagi farzandlarimizning qahramonona hayotlari va insonparvarlik xislatlariga yo’g’rilgan olijanob tuyg’ulari poetik ifodasini topdi. Tasvirdagi lirizm kuchayib, bola qalbining katta voqealarga munosabatini aniq aks ettira olish darajasiga ko’tarildi. Tashviqotchilik, his-hayajonni yuksak pafosda ifodalash, jangovar chaqiriq, xitob singari emotsional kechinmalar asarlar mazmuniga chuqur singdirildi. Ona yurtga sadoqat, do’ stlik va mardlik mavzularining tasviriy ko’lami yanada kengaydi. Mazkur mavzularda yaratilgan asarlarda optimistik ruh, g’alabaga qat’iy ishonch ruhi barqaror bo’ldi. Bu davr shoir ijodining yulduzli, eng sermahsul va kamolotga erishgan davri bo’ldi.

Muhimi esa Zafar Diyor asarlari bugungi kunimizda ham, ertaga ham farzandlarimizni, shoirning o’zi bir she’rida ta’kidlaganiday, “o’zbek o’g’li er o’g’li, asl botir sher o’g’li” bo’lish ruhida tarbiyalashga beminnat xizmat qilaveradi.

Zafar Diyorning she’rlarida bolalarning tabiat va jamiyat hodisalari bilan tanishishiga katta ahamiyat beriladi. Kichkintoylar o’zlarining do’stlari kapalaklar, qaldirg’ochlar, laylaklar haqida quvnab-quvnab kuylaydi. Shoirning “Kapalak” she’ri sujetli voqea asosiga qurilgan. Jajji lirik qahramon kapalakka murojaat qilib, u bilan suhbat qilish, do’st tutinish orzusini bayon qiladi:



Kapalakning tutqich bermay, shoshib uchishi, guldan gulga qo’nib, sharbat so’rib o’tirishi - «pildir-pildir uchishi» lirik qahramonga zavq bag’ishlaydi, ammo uni tutolmaganidan halak. Negaki, u kapalakni juda yaxshi ko’rgani uchun do’st bo’lmoqchi,



xolos. Unga ozor yetkazmoqchi emas. Ana shu orzusini aytish uchungina uni tutib, suhbatlashmoqchi. Bu jihat kichkintoylar tabiatiga xos va mosligi anglashilib turadi.

Hoy. kapalak. kapalak. Qanotlanng ipakdak. Muncha shoshib uchasan, To'xta. so'zlayin andak. Uchrataman har kuni Seni har kun bog'chamda, So'Tib gullar sharbatin O'ltirasan olchamda. Borib ushlay deganda Shoshib darhol uchasan Sira tutqich bermasdan Guldan gulga ko'chasan.

Mendan aslo qochmagin. Do'st bilaman o'zimga. Pildir-pildir uchishing, Oh, yoqadi ko'zimga. Ucn. uchaver. uchaver, Go'zal bog'cham — gulshanda Sira ozor bermayman Sevgim. fikrim bor senda. Kapalakjon, kapalak. Qanotlaring ipakdak. Do'st bo'laylik ikkimiz. To'xta. so'zlayin andak!

Bu jihat shoirning “Binafsha” she'ri uchun ham xos bo'lib, maktabgacha tarbiya yoshidagi bolalarga mo'ljallab yoilgan. Bu kabi she'rlar sodda, samimiy tuyg'ularga yo'g'rilgan, obrazlarning ko'rimgililigiga asoslangandir.

Binafshaxon, binafsha Kulishlaring chiroyli: Bog'imizda ochilib Turishlaring chiroyli. Hamma chiqar dalaga Binafshalar tergalr, Men ham terdim bir dasta Opamizga bergali.

— Mana, opa, binafsha, Qarang, qanday chiroyli. — Yuring, — dedi opamiz, — Binafshalar teraylik.

Binafshalar ochildi Chakkangga taq. chakkangga:

Zafar Diyorning ertak va dostonlarida esa o'smirlar tafakkuri yetakchi. Shoirning 30-yillarda yozgan “Yuksak tog', keng o'tloq va mard o'rtoq haqida qissa” dostoni qo'riq va bo'z yerlarni o'zlashtirishga bag'ishlangan bo'lib, davr voqeligi yorqin aks etgan ertak-dostondir. U uch o'rtoq - keng o'tloq, yuksak tog' hamda mard o'rtoq - inson muloqoti, hamkorligiga bag'ishlangan. Ertak keng sahrolar tasviri, chang-u to'zon qoplagan dashtning qonib suv ichish orzusini hikoya qilish bilan boshlanadi. Ayniqsa, uning bag'ridagi o'tloq alamzada. Negaki:

– Dilbar yozda, bahorda, Kunduz, hatto nahorda, Bir qush yayrab o'tmasa, Bir qultum suv yutmasa, Karvonlar ham o'tar kam.



Shu sababdan o'tloq o'ksib-o'ksib yig'lab, qiyomatli o'rtog'i bo'lgan tog'ga dardli boqadi. Yuksak tog' esa usti to'la oppoq qor, xuddi posbon-u, osmon unga soyabondek turardi. O'tloq unga yolbora boshlaydi:

– Do'stim, senda suv mo'ldir, Ustingda qor mo'l-ko'ldir. Suv bor - shunday obodsan, Obodlikdan xo'b shodsan.

Sen ham yashnab kul desang, Sevinchlarga to'l desang, Ber suvingdan menga ham Qo'yay hayotga qadam.

Afsuski, shunday yuksak tog' qadrdon o'rtog'i - o'tloq sahroga obihayot berishdan, ko'ksiga suv quyishdan ojiz edi. U shundan nadomat chekadi:

Bilsang, oyoq-qo'lim yo'q.

Senga eltar yo'lim yo'q, Qanday qilib o'rtoqjon, Suv yo'llayman sen tomon. Buning uchun kuch kerak, Kuchga to' la zo'r bilak.

Ularning ana shu suhbati ustiga qomati chinordek, savlati Go'ro'g'lidek bir mard o'rtoq kelib qoladi. Birinchi bo'lib, yuksak tog' so'z boshlaydi:

– Hoy, mard o'rtoq, mard o'rtoq, Qara, shuncha keng o'tloq, Suvsizlikdan dili tog'... Chamanzorga aylantir, Mangulikka shodlantir.

Bu fikrni issiqlikdan qovjirab, hansirab yotgan o'tloq ham qo'llab quvvatlaydi: – Suv ber menga, suv bergin, Ko'ksimdan so'ng gul tergin, – deydi. Ana shundan keyin uch o'rtoq o'zaro kelishib, "Sir" tomon, ya'ni Sirdaryoga yo'l oladilar. U o'z yo'lida goh qirg'oqlarga sig'may to'lib-toshar, goh to'qaylar-u bog'lardan o'tib, Orol dengiziga suvini etib quyar edi. Inson qo'li tufayli o'sha suvlarning bir qismi, qaqrab yotgan sahrolarga burib yuboriladi.

Ertak shu uch o'rtoq orzusining ro'yobga chiqishi bilan xotima topadi. Shu nuqtayi nazardan qaralsa, do'stlikning, o'zaro hamkorlikning ulug'lanishi asarning tarbiyaviy ahamiyatini belgilaydi. Shuningdek, asar yosh avlodni



tabiatga muhabbat ruhida voyaga yetishlariga hissa qo'sha oladi. Zafar Diyor bolalar va o'smirlarga xos shijoatkorlikni, mehnatsevarlikni kuylagan. Ayni paytda o'z davrining dolzarb mavzusi - qo'riq va bo'z yerlarni o'zlashtirish masalasini bolalar adabiyotida o'ziga xos usulda, ertak janri sujetini zamonaviy voqelik asosida yaratishga erishadi. Lirik qahramonlarning nomlanishi (o'tloq, tog', o'rtoq) va sifatлари (keng, yuksak, mard) ham an'anaviy va zamonaviy talqinlarga xos. Shu bilan birga, asar g'oyasi bugungi ekologik fojealar zaminini oydinlashtirishga, uni zamondosh o'quvchiga tushuntirishga xizmat qiladi.

Umuman, Zafar Diyor ona yurt, serquyosh o'lka, kichkintoylar baxtiyorgligi, qiziqishlari, kechinmalarini tarannum etuvchi she'rlari bilan o'tgan asrning 30-yillari bolalar adabiyotiga alohida hissa qo'sha olgan, bugun ham she'rlari jajji o'quvchilar tilida baralla kuylanadigan shoir sifatida barhayotdir.



Quddus Muhammadiy 1907-yilda oilasida dunyoga keldi. Bo'lajak Abdurahmonbekov ancha savodli kishi Toshkent shahrida mehnatkash dehqon shoirning otasi Muhammad Alibek edi. Shu sababli u dastlabki ma'lumotni otasidan oldi. 1925-yilda otasi vafot etgach, Quddus Muhammadiy avval amakisinikida, so'ngra esa maktab-internatda tarbiya



oladi. Internatda Quddus Muhammadiyning birinchi she'ri "Chuvalachi" maydonga keladi va bu yerda chiqadigan "Quyosh" nomli devoriy gazetada e'lon qilinadi. Shu ilk mashqlaridayoq bo'lajak shoirning nafosat olamini kuzatish va badiiy idrok etish talanti hamda umumlashtirish mahorati yaqqol ko'rinadi. U yetti yillik maktabni tamomlab, Toshkent qishloq xo'jalik texnikumiga o'qishga kiradi. Bu yerda u bolalar uchun she'rlar yoza boshlaydi. Uning "Tong o'yini", "Paranji", "Ahmad va asalari", "Seleksiya stansiyasi" nomli she'rlari vaqtli matbuotda bosilib chiqadi. 1931-yildan Quddus Muhammadiy maktabda botanika o'qituvchisi bo'lib ishlaydi, shu bilan birga, O'rta Osiyo davlat universitetining biologiya fakultetida o'qiy boshladi.

Quddus Muhammadiy ilk she'rlaridan biri orqali ulkan adib Oybek bilan tanishadi. Oybek bu iste'dodli bolalar shoirini hamisha qo'llab-quvvatlab, ijodiga g'amxo'rlik qilib kelgan. Bir kuni Yozuvchilar uyushmasida mushoira bo'ladi. Mushoiraga raislik qilayotgan Hamid Olimjon she'r o'qish navbatini Quddus Muhammadiyga beradi. U zavq bilan "Sa'va sayrarkan" she'rini o'qiydi. Bo'lajak shoirning ijodiy qobiliyatini payqagan Hamid Olimjon she'r tugashi bilan uni yoniga chaqirtiradi. Qachondan beri she'r yozishini, qayerda ishlashini surishtirib, she'r ma'qul tushganini aytadi. So'ng bolalar uchun she'rlarning kamligi haqida to'xtalib, mana shunday ajoyib she'rlarni ko'proq yozishni ta'kidlaydi.

Shoirning birinchi she'rlar to'plami 1946-yilda "O'quvchiga esdalik" nomi bilan bosilib chiqadi. Shundan keyin "She'r va ertaklar", "Sinov" (1947), "Orzu", "Bahor keldi" (1948), "Qirq o'g'il, qirq qiz" (1951), "Yangi uy" (1953), "Mehribon do'stlar" (1955), "Tanlangan asarlar" (1957), "Qanday bo'lmog'im kerak?" (1960), "Juda qiziq, juda chiroyli" (1961), "Ona-bola mehri" (1963), "Bola boshidan, o'g'lon yoshidan" (1964), "Dono boboning nevara-chevaralari" (1966), "Qanotli do'stlar" (1967), "Ochildasturxon" (1971), "Tabiat alifbesi" (1971), "Bog'larda bolalar" (1976), "Qanotli do'stlar" (1978),



“Cho‘pon bobo qo‘shig‘i” (1979), “Kitob-oftob qo‘shig‘i” (1985), “Men sizga bir hikmat aytayin” (1987) singari 60 dan ortiq she‘r va ertaklar to‘plamlari Quddus Muhammadiyni haqli ravishda bolalar she‘riyatimizning sarvari, sarkori sifatida tanitdi. Bolalar adabiyotida o‘ziga xos hodisa bo‘lmish besh kitobdan iborat “Tabiat alifbesi” (1971-1980) esa tom ma’noda shoir ijodining gultoji hisoblanadi.

Quddus Muhammadiyning she‘riy to‘plamlari, ertak-dostonlaridan tashqari, maktab darsliklariga kiritilgan asarlarining o‘ziyoq, uning ommabop va hammabop she‘rlar yozganidan dalolat beradi. Muhimi, ana shu ehtiros hali-hanuz so‘ngani yo‘q. Shoir she‘rlari mustaqillik bolalari tomonidan ham birdek, sevib o‘qilmoqda. Shunga yarasha ijodkor badiiy olamining talqini o‘zining yangi qirralari bilan to‘lishib bormoqda.

Q.Muhammadiy ijodiga xos bo‘lgan muhim xususiyatlaridan biri hozirjavoblikdir. Shoir asarlarida ona-Vatanga muhabbat, a‘lo o‘qish, xulq-odobda boshqalarga namuna bo‘lishga da‘vat etish, fan va texnikani o‘rganish muammolari asosiy mavzulardan hisoblanadi.

Quddus Muhammadiy doimo zarur mavzularda asarlar yaratib keldi. Har bir she‘rni kundalik hayotimizdan olib yozdi. Yozganda ham qiziq yozdi, qizg‘in yozdi, soz yozdi. Bolalarni o‘qishga, hunar o‘rganishga, odobli bo‘lishga, mehnatga chaqirdi, qiziqitirdi, yordam berdi. Buni shoirning “O‘quvchiga esdalik” she‘rida ko‘rish mumkin. Asarda maktab o‘quvchisining ma‘naviy qiyofasi va vazifalariga mufassal to‘xtalib, o‘qish, bilim o‘rganish zarurligini ta’kidlaydi:

Bo‘lay desang bog‘bon,

Yo Vatanga posbon.

Yo osmonda uchuvchi,

Yo dengizda suzuvchi, Nimani qilsang tilak, Bariga o‘qish kerak.



O'quvchi, sendan talab,
Maktabga bor ertalab.
O'qi berib mehringni,
Qo'yib ko'ngil, zehningni-

satrlari minglab bolalarning kelajagini belgilashda, ularni ilm-ma'rifatga oshno qilishda yo'l boshlovchi bo'lib xizmat qilgan bo'lsa, ajab emas. Chunki nihoyatda samimiy bu she'rida shoir har bir yosh kitobxon bilan g'oyibona uchrashib, dildan suhbatlashadi, ularni hayotda o'z o'rnini topib, vataniga, xalqiga, oilasiga munosib farzand bo'lishga chorlaydi. Juda katta ma'rifiy-ta'limiy va tarbiyaviy ahamiyatga ega bo'lgan ushbu she'r badiiy-estetik qimmatini nuqtayi nazaridan ham bolalar she'riyati xazinasidan o'rin egallaydi.

Quddus Muhammadiy ijodiga xos bo'lgan asosiy xususiyat uning asarlarida badiiylik, ma'rifiylik va tarbiyaviylikning uyg'unligi, chambarchas bog'lanib ketganligidadir. Shoir asarlarining yetakchi mavzulari Ona-Vatanga muhabbat, a'lo o'qish, fan va texnikani egallash, xulq-odobda kamolotga intilish singarilarda namoyon bo'ladi. U har bir she'rini bevosita bolalar hayotidan olib yozishga intiladi, kichkintoylarni a'lo o'qishga, kasb-hunar o'rganishga, odobli va mehnatsevar bo'lishga chorlaydi.

Shoir ijodida mehnatsevarlik va mehnatkashlar timso-
lini yaratish mavzusi ham alohida o'rin tutadi. "Mirob", "Bu binoni kim qurgan?", "Mamajon shofyor", "Mashinistka", "Ipak nimadan paydo bo'ladi?", "Militsioner amakim", "Sharofat xolam pazanda" she'rlarida shoir turli kasb egalarining fazilatlarini ulug'laydi, yosh kitobxonni kasb-hunar sirlari bilan tanishtiradi, mehnatkash inson qo'li bilan yaratilgan har bir buyumning yaratilish tarixini hikoya qilib beradi, eng oddiy kasb- hunardan ham go'zallik izlaydi, oddiy mehnat kishisi timsolini bolalar nazdida o'rnak bo'ladigan ulug'vor inson darajasiga ko'taradi



Quddus Muhammadiy ijodiga xos jihatlardan yana biri ona-tabiatni tarannum etishda namoyon bo'ladi. U yurtimiz tabiati, fasllarining go'zalligini berilib tasvirlash bilan o'quvchida go'zallikni sevish hissini tarbiyalaydi, o'z fikrlarini tabiat tasviri, ko'rinishlari va fasllari orqali jonlantirib beradi. "Bahor ostonasida", "Bahor keldi", "Bahor meni chaqirar", "Bahor bilan so'zlashdim" turkum she'rlarida bahor kelishi bilan tabiat uyg'onishi, dala-dashtlar dehqonlar mehnati bilan yanada yashnab, ko'rk ochishi yorqin tasvirlar, poetik epitelar, o'xshatish va jonlantirishlar vositasida go'zal badiiy bo'yoqlarda tasvirlasa, "Qish ham chiroyli", "Qish ertasi", "Qish boboning hazili" she'rlarida qish fasli go'zalliklarini yosh kitobxon nigohi bilan kashf etadi. Bu jihatdan, ayniqsa, shoirning "Bahor keldi" she'ri e'tiborga sazovordir:

Qo'llarida soz bilan,
Gul-g'uncha pardozi bilan,
Silkinib parvoz bilan,
Uchib turna g'oz bilan
Sevimli bahor keldi.

Shoir tabiatning uyg'onish fasli bo'lgan bahorni tom ma'noda jonlantirish bilan tabiatning uyg'onishini xursandchilik ayyomi, to'y-tomoshaga o'xshatadi, bahorning qo'llariga sozini olib, gul-g'unchalar bilan bezanib - pardozi qilib, yurtimizga bahorda tashrif buyuradigan turna-yu g'ozlar bilan birgalikda parvoz qilib kirib kelishi manzarasini yosh kitobxon ko'z o'ngida yorqin namoyon qilishga erishadi. "Bizning kuz" she'ridagi:

Kuzimizning go'zalligin, Og'aynilar, ko'rganmisiz? Tokdan husayn, yerdan qirqma, Shoxdan behi uzganmisiz?

Uzum uzib, sharbat suzib, Shinniga o't yoqqanmisiz? Gala-gala do'stlar bilan Duv-duv yong'oq qoqqanmisiz? satrlari esa serquyosh o'lkamizdagi pishiqchilik fasli hisoblanmish kuzning o'ziga xos manzarasi yaratilganligi bilan e'tiborni tortadi.



Shoir ijodining ushbu qirralari qay jihatlardandir, xalq og'zaki ijodiga yaqinlashib ketadi, tasvir va ta'riflarning xalqona soddaligi, tabiiyligi, beg'uborligi bilan e'tiborni tortadi. Ma'lumki, Quddus Muhammadiy 1941-45- yillarda Islom shoirning kotibi bo'lgan. Ta'bir joiz bo'lsa, ushbu xalqonalik shogirdga ustozdan ko'chgan bo'lib, xalq og'zaki ijodi donoligining shoir ijodiga samarali ta'siri dalolatidir.

Quddus Muhammadiy she'rlaridagi yana bir fazilat shoirning jonli tabiatga tabiatshunos murabbiy sifatida nigoh tashlashi va undagi har bir dov-daraxt, o'simlik, gullar hamda jonivorlar - qushlardan qurt-qumursqalargacha har birini yosh kitobxonga tanishtirishi, eng oddiy narsalardan ham go'zallik izlashi, o'quvchining tabiat haqidagi tasavvurini boyitishi, bilmaganini bildirishi, ko'rmaganini ko'rsatishida aks etadi. "Tok daraxti bir xil-u, uzumi nega har xil?", "Tolim gullaydi-yu, nega meva tugmaydi?", "Shaftoli doktor", "Chuvalchang- traktor" she'rlari shu jihatdan xarakterlidir.

Shoir ijodining yana bir qirradi yosh avlodning a'lo o'qishi, xulq-atvorining shakllanishiga xalaqit beradigan yomon odatlarni hajv yo'li bilan tasvirlash hamda o'tkir satira tig'i va yengil kulgi vositasida tuzatishga harakat qilishida ko'zga tashlanadi. Mashhur "Dum" she'ridan boshlab, "Ahmadjonga uyat", "O'tkirjon va vaqt", "Do'nansher nega "2" chi?", "Rav-shanjonning qo'li tilga kirdi", "Tugmacha" singari ko'plab she'rlarida bolalar tabiatidagi turfa nuqsonlar ba'zan bevosita, ba'zan majoziy yo'lda hajv tig'i ostiga olinadi. Bu she'rlarni o'qigan yosh kitobxon hajv qilingan qahramonlar timsolida o'zini ham ko'radi, xulq-atvoridagi shunday kamchiliklardan tezroq qutulishga harakat qiladi.

Muhimi shundaki, shoir ijtimoiy hayot voqealari va tabiat hodisalariga teran nazar tashlaydi, o'ziga xos ichki va tashqi tomonlarini, rivojlanish qonuniyatlarini chuqur idrok etgan holda ularni bolalar adabiyoti talablariga muvofiq, jonli va



dinamik tarzda gavdalandiradi, badiiy umumlashma obrazlar yaratadi, asarlarini bolalarning yoshiga, talabiga va saviyasiga mos qilib yaratadi.

Quddus Muhammadiy “nimavoylar”ning savollariga jamiyatning ertasini o‘ylagan holda javob izlashi sababi, she’rlar sarlavhasi ham savollardan iborat: “Dadajon, nima uchun oftob yerga qarab turadi?”, “Kimning uyi eng kattakon?”, “Hamma narsa yer ustida, yer o‘zi nima ustida?”, “Olcha nega qip-qizil?”, “Yong‘oqning qobig‘i nega qattiq?”, “Yong‘oqni nega yong‘oq deymiz?”, “Tok daraxti bir xil-u uzumlari nega har xil?”, “O‘rik nega sarg‘ayib pishadi?”, “Jiydaning shoxi nega egik?”, “Shaftolining bargi nega achchiq?”, “Sada nega meva qilmas?”, “Dada, bog‘bon tokni nega qirqib turadi?”, “Qora mushukchani mashina nega bosdi?”, “Nima uchun mushuk odamlardan ajralmaydi?”, “Mol nega kavsh qaytaradi?”, “Chittak nega qittak?”, “Qaldirg‘ochlar charchamaydimi, dada?”, “Laylakning oyoq-tumshug‘i nega uzun?”, “Qushlar qishda qayda qo‘noqlar?”, “Xo‘roz nega qichqiradi?” kabi. Bular shunchaki jo‘ngina savollar emas, har qanday ota-ona ham ularga dabdurustdan nima deb javob berishga qiynaladi. Aytaylik, o‘rik nega sarg‘ayib pishadi? - degan savolga g‘o‘raligida turshak bo‘lgan o‘rik quyosh nuri bilan haroratdan xlorofill so‘rib, qizarib pishib yetiladi, deb javob bergudek bo‘lsangiz, unda xlorofill nima, quyoshdan uni qanday so‘radi, kabi yangidan-yangi savollar tug‘iladi. Quddus Muhammadiyning topqirligi shundaki, u bunday savollarga insonning mehnati va kasbu korini sharaflavchi ma’noga ega didaktik javob topadi, bu didaktik javob yangi savolning tug‘ilishiga deyarli o‘rin qoldirmaydi. Aytaylik, chindan ham o‘rik nega sarg‘ayib pishadi? Shoir bu savolga shunday javob beradi: o‘rik o‘zini ekkan, vaqtida sug‘organ, vaqtida tagini yumshatgan, vaqtida quruqshagan shox-shabbasini qirqib parvarishlagan inson dasturxonini ziynatlashni intiqlik bilan kuta-kuta rangi sarg‘ayib, yetilib pisharmish. Shoir bunda xalqning “kuta-kuta rangi somon bo‘ldi” iborasi mazmunini yangicha talqin etgan.



Quddus Muhammadiy she'rlarini to'plam tarzida tartib berishda sharqona mumtoz adabiyotimizning devon tartib berish an'analariga ijodiy munosabatda bo'lishga harakat qilib, o'z asarlaridan saralarini "Oftob, Yer, Suv, Havo", "Dov- daraxt mehrigiyo yashil do'stlar", "Yerdagi jon-u jondorlar", "Qanotlilar" hamda "Odam va maqollar" sarlavhalari ostida besh guruhga jamlab, 1971-yilda "Tabiat alifbesi" nomi bilan nashr ettirgan edi. Bu kitob yosh she'r ixlosmandlari tomonidan katta qiziqish bilan qabul qilingach, shoir uning qismlarini kengaytirib kitob holiga keltirishga kirishdi, bu sohadagi izlanishlarini 1974-yilda boshlab, 1988-yilda intihosiga yetkazdi. Yetti yil davomida umumiy "Tabiat alifbesi" nomi ostidagi besh she'riy to'plam, chunonchi, "Tabiat alifbesi" (1-kitob, 1974), "Bog'larda bolalar" (2-kitob, 1976), "Qanotli do'stlar" (3-kitob, 1977), "Cho'pon bobo qo'shig'i" (4- kitob, 1979), "Odam - olam qo'shig'i (5-kitob, 1981) kabilar bosilib chiqdi.

Shu tariqa, Quddus Muhammadiy o'zbek bolalar adabiyoti tarixida ilk bor besh kitobdan iborat yaxlit majmua yaratish an'anasini boshlab berdi. Bu besh kitobdan iborat she'rlar majmuasi har qanday ko'p tomlik saylanma, yoki tanlangan asarlardan shunisi bilan farq qiladiki, ularning har bir kitobida alohida bir mavzudagi she'rlar, ertaklar jamlangan bo'lib, barchasi birgalikda tabiat alifbesidan saboq beruvchi yagona konsepsiyaga birlashtirilgan.

"Tabiat alifbesi" deb atalgan birinchi kitobda olam va uning tuzilishi, yil fasllari, jismlar va ularning inson hayotiga daxldorligini ifodalovchi quyosh, yer, suv va havo haqida bahs etuvchi she'rlar jamlangan bo'lsa, "Bog'larda bolalar" nomli ikkinchi kitob nabotot olamini tashkil etuvchi dov-daraxtlar, gullar, xullas, yashil do'stlar haqidagi she'rlardan tarkib topgan.

Hamza nomidagi Respublika Davlat mukofotiga sazovor bo'lgan uchinchi kitob "Qanotli do'stlar" deb nomlangan va unda qushlar olami, ularning xilma-xil tabiati hamda insonlar hayotiga daxldor qirralarini ifodalovchi she'rlar jamlab berilgan.



Masalan, kaptar haqidagi she'rda uning "g'uv-g'uv" xonishi va unga ohangdosh tovushlarning faolligi qush haqidagi tasavvurni uyg'ota oladi:

Kaptarim deydi g'uv-g'uv, G'uv-g'uvlab nima der u?
Kaptarimning so'zi bu, Kaptar so'zi qizig'-u!

G'uv-g'uv degani o'quv, O'quvga kerak uquv, Kaptar maktabi yo'g' -u Kitob-daftari yo'g'-u.

G'uv-g'uv so'zi- maktabi, Daftar, qalam, kitobi.

Uni o'qib der g'uv-g'uv, G'uv-g'uvning ma'nosi shu!

Diqqat qilinsa, butun she'r vujudidan kaptar ovozi taralayo'tganday, kaptar ovozini ifodalovchi "g'uv-g'uv" taqlidiy so'zi satrlar oxiridagi "u-bu", "o'quv- uquv", "yo'g'-u" va "shu" so'zlari hosil qilgan ohangdoshlik asosida nafaqat uning shakily, balki didaktik ma'nosi ham ahamiyatli ekani oydinlashadi.

Kasb-hunar va mehnatga havas uyg'otuvchi she'rlar "Cho'pon bobo qo'shig'i" nomli to'rtinchi kitobga jamlangan bo'lsa, insonning tabiat farzandi ekanligi haqidagi she'rlar beshinchi kitob sanaluvchi "Odam - olam qo'shig'i" mundarijasini tashkil etadi. Shu zaylda besh she'riy kitob inson va uning hayoti, inson va uning tevarak-atrofida yashovchi qushlar, hayvonlar, hasharotlar, nabotot olami, osmon jismlari, yerdagi narsalar bilan munosabati mohiyatini bolalarga xos qarashlar zamirida badiiy talqin qilishga yo'naltirilgan xilma-xil janrlardagi asarlar silsilasini qamrab olgan. Shu fazilatiga ko'ra, bu besh she'riy kitob nainki Quddus Muhammadiy ijodida, balki XX asr o'zbek bolalar she'riyati tarixida ham o'ziga xos adabiy hodisa bo'lib qoldi. Uning bosh qahramoni esa bolalik va shoirning o'zidir

Quddus Muhammadiy butun ijodiy faoliyati davomida xalqni o'z ustozlari deb bildi, xalqning boy va qadimiy og'zaki badiiy ijodiga mehr bilan qaradi, uni qunt bilan o'rgandi. Xususan, xalq shoiri Islom ota Nazar o'g'liga shogird tushib, ancha vaqt davomida ijodiy muloqotda bo'lishi uning xalq ijodi sirlarini yanada chuqurroq idrok etishiga keng imkoniyat



yaratdi. Xalq qo'shiqlari ritmidagi o'ynoqilikni yuzaga keltirgan vositalarni his eta boshladi, xalq afsonalari, rivoyat, naql, ertak va topishmoq janrlariga xos shakl, syujet motivlari va ritmidan ijodiy ilhomlanib, o'zbek bolalar epik poeziyasini folklorizmlarning xilma-xil jilolari bilan boyitdi. Natijada, "Tovuq nega qaqillaydi?", "Xo'roz nega qichqiradi?", "Mushuk nega pixillaydi?", "Olahakka og'zidan tug'ar emish", "Hakkavoyning xom xayoli", "Bulbul bilan mayna qissasi", "Oy yuzida nega dog' bor?", "Tentak soy", "Buvi va sandiq" qissasi, "Tut daraxti va ipak qurti tutilishi", "Zag'izg'on", "Toshbaqa" singari she'riy afsona va she'riy rivoyatlar, "Bir mayizni qirq bo'lib" she'riy naqli, "Bir o'zboshimcha chumchuq haqida", "Qo'ng'izoy bilan Sichqonvoy", "Sandal va pechka", "Chivin urushqoq va shamol botir", "Oltin daraxt", "Dono bobo va bir yuz besh pahlavon o'g'il va qizlari haqida ertak", "Ola bola va a'lo bola qissasi", "Bog'bon chol uch xum ertak aytganmish", "Erkinjon oyga chiqibdi", "Adashgan bola qissasi" kabi she'riy ertaklar hamda "Oltin olov, shirin palov va yashil qozon haqida topishmoq" she'riy ertak-topishmog'idan iborat oraliq janrlardagi asarlari dunyoga keldi.

Bundan tashqari, Quddus Muhammadiy mumtoz she'riyatimizdagi chistonnavislik an'analarini ijodiy rivojlantirib, "Toping-chi?", "Viz-viz", "O'ylab top", "Buni toping, bolalar, aytib bermang onalar" kabi qator she'riy topishmoqlarni yaratdi.

Aytaylik, "Toping-chi" topishmog'ida mikroskop, "O'ylab top"

topishmog'ida kirpi yashiringan:

Dumdumaloq jonivor, Tikanak choponi bor. Kechasi ovga chiqar, Ilonni tutib qirqar.

Hech narsadan qo'rqmaydi, Suvga tushsa cho'kmaydi. Olma, uzum yemishi, Olmosdek o'tkir tishi.

Odamni ko'rsa koptok, O'zi hayvon, o'ylab top!

Shoir topishmoq janri imkoniyatlaridan keng miqyosida foydalanishni ko'zlab, bolalarni ijtimoiy voqelikka faolroq



aralashtiradigan va shu xususda fikr yuritishga da'vat etadigan topishmoq-she'r va topishmoq-ertak singari oraliq janrlarda quvnoq asarlar ijod qildi. "Buni toping, bolalar, aytib bermang, onalar" topishmoq she'rining dastlabki bandi yettilik shaklida: olti satri jumboqni tasvirlasa, so'nggi satri o'sha jumboq yechimini ifodalaydi. Keyingi bayti sakkizlik shaklida: yetti satrda jumboq tasvirlangan, keyingisida yechim berilgan. Jumboqlarning birinchisi - lolalar, ikkinchisi - buloqlar! Keyingi jumboq 21 satrda, to'rtinchi jumboq 20 satrda, beshinchi jumboq 10 satrda, oxirgi jumboq 11 satrda tasvirlanib, javobi sir tutilgan. Bularni topish o'quvchilarga havola qilingan. Topishmoq:

Buni toping bolalar, Aytib bermang, onalar!, - satrlari bilan intiho topgan.

"Qo'ng'izoy bilan Sichqonboy" Quddus Muhammadiy ijodiyotidagi shoh asar bo'lib, 1940-yilda yozilgan va dastlab "Mushtum" jurnalida "Qo'ng'iz bikach bilan Sichqonvoy" nomi ostida bosilib chiqqan. Shoir uni yana qayta ishlov berib, takomillashtirib 1955-yilda hozirgi nomi bilan e'lon qildi. Shundan beri qayta-qayta nashr etilgan bu asar o'zbek bolalar epik poeziyasi taraqqiyotida o'ziga xos salmoqqa ega bo'lib, Hamid Olimjon, Mirtemir va Sulton Jo'ralar boshlab bergan she'riy ertaknavislik an'anasi hosilasi sifatida yuzaga kelgan.

Qo'ng'izoy va uning tarafdorlari bilan Sichqonboy va uning tarafdorlari o'rtasidagi o'zaro kurash lavhalari ertak sujeti asosini tashkil etadi. Qo'ng'izoy o'z muhabbati uchun har qancha kurashmasin, pul va zo'ravonlikni kasb qilib olgan Sichqonboyga tegishga majbur bo'ladi. Sichqonboyning o'z xotini va bolalari bor, lekin u Qo'ng'izoy visoliga yetish uchun hech narsadan qaytmaydi, hech narsani ayamaydi, xotinini qo'yib yuboradi, Qo'ng'izoyga sovchi ustiga sovchi yuborib, uni ham, ota-onasini ham holu joniga qo'ymaydi. Boshida o'zini "ombor mudiri, mudirlarning kuziri, tekin puli" oshgani-dan shoshilib, bosar-tusarini bilolmay "hamyonini xazonday socha boshladi". Bular bilan ham muddaosiga yetolmasligini



payqagach esa Kallamushni sovchilikka yuborib, Qo'ng'izoyning otasiga po'pisa qilib, qizini bermasa, o'ldirajagini aytib, nihoyat murodiga yetadi. Shoir Sichqonboy o'tkazgan to'y lavhalarini yanada yorqinroq chizadi. To'yga oid rasm- rusumlar tasvirida Sichqonboy va uning safdoshlarining xatti-harakati, dabdabali to'y manzarasi real aks etadi:

Tekinxo'rlar kelishib,

Biri pazanda bo'pti, Biri sozanda bo'pti, Ola qarg'a karnaychi, Qora qarg'a surnaychi. Baqalar nog'orachi, Go'ng pashsha hofiz, kuychi. Beshiktervat o'yinchi, Chigirtka chertar g'ijjak. Sichqon olifta luchchak.

Chirildoq shovvoz naychi, O'yin tushar ninachi.

O'rgimchak tor quribdi, Qo'ng'izoy oh uribdi.

Bu tasvirda har bir qush, hasharot yoki hayvon o'z qiyofasi, harakati va ovozi bilan jonli gavdalandirilgan. Ularning barchasi to'y shavqidan sarmast, faqat Qo'ng'izoy diliga kulgi sig'maydi. Uning butun vujudini alam va norozilik qoplagan. Shoir bu holatni kelindan rozi-rizolik so'rash udumi orqali yanada bo'rttiradi. Qo'ng'izoyning har qancha zo'rlashmasin, tan mahramlikka rozi bo'lavermaydi, lekin qayta-qayta so'rovlardan keyin uning yangasi Qo'ng'izoy qiz tilidan "ha" deb yuboradi. Nihoyat qizni Sichqonboy uyiga etgan zahoti, yo'lak tomonda:

Qo'shni bo'lak tomondan.

Yig'lagan ovoz kepti, Bekilmagan eshikdan, Chiqibdi sichqon bekach. Kavak uyda qon bekach, Sichqonboyning xotini. Bir vaqt sevgan otini. Ya'ni jufti yo'ldoshi, Qo'ng'izoyning kundoshi. Ortida sichqonchalar, Tiriklay yetimchalar. Tizilishib ketma-ket,

dadalashib, chiyillab kela boshlaydilar. Sichqonboy qancha g'azablanmasin, Qo'ng'izoyning dili ham shu qadar og'riqqa to'lib ketibdi. Bular ham yetmaganday, "Sichqon o'lsin, xotinboz" chiqib qoldi. U "Qancha xotinni qo'ydi, ko'plarni ko'zin o'ydi".



Ustiga ustak yana “Ichib keladi kunda, ba’zida yarim tunda” janjal, mashmasha ko’targani-ko’targan. “Erkak xotinga podshoh deya” Qo’ng’izoyini yulqib uradi. Xotiniga Chumchuq bilan yuribsan, - deb tuhmat qilishdan ham tap tortmaydi. Holbuki, Qo’ng’izoyning qo’li uy ishlaridan bo’shamasdi: “Kasov edi qo’llari, Supurgi sumbullari”. Dard ustiga chipqon deganlaridek, qaynonasi ham chayonday unga nashtar sanchgani-sanchgan edi. Bunday og’ir vaziyatdan to’ygan Qo’ng’izoy bir kuni qochib onasinikiga keladi. Sichqonboy uning izidan kelib, yana zo’ravonlik bilan uyga olib keladi. Endi uni avvalgidan battar xo’rlay boshlaydi. Shunda uning eski do’stlari kapalak-u ninachilar joniga oro kirib:

Qo’rqma sichqon do’qidan, So’yloq tishi o’qidan. Sen uchun biz parvona, Emasmiz-ku begona. Sichqonlar ko’zini och! Dugona, o’rmonga qoch!-

deya maslahat beradilar. Qo’ng’izoy shu maslahatga amal qilib, oysiz qorong’u tunda o’rmonga qarab qochadi. Uni o’rmondagi dov-daraxtlar-u gullar, sayroqi qushlar kapalak va ninachilar xursand kutib olishadi. Shunda u tinmay ishlaydi va o’ziga mos mehnatkash asalari bilan topishib oladi. Endi ularning to’yi eskicha udumlarsiz, o’zlari xohlaganlaricha zavqu surur bilan bo’lib o’tadi. “To’yga yurak to’yboshi” bo’ladi. Bu oddiy bir to’y bo’lib, unga barcha o’rmonliklar keladi:

Kelishdi juft-juft bo’lib,

Ketma-ket to’p-to’p bo’lib. Sa’va, bulbul, to’rg’aygacha, Qolmadi chittakkacha.

Bo’ldi ajoyib bazm, O’yin, askiya, hazil. Qushlar sayrar - orkestr, Laylak -drijor master.

Kapalaklar o’yinchi,

Raqsga tushar ninachi.

Ayiqqlar masxaraboz,

Maymunlar o’ynar dorboz.

Bolarilar xizmatda, Qo’ng’izoyim izzatda.



Shoir to'y manzarasini butun borlig'i bilan harakatda ko'rsata olgan. Shu zavqu quvonch Qo'ng'izoyning baxtli turmushi dalolatiga aylangan.

Ertak oxirida Sichqonboy o'g'rilikka kirib, mushuk qo'liga tushgani xabar qilinarkan, qissadan hissa tarzida "Har kim ekanini o'rar", degan xulosa o'rta tashlanadi. Asar uchun tanlangan voqelik, konflikt va g'oya kattalar hayotiga to'g'ri kelsa-da, ammo u allegorik obrazlar vositasida shartlilik asosida ifodalanganligi natijasida bolalarbop mohiyat kasb etgan. Muhimi, asar

yaratilganiga qariyb bir asr bo'layotgan esada, undagi tabiat manzaralari va personajlar tasviridagi mutanosiblik, tanlangan sujetning qiziqarliligi, muammoning hayotiyligi diqqatga sazovor va shu sababli u yosh kitobxonlar tomonidan hamon sevib o'qilayotgani oydinlashadi.

Shunday qilib, Quddus Muhammadiy o'zbek bolalar she'riyatini tom ma'noda yangi mavzular va g'oyalar, yangi badiiy shakllar va obrazlar, yangi tasviriy vositalar va uslublar bilan boyitdi; navqiron naslning orzu-armonlari, o'yin, o'qish va yashashdagi zafarlari, iztirob va quvonchlari, orzu va umidlarini, odam va olamga munosabatlarini turfa jilolarda kuylab, o'z yurtida va uning sarhadlaridan tashqarida ham tanildi. Uning asarlari yigirmadan ziyod tillarga tarjima qilinib, S.Marshak, A.Barto, S.Mixalkov singari bolalar shoirlari e'tiborini qozondi.

Shoir ijodining nozikta'b tadqiqotchilaridan biri, akademik M.Qo'shjonov fikricha: "U nima to'g'risida asar yaratmasin, nima haqida gapirmasin, doim o'sha narsadan inson hayoti nuqtayi nazaridan ma'no izlaydi. Shoir shu ma'noni topadi ham. Bu oddiy bir ma'no emas, balki bolalarning hayotdan oladigan birinchi taassurotlarini izohlaydigan, uning dunyoqarashi shakllanishiga xizmat qiladigan ma'no".

Bolalar she'riyatimizning tom ma'nodagi sarbonlaridan biri bo'lmish Quddus Muhammadiyning sodda-beg'uborligi she'rlarida manguликka ko'chgan bo'lsa, qalbi she'rlarida qodi.



Shukur Sa'dulla 1912-yilning 15-yanvarida Jizzax shahrida xizmatchi oilasida tug'ilgan. U dastlabki savodini eski maktabda chiqargach, 1924-yilda Samarqand shahriga kelib, pedagogika bilim yurtida o'qiydi. 1932-yilda shoirning «Hayqiriq» nomli 1-she'rlar to'plami chop etiladi.

Shukur Sa'dulla 1931-yilda O'zbekiston Davlat nashriyotining bolalar va yoshlar adabiyoti bo'limiga muharrirlikka ishga taklif etiladi. 1950-yilda Ilyos Muslim bilan hamkorlikda S.Marshakning «She'r va ertaklar» asarini o'zbek kitobxonlariga tortiq etishdi.



U daniyalik mashhur ertakchi G.X.Andersen, rus yozuvchisi N.A.Nekrasov asarlari, L.Tolstoy va B.Jitkov hikoyalari, bolalar shoirlari M.Kvitko, A.Barto, M.Mirshakar, O.Berdiyorov, M.Fayzulina she'rlarini, V.Lebedov-Kumachning yoshlik taronalari, B.Gorbatovning «Bo'ysunmaganlar» (1953), V.Osayevaning «Vosyok Trubachev va uning o'rtoqlari» (1954) povestlarini, Korney Chukovskiyning «Doktor Voyjonim» (1966) asarini ona tilimizga tarjima qilgan.



Shukur Sa'dulla bolalar uchun turli janrlarda ijod etdi: she'r, poema, hikoya, qissa, opera va bir qancha she'riy ertaklar yozdi. Xalq ijodiyotiga mansub ayrim an'anaviy janrlar, xususan, xalq latifalari asosida «Ikki donishmand», «Afandining ko'ylagi», «Afandi tegirmonchi va ko'sa» kabi she'riy latifalardan topishmoq janri talablarini saqlagan holda topishmoq-she'r namunalarini, «Ayyor chumchuq», «No'xatpolvon», «Laqma it» kabi she'riy ertaklar, «Yoriltosh», «Afsona yaratgan qiz» singari ertak-pyesalar hamda «Kachal Polvon yoki yog'och qo'g'irchoqning sarguzashtlari» ertak-qissasini yaratdi.

Uning maktabgacha tarbiya va kichik maktab yoshidagi bolajonlarga bag'ishlab yozgan ko'plab she'rlari hamon kichkintoylar tilidan tushmay keladi. Ayniqsa, «Shohista», «Yomg'ir-yog'aloq», «Yaxshi ism», «Dildor va koptok» she'rlari jajji bolakaylar fe'l-atvorini to'la aks ettirgani bilan ajralib turadi.

Shuningdek, Shukur Sa'dullaning yil fasllari haqidagi she'rlari maktab darsliklaridan o'rin olganligi e'tiborli. Muallifning «Yoriltosh», «Kachal polvon, yoxud yog'och qo'g'irchoqning sarguzashtlari» ertak-dramalari, «No'xatpolvon», «Laqma it», «Ayyor chumchuq» adabiy ertaklarining sujeti va badiiy-kompozitsion xususiyatlari diqqatga sazovor. Shukur Sa'dullaning o'zbek bolalar nasri taraqqiyotiga qo'shgan hisssasi «Komandirning boshidan kechirganlari», «Aziz qishlog'im» qissalarida namoyon bo'ladi.

Shukur Sa'dulla maktabgacha yoshdagilar uchun samarali ijod etdi. Uning asarlari xilma-xil janrlarda yozilgan bo'lib, asosan, quvnoq voqeaband she'rlar, Vatan tabiatining ko'rkam lavhalarini ifodalovchi peyzaj, portret-she'r, she'riy imzo, o'yin qo'shiq, masal-ertak, masal, topishmoq kabilardan iborat. Ularda kichkintoylar faoliyatining turli qirralari tevarak-atrofga, undagi narsa-hodisalarga munosabati, orzu-o'ylari, intilish hamda xarakteri bolalarcha mushohadakorlik negizida poetik talqin qilinadi. Shoir kichkintoylar hayotida uchraydigan har



qanday hodisadan insonni ma'nan boyitadigan ma'no topishga erishadi. Bunday intilishning samarasini "Kim yaxshi?", "Dildor va koptok", "Lola va men", "Oymoma", "Kichkina bola", "Qiz va gul", "Bola va to'rg'ay", "Yomg'ir yog'aloq", "Turnalar", "Hasan-Husan", "Dam olish kuni", "Uloqcham" kabi o'nlab she'rlar misolida ko'rish mumkin.

Adabiyotshunos A.Milient e'tirof etganidek, murg'ak bola tasavvurida ota- onasi va yaqin qarindoshlarining o'z hayotida qanday rol o'ynashini anglash - muqaddas Vatan tushunchasi mohiyatini idrok etishning boshlanishidir. Shukur Sa'dulla masalani shu taxlitda his etadi. Buni kichkintoylar gapirish uslubiga monand yozilgan savol-javob tarzidagi "Kim yaxshi?" she'rida aks ettiradi:

Ayasi der: - Xo'p, aytib ber,

Uyimizda kim yaxshi?

- Ayam yaxshi, dadam yaxshi, Buvimlar ham yaxshi! - der. - Akanglar-chi?

- Akam yaxshi!

- Opanglar-chi?

- Yaxshilar!

- O'rgilay, - deb hammalari Jajji qizni o'pishar!

Ayonlashadiki, oilada hammaning hurmatini qozonish uchun barchani bir xil ardoqlash lozim. Shoir shu axloqiy aqidani bolalar tabiati mantiqiga mos keladigan talqin orqali tasvir-lay olgani e'tiborli. "Dildor va koptok" she'rida Shukur Sa'dulla bolalardagi mustaqil, o'z-o'ziga xizmat etish ko'nikmasini shakllantirishda ular fe'l - atvoridagi nuqsonlarni tuzatish uchun to'g'ri muomala qila bilish zaruriyatini uqtiradi. Bunda shoir shunchaki nasihatgo'ylik qilib o'tirmaydi, balki hayotiy voqealarni poetik obrazlarda gavdalantirib, o'quvchiga estetik ta'sir ko'rsatadi. Shoirning ustaligi shundaki, u Dildor fe'l-



atvoridagi tantiqlikni bolalar nutqiga xos takrorlarni qo'llash va bolalarning mudom tinimsiz harakatda bo'lish mantig'iga asoslanadi. Ya'ni, kichkintoy Dildor o'yinchoq koptogini izlab, uning qayerdaligini oyisidan so'raganda, uyda, yotogidagi krovatchasi ostida, yoki unga chiroyli ko'ylakcha tikib beradigan tikuv mashinasi orqasida kabi joylarni erinmay qizalog'iga tushuntirgani bois, nihoyat uni izlay-izlay "mashaqqat" chekib, o'zi topa olganidan sevinchi ichiga sig'may, "Ana, topdim, ana!",-deya shodlanishi yorqin tasvirlangan. Shoir shu ekspressiv vosita tufayli kichkintoylarda mehnatga muhabbat hissini singdirishni ham ko'zlaydi.

"Ozoda" portret-she'rida esa tozalik mehnat natijasi ekanligi "olti yashar jajjigina Ozoda" timsolida o'rnak qilib ko'rsatiladi. "Dastyor qiz" she'rida mehnat hurmatga erishtiradi, degan g'oya bolalar hayotidagi oddiy voqea bayoni orqali olg'a surilgan. "Lola va mushuk" she'rida ozodalikka munosabat bolalarcha mushohadakorlik zahirida talqin qilinadi. Shoir bunday harakatlar o'xshashligi mantig'iga tayanib, ichki kompozitsion yaxlitlikni vujudga keltirgan. Shoir kichkintoylar ruhiyatining murakkabliklarini chuqurroq bilishga intiladi. Shu sababli ular fe'l-atvoridagi har qanday o'zgarishlarga bir xil munosabatda bo'lavermaydi: insoniy fazilatlar va kechinmalarni chuqur samimiylik bilan ifodalasa, "bolalarcha soddalik" deb ataluvchi xislatlardan yengilgina kulib, jilmayib qo'yadi. Bunday paytda beg'araz yumor shoir she'rlarining haroratiga aylanadi. "Dam olish kuni", "Oymomo" she'rlari shu xildagi yumoristik ruhi bilan ajralib turadi.

Kichkintoylarning Vatanimiz go'zal tabiatidan zavqlanib kechgan rang-barang tuyg'ularini ifodalashda peyzaj Shukur Sa'dullanning asosiy tasviriy vositasiga aylangandir. Bu jihatdan shoirning "To'rt fasl" turkumi, "Bahor keldi", "Yomg'ir yog'aloq", "Turnalar", "Qiz va gul", "Yoqut ko'zli isirg'a", "Birinchi qor", "Men archa kesgani o'rmonga bordim", "Archa qo'shig'i" singari she'rlari e'tiborlidir.



“Qiz va gul”- o‘zbek bolalar she‘riyatida maktabgacha yoshdagilar uchun yaratilgan peyzaj lirikasining go‘zal namunasi. Bu asar Hamid Olimjonning mashhur “Lola” she‘riga hamohang yozilgan. Unda tabiat go‘zalligi fonida inson go‘zalligi shoirona nafas bilan yolqinlantirilgan:

Daryo oqar jo‘sh urib, Sohil to‘la gul-lola.

Ko‘kka boqib, g‘oz turib, Kuylar jajji qiz bola. Sochlariga gul taqib, Oro berar o‘ziga.

Daryo emas, gul oqib,

Ko‘rinar qiz ko‘ziga.

Daryo labi lolazor,

Kuylar jajji Gulbahor!

Sirtidan mo‘jazgina ko‘rinadigan bu she‘rda faqat “jo‘shqin daryo” va “ko‘kka boqib”, “g‘oz turib” kuylayotgan “jajji qiz bola” obrazlari borday tuyuladi. Aslida esa, shoir she‘r yakunlanmasida qizcha nomini ma‘lum qilib, asarni yangi bir ramziy obraz - bahor obrazi hisobiga boyitadi. Gulbahor gapiruvchi ekspressiv nom. Uning timsolida “sochlariga gul taqqan” baxtiyor qizaloqlarimiz hamda tabiatga fayz kiritib kelayotgan ko‘rkam fasl obrazlarini yorqin tasavvur qilish mumkin.

She‘riy imzo - o‘zbek bolalar she‘riyati uchun mutlaqo yangi janr. U asosan, dialog yoki monolog shaklida bo‘ladi. Ba‘zan topishmoqdek jumboqdan iborat bo‘lsa, ba‘zan epigramma xususiyatiga ega. Bunday paytda piching, istehzo uning asosiy fazilatiga aylanadi. Binobarin, she‘riy imzo kuchli emotsional ta‘sirchanlikka ega miniatyur badiiy asar hisoblanadi. She‘riy imzoda hayvonlar, qushlar, hasharotlar hamda boshqa narsa-hodisalarning she‘riy tavsifi ixchamgina: ba‘zan oddiygina, ba‘zan yumoristik tarzda ifodalanadi. Uning har bir satri yoki bandining mazmuni asosida aniq narsa yoki voqeani aks ettiruvchi jozibali rasm chizish mumkin. Demak, she‘riy imzo shoir va rassomning hamkorlikdagi fantaziyasi mahsuli hisoblanadi.



Shukur Sa'dullaning hayvonlar, qushlar, hasharotlar va bolalar o'yinchoqlari to'g'risidagi qator asarlari ma'rifiy-badiiy qimmatga ega she'riy imzolar sirasini tashkil etadi. "Chittak" - qushcha rasmi ostiga "chekilgan" ana shunday she'riy imzolardan. Shoir unda topishmoqdagidek yashiringan narsa - jumboqning belgilarini sanab ko'rsatib, shu usul bilan kichkintoylarga chittakning tashqi ko'rinishiga oid oddiygina ma'lumotlar beradi, ular tasavvurini aniq tushunchalar hisobiga to'ldiradi va boyitadi:

Men qushchaman kichkina,
Tillarim chuchukkina.
Ola-chipor qanotim,
Bilsangiz - chittak otim.

Chittak o'zini shunday tanitadi. Uning so'zlash uslubi xuddi bolalarnikiday. Antropomorfizmdan foydalanish she'riy imzoning ma'rifiy ahamiyatini ta'minlashdan tashqari, tez yodlanishini ham qulaylashtiradi. Demakki, kichkintoylar lug'at boyligini "ola-chipor", "chuchukkina", "chittak" kabi yangi tushunchalar hisobiga boyitish imkonini tug'dirgan.

Shoir poetik ijodida hajviy she'rlar barmoq bilan sanarli: "Olim uyaldi", "Bizning oyna", "Ivirsiq", "Anqov", "Shalabbo", "Injiq qizcha", "Jumboq" kabilar shu silsilani tashkil etadi. Shukur Sa'dulla 60-yillarga kelib o'z qalamini nasrda ham sinay boshlaydi, bunda ham u maktabgacha yoshdagi kichkintoylarning o'y va orzulari, taqdiri, xarakter-xususiyatlarini badiiy tahlil qilishni maqsad qilib olgandi. Binobarin, uning bunday hikoyalari ni ma'lum darajada kichkintoylar olamining o'ziga xos badiiy tadqiqoti desa bo'ladi. Bu hikoyalarning aksariyati ichki qarama-qarshilik negizidagi kompozitsion asosda qurilgan: "Tush", "Ismi qo'yilmagan xat", "Yutqiziq", "Yaxshilik" hikoyalari ana shunday fazilatga ega. Hikoyalarning aksariyatida ifodalanayotgan fikr-muddao muallif tanlagan "Anqov", "Yalqov",



“Qo‘rqoq”, “Qaysar”, “Ochko‘z”, “Chaqimchi”, “O‘jar”, “Dilozor”, “Izza”, “Gap uqmas” singari sarlavhalaridayoq ravshan anglashilib turadi. Bu hajviy hikoyachalarda adibning o‘zi tasvirlanayotgan voqealarga aralashmaydi.

“Komandirning boshidan kechirganlari” (1961) qissasi yozuvchining sarguzasht janridagi dastlabki mashqidir. Bu qissa o‘zbek bolalar prozasida maktabgacha yoshdagi kichkintoylar hayotini, orzu va tashvishlarini realistik va romantik bo‘yoqlarda ifodalagan birinchi yirik asar hisoblanadi. “Komandirning boshidan kechirganlari” asarida serquyosh respublikamizning azim poytaxti, Sharqning mash‘ali - go‘zal Toshkent shahri besh yashar Hayotning tasodifiy sayohatlari fonida epik tarzda tasvirlanadi. Unda Hayot hali maktab ko‘rmagan, kuzatuvchanlik qobiliyati past, maktabgacha yoshdagi kichkintoylarning vakili sifatida harakat qiladi.

Asarda Hayotning harakati tasodiflar negizida sodir bo‘lsa-da, yozuvchi talqinida ko‘zlagan ma‘lum estetik-tarbiyaviy maqsadni aks ettiradi. Chindan ham qahramon sayohatlari kechgan Toshkentning e‘tiborli joylari tasviri kichkintoyni qanchalik zavqlantira olsa, uning qalbida Vatanga muhabbat tuyg‘usini ham shu qadar to‘lqinlantira oladi va mazkur tuyg‘uning mustahkamlanishiga, e‘tiqodga aylanishiga madadkorlik qiladi. Yozuvchi asar qahramoni besh yashar Hayotni ana shunday harakatlari evaziga voqelikni - turmush haqiqatini kichkintoylar saviyasiga munosib aks ettira olgan.

Adibning zamonaviy mavzuda yaratgan ikkinchi asari “Aziz qishlog‘im” qissasidir. Bu asar 1967-yilda yozilgan bo‘lib, 1969-yilda nashr etildi. Shukur Sa‘dulla asarda xalqimiz hayotining yangi bir manzarasini - qishloqdagi qaynoq turmushni shaharlik bola Habibullaning qishloqqa qilgan sayohati jarayonida ko‘rsatadi. “Aziz qishlog‘im”da mavjud obrazlarning barchasida ijobiy insoniy fazilatlar mujassam, shunga qaramay, yozuvchi qissa konfliktini inson va tabiiy ofat o‘rtasidagi kurash



negizida qurib, “Inson degan soʻzning magʻrur jaranglashi”ni (M.Gorʻkiy) real ifodalay olgan.

1966-yilda Toshkent zilzilasi faqat toshkentliklarnigina emas, balki butun mamlakatni, hatto million-million bolalarni ham bezovta qilgani tarixiy haqiqatdir. Shukur Saʼdulla qissada xuddi shu mavzuga qoʻl urib, bahonada qishloq ahlining zilzila jafokashlariga xayrixohlik tuygʻularini ifodalashga intiladi. Bu hol, ayniqsa, qishloqliklarning toshkentlik bola Habibullaga munosabatlari fonida yorqin gavalantirilgan.

Shukur Saʼdulla “Kachal Polvon yoxud yogʻoch qoʻgʻirchoqning sarguzashti” ertak-qissasini yaratishda oʻzbek qoʻgʻirchoq teatrining chodir xayol va chodir jamol tipida oʻynaladigan Kachal Polvon sarguzashtlariga doir xalq komediyalariga asoslanadi. Xalq komediyalari mazmunini ijodiy qayta ishlab, gʻoyaviy-badiiy niyatiga muvofiq qisqartiradi, toʻldiradi va yangi detallar, epizodlar bilan boyitadi. Xalq komediyalarining qoʻgʻirchoq qahramonlarini esa asar qahramonlariga - badiiy obrazlarga aylantirdi. Shu asosda ertak-qissada fantaziya va realizm oʻzaro uygʻunlashib, asarning yaxlit sujetini vujudga keltiradi. Bunda Shukur Saʼdullaning italiyalik adib K.Kollodining “Pinokkioning sarguzashtlari” hamda rus adibi A.Tolstoyning “Oltin kalit yoki Buratinoning boshidan kechirganlari” asarlaridan ijodiy taʼsirlanganligi ham muhim rol oʻynagan. Asardagi obrazlarning qariyb barchasi qoʻgʻirchoq komediyalar qahramonlaridan iborat. Adib tayyor obrazlarni oʻz holicha ishlatavermaydi. Ularga oʻz gʻoyaviy-estetik konsepsiyasiga muvofiq ijodiy yondashadi. Fantastik ertak-qissada Shukur Saʼdulla tomonidan ijod qilingan salbiy va ijobiy xarakterdagi toʻqima obrazlar ham yoʻq emas. Adib har bir xarakterning oʻz qiyofasiga, xarakter belgilariga ega boʻlishini taʼminlash maqsadida turli badiiy vositalarga murojaat qiladi. Ertak-qissada ellikka yaqin obraz mavjud. Mazkur obrazlarni gʻoyaviy-badiiy estetik xususiyatlari va ijtimoiy- tarbiyaviy



vazifalariga ko'ra uch guruhga bo'lib o'rganish mumkin:

1. Xalq tiplari. Bu guruhga Kachal Polvon, Shomamat ota, Orif jarchi, Boybuva ko'sa, Beknazar karnaychi, Ernazar maymunchi, Jo'ra qiziq, Mullajon, Bichaxon, To'tixon, yetim qiz Mohira, kayvoni, askiyachilar, Qo'zi cho'tir, Ro'zi gov, Dehqon ota, Jalol polvon, rohatijonfurush, egizak aka-ukalar Alijon va Valijon, mehtarbozlar boshlig'i Mirsalim, Qurbonali otalar mansubdirlar. Bular orasida markaziy o'rinda Kachal Polvon obrazi turadi. Kachal Polvon individual belgilarga ega umumlashma tip. U sho'x, quvnoq, xushchaqchaq, sodda va dilkash. Vaziyatni mudom to'g'ri baholay oladi. Bu xususiyatlar uning do'stlari bilan olib borgan siyosiy kurashida qozongan g'alabasini mantiqiy asoslashda o'zini ko'rsatgan.

To'g'ri, Kachal Polvon inqilobchi obrazi emas, shunga qaramay, Kachal Polvon Abdurahmonbek saltanatiga qarshi eldoshlari - faqir mahallaliklar ozodligi, haq-huquqlari uchun astoydil kurashgan xalq qahramoni timsoliday kichkintoylar qalbiga yo'l topib, ularga xalqparvarlikdan saboq beradi. Ertak-qissada Kachal Polvon yakka harakat qilmaydi. Hamma faqir mahallaliklar bilan kengashib, ular bilan belgilangan maqsad sari olg'a intiladi. Natijada, doimo g'alaba qozonadi. Yozuvchi shu taxlitda jamoatchilik qudrati va yengilmasligini hayot haqiqatiga muvofiq talqin qiladi. Xalq tiplariga mansub boshqa barcha ijobiy obrazlar epizodik xarakterdadir. Adib bu personajlarning ma'lum g'oyaviy-badiiy qimmatiga va har birining o'ziga xos individual belgilariga ega bo'lishini esda tutishga intiladi.

2. Satirik obrazlar. Bu guruhga hokim Abdurahmonbek, Iso avliyo, Nosir bo'ri, Qora Mirshab, To'racha-chinoq, maktabdor domla, xalfa, Eshonqul, Sarsinboy chavandozlar mansub. Bu salbiy personajlar ijobiy personajlarga nisbatan birmuncha mukammalroq ishlangan. Bulardan tashqari, satirik obrazlar qatoriga savdogar Abdurahim, Mirzasalim oqsoqol, jarchi Mullagarang, ayg'oqchi talabalar - Umar echki, Salim tajang,



Ashirbek kabi nomi boru aslida qiyofasini ko'rsatmaydigan personajlar ham bor.

Abdurahmonbek – bosh salbiy personaj. Aslida “Sarkardalar” deb ataluvchi chodirxayol qo'g'irchoq teatrida o'ynaluvchi xalq komediyasida Farg'ona viloyatining zolim hokimi qiyofasida ko'rinadigan bu personaj Shukur Sa'dulla talqinida afsonaviy qo'g'irchoqlar mamlakati bo'lmish Shirinsoyning sohib saltanati. U - feodal ierarxiyasining cho'q-qisida turgan hamda adolatsiz tizimni butunicha o'zida tajassum etgan zolim va telba hukmdorning timsoli. Unda feodal hukmdorga xos barcha xususiyatlar mavjud. Yozuvchi Abdurahmonbek personajini xarakterlashda rang-barang bo'yoqlarga murojaat etadi. Bunda fosh etuvchi sotsial yumor, ayniqsa, katta rol o'ynagan. Natijada, Abdurahmonbek zolimlikda tengsiz shaxs va feodal davlat arbobining umumlashgan tipi darajasiga ko'tarilgan.

Boshqa salbiy personajlarni ishlashda ham Shukur Sa'dulla ular dunyosini ma'naviy qashshoq va badkirdorlar dunyosi tarzida kichkintoylar ko'z o'ngida gavdalantirgan. Shu yo'l bilan kichkintoylarda yomonlik va xunuklikni ezgulik va go'zallikdan tez ajrata bilish malakasini shakllantirishni ko'zlagan.

3. Afsonaviy maxluqlar, hayvonlar, hasharotlar va qushlar obrazlari jumlasiga ajdar, kavsar dev, oq chavkar ot, quyon, chumoli, ko'rshapalak, kaptar, kaklik, bedana va qirg'ovullarni kiritish mumkin. Bularning barchasi ham asar qahramonlari hayotida, xususan, Kachal Polvon faoliyatida muhim rol o'ynaydi. Ajdar, kavsar dev kabi afsonaviy maxluqlar hamda ilon yovuzlik timsoli hisoblansa- da, Kachal Polvonning ijobiy fazilatlarini bo'rttirishda xizmat qiladi. Yosh kitobxon oppoq qanotlarini kitob o'rnida Kachal Polvonga taqdim etgan kapalaklarni ham, boylar zo'ravonlik bilan o'ziniki qilib olgan kambag'allar bug'doyini qaytarishda jonbozlik ko'rsatgan va Kachal Polvonning ozodlikka chiqishiga katta madad bergan



zahmatkash chumolilarni ham, Kachal Polvonni jazodan ogohlantirgan ninachini ham, oldingi oyoqlarini ko'tarib, bir-biriga urib qarsak chalgan quyonlarni ham, xushxon-u raqqos bedanalar, kakliklar, qirg'ovullarni ham sira unutulmaydi.

Shukur Sa'dulla ertak-qissaning badiiy jihatdan qiziqarli bo'lishi, unda xalq komediyalariga xos milliy ruhning barq urib turishi uchun o'zbek xalq ijodiyoti, hatto bolalar folklori namunalari keng murojaat qiladi; xushchaqchaq askiyalardan, yumorni va o'ychanlikni kuchaytiradigan topishmoqlardan, tez aytishlar, sanamalar, dononishmand maqollari va matallaridan unumli foydalanadi.

Bu asarda yaxshilik bilan yomonlik, tadbirkorlik va takabburlik, mehr va g'azab, sabr bilan toqatsizlik o'rtasidagi shafqatsiz kurash ifodalanib, pirovard-natijada yaxshilik, tadbirkorlik, mehr va sabrning tantanasi ko'rsatiladi. Bolalarga shu tushunchalar mohiyati singdiriladi. Binobarin, bu asarlar bolalarda yuksak insoniy fazilatlarni tarbiyalashda va ularning zavqini, qiziqishlarini oshirishda ahamiyatlidir.

Shukur Sa'dulla folklor materiallaridan ijodiy foydalanib, bir nechta dramatik asarlar ham yozdi. Uning "Yoriltosh" musiqali ertak-dramasi (1937) va opera librettosi (1967), "Chol bilan bo'ri" kichik she'riy pyesasi (1967), "Zubayda" (1969) ertak-dramasi o'zbek bolalar dramaturgiyasining yuksalishida hissa qo'sha oldi.

"Yoriltosh" - Shukur Sa'dullaning dramaturgiyaga dadil qo'l urishi tufayli bitilgan va asosan, o'smirlarga mo'ljallangan musiqali ertak-dramadir. Asar birgina "Yoriltosh" ertagi sujetini stilizatsiya qilish asosidagina emas, balki shu ertakda tasvirlangan o'gaylik motivlariga hamohang bo'lgan boshqa bir qancha xalq ertaklaridan ijodiy ilhomlanish va ta'sirlanish negizida yozilgan. Dramaturg uni uch marta qayta ishlab, o'zbek bolalar dramaturgiyasining yorqin namunasiga aylantira oldi. "Yoriltosh" ertak dramasi katta-yu kichikni birdek qiziqtiradi. U



folklordagi shu nomli ertak asosida yozilgan. Shukur Sa'dulla xalq ertagini badiiy jihatdan to'liq qayta ishlagan. Bu avvalo, ertak-drama kompozitsiyasida ko'rinadi. Xalq ertagi sujeti asosan, nasriy qismdan iborat. Faqat Gulnoraaning toshga, Oymomaniy opasiga yolvorib aytgan so'zlari she'riy ifodalangan. Ertak-drama esa ko'proq she'rlar asosida tuzilgan. U to'rt parda, olti ko'rinishli bo'lib, ham nasriy, ham nazmdan tashkil topgan. Xususan, qahramonlarning ichki kechinmalari, orzu havaslari, tuyg'ulari she'r orqali beriladi. Sahna Gulnoraaning bog' etagida, boshida gulchambar, ashula aytib yurgan ko'rinishi bilan boshlanadi:

Erkin-erkin yursam men,

Davri-davron sursam men, Baxtli kunlar ko'rsam men,
Qandi-navvot so'rsam men. Bo'lsa chamber boshimda, Xuddi
guldek yoshimda, Bulbul bo'lsa qoshimda, Shakar bo'lsa
oshimda...

Shukur Sa'dulla bu asarni musiqiy ertak-dramaga moslab yozgani sababli, unda shunga o'xshash she'riy matnlar talaygina. O'gay ona va Gulnora o'rtasidagi ziddiyatlar barcha o'gaylik motividagi ertaklarga o'xshab ketadi: albatta, sho'rlik qizga jabr-sitam qilinadi, uyning barcha yumushi uning bo'ynida, tag'in ikki gapning birida haqoratli so'zlar bilan xo'rlanadi. Gulnora ham ana shu zulmlar dastidan dod deyishga andishasi qo'ymay, kuylashga, yuragini yozishga harakat qiladi. O'gay ona Gulnorani qancha xo'rlagani, yomon ko'rgani sari undan qutulgisi ham yo'q. Gulnora o'gay ona zulmidan qutulmoqchi bo'lganda, o'gay ona unga: "Qutulasan-a, qutulasan. Osmonga chiqsang oyog'ingdan tortaman, yerga kirsang qulog'ingdan. Hali chuchvarani xom sanab yuribsan... Bo'l tezroq, bor, o'tin keltir, to'ngak yor, choy qaynat, hovlini shipir, ayvonni tuzat, ko'rpacha yoz qora yer...", - deydi. O'gay onaning tub maqsadi keyin fosh bo'ladi. Uning So'loqmon arzandasiga Gulnorani olib berish uchun to'y boshlangan edi. Gulnoraaning dugonalari, yigit-qizlar dastlab qo'shiq aytishib, o'yin tushganda ham Gulnora nima gapligini tushunmaydi.



Shukur Sa'dulla asarda qizlar ashulasi, o'yini, Gulnora va qizlarning lapar aytishuvini ijodiy mahorat bilan ifodalaydi. Negaki, xalq ertagi sujetida bunday laparlar yo'q. Bu yor-yor va laparlarning aksariyati to'ylarda, qiz yig'inlarida aytiladigan matnlardir. Masalan,

Hay-hay o'lan, jon o'lan, mis panjara, Har jafoga ko'nadi qiz bechora.

Yoki,

Uzun-uzun arg'amchi halinchakka, Doka ko'ylak yarasha-di kelinchakka. Doka ko'ylak etagiga tut qoqaylik, Yigitlarning yuragiga o't yoqaylik.

Shuningdek, Gulnora bilan qizlar o'rtasidagi ayti-shuvlarning ba'zilari shoir ijodi ekanligi yaqqol ko'rinadi. Masalan, qizlar bilan qo'shilib o'ynab-kulayotgan Gulnora oldiga keltirilgan kelin sarpolarini ko'rib, hayratlanadi. O'z shubhalarini o'rtoqlaridan so'raganda, ular bunday javob qiladilar:

Aytsak xafa bo'lmaysan, go'zal Gulnora,

Bu baloga, azizim, top o'zing chora.

Bu o'ltirish, bu kulgi, bu o'yin yalla, Chinni aytsak bosh-langan to'ying, Gulnora.

Yoki, bu so'zlar chinligiga endi ishonmaslikka iloji qol-magan Gulnora shunday bo'zlaydi:

O'gay akam.. Voy sho'rim, koshkiydi o'lsam, G'unchaligimda tezroq, ochilmay so'lsam...

Yuragim pora-pora bo'ldi... Uf... Evoh...

Na qilay... qayga bordim... sho'rim qurdi... oh...

Ko'rinadiki, Shukur Sa'dulla "Yoriltosh" ertak-dramasini anchayin ijodiy qayta ishlagan. Keyingi sahnalarda ham Gulnoraning tog'-toshlar orasidan o'gay onasi va o'gay akasi ta'qibidan qochib, kuylagan g'azallari goh mumtoz adabiyotga xos vaznda, goh folkloriy ohangda ifodalangan. Aytaylik, "Zulm ila tushdi boshimga ko'p jaf, ey do'stlarim, Ayriliqqa yo'lni



soldim, za'farondir yuzlarim",- deb boshlanuvchi g'azal aruz vaznida yangrasa,

Ey xarsang tosh-xarsang tosh-a, Xo'rlanganman, ko'zda yosh-a. Yorilgin tosh, yoril tosh-a, Men senga yo'ldosh, yo'ldosh-a, misralari xalq ohanglariga hamohang. Ertak drama sujeti xalq ertagidan deyarli tafovut qilmasa-da, shunga o'xshash sahna ko'rinishlari, Gulnoraning kechinmalari bilan bog'liq aytim-olqishlar, yoxud o'gay ona qarg'ishlari shoirning ijodiy mahsuli ekanligi ko'rinib turadi.

Shukur Sa'dulla ertak-drama sujetida ham ayrim o'ziga xos obraz va detallar kiritadi, albatta. Masalan, Gulnoraga xarsang tosh uni berkitishini onasidan yodgor qolgan marjon tosh aytadi va uning yo'lini yoritib boradi. Ertak-dramaning oxirigacha ana shu marjonlar opa-singillarga homiylik qiladi. Oymomaga opasi alla aytishini ham shoir badiiy to'qimasi, deyish mumkin.

Gulnora va Oymoma sahroda uxlab qolgach, Ajdarning paydo bo'lishi, bu ularning o'gay akasi ekanligi, ular olishib, oxiri ajdar kechirim so'rab, onasining kirdikorlarini xabar berib ketishi ertak-dramaga jon bag'ishlaydiki, bu ham xalq ertagida kuzatilmaydi.

Bundan shu narsa ayon bo'ladiki, o'gay ona va uning o'g'li sehr-jodu bilan ish qiladi. Ular ertaklardagi demonologik obrazlarga o'xshab, turli qiyofalarga kira oladilar. O'gay ona Gulnorani xotin qilib olgan shoh uyiga Parixon qiyofasiga kirib borishida ham bu dalilni ko'rish mumkin.

Umuman, ertak-dramada she'riy yo'l bilan yozilgan qismlar ko'proq. Shunga qaramay, shoir bolalarbop ifoda usuli bilan eng dolzarb mavzularni tilga olgan. Shoirning "Pyesalar" kitobida bu ertak-dramaning yozilgan yili 1937-1938-yillar deb ko'rsatilgan. Shuning o'ziyoq "Yoriltosh" nmg ramziy ma'no kasb etishini anglatadi. Chunki, bu yillar millatimiz tarixida eng qirg'inbarot, yalpi qatag'on davri sifatida achchiq xotira bo'lib qolgan. E'tibor berilsa, ertak-dramada asosan ozodlik, erkinlik



haqida ko'p kuylanadi. Yana Gulnoraaning tilidan tog'u toshlarga nido qilinadi. O'gay ona va akaning yovuz qiyofalarga kirib opasingillarga kun bermay, yovuzlik qilishi o'sha yillar fojealarini esga soladi. Bekoyim bilan Parixonning til biriktirib, Gulnoraqa qasd qilishlari zamirida ham yovuzlik yotadi. Bularning barchasi, avvalo, Shukur Sa'dullaning xalq og'zaki ijodining boy merosidan unumli foydalana olgani natijasi bo'lsa, ikkinchidan, shoir iste'dodi namunasidir. Zotan, u xalq ijodiga xos motivlarni ham ertak-dramada o'rinli ifodalay olgan.

Xullas, Shukur Sa'dulla ham shoir, ham yozuvchi, ham dramaturg, ham tarjimon, ham folklorshunos sifatida bolalarga qirqdan ortiq kitob hadya etib, o'zbek bolalar adabiyoti xazinasini boyitgan professional ijodkordir.

Bilim, ko'nikma va malakani rivojlantirishga yo'naltiruvchi savollar:

1. Quddus Muhammadiy ijodiy faoliyati qay jihatlari bilan ajralib turadi?
2. Shoir asarlarining mavzusi va g'oyasi haqida ma'lumot bering.
3. "Tabiat alifbesi" tarkibiga kiruvchi she'rlar to'plami qanday nomlanadi?
4. Sulton Jo'raning pedagog shoirligini asoslang.
5. "Harflar paradi" qanday she'rlar turkumiga kiradi?
6. "Tinish belgilarining majlisi" qaysi fanga doir she'r?
7. She'riy imzo nima?
8. Shukur Sa'dulla qanday janrlarda ijod qilgan?

Mavzuga oid test savollari:

1. Toshkent qishloq xo'jalik texnikumi, O'rta Osiyo davlat universiteti biologiya fakultetini tamomlab, maktabda botanika o'qituvchisi bo'lib ishlashiga qaramay, ijodkor sifatida mashhur bo'lgan bolalar shoirini aniqlang?



- a) Sulton Jo'ra;
- b) Zafar Diyor;
- c) G'afur G'ulom;
- d) Quddus Muhammadiy;

2. Bir maktabda gap mish-mish

Turg'unning dumi bormish... Ushbu misralar muallifi, she'rning nomi va yo'nalishi qaysi javobda to'g'ri?

- a) Zafar Diyor, «Qahramon», hajviy;
- b) Quddus Muhammadiy, «Dum», yumoristik;
- c) Quddus Muhammadiy, «Lapashang», satirik;
- Quddus Muhammadiy, «Nomsiz erkatoylar», yumoristik.

3. Quddus Muhammadiyning ertak-dostonlari qaysi javobda to'g'ri?

- a) «Bir o'zboshimcha chumchuq haqida», «Qo'ng'izoy va Sichqonboy», «Sandal va pechka»;
- b) «Tabiat alifbesi», «Odam-olam qo'shig'i»;
- c) «Momaqaymoq», «Shaftoli doktor»;
- d) «Asalari va Ahmadjon», «Mamajon shofyor».

4. Ushbu misralar muallifi kim?

Do'stlar mening yurtimni,

O'zbekiston deydilar.

Dong'i tutgan dunyoni

Bog'u bo'ston deydilar.

- a) Hamid Olimjon;
- b) Zafar Diyor;
- c) Quddus Muhammadiy;
- d) Qudrat Hikmat.

5. «Kapalak», «Binafsha», «Navbahor», «Qushlar haqida qo'shiq» singari mashhur she'rlar muallifi va bu asosan qaysi yoshdagi bolalarga mo'ljallanganini aniqlang?



- a) G'afur G'ulom, maktabgacha tarbiya yoshidagi bolalarga;
- b) Quddus Muhammadiy, bolalar va o' smirlarga;
- c) Zafar Diyor, kichik maktab yoshidagi bolalarga;
- d) Sulton Jo'ra, o' smirlar uchun

6. Zafar Diyorning lirik-epik asarlari qaysi qatorda to'g'ri ko'rsatilgan?

- a) "Mashinist", "Yuksak tog', keng o'tloq va mard o'rtoq haqida qissa";
- b) "Qushlar haqida qo'shiq", "Madriddan kelgan mehmon";
- c) "Tilsiz o'rtoq", "Madriddan kelgan mehmon", "Mamlakat", "Kazbek";
- d) A va B javoblar.

7. Zafar Diyorning qo'riq va bo'z yerlarni o'zlashtirish mavzusidagi asari qaysi javobda to'g'ri ko'rsatilgan?

- a) «Kichkina bog'bon haqida doston»;
- b) «Yuksak tog', keng o'tloq va mard o'rtoq haqida qissa»;
- c) «Madriddan kelgan mehmon»;
- d) «Mashinist».

8. 1907- yilda Toshkent shahrida mehnatkash dehqon oilasida dunyoga keldi. 1925- yilda esa uning birinchi she'ri "Chuvalachi" e'lon qilindi. Qaysi javob ma'lumotga mos?

- a) Zafar Diyor;
- b) Shukur Sa'dulla;
- c) Quddus Muhammadiy;
- d) G'afur G'ulom.

9. 1910-yilning 15-yanvarida Buxoro viloyatining Shofirkon tumanidagi Qag'altom qishlog'ida tug'ilgan bolalar adibi qaysi javobda keltirilgan?

- a) Omon Muxtor;
- b) Safar Barnoyev;



- c) Sulton Jo'ra;
- d) Zafar Diyor.

10. Sulton Jo'raning ilk she'rlari qachon va qayerda chop etilgan hamda dastlabki kitoblarning nomi to'g'ri qayd etilgan javobni aniqlang?

- a) 1933-yilda Buxoro yosh shoirlarining "She'rlar" to'plamida;
- b) 1939-yilda "Fidokor", 1941-yilda "Moskva" she'riy to'plamlari, 1942-yilda "Iroda" nomli pesasi nashr etilgan;
- c) shoir vafotidan so'ng "Havo rang gilam", "Zangori gilam", "Bruno", "Parvoz", "Qaldirg'och", "Tanlangan asarlar" kitoblari bosilib chiqqan;
- d) A,B,C javoblar

11. Sulton Jo'raning Vatan urushi yillarida yaratgan asarlari nomi keltirilgan javobni aniqlang?

- a) "To'pchi Muhammad", "Pulemyotchi ovozi", "Chavandoz", "Uch og'ayni botirlar", "Sog'inchli salom";
- b) "Nayzamiz", "Qahramon Qo'chqor", "Jahon seni olqishlar", "Salom xat";
- c) "Qaldirg'och", "Zangori gilam", "Dengiz tagida", "Tinish belgilarining majlisi";
- d) A va B javoblar.

12. Sulton Jo'raning pedagog-shoir sifatidagi ta'lim-tarbiyaviy she'rlari qaysi javobda to'g'ri?

- a) "Kimning xati chiroyli", "Tinish belgilarining majlisi", "Harflar paradi";
- b) "Oy nechta", "Mamatning kechirmishi", "Yaxshi"ning maqtovi";
- c) "Sog'inchli salom", "Salom xat", "Sog'inish", "Yolg'onchi";
- d) to'g'ri javob yo'q.



13. Uqdingizmi? Yetadimi? Bormi savol?

Yoki o'zim so'rayinmi sizdan savol? Bu misralar nima tilidan aytilgan, qaysi she'rdan olingan va uning muallifini aniqlang.

- a) «Gunafsha», binafsha tilidan, Zafar Diyor
- b) "Tinish belgilarining majlisi", so'roq belgisi tilidan, Sulton Jo'ra;
- c) "Harflar paradi", harflar tilidan, Sulton Jo'ra;
- d) "Temirlar o'yini", temirlar tilidan, Quddus Muhammadiy.

14. Gar undalma gapda kelsa qoq o'rtada, Uning ikki yonboshida men jo'rttaga... Gar undalma gap so'nggida kelsa, u choq, Undan oldin qo'yilarman, tushun o'rtoq! Bu ta'rif qaysi tinish belgisiga xos. She'r nomi va muallifini aniqlang.

- a) qo'shtirnoqqa, "Kimning xati chiroyli", Sulton Jo'ra;
- b) "A" harfiga, "Harflar paradi", Sulton Jo'ra;
- c) tirega, "Tinish belgilarining majlisi", Sulton Jo'ra;
- d) vergulga, "Tinish belgilarining majlisi", Sulton Jo'ra;

15. Chiroyli yoz, yozsang xat!

Chunki bu ham zo'r san'at... ushbu she'r nomi, muallifi va mohiyati qaysi javobda to'g'ri?

- a) "Kimning xati chiroyli", Sulton Jo'ra,
- b) yozuvning go'zal bo'lishida partada to'g'ri o'tirish qoidasiga qat'iy rioya qilish;
- c) bolaning sog'lom, baquvvat bo'lib kamol topishi;
- d) A,B javoblar to'g'ri.

16. Shukur Sa'dulla asarlari qaysi javobda to'g'ri ko'rsatilgan?

- a) "Shohista", "Dastyor qiz", "Ozoda", "Komandirning boshidan kechirganlari" she'rlar va hikoyalar to'plami;



b) “Yoriltosh”, “Bizning bog‘chamiz”, “Ikki bilakuzuk”, “Zubayda”, “Afsona yaratgan qiz” p’esalari;

c) “Ism qo‘yilmagan xat”, “Sening bayraming”, “Mening aziz bolalarim” qissa va ertak-dostonlari

d) noto‘g‘ri javob yo‘q.

17. Milt etib chiqdi quyosh,

Dedi:- Do‘stlar, qish odosh .

Ko‘rsak yo‘q qora bulut,

Yer yuzi ko‘k gilam - o‘t. Bu misralar Shukur Sa‘dulla-ning qaysi she‘ridan olingan va nima ta‘riflanmoqda?

a) «Yomg‘ir yog‘aloq», yomg‘ir;

b) «Boychechak», gul;

c) «To‘rt fasl», bahor;

d) «To‘rt fasl», kuz.

18. Shukur Sa‘dullaning xalq ertaklari uslubida yozilgan asarlarini aniqlang?

a) “Uch ayiq”, “Ayyor chumchuq”, “Ari bilan qaldirg‘och”, “Laqma it”;

b) “Ivirsiq”, “Anqov”, “Komandirning boshidan kechirganlari”;

c) “Ikki donishmand”, “Yalqov ayiqcha”, “No‘xat polvon”, “It o‘ziga qanday qilib do‘st topdi”, “Chol bilan bo‘ri”;

d) A va C javoblar.

19. Shukur Sa‘dullaning qissalari qaysi javobda keltirilgan?

a) “Shohista”, “Yalqov ayiqcha”, “Dastyor qiz”;

b) “Aziz qishlog‘im”, “Komandirning boshidan kechirganlari”;

c) “Kachal polvon”, “Ism qo‘yilmagan xat”;

d) B va C javoblar.



Tavsiya etilgan adabiyotlar:

1. O'zbek bolalar adabiyoti va adabiy jarayon. - T.: Fan, 1989.
2. O'zbek bolalar adabiyoti antologiyasi. Ikki jildlik. 1-2-jild. - T.: O'qituvchi, 2006.
3. O'zbek bolalar adabiyoti. Maqolalar. - T.: Yosh gvardiya, 1969.
4. Muhammadiy Q. Tabiat alifbesi. 1-kitob. - T.: Yosh gvardiya, 1974; yana: Bog'larda bolalar. 2-kitob. - T., 1976.
5. Muhammadiy Q. Cho'pon bobo qo'shig'i. 4-kitob. - T., 1975; yana: Odam- olam qo'shig'i. 5-kitob. - T., 1981.
6. Qobilov N. Kichkintoylarning katta shoiri. - T.: Yosh gvardiya, 1973; yana: Ylbek. - T., G'ASN, 1988.
7. Qosimov B. Milliy uyg'onish. - T.: Ma'naviyat, 2005; yana: Uyg'ongan millat ma'rifati. - T., Ma'naviyat, 2011.
8. Qodiriy A. Kichik nasriy asarlar. - T.,1989.
9. Shermuhamedov P., Tursunov J., Safarov O., Egamov X. O'zbek bolalar adabiyoti. Darslik-xrestomatiya. - T.: O'qituvchi, 1976.
10. Nazarov B. G'afur G'ulom olami. - T.: Fan, 2004.
11. Safarov O. Zamonlar tongining charoqlarisiz. - Buxoro, 2003.



VIII. BOLALAR ADABIYOTI TARAQQIYOT SARI

Reja:

1. *Ilyos Muslim - bolalar shoiri.*
2. *Hakim Nazir - o'zbek bolalar realistik nasrining sohibkori.*
3. *Mirkarim Osim - tarixiy-biografik qissanavis adib.*
4. *Po'lat Mo'min bolalarning qo'shiqnavis shoiri.*
5. *Qudrat Hikmat she'rlarining badiiy-tasviriy xususiyatlari.*
6. *Nosir Fozilov ijodida bolalar va o'smirlar ruhiyati talqini.*
7. *Farhod Musajon - bolalar adibi va kinodramaturgi.*

MAVZUGA DOIR TAYANCH TUSHUNCHALAR: *tashbeh, taqvim, realistik nasr, roman, ocherk, lavha, novella, tarixiy-biografik, tarixiy-qahramonlik, tarixiy-maishiy, fantastik, ertak-pyesa, epizod, dramatik konflikt, voqeaband, kinoya, istehzo.*



Ilyos Muslim – bolalar shoiri (1909-1993). Bolalar uchun asar yaratishdek sermashaqqat va qutlug' ishga umrini bag'ishlagan Ilyos Muslim 1909- yilda Qirg'izistonning Bishkek



shahrida cho'yan quyuvchi - hunarmand oilasida dunyoga keladi. I.Muslim 1927-yilning kuzida Toshkentga kelib, erlar bilim yurtiga o'qishga kiradi. 1930-yilda u bilim yurtini muvaffaqiyatli tamomlagach, Qashqadaryoning Yakkabog' tumanidagi Shaman-qirg'iz va Sheroziy qishloqlarida o'qituvchilik qilib, yoshlarga bilim beradi.

1931-1942-yillarda Ilyos Muslim O'zbekiston davlat nashriyotida, badiiy adabiyot, yoshlar va bolalar adabiyoti nashriyotlarida turli lavozimlarda ishlaydi. Shoirning birinchi she'rlar to'plami 1932-yilda "O'suv" nomi bilan kitobxonlar hukmiga havola etildi. 1934-yilda "Zaharxandalar" degan ikkinchi to'plami, "Miqti keldi" dostoni bosilib chiqadi. 1938-yilda esa "She'rlar" to'plami nashrdan chiqadi. 1942-1947-yillarda harbiy xizmatda bo'lib qaytgan shoir yana adabiy ijodga qizg'in sho'ng'iydi. Shundan keyin uning birin-ketin "Turnalar" (1952), "Bizning maktab" (1954), "Sening sovg'ang" (1957), "Tilla qo'ng'iz" (1960), "Ishchan asalarilar" (1962), "Oylar aytishuvi", "Oyxon va rayhon" (1964), "Ko'rik" (1969) kabi qator she'riy to'plamlari bolalar adabiyoti taraqqiyotiga hissa bo'lib qo' shildi.

Shoir she'rlarida o'ziga xos poetik obrazlar, o'xshatishlar ko'zga tashlanadi. Masalan, u bahor elchisi boychechakni ta'riflar ekan, uning yorqin detallari - rang va xususiyatlarini kichkintoylar tafakkuriga mos talqin etadi:

Hali erimasdan qor, Dala, qirda gulbahor. Chiqdi mitti gulchechak, May elchisi boychechak. Askar kabi turar tik, Barglari yashil, tetik.

Uning rangi sariq, oq,

Boshida kumush qalpoq.

I.Muslim she'rda obrazning kichkintoylar tasavvuriga xos ko'rimlilikini ta'minlagan. Bahor dala-qirdan boshlanishi bejiz emas. Quyosh nuri eng ko'p tushadigan, ilqlik tafti ilgariroq seziladigan joy bepoyon qir-u dalalardir. Boychechak ham dastlab dala-tuzda yashnab ochiladi. U qadimda Navro'z



elchisi sifatida bolalar quvonchiga sabab bo'lgan. Shoir xalq orasida qadimdan bolalar tomonidan kuylanib kelinayotgan qo' shiqqa aniqlik kiritib, uning yangi qirralarini tasvirlaydi. May turfa gullarning qiyg'os ochilgan pallas, boychechak esa uning dastlabki nishonasi ekanligi shu tariqa bolalarga ayon bo'ladi. Bu jajji gulning askarga o'xshatilishi ham tasodif emas. Uning sovuq va erib ulgurmagan qordan qo'rqmay, bosh ko'tarib turishi askarlarga xos jasoratga qiyoslanmoqda. Kumush qalpoq tushunchasi faqat gulning (oq rang) tashbehlaniishi bo'lib qolmay, qor ostidan bosh ko'tarib turishiga ham ishoradir.

Shoir she'rlarining aksariyati maktabgacha ta'lim yoshidagi yoxud kichik maktab yoshidagi o'quvchilarga mo'ljallab yozilgani she'rlar mazmun- mundarijasidan anglashiladi. Bu yoshdagi bolalarni ko'proq hayvonlar, qushlar va jonivorlar, gullar, zilol suvlar-u yoz ne'matlari yoki qorbobo va qish, yam-yashil archa juda-juda qiziqtiradi. Ilyos Muslim bolalarga olam-olam shodlik keltiruvchi ana shunday mavzularga tez-tez murojaat qiladi. Shoirning "Laylak keldi", "Turnalar", "Quyong", "Toychog'im", "Laylak", "Gul teramiz", "Archa qo'shig'i", "Maktabimiz" singari she'rlari shu ma'noda ardoqli.

LMuslimning mehnat mavzusida yozilgan she'rlari o'quvchilarda faqat mehnatga ko'nikma hosil qilish, mehnatning hayotiy ehtiyoj ekanini uqtirib qolmasdan, balki ularda mehnatdan zavqlanish tuyg'ularini ham shakllantirib boradi. Shu jihatdan shoirning "Sening sovg'ang", "Oyxon va rayhon" she'rlari ahamiyatli. Masalan, dastlabki she'rda jajji qo'lchalari bilan kashta tikib onasiga sovg'a qilishga chog'lanayotgan qizaloq haqida so'z borsa, ikkinchi she'rda jambil- rayhon ekib, jo'yaklariga suv qo'yib ko'kartirgan Oyxon ta'riflanadi. She'rlarda shoir o'zi xulosalaganday, halol mehnat rohatini totish zavqi yorqin aks etgan. "Odobli qizcha"da esa qiz bolalarga xos tartiblilik, saranjom-sarishtalikka da'vat etiladi:

Ra'no kichkina hali, Ishiga hamma hayron. Qo'lda jajji supurgi,



Chinnidek hovli, ayvon.

Uyni tartibli tutar,

Chang qo'nmas divanga hech.

Buni ko'rib qo'shnilar

Maqtashadi erta-kech.

Albatta, bunday she'rlarning mazmuni ancha sodda, badiiylikdan ko'ra oddiy so'zlar bayoni tarzida ifoda etilgan bo'lsa-da, yarim asr ilgarigi avlod kichkintoylarining zehn idrokiga muvofiqligi ayon haqiqat. Qolaversa, bugungi kichkintoylar ibrat olsa arziydigan xalq qadriyatlari mavjud unda.

Ilyos Muslim qator yumoristik she'rlar ham yozgan. "Eshmatvoyning qiligi", "Befahm Eson" she'rlarida bolalarda uchrab turadigan ayrim qusurlar hajv qilinadi. Shuningdek, uning "Oylar aytishuvi" she'rida taqvimdagi 12 oyning o'ziga xos muhim xususiyatlari, navbat bilan ketma-ket almashib kelishi, el-yurti obod etishi kuylanadi. Zero, Ilyos Muslim boy ijodiy tajribaga hamda xalq e'tirofiga sazovor shoirlardan biridir.

Hakim Nazir - o'zbek bolalar realistik nasrining sohibkori



Bolalar dunyosi keng, o'ziga xos, ajib dunyo. Oz quvonch-tashvishlari, orzu- havaslari, sarguzasht-hangomalari, o'yin-kulgilari-yu, o'z sir-u jumboqlariga to'la. Hakim Nazir o'zbek bolalar nasrining sevimli adiblaridan biri bo'lib, bolalar



olami uni ohanraboday o'ziga tortib, har tomonlama qamrab olgan. Uning kechmish-kechirmishlari, maqsad-niyatlari bilan kichkintoylar olamiga chambarchas bog'lanib ketishi alohida e'tirofga sazovor. U bolalar uchun o'ndan ziyod qissa, roman, pyesa, son-sanoqsiz hikoyalar yaratdi. "Lochin qanotlar" romani, "So'nmas chaqmoqlar", "Yonar daryo", "Kenjatoy" qissalari, o'nlab hikoyalari ko'pgina xorijiy tillarga tarjima qilinib, chet ellarda tanildi. Binobarin, adib ijodining serqirra talqiniga e'tibor mustaqillik yillarida yanada ortgani bejiz emas.

O'zbek bolalar nasrining zahmatkash adiblaridan biri Hakim Nazir 1915-yilda Toshkentning Arpapoya mahallasida mahsido'z-kosib oilasida dunyoga keldi. Hakimjon og'ir mehnat hisobiga kun kechiradigan jafokash oilada katta bo'lgani uchun yoshlikdan mehnatni hurmat qilish ruhida tarbiyalangan. Ehtimol uning ko'nglida bolalik yillaridayoq ota kasbiga yashirin mayl paydo bo'lgandir, u maktabda boshlang'ich ma'lumot olgandan so'ng, 1931-yilda oyoq kiyim fabrikasiga ishga kiradi. Dastlab shogird, keyinroq master bo'lib ishlaydi. Fabrikada o'z hunarining ustasi bo'lish bilan qanoatlanib qolmay, ayni vaqtda kechki ishchilar universitetida o'qib, umumiy malakasini oshirishni davom ettiradi. Hakimjon o'qib va ishlab yurgan damlarida adabiyotga juda qiziqib qoladi. Gazeta va jurnallarda bosilgan badiiy asarlar, rus va o'zbek yozuvchilarining kitoblari uning doimiy hamrohiga aylanadi. O'qilgan qissalar, hikoyalar esa Hakimjonda, o'sha yillari uning o'zi ham izohlay olmagan ajib kayfiyatni hosil qiladi. Buning ilk mevasi sifatida atrofiga ro'y berayotgan yangiliklar, voqealar haqidagi ocherk va lavhalar maydonga keladi. Bunga oila muhiti ham katta ta'sir etadi. Uning ota-onasi o'z davrining o'qimishli kishilaridan bo'lib, uylarida tez-tez kitobxonlik o'tkazilib turardi. Qo'ni-qo'shnilar, uzoq-yaqindagi tanish-bilishlar ularnikida yig'ilishib, Navoiy, Fuzuliy, Mashrab g'azallaridan tortib, xalq doston va ertaklari, "Qissasul anbiyo", "Bobo Ravshan", "Yusuf-Zulayho"largacha o'qishar edi. Hakimjon bularni maroq bilan tinglar, ayrim parchalarini yodlab



olar, keyin o'rtoqlariga aytib berardi. Eshitgan narsalarining mag'zini chaqishga intilar, so'rab-surishtirar, shu tariqa, uning qalbidagi adabiyotga havas tuyg'usi tobora ortib borar edi. Hakimjon Abdulla Qodiriyning "O'tkan kunlar"ini ham birinchi marta mana shu kitobxonlik davrasida ommaviy o'qishda tinglagan. Binobarin, yosh Hakimjonning adabiyot bo'stoniga oshinoligi ona suti, mehri, maftunkor ertaklari bilan tarbiya topdi, deyilsa to'g'riroq bo'ladi. Adabiy ijodga tuganmas ixlos va muhabbat uyg'otgan ana shu omillar keyinchalik yorqin bo'y ko'rsatdi.

O'zbekiston vaqtli matbuoti adabiyotimizning yirik arboblari bag'riga olib tarbiyalagan, qalamiga kuch va ijodiga sayqal bergan dargohdir. Shuning uchun Hakim Nazir o'z yoshlik g'ayrati, bilim va iste'dodini yozuvchilikka bag'ishlashga qaror qilgach, bu ezgu niyatga olib boradigan yo'l matbuot orqali o'tajagini anglaydi. 1933-1941-yillar mobaynida "Lenin uchquni" (hozirgi "Tong yulduzi"), "Yosh leninchi" ("Turkiston") gazetalari redaksiyalarida xizmat qiladi. Ayniqsa, bolalar gazetasida ishlagan yillarida yetuk shoir Zafar Diyor bilan ijodiy hamkorlikda bo'lish natijasida bolalarga iliq muhabbat bilan qarashga, ularning xarakteri va psixologiyasini kuzatishga o'rganadi. Bolalarning maktab hamda oiladagi hayotini tasvirlovchi kichik-kichik badiiy asarlari jamoatchilik e'tiborini o'ziga torta boshlaydi. Qo'li yozuvchilikka ancha kelishib qolgan Hakim Nazir o'rta ma'lumot bilan ko'zlagan maqsadga erishish qiyin ekanini tushunadi. 1936-yilda shu tilak bilan V.G.Belinskiy nomidagi Toshkent kechki pedagogika institutining til va adabiyot fakultetiga o'qishga kiradi. Institutni 1941-yili tamomlab, birmuncha vaqt o'qituvchilik qiladi.

Maktab Hakim Nazir uchun ayni muddao bo'lgan muhit edi. Bu yerda bevosita bolalar orasida ishlash yozuvchiga boy material beradi, voqelikka yanada yaqinlashtiradi. Oradan bir oz vaqt o'tgach, O'zbekiston radio eshittirishlarida ishlaydi.



Xalqimiz ikkinchi jahon urushi frontlarida qahramonona jang qilayotgan kunlarda Hakim Nazir xalqni, yosh avlodni ona-Vatanga cheksiz muhabbat, yovuz dushmanga o'tkir nafrat ruhida tarbiyalovchi ocherklar, hikoyalar, publitsistik maqolalar yozib, radiodan eshittiradi. Radiokomitetda o'n bir yil ishlab, bolalar va yoshlar uchun maxsus qiziqarli adabiy-badiiy eshittirish programmasi tuzishning tashabbuskorlaridan bo'ladi. Elliginchi yillar boshida respublika yozuvchilar uyushmasida xizmat qiladi. U yerdagi qizg'in ijodiy muhit, o'zbek adabiyotining G'afur G'ulom, Oybek, Abdulla Qahhor, Shayxzoda kabi atoqli namoyandalari bilan tanishish Hakim Nazir istiqboli uchun katta ahamiyatga ega bo'ldi. Yozuvchi adiblarning tez-tez o'tkazilib turadigan yig'ilishlari, nasr bo'limining o'sha yillardagi rahbari, zabardast adib Abdulla Qahhorning malakali maslahatlari yosh hikoyanavis uchun mahorat maktabi vazifasini o'tadi. Yozuvchi sifatida shakllanishida Abdulla Qahhorning ta'siri kuchli bo'lganini, novellachilik sirlarini shu san'atkordan uqib olganini keyinchalik Hakim Nazirning o'zi matbuotda shunday bayon qilgan edi: "...Mening o'zimda ham hikoyachilikka havas uyg'otgan yozuvchilardan biri Abdulla Qahhor bo'ldi. Biz birinchi hikoyalarmiz bilan Abdulla akaga duch kelganimizdayoq uning g'oyat qattiq qo'lli, talabchan ustoz ekanligini bildik. Bundan o'n yilcha burun Abdulla aka hikoyalarmidan birini o'qib chiqib: "Buni go'ngdan tozalansa, durust hikoya bo'ladi" degani yodimdan chiqmaydi, haqiqatda o'sha hikoyamda agroteknika oid gaplar ko'payib ketib, odam obrazi, uning psixologiyasi yaxshi ochilmay qolgan edi. Axir badiiy adabiyotning asosiy materiali inson-da! Odamlarning ichki va tashqi qiyofasini yaqqol ochib berish uchun ularning turli taqdirini chuqur o'rganib, aniq tasvirlab yozgandagina yaxshi asar maydonga kelishini Abdulla aka tajribasida ko'p uchratdik". Garchi Hakim Nazir hikoyalari Respublikamiz gazeta va jurnallarida urushdan oldingi yillardanoq ko'rina boshlagan esa-da, uning to'ng'ich kitobi "Qishloqdagi jiyanlarim"



1948-yilda nashr etildi. “Boshqoq”, “Bir tup g‘o‘za”, “Tanish surat” singari bir qancha hikoyalardan iborat bu kitob qisqa muddat ichida tez tarqaldi va o‘quvchilarning qo‘lidan tushmaydigan bo‘lib qoldi

Hakim Nazirning bolalar yozuvchisi sifatida bosib o‘tgan ijodiy yo‘li doimo adabiy tanqidchilikning diqqat-markazida bo‘lib keldi. Dastlab, “Salim otaning ginasi” hikoyasi bilan so‘z zarshunosi A.Qahhor nazariga tushadi. Shundan so‘ng yozuvchilardan P.Tursun, N.Safarov, A.Muxtor, X.To‘xtaboyev, S.Barnoyev; adabiyotshunos tanqidchilardan O.Sharafiddinov, M.Yunusov, L.Qayumov, U.Normatov, O.Tog‘ayev, M.Normatov, B.Imomov, P.Shermuhamedov, O.Safarov, X.Egamov va boshqa o‘nlab tanqidchilar vaqti-vaqti bilan yozuvchi ijodidagi yangilik va kamchiliklarni o‘rganib, qizg‘in munozaralarga sabab bo‘ladigan maqolalar yozganlar.

Qunt, chidam bilan o‘z ustida ishlashi, tinimsiz ijodiy izlanishi tufayli Hakim Nazir bolalar yozuvchisi sifatida kitobxonlarga tanilib ulgurdi. Hikoya janri yozuvchi bilan yosh kitobxonlar olamini birlashtirishda go‘yo ko‘prik vazifasini bajardi. Bu ko‘prik orqali Hakim Nazir bolalarning boy, go‘zal, quvnoq, ajoyibotlarga to‘la dunyosiga kirib boradi. Bir-biridan ta‘sirli, bir-biridan o‘qimishli, bolalarcha jonli hikoyalari dunyo yuzini ko‘rdi. Bularda kichkmtoylammg quvonchga to‘la turmushi, his-tuyg‘usi, o‘qishi, xulq-odobi, kattalarga hurmati, mehnatga munosabati, milliy qadriyatlar o‘z badiiy ifodasini topdi. Hikoyalarda yozuvchining kichkintoylar saviyasi va ruhiyatini ko‘rsatishga alohida e‘tibor bergani diqqatga sazovor. Shu jihatdan adibning “Besh baho” (1955), “Cho‘l havosi” (1958), “Yaxshi ism” (1962), “Meni taniysizmi?” (1963), “Bolajonlarim” (1964) nomli hikoyalar to‘plamlari birin-ketin e‘lon qilinib, bolalar va o‘smirlarning ma‘naviy mulkiga aylandi.

Hakim Nazirning ko‘pgina hikoyalari bog‘cha yoshidagi yoki endigina birinchi sinfga qadam qo‘ygan bolalar hayotini



aks ettirishga bag'ishlangan. Adibning "Bir og'iz so'z", "Rasmlı kitobcha", "Davronning qushchasi", "Qaysargina ukam", "Yaxshi ism", "Ikki o'rtoq", "Bulbul", "Igna", "Bir tup g'o'za" kabi hikoyalari fikr dalilidir. Bu hikoyalarda bolalar o'rtasidagi o'zaro do'stlik, axloq-odob, a'lo o'qish, jamoat ishlarida faollik ko'rsatish, kattalarning yumushlariga ko'maklashish, qushlar va jonivorlarga g'amxo'r bo'lish, orzu-umidlar qanotida yashash kabi masalalar aks etadi.

Bolalarda orzu-umid, yaxshilik sari intilish kattalarga nisbatan kuchliroq bo'ladi. "Yaxshi ism" hikoyachasida adib shu to'g'rida fikr yuritadi. Shoir endigina birinchi sinfga qadam qo'yg'an. U hali maktab qoidalarini yaxshi bilmaydi. Shuning uchun qizcha o'qituvchisi Zuhra yulduziga raketa uchirilganligi to'g'risidagi axborotni ro'znomadan o'qib berganida butun sinfni boshiga ko'tarib:

- Topdim! Topdim! Topdim!!!- deya baqirib yuboradi.

Ayon bo'lishicha Shoir kecha singilchalik bo'lib, chaqaloqqa nima deb ism qo'yish haqida bosh qotirilayotgan ekan. Shoirada havas yaxshi, niyat kuchli. Unga raketa va ayniqsa, Zuhra yulduzi yoqib qoladi. Shu onda singilchasiga Zuhra deb ism berish fikri tug'iladi. Bu haqda butun sinfga so'zlab beradi. "Yaxshi ism"ning xulosasi ham bolalar orzu qilgandek yakunlanadiki, asarni o'qigan har bir bolaning Shoiraga, u tanlagan ismga, qudratli texnikaga, shirinsuxan muallimaga va otaga havasi keladi.

Bolalarga har tomonlama to'g'ri ta'lim-tarbiya berish, tushuntirish, o'rgatish, ularda ko'nikmalar hosil qilish kattalarga bog'liq. Yozuvchi "Bulbulcha" hikoyasida bu masalaga katta e'tibor beradi. Ona tabiatga, qushlarga mehribonchilik qilish g'oyasi bu asarning g'oyasini tashkil qiladi.

Qobiljon qushlarni ehtiyot qilish, e'zozlash kerak ekanligini, ularni urish, ozor berish yomonligini hali tushunib yetmaydi. Shu sababli qo'shni hovliga kelib sayragan bulbulni



urmoqchi bo'ladi. Olim aka ishdan qaytganda Qobiljon qo'shnilarnikiga bulbul kelganidan xabar beradi.

- Dada, dada! - dedi u ko'zini katta ochib, - nega bizning boqqa bulbul kelmaydi-a?

- Qo'rqadi,- dedi dadasi.

- Nimadan qo'rqadi?- dedi u ajablanib.

- Sendan!- dedi dadasi.

- Iya, nega endi mendan qo'rqadi?

- Axir kesak otsang, mayib bo'ladi-da? Bu ishing yaramaydi deb aytib edim-ku. Qobiljon indamay o'ylanib qoldi: endi nima bo'ladi? Rostdan ham bulbuljon uning bog' iga hech kelmasmikin-a?

- Kesak otmasam keladimi, dada?- dedi oxiri Qobiljon.

- Albatta, keladi, - deb ishontirdi dadasi.

- Bo'pti! - dedi Qobiljon va shu paytdan boshlab qushlarga kesak otmaydigan bo'ldi.

Adibning maktab yoshidagi bolalarga bag'ishlab yozgan juda ko'p hikoyalari kitobxonni ona-yurtini sevishga, mehnatkash bo'lishga, mehnat ahlini, ota-onani e'zozlashga, kasb-hunar egasi bo'lishga chorlaydi.

Hakim Nazir hikoya janrida muvaffaqiyat bilan qalam suradigan bo'lgandan keyin, bolalar uchun maroqli qissalar yozish orzusiga tushadi. 1954-yilda yozilgan "Ko'korol chiroqlari" o'sha orzuning amalga oshuvi edi. Katta hajmli asarlar yaratishdagi birinchi tajriba hisoblangan "Ko'korol chiroqlari" muayyan nuqsonlardan xoli emasdi. Asar muallifning do'stlari bildirgan istaklar, mulohazalar asosida qayta ishlanib, 1958-yili "So'nmas chaqmoqlar" nomi bilan nashr qilindi. "So'nmas chaqmoqlar" baxtli bolalik haqidagi qissadir. Unda bolalar va o'smirlarning bir yoqadan bosh chiqarib, nihoyatda ahil bo'lib yashaganliklari uchun o'qishda ham, ijtimoiy foydali mehnatda ham maqtashga loyiq yutuqlarga erishganliklarini ko'rish mumkin.



Hakim Nazir har bir yangi asari uchun materialni o'ziga hamnafas zamondoshlarining kechib turgan real turmushidan olishga o'rganganidan, respublikamiz bo'ylab kezib yuradi. Uning asarlari mavzuiga ko'ra ba'zan Farg'ona vodiysida, ba'zan Buxoro gazchilari orasida, ba'zan esa, paxtakorlar delegatsiyasi orasida Ozarbayjon dalalarida ko'rish mumkin.

Yozuvchining "Kenjatoy" (1976) qissasida hunar maktabi hayoti qiziqarli va jozibador aks ettirilgan bolib, o'smirlarda ishchi kasbidan faxrlanish tuyg'usini tarbiyalashga xizmat qiladi.

"Tohir-Zuhra qissasi"ning (1985) bosh muammosi hayotga qadam qo'yayotgan, balog'at pallasidagi o'spirin bilan qizaloqning yosh qalblarida tug'ilmish ilk sevgi kechinmalariga qaratilgan, qahramonlarning yoniq iztirobiga keng o'rin berilgan.

"Dadamni topib beringlar" qissasida (1991) bir dehqon oilasi boshiga tushgan nohaqlik fojiasi kichiklar nazari orqali o'tkazilib, ularning ongi va ruhiyatiga yetkazgan salbiy ta'siri badiiy tahlil etilganini ko'ramiz va kitobxon yosh qahramonlar bilan iztirobga tushadi.

Hakim Nazir so'nggi kitobini "Oq fotiha" deb atadi. Bu xotira-qissa bo'lib, bolalik sarguzashtlariga bag'ishlanadi. Muallif bezovtalik, g'ulg'ula-hayajonlarga to'la bolalik chog'lari ko'rgan-kechirganlarini jonli lavhalarda hikoya qiladi, kichiklikda ota-onasidan olgan ilk insoniy saboqlari uchun ularga chuqur va samimiy minnatdorchiligini izhor qiladi.

Darhaqiqat, endigina mustaqil hayot ostonasiga qadam qo'yayotgan o'smirlarni yosh niholga o'xshataman: niholni qanchalik avaylab-asrasang, unga mehringni bersang, shuncha to'g'ri va ko'rkam bo'lib o'sadi; e'tiborsizlik qilsang o'tinga aylanadi.

Albatta, yozuvchi asarlarida yoshlar va texnikaga murojaat qilishi bejiz emas. Hakim Nazir texnikasi qudratli bo'lgan mamlakatda rivojlanish bo'lishini yaxshi anglaydi.



O'zbekistonning ham e'tiborli mamlakatlar qatoridan o'rin egallashini orzu qiladi, shu qudratli texnikani O'zbekistonlik aqlli, zukko, fidoiy yigit-qizlar boshqarishini istaydi.

1959-yilning iyul-avgust oylari. Respublikaning iqlimi mo'tadil joylarida qumga tuxum ko'msa ko'z ochib-yumguncha pishadigan paytlar-u, Hakim Nazir Qizilqum barxanlarini o'tib Gazliga ketayapti. Shu damda "Gazlida qum bo'roni shaxmat donalaridan batartib o'rnashgan yangi binolarga to'qnashib, avjiga chiqar va bo'ri kabi uvlardi. Shunga qaramay, bu ishchi posyolkasida hayot qaynardi..." Odamlar sayohat uchun kelmaydigan yerlarga ko'nglida biror "dardi" bo'lmasa kelardimidi? Bu "dard" shubhasiz, qum sahrolari o'rtasida "Shahri azim" barpo qilib, undan butun o'lkaga "yonar daryo" oqizayotgan mo'jizakor kishilarni madh etish "Gaz qaynar dostoni", "O'tlar tutashganda" nomli ocherklar olovkorlarni kuylash namunasidir.

Yozuvchining qumlar qal'asidan olib kelgan taassurotlari, qalbiga yaqin bo'lib qolgan katta-kichik quruvchilar ko'p edi. Ular bir-ikki ocherk doirasiga sig'maganidan alohida, maroqli qissa yozishga ahd qiladi. Nihoyat, "Gazqaynar" manzarasini yorqin bo'yoqlarda gavdalantiradigan "Yonar daryo" qissasi (1965) yaratiladi. Asarning mazmunini ushoqligi uchun "mitti" laqabini olgan o'quvchi bola Damirning oila muhiti, o'rtog'i Bo'ron Gazqaynarga boshlab borganda ko'rgan-kechirganlari tashkil qiladi. Muallif oiladagi kattalarning munosabatiga, yaxshi-yomon hodisalarga, turli predmetlarga Damirning ko'zi bilan qaraydi. Bundan ikki yil avval otasi vafot etib, singlisi Popuk ikkovi onasining qaramog'ida qolishgan. Ko'p vaqti ishda o'tadigan ona bolalar tarbiyasiga durustroq vaqt ajratolmaydi. Damir esa keksa buvisining o'ta mehribonligi, yumshoqligi orqasida o'yinqaroq, o'qishga kamhafsala, o'jar bo'lib qolgan. Jadvalda ko'rsatilgan kun tartibini istagancha o'zgartiradi, onasiga bo'yin egmaslikka harakat qiladi.



Damirlarga uzoq qarindosh bo'lgan Sulton amaki bu oilaga bot-bot keladigan bo'lgandan beri bolalar unga o'rganib qoladilar. Sulton amaki o'zi bilan birga bu uyda yetishmay turgan ota mehriga yaqin iliqlik olib keladi. Keyinchalik ota sifatida shu oilaga kirgan Sulton amaki Damir xarakterining shakllanishida muhim rol o'ynaydi. Damir hayotidagi ikkinchi voqea uning Qizilqumga safari bo'ladi. O'rtog'i Bo'ron tili bilan aytganda, "shu choqqacha o'z uyasidan tashqariga chiqmagan" beshinchi sinf o'quvchisi ko'z o'ngida yangi olam ochiladi.

"Yonar daryo"da muallif o'smirlar ruhiyatini ustalik bilan tasvirlaydi. Go'yo o'z qahramoni bilan izma-iz yuradi-yu, u nimani ko'rsa shuni qayd qilib, nima desa shuni yozib oladi. Damir sir yashirmaydigan ochiq bola. Onasidan arazlab ovqatga bormay och qolganida, darsi miyasiga kirmay "daftar betidagi raqamlar, harflar xuddi chigirtkaday dik-dik sakrashib" ketgani bormi, Sulton amakini dada qilib olib kelmoqchi bo'lganlarini eshitganda "g'ashi kelib buvisidan jahli chiqqani" bormi, dadasi oilani cho'lga olib ketaman deganda onasi gap o'rgatib, "bormaymiz" deyishga undashi ko'ngliga yoqmagani bormi, hamma-hammasini ro'y-rost aytib beraveradi.

Qissadagi "Adajon" sarlavhali hikoyada Damir va otasi o'rtasidagi rishtalarning nechog'li bog'lana borganini ko'rish mumkin. Chunki, Sulton amaki ham o'zini bu oilaning haqiqiy a'zosidek tutishida hali nimalardir xalaqit berar edi. Ayniqsa, bu yerga kelgandan buyon uydan biror marta xat kelmagani uni shubha- gumonlarga solardi. Shu sababli u o'g'lidan so'raydi:

- Damirjon!, - deydi u ovozi qaltirab, - chin o'g'lim bo'lsang, bir so'z so'rayman, to'ppa-to'g'ri javob aytasan, kelishdikmi?

- Himm, - deydi Damir.

- Qani aytchi: oying meni hech eslaydimi?

- Himm, - deb yuboradi-yu, lekin nima deb eslaganini aytib o'tinnaydi...



“Eh, Sulton amaki, Sulton amaki! - o‘ylaydi ichida Damir. - Sizning uydan ketib qolganingiz, oyimning hadeb xafa bo‘lavergani kelishga majbur qildi meni. Bo‘lmasa u yoqda oyimni xavotir oldirib, sizning oldingizda o‘zimni qiynab yurarmidim?” So‘ngra, singlisining xarxashasi-yu, buvisining kasal bo‘lib qolganlarini birma-bar gapiriub bergach:”- Borasizmi, ada?” - deb yuboradi. Bu Damirning birinchi bor “ada”lashi edi. Aytishga aytadi-yu, ichidan chuqur xo‘rsiniq keladi, qulog‘i shang‘illab, ko‘zi tinib ketadi. Sulton amaki ham shunday bo‘ldimi, ancha vaqt indamay, qon talashgan uyqusiz ko‘zlarini Damirga tikib qoladi. “Bu tikilishi menga juda ham yumshoq, mehribon, ich-ichimdagini bilib turganday yaqin ko‘rindi”, - deydi Damir. Keyin Sulton amaki birdan egiladi-yu, kuchli qo‘llari bilan qo‘ltig‘idan olib osmonga ko‘taradi va:

- Sanga aytsam o‘g‘ilnam, hoziroq uyga qanot boylab borardik! Ammo bu yerdagi ishlar, o‘zing ham ko‘ryapsan, og‘irlashib ketyapti, ko‘ngil uzolmay turibman,- deydi.

Shu tariqa, ota-bola o‘rtasida mehr rishtalari mustahkamlana boradi. Bu cho‘lda ish qizib ketadi. Sulton amaki chinakam jasorat ko‘rsatib, Damir ko‘z o‘ngida qahramonga aylanadi.

Hakim Nazir 1973-yilda “Lochin qanotlari” romanini yaratdi. Bunda urushga ketgan ota-onalarning o‘rnini bosgan O‘ktam, Umri va boshqa vatanparvarlar obrazi gavdalanirildi. Tadqiqotchilar “Lochii qanotlari” romani o‘zbek bolalar adabiyotida deyarli qo‘l urilmagan mavzuni - urush yillari kichkintoylarning buyuk g‘alabaga qo‘shgan hissasini ko‘rsatishga bag‘ishlangan yirik asar sifatida qimmatlidir, deb ta’kidlaydilar.

Yozuvchining “Chiranma g‘oz - hunaring oz” nomli pyesasi ko‘p yillar davomida Yosh tomoshabinlar teatri sahnasida qo‘yildi.



Hakim Nazir ijodida kattalar uchun yozilgan asarlar ham anchagina. Jumladan, “Odamning qadri” (1958), “O‘tlar tutashganda” (1960), “Onaizor” (1961), “Aziz odam” (1964) kabi hikoya va ocherklar to‘plamlari; “Suv gadosi” (1962), “Ko‘kterak shabadasi” (1968) shu ma’noda e’tirofga sazovor.

Hakim Nazir insoniylik, zamonaviylik va mehr-oqibat kuychisi sifatida ijtimoiy hayotimizdagi har bir o‘sinh-o‘zgarishni sinchkovlik bilan kuzatadi. Kuzatganlarida qalbiga ma’qul tushganlarini o‘rnak tarzida adabiyotga olib kiradi.

Shuning uchun ham uning qissalarida insoniy qadr-qimmat asosiy o‘rinda targ‘ib etiladi. Yozuvchi har lahzada insonni sharaflashni o‘zining burchi deb anglab, bu mas’uliyatli vazifaga katta mehr va mas’ullik hissi bilan qaraydi.

Shunisi ahamiyatliki, Hakim Nazir hayotni kuzatar ekan, undagi yangiliklarni faqat yangi bo‘lganligi, yangi mavzuga material bo‘la olishi uchungina olib kirmaydi. “Men ijobiy qahramonni zamon barometriga o‘xshataman. Qahramonning o‘y-fikri, orzu-umidi, xatti-harakati, ruhi-kayfiyatida zamon nafasi, davrning tomir urishi aks etib turadi... Kitobxon qo‘liga kitob olishi bilan undan o‘z qahramonini izlashi turgan gap. U o‘ziga yoqib qolgan qahramonga qalb to‘ridan joy beradi. Unga taqlid qilgisi, uning ishlari va xatti-harakatlarini takrorlagisi keladi, har ishda unga o‘xshashga harakat qiladi”, - deydi u.

Shu sababli adib hayotga badiiy obrazlar yangiligi nuqtayi nazaridan yondashadi. Qalb yangiligiga, gap yangiligiga intiladi. Yangi gapni aytishga munosib yangi muammolar yaratishga jazm etadi. Quدرات, Kolya, Mehri, Damir, Bo‘ron, Fotima, Tohir, Zuhra, Sobir, Raisalar yana shunday yangi gap aytish istagida tug‘ilgan tiplar bo‘lib, bolalar adabiyotida har birining o‘z o‘rni bor.

Hakim Nazir – O‘zbekiston xalq yozuvchisi, Hamza nomidagi respublika Davlat mukofoti va X.K.Andersen nomli Xalqaro faxriy diplom sovrindoridir.



Mirkarim Osim
- tarixiy-biografik qissanavis adib



Adabiyotda xalqimizning tarixiy o'tmishi mavzuini badiiy aks ettirish to'g'risida mulohaza yuritilsa, taniqli adib Mirkarim Osimning bu sohadagi xizmatlarini eslamaslik mumkin emas. Yozuvchi tarixiy o'tmishga hamisha va astoydil qiziqib kelgan. Xalq o'tmishiga qiziqish uning ijodida tarixiy mavzuni bosh yo'nalishga aylantirdi.

Mirkarim Osim 1907-yilda Toshkentda, ziyoli oilasida dunyoga kelgan. 1918-yildan "Shamsul urfon" nomli boshlang'ich maktabda o'qidi. 1921-yildan Alisher Navoiy nomidagi respublika bilim yurtida tahsil ko'rdi. Do'stlari Oybek va H.Yoqubovlar bilan bu texnikumda adabiyot-san'at turlarini o'rgandi. 1926-1930- yillarda Moskva Davlat pedagogika institutining tarix-iqtisod fakultetida o'qidi. Samarqandda o'qituvchilar tayyorlash kursida, 1932-yilda O'zbekiston Maorif xalq komissarligi Pedagogika ilmiy-tadqiqot institutida ishladi. Tarix fanidan qo'llanma, darsliklar yaratdi. Mirkarim Osim badiiy ijodni she'rlar yozish bilan boshlagan. So'ngra hikoya va qissa janrlarida ham qalam tebrata boshlagan. 1940-yilda Alisher Navoiy hayoti va ijodi haqida "Astrobod", "Alisher Navoiy va Darveshali", "Badarg'a", "Navoiyning xislatlari", "Ulug'bek va Navoiy" singari hikoya va tarixiy qissalar yoza boshlaydi. Adib bir



umr tarixiy qissalar yozish bilan mashg'ul bo'lib, bir necha yosh avlodni o'tmish va uning ilg'or shaxslariga nisbatan muhabbat ruhida tarbiyalashga hissa qo'shib kelmoqda. Bu orqali adib vatanparvarlik va insonparvarlik g'oyalarini ulug'lash yo'lidan boradi.



Mirkarim Osim 50-yillardagi Stalin qatag'onining be-gunoh ma'naviy qurbonlaridan biridir. Uning vatanparvarlik, millatparvarlik, o'tmish tarixga muhabbat ruhidagi asarlari o'z muallifiga qora kunlar olib keldi. Adib ko'p yillar sho'ro rejimining azoblarini chekadi. 40-yillarning oxirida qatag'onga uchraydi, 50-yillarda ozodlikka chiqadi. Tarixiy mavzularda hikoyalar, qissalar yozib, barcha asarlarida xalq tarixi, nurli siymolar xarakteri yorqin tasvirlanadi.

60-yillarda to'liq oqlanib, yurtiga qaytgan adib tarixiy asarlar yozishda davom etadi. Adabiy nashriyotlarda kichik adabiy xodim vazifalarida ishlaydi. Mirkarim Osim tarixchi adiblar orasida asl manbani buzmay, qayta badiiy jonlantirishi bilan ajralib turadi. Adabiyotshunos M.Sattorov tarixchi adibning asarlarini davriy jihatdan shartli ravishda uch guruhga ajratadi.

1. Tariximizning qadimgi davrlari haqida hikoyalar (makedoniyalik Iskandar, arab xalifaligining, keyinroq eroniy shohlarning O'rta Osiyoga yurishlari haqidagi bitilgan hikoya, qissa va turli obrazlar talqiniga oid asarlar).

2. O'rta asrlar tarixidan hikoya qiluvchi asarlar (mo'g'ullar istilosi, fan va madaniyatning buyuk arboblari haqida biografik qissa va hikoyalari).



3. XVIII asrdan to Oktabr to'ntarishiga qadar (1917-yil) bo'lgan davr tarixiy hayotini badiiy aks ettirgan asarlar turkumi.

Chindan ham muallif asarlari davriy jihatdan keng qamrovli. Ayniqsa, adibning O'rta asrlar tarixidan hikoya qiluvchi tarixiy-biografik qissalari alohida e'tirofga sazovor. Ayni paytda Mirkarim Osim asarlarini uch katta mavzu yo'nalishi bo'yicha tahlil qilish, baholash mumkin:

- tarixiy qahramonlik mavzuidagi asarlar.
- tarixiy-maishiy mavzu.
- tarixiy-biografik asarlar.

Adib yarim asrlik ijodiy faoliyatida ana shu uch davr va uch mavzuviy yo'nalish bo'yicha samarali ijod qilib, o'zbek nasrini, o'zbek qissachiligini boyitdi. Xususan, u tarixiy qissachilikda katta yutuqlarni qo'lga kiritdi. Bu yo'nalishda u qadim ajdodlarimizning, Vatanimiz tuprog'iga bostirib kirgan chet ellik bosqinchilarga (eron, arab, mo'g'ul, rus) qarshi olib borgan qahramonona kurashlari, o'tmish ilm-fan madaniyatimiz yulduzlarining jahon madaniyati xazinasiga qo'shgan beqiyos hissalar, o'zbek xalqining ikki tomonlama zulm-istibdoddan tinkasi qurib, adolatsizlikka qarshi isyonga o'tlanib, milliy ozodlik uchun kurashgani haqida bir qator asarlar yaratdi. Jumladan, muallifning "O'tror" qissasi fikrimizni dalillay oladi. Unda o'zbek xalqining 1216-1220-yillardagi siyosiy-ijtimoiy va madaniy hayoti badiiy aks ettiriladi. Qissada tarixiy voqealar talqini barobarida xalqning maishiy turmush sharoiti, kasb-kori, mashg'ulotlari tasviriga ham keng o'rin ajratilgan. Shuning uchun uni tarixiy-maishiy yo'nalishdagi asar deb qarash lozim.

Mirkarim Osim ijodida tarixiy-biografik mavzu ham katta oqimni tashkil etadi. Adibning "Jayhun ustida bulutlar" qissasi ulug' qomusiy olim Abu Rayhon Beruniyning, "Ibn Sino qissasi" buyuk hakim va olim Abu Ali ibn Sinoning, "Aljabrning tug'ilishi" hikoyasi mashhur matematik al-Xorazmiyning hayoti va ijodiga bag'ishlangan.



Adib o'z tarixiy-biografik asarlarini, odatda, bu ulug' insonlarning tavallud ayyomining tantanali nishonlanishi munosabati bilan sovg'a sifatida yaratgan. Jumladan, "Jayhun ustida bulutlar" qissasi Abu Rayhon Beruniyning 1000 yilligiga, uchto'rt biografik hikoyalardan tashkil topgan "Ibn Sino qissasi" Abu Ali ibn Sinoning 1000 yilligiga, "Aljabrning tug'ilishi" hikoyasi al-Xorazmiyning 1200 yilligiga bag'ishlab yozilgan. Shuningdek, adibning XV asr hayotiga oid "Zulmat ichra nur" qissasi atoqli shoir Alisher Navoiyning 525 yillik yubileyiga tortiq qilingan edi. O'smirlar va bolalarga bag'ishlangan bu asarda bobokalon shoirimiz hayoti va ijodiy faoliyatining barcha davri hissiy nozikliklari bilan yaxlit qamrab olingan. Yoxud adibning "Nur va zulmat" qissasi Jahon otin Uvaysiyning qalb iztiroblarini tarannum etadi. Shunga ko'ra bu kabi asarlar tarixiy-biografik qissalarning mumtoz namunalaridan hisoblanadi. Bundan tashqari, qahramonlik mavzuiga ijodkorning "To'maris", "Temur Malik", "Aleksandr va Spitamen" kabi asarlarini kiritish mumkin bo'lsa, maishiy mavzudagilarga "Mohlar oyim va Xonposhsha", "Karvon qo'ng'irog'i", "Elchilar" asarlari, shuningdek, "Karvon yo'llarida", "Do'stlik qaldirg'ochlari", "Tilsiz guvoh", "Zulmat va muhabbat nuri" kabi tarixiy qissalari hayotimizning, aniqrog'i, xalqimiz tarixining ilmiy va badiiy jihatdan nisbatan kam tadqiq qilingan davrlari - XVII-XIX asrlar hayotiga, o'sha davr xalqlarimiz turmushining tarixiy taraqqiyotiga bag'ishlanadi.

Tarixiy mavzularda asar yaratish olijanob vazifa va ayni paytda, benihoya mas'uliyatlidir. Tarixni baholash vaqtning zimmasida, albatta. Mirkarim Osim tariximizning ochilmagan sahifalarini birma-bir varaqlab, unga murojaat etdi. "U kishi nafaqat yozuvchi, - deb yozgan edi O.Yoqubov, - balki har qanday tarixshunos olim bilan (albatta, tarixiy voqealar haqida gap ketganda) bellasha oladigan, tarixni besh qo'ldek biladigan zukko edi. Shu boisdan, oddiy kitobxonlar qatori tarixshunos olimlarimiz ham uning asarlarini o'qib o'rganadilar".



Tarixiy qissalar ilmiy-nazariy ma'lumotlarga qaraganda ta'sirchan va tarbiyaviy-estetik ahamiyat ustuvor ekanligini S.Anorboyev mulohazalaridan ham anglash mumkin. Uning e'tiroficha, 1940-yillarda hali adabiyot darsliklari va xrestomatiyalarda Alisher Navoiy haqida qisqacha biografik ma'lumotlar bo'lmagan bir paytda, olimlarning davriy matbuotda e'lon qilingan Navoiy hayot yo'li, ijodining keng tahlili o'quvchilar ommasiga boy ma'lumot bera olgan. "Mirkarim Osimning "Alisher Navoiy va Darvishali", "Astrobod", "Alisherning yoshligi", "Badarg'a" hikoyalarini o'qiganimda esa, - deb yozadi muallif alohida qoniqish bilan, - Alisher mening ko'zimga goh uyqusirab otdan yiqilib, Yazd cho'lida qolib ketgan ziyrakkina bola, goh navqiron yigit, goh... johil ruhoniylardan tap tortmay hajv qiluvchi tili o'tkir zabardast shoir, goh adolat tig'ini baland ko'targan davlat arbobi qiyofasida namoyon bo'ladi".

1963-yilga kelib, Alisher Navoiy haqida adibning "Zulmat ichra nur" qissasi yaratildi. Qissada Alisher Navoiy obrazi boshqa shu mavzudagi asarlarga nisbatan teran aks etgan. Sababi, M.Osim Alisherning tadrijiy kamolotini ko'rsatishda shoir hayotidagi eng muhim qirralarga e'tibor qaratadi. Ya'ni, to'rt yoshli bolaning shoir tog'alarini hayratga solib Qosim Anvor g'azallaridan yod aytishi, kitobga ixlos qo'yishi, kekxa tarixchi bilan bo'lgan uchrashuvlari, qushlar tiliga muhabbati, Farididdin Attor haqidagi rivoyatlarni zavqu-shavq bilan tinglashi tizimli ravishda tasvirlanadi. M.Osim Alisherning "Mantiq ut-tayr"ga mukkasidan ketib, asosiy o'qishiga ulgurolmay qolayotganini ham haqqoniy ko'rsatadi.

"Devorlari ganch suvoq bilan o'ymakor qilib ishlangan maktabxona qiy- chuvga to'lgan. Yumshoq namat ustida tiz cho'kib o'tirgan bolalar chuvvos ko'tarib oldilaridagi taxta ustiga qo'yilgan kitoblarni o'qishadi. Kichikroq bolalar alifbe va "Abjad" yozilgan taxtalarga qarab: "Alif, be, te, se", deb qichqiradi, ba'zilar "Haftiyak"ni hijjalaydi. Alisher esa taxta ostiga Attorning "Mantiq



ut-tayr"ini qo'yib zavq bilan o'qiydi. Bu kitobni o'qiganda ko'z o'ngida ajoyib bir manzara hosil bo'ladi..." Alisher asarga diqqati jalb bo'lib, domlaning tanbehini eshitadi: " - Alisher, xayol surmay, sabog'ingni takrorla, hali seni qoshimga chorlagaymen."

Alisher "Qushlar tili"ni berkitib, taxta ustida ochiq turgan Qur'on kalimalarini takrorlay boshlaydi. "Yosin" surasining bir qismini yod olib kelish topshirilganiga qaramay, Alisher bunga kam vaqt ajratgani bois, domla uni yoniga chaqirib so'raganda, tutilib qoladi. " - Bo'lmaydi, sabog'ingni o'qimabsen", - deb o'shqiradi domla unga, ammo savashga qo'li bormaydi.

Shu tasvirdayoq Alisher obrazi ifodasida tabiiylik yaqqol seziladi. Garchi so'z bo'lajak shoir haqida ketayotgan esa-da, uning hamma bolalarga xos xususiyatlari, bir narsaga qiziqdimi, butun xayoli o'shanga band bo'lib, asosiy vazifalardan chalg'ishi o'rinli tasvirlangan.

Qissada Alisherning ana shu bolalik tasviridan so'ng, o'n olti yoshli o'spirinligi davriga e'tibor qaratiladi. U maktabdosh do'sti Husayn bilan Abulqosim Bobur saroyida xizmatga kiradi. Bu davr ham Alisher hayotida burilish yasaydi. Podshoh vafot etishi bilanoq, taxt uchun kurash alanga oladi, o'n sakkizga kirgan barvasta Husayn Mirza ham bir kuni Navoiyni chodiriga chaqirib, o'zi bilan birga safarga chiqishni taklif qiladi:

" - Men qazoqliqqa chiqib keturmen, - deydi Husayn xipcha belidagi kamarga qilich-qinini osar ekan. - Yuring men bila Semurg' qushini izlamoqqa!

Uning izlagan Semurg' qushi panjasi va tumshug'i qon, odam go'shtiga o'ch yirtqich parranda ekanini Navoiy yaxshi bilardi, shu sababdan sobiq maktabdoshining taklifini rad etib:

- Men Mashhad shahrida qolib, madrasada o'qimoq niyatidadurmen, - deydi.

- Afsuski, siz qilich emas, qalam bila mashq qilib kelgansiz, bo'lmasa menga ergashib ketgan bo'lur erdingiz. Mayli, siz ilm



xazinasidin durdonalar tera bering, yurt uchun yarab qolar. Men ersam ko'kragimni shamolga berib, Semurg' qushini izlaymen”.

Bu tasvirda ham Alisher Navoiyning ilm va ma'naviyatga ulug' e'tiqodi ko'rsatilgan. Ammo shu bilan birga Navoiy iztiroblari ham yonma-yon berib boriladi. Xususan, qissaning “Pahlavon Muhammad hazili” faslida yosh shoirning hayotda duch kelgan mashaqqatlari haqida fikr yuritiladi. Jumladan, uning ota onadan yetim, homiysiz qolgani yetmaganidek, musofir yurtida mafosil (suyak zirqirashi) kasaliga muhtalo bo'lishi, u turgan pastak hujrada kechirgan kunlari, Mashhadda Pahlavon Muhammaddan ko'rgan ezguliklari hikoya qilinadi. Shu munosabat bilan ulug' ustozning unga qilgan qaltis hazili, ya'ni, Navoiy kechqurun yozib cho'ntagiga solib qo'ygan yangi g'azalni uni ko'rgani kelganda uyqusi elitgan shoirga sezdirmay, qoziqqa ilingan jomaning chokini tikish uchun olgan Pahlavon Muhammad bu g'azalni ikki-uch marta o'qiboq, yodlab oladi-da, yana joyiga qo'yadi. Navoiy uyg'onib, ustozni keltirgan taomdan tanovul qilgach, adabiyot, she'riyat haqida suhbat boradi va gap kelib, otashnafas shoirlarga taqaladi, Navoiy Lutfiyni ehtirom bilan tilga oladi; Pahlavon Muhammad esa Sayid Nasimiy haqida kuyib-yonib gapiradi-da, Navoiyning shu bugun ertalab yozgan she'rini zavq bilan o'qib beradi:

Har qayon boqsam yuzumga ul quyoshdin nur erur,

Har sori qilsam nazar ul oy menga manzur erur.

She'rning so'nggi ikki misrasini o'qiyotganda “Navoiy” so'zi o'rniga “Nasimiy” so'zini qo'yib o'qiydi:

Gar Nasimiy simbarlar vaslin istab ko'rsa ranj,

Yo'q ajab, nechunki xom etgan kishi ranjur erur.

Shu tariqa, keksa ustoz oldida lol qolgan yosh shoirning g'alat ahvoli chinakam namoyon bo'lgan. M.Osim bu hikoyatni asarga o'rinli singdira olgan. Bundan tashqari, Navoiy o'z davrining eng ulug' shoiri, mutafakkiri bo'lib yetishuvi oson kechmagani, doimo o'ziga yarasha ziddiyatlar, qiyinchiliklarga



ro'para bo'lgani ham qissada tilga olinadi. Shu ma'noda qissadagi "Yaxshining sharofati", "Badarg'a", "Samarqand bo'sag'alarida" fasllari Navoiy hayotining murakkab qismatlarini o'zida aks ettirgan.

M.Osim Navoiyning notinch zamonda ham tinmay ijod bilan mashg'ul bo'lgani, sahargacha mijja qoqmay ishlashini quyidagi tasvirda yorqinroq aks ettiradi: "Shoirning tog' yon bag'riga solingan shiyponi o'rtasida pastak kursi ustida bir sham lip-lip yonib turar, mis qandil ustiga ko'z yoshlarini to'kar edi. Oydinsiz kechalarda sham nuri zulmatning bag'rini yorib o'tib, olisdan miltillab ko'rinardi..."

Ha, yozuvchi aytmoqchi bo'lgan haqiqat shuki, Navoiy yashagan ijtimoiy davr, hayot qop-qorong'u zulmatdan iborat bo'lsa-da, uning siymosi, ijodi o'sha zulmat bag'rini yorib o'tgan nur edi, go'yo.

Avtobiografik qissalarni o'rgangan A.Abrorov yozadi: "Avtobiografik qissalar o'z uslubiga ko'ra ikki turli bo'ladi. Bir necha turdagi avtobiografik asarlarda yozuvchi o'z boshidan kechirgan voqea va hodisalarni, faktlarni boshqa badiiy obraz orqali tipiklashtiradi. Aniqrog'i, avtorning o'zi asarning markazida tursa ham, u boshqa nom bilan sujetda harakat qiladi.

Ikkinchi tur avtobiografik asarlarda bosh qahramon sifatida bosh qahramon o'z nomi bilan qatnashadi. Avtorning o'z hayotida yuz bergan voqea va faktlar, o'zi ko'rgan yoki ishtirok etgan epizodlar asarning asosiy materiali bo'ladi". Ushbu fikrlarni adibning tarixiy-biografik qisalariga tatbiq etadigan bo'lsak, ularni quyidagicha tasnif qilish mumkin:

1. Tarixiy shaxs boshidan kechirgan voqea va hodisalarni, dalillarni boshqa badiiy obraz orqali tipiklashtirish, boshqacha qilib aytganda, badiiy to'qimaga asoslangan tarixiy-biografik qissalar.

2. Bosh qahramon sifatida tarixiy shaxsning o'zi tanlanadi, ya'ni tarixiy voqelikka asoslangan tarixiy-biografik qissalar.



Adibning yuqorida nomlari zikr etilgan qissalarini ikkinchi guruhga kiritish mumkin.


Adibning tarixiy-biografik qissalarida tariximiz uchun munosib nom qoldirgan ko'plab tarixiy shaxslar obrazi yaratilgan. Bu haqda adabiyotshunos P.Shermuhamedov yozadi: "Mirkarim Osimning yana bir guruh asarlari borki, ularda xalqimiz tarixining zarvaraqalarida o'chmas qilib yozib qo'yilgan siymolarning tabarruk obrazlari tasvirlangan. "Jayhun ustida bulutlar" qissasining qahramoni Beruniy, "Yulduzlar sayri"dagi Ulug'bek, "Zulmat ichra nur" asaridagi Navoiy, "Ixlos tuzog'i" qahramoni Mashrab mana shunday obrazlardir." Binobarin, "Yulduzlar sayri" tarixiy-biografik qissasidagi badiiy lavhalar fikrimizni tasdiqlaydi. Unda Ulug'bekning bolalik yillari tasvirlanadi.

Bundan tashqari, Mirkarim Osim tarix bilan tillashgan adib sifatida To'maris, Shiroq, Spitamen, Xorazmiy, Beruniy, Ibn Sino, Ulug'bek, Mashrab kabi ulug' ajdodlarimiz siymosini ham tarixiy manbaalar asosida shunday yorqin chizgilarda yarata olgan. Zotan u o'tmishimiz bilimdoni sifatida e'tirof etilib, "O'zbekiston Respublikasida xizmat ko'rsatgan madaniyat xodimi" unvoniga sazovor bo'lganligi bejiz emas. Taniqli adib 1984-yili vafot etadi. Mustaqilligimizning o'n yilligi arafasida O'zbekiston Respublikasi Prezidentining farmoni bilan o'zbek milliy madaniyati rivojiga ulkan hissa qo'shgan M.Osim "Buyuk xizmatlari uchun" ordeni bilan mukofotlandi.

Bugungi kunning mashhur va tanilib kelayotgan tarixchi adiblari Mirkarim Osimni haqli ravishda o'zlarining ustozlari deb biladi.



Po'lat Mo'min
- bolalarning qo'shiqnavis shoiri
(1922-2004)



Bolalarning suyakli shoiri Po'lat Mo'min yoshligidanoq adabiyotga havas qo'ydi. U Toshkent pedagogika bilim yurtida o'qib yurgan vaqtida adabiyot to'garagiga faol qatnashadi. Adabiyotni qunt bilan o'qidi, o'rgandi. O'rta ma'lumot olgach, hozirgi Nizomiy nomli Toshkent davlat Pedagogika universitetining o'zbek tili va adabiyoti fakultetiga o'qishga kirib, uni muvaffaqiyatli tamomladi, aspiranturada o'qidi, maktablarda o'qituvchilik qildi. So'ngra O'zbekiston Davlat nashriyotida ishladi. P. Mo'minning birinchi she'rlar to'plami 1949-yilda "Sayrang, qushlar!" nomi bilan nashr etiladi. Kitob adabiy jamoatchilik tomonidan iliq kutib olindi. To'plamdan munosib o'rin olgan "Haykal", "Alla va Jalla" (ertak) singari



asarlari mazmundorligi, qiziqarliligi bilan kitobxonlarning e'tiborini o'ziga jalb etadi. Bolalarga atab ijod etish, bu sohada muvaffaqiyat qozonishi uchun qobiliyat va istakning o'zigina yetmaydi. Belinskiy ta'rifi bilan aytganda, bolalar yozuvchisi bo'lib tug'ilish kerak. Bu bolalar yozuvchisi mohir pedagoglarday bola qalbining bilimdoni bo'lsin, nozik did egasi, go'dak tabiati va psixologiyasining bilimdoni, mehribon va bolajon, kamtarin va samimiy, bolalarcha soddadil ham dono bo'lsin, degan mazmunni taqozo etadi, albatta. Po'lat Mo'min ijodida ana shunday xususiyatlar mujassamligi uning ijodi misolida ayonlashadi. Shoirning tinimsiz ijodiy mehnati tufayli "Hunardan unar", "To'g'ri o'sgan gul bo'lar", "Aql qayerda bo'lar", "O'rinbosarlar", "Oltin nay", "Bir yarim Karim", "Endi adashmaydi", "Barcha bola do'st bo'lsa", "Rahmatga rahmat", "Gazpolvon ertak aytar", "Do'sting qancha ko'p bo'lsa", "Oftob va odob", "Yaxshilarga o'xshasam", "Bu juda soz", "Eson va Omon", "Oltmish olti oltin qo'l", "Ustozlar izidan", "Bolalarning baxti kulkan", "Bir yuz bir oltin qo'l" she'riy to'plamlari; "Chanoqvoy bilan Qovoqvoy", "Bahodirning botirligi", "Oq fil yo'qoldi", "Suqatoy-konfetvoy", "Ona bolam deydi" kabi ertaklari, pyesalari yuzaga keldi. Bu kitoblarga kirgan eng yaxshi she'r va qo'shiqlari, doston va ertaklari bolalar adabiyoti xazinasiga munosib hissa bo'lib qo'shildi, uni boyitdi. Bu asarlardan bir qanchasi jahon xalqlari tillariga tarjima qilinganki, bu faqat shoirning emas, balki o'zbek bolalar adabiyotining ham yutug'idir. Kimda-kim a'lo va yaxshi baholarga o'qish uchun astoydil intilsa, harakat qilsa, zahmat cheksa, shubhasiz, u maqsadiga erishadi, samarali bilim oladi. Agar bu intilish jismoniy mehnat bilan qo'shib olib borilsa, yanada muvaffaqiyatli bo'ladi. Po'lat Mo'min ta'lim va jismoniy mehnatga bag'ishlangan she'rlarida mehnat va mehnatsevar bolalar haqida fikr yuritadi. Ba'zan ishyoqmas, dangasa, yalqov o'quvchilarni tanqid qiladi, ularning kamchiliklarini ochib tashlaydi. Masalan, "Besh oldim, besh!" she'rining qahramoni uzoq vaqt past bahoga o'qib yurardi, fanlarni ko'ngildagidek



o'zlashtira olmaganidan do'stlari, ota- onasi va o'qituvchilar oldida gunohkordek his qilardi o'zini. O'quvchi bunday qiyin ahvoldan faqat ko 'proq dars tayyorlashi, kitob o'qishi bilan qutulib ketishi mumkinligiga ham ishonardi. Bir kuni u uyga berilgan topshiriqni qayta-qayta o'qib, dars va kitobdan boshqa hech narsani o'ylamaslikka harakat qiladi. Natijada, ertasi kuni "besh" baho oladi. Shu-shu bola kitobni sevib qoladi. Qunt qilish, berilgan topshiriq ustida ko'p mehnat qilish lozimligini tushunib yetadi. O 'zidagi bunday ijobiy o'zgarishdan xursand bo'ladi. Boladagi bu quvonch va hayajonni shoir yosh kitobxon ruhiyatiga mos ravishda chizib beradi:

Shunday qilib do'stlarim, Aytsam yurak so'zlarim, Yurishib qoldi ishim Ko'payib ketdi "besh»"im.

Bolalar shoirining "Tuganmas kon", "O'qituvchi baho qo'yganda", "Ko'chalarni to'ldirib", "Sizga nima bo'ldi, o'g'il bolaiar?", "Yuqumli "2"lar", "Bilsa bo'lar ekan- kul", "Sentabrdan kim sevinar?" kabi she'rlarida ham a'lo va yaxshi o'qish uchun intilayotgan, harakat qilayotgan bolalar to'g'risida yozilgandir. Ba'zan o'quvchi- yoshlar orasida mug'ambir bolalar ham topilib qoladi. Shoirning "Qo'l ko'tarib qo'lga tushdi" degan she'rida shunday bolalar kulgi qilinadi. Asar qahramoni aslida dangasa, ishyoqmas, qoloq o'quvchi. U buni o'qituvchisiga sezdirmaslik uchun har kuni dars paytida "Men aytaman, deb ko'taradi qo'l". O'qituvchi esa bolaning bunday mug 'ambirligini sezmaydi, u darsni yaxshi o'zlashtiribdi, deb undan so'ramaydi. Oxiri bir kuni "Mayli, ayta qol" deydi. Shunda haligi bola savolga javob bera olmay, o'qituvchi va o'quvchi do'stlari oldida izza bo'ladi:

Darvozasiga

Urilganday gol, Qo'lga tushgandi U ko'tarib qo'l.

Shoir she'rlarida kichkintoylarning jismoniy mehnatga intilishlarini ham ochib berishga harakat qiladi. Uning "Yer chopildi - javob topildi" she'rining yosh qahramoni uyga berilgan topshiriq - misollarni dastlab, ishlay olmaydi. Shunda u



jismoniy mehnat qilishga kirishadi - yer chopadi; terlab-pishib, ko'ngli yorishadi, fikri oydinlashadi. Nihoyat, uyga berilgan misollarni qiynalmay yechadi; yer chopilgach misolning javobi ham topiladi. Shoirning "Oftob chiqdi olamga" she'ri xalq og'zaki ijodidagi yalinchoq janri stilizatsiyasi asosida yozilgan. She'rda bolalarning harakati, urinishi, kattalar ishiga ko'maklashishi zavqovar hikoya qilingan. Shu tariqa, shoir oftobning olam-olam quvonch, shodlik, mehnat, yashash, yasharish ramzi ekanligini kichkintoy do'stlari qulog'iga quyishga, buni bola obrazi orqali yanada yorqinroq, ta'sirliroq aks ettirishga harakat qiladi

Oftob chiqdi olamga, Chopib bordim dadamga. Dadam ko'chat ekardi, Salom berdim dadamga.

Po'lat Mo 'minning "5" baho qo'shig'i", "Xursandmisiz? Xursandmiz", "Uch baho - puch baho" singari qo'shiqlari o'qish, ilimli bo'lish mavzuiga bag'ishlangan. O'z ustida ko'p ishlash, kitob o'qish, dars qoldirmaslik "a'lo" o'qishning mustahkam garovi ekanligini shoir "Uch baho - puch baho" qo'shig'ida ancha tanqid qilib o'tadi. Onalarni, keksalarni hurmat qilish, e'zozlash ("Achom- achom buvijon", "Mehribonim, oyijon!"); o'zaro hurmat, do'stlikni ulug'lash ("Bir jahon bolalarmiz"); har bir shodiyona, bayramlarni zo'r tayyorgarlik bilan kutib olish, chevarlik kasbini bolalikdan bilib borish ("Ko'ylagim") mavzulariga bag'ishlab shoir o'nlab qo 'shiqalar yaratganki, bunday qo'shiqlar hamon bolalar tilidan tushmay keladi.

P. Mo'minning "O'ktam avlod" qoshig'i 5 hijoli misralardan tashkil topgan. Unda barkamol avlod siymosi chizib berilgan:

Sog'lom, barkamol

Avlod bo'lsalar, Ilm-u hunarda Kuchga to'lsalar. Vatanga ular

Har doim kerak, Sheryurak, asl Farzandlar kerak.

Qo'shiqning mazmunida vatanparvarlik hissi ustuvor. Uning ritmik jarangdorligini yuzaga keltirgan "b", "l", "m", "k" "r" kabi tovushlar takrori — alliteratsiya ritmik ohang hosil



qila olgan. Har misraning o'zi turoqlanib kelish bilan birga, mavzuning lirik ifodasi o'quvchiga ta'sirliroq aks etgan.

Bolalar bo'lsa, Topqir bo'lsalar. Chaqqon-u epchil, Chopqir bo'lsalar. Ko'zlari o'tkir Merganlar kerak Mardona ko'krak Kerganlar kerak.

Shoirning "Oftob ham yaxshi, odob ham yaxshi" she'rida ham "o", "u", "o" unlilari, "d", "t", "b", "z", "s", "f" undosh tovushlari alliteratsiyasini kuzatish mumkin. Ayniqsa, "odob-oftob", "lolalar-bolalar", "odam-olam" tarzida to'liq qofiyalangan jumlarlar she'rning ritmik, o'ynoqi ohangdorligi hamda yod olishga qulayligini belgilagan. Muhimi, bu she'rning mazmundorligiga putur yetkazmaydi. Po'lat Mo'min axloq va odob kuychisi hisoblanadi. Bu masala ko'proq uning "Birovlar", "Bir odamning afsusi", "So'zi shunaqa - o'zi shunaqa", "Behzodni bilasizmi?", "Ulg'aydimi aqlingiz?", "Qo'ling oltin - yo'ling oltin", "Birinchi bo'l, birinchi" kabi she'r va qo'shiqlarida ochib beriladi. Po'lat Mo'min "Alla bilan Jalla", "Ziyrak fil va ziqna boqqol", "Har kimniki o'ziga, oy ko'rinar ko'ziga", "Unutgan o'g'il", "Oltin nay", "Dono bola", "Bilganni qari - bilmaydi pari" singari ertak-dostonlarida xalq og'zaki ijodi namunalaridan unumli foydalangani ko'rinib turadi. Po'lat Mo'min dostonchi-shoir sifatida ham juda qadrlidir. Uning "Oltin nokli bog", "Ko'cha - KO'pchilik uchun", "Eh, rosa shirin ekan", "Xolning jiyyon velosipedi", "Ko'ngil istar yaxshilik" degan poemalari allaqachon kichkintoylarning sevimli asarlariga aylanib ketgan. Shoirning dostonlarida bolalar o'rtasidagi do'stlik, birodarlik, o'qituvchi va jonajon maktabga muhabbat, birlik, baynalminallik kabi masalalar ilgari surilgan. Bolalar hayotida sodir bo'ladigan yutuq va kamchiliklar badiiy bo'yoqlarda, qiziqarli epizodlarda chizib berilgan.

Po'lat Mo'min o'zining ertak-pyesalari bilan ham yosh kitobxonlar o'rtasida shuhrat qozondi. Uning "Qovoqvoy bilan Chanoqvoy", "Suqatoy-konfetvoy", "Ona bolam deydi, bola



onom deydi” nomli fantastik ertak-pyesalari uzoq vaqtlardan beri bolalarning quvonchiga quvonch qo’shib kelayotir. Qovoqvoyning dangasaligi, lapashangligi, erkalgigi, tantiqligini o’tkir kulgi ostiga oluvchi va Chanoqvoyning bilimdonligi, donoligi hamda mehribon do’stligini ulug’lovchi “Qovoqvoy bilan Chanoqvoy” bolalarni yaxshilikka da’vat etadi. Asarning shu jihatdan ta’lim-tarbiyaviy ahamiyati juda katta. Undagi ertaklarga xos shartli, allegorik obrazlar tomomila aniq va hayotiy zaminga asoslangan. Pyesaning bosh qahramonlaridan biri Qovoqvoydir. Uning timsolida shoir dangasalik va beg’amlik oqibatida darslarni o’zlashtira olmay, sinfda qoluvchi lapashang va po’k bolaning tadrijiy takomilini mujassamlashtirgan. Do’stlari ta’sirida Qovoqvoyning asta-sekin tuzala borishi, ilg’orlar qatoriga kirib, mehnatsevarlik va epchillik darajasiga ko’tarilishi bilan bog’liq voqealar, bu yo’ldagi kishilar o’rtasidagi munosabat, tortishuv va kurashlar pyesaning asosini tashkil etadi. P. Mo’min ertak sujetini harakatga keltirishda bosh va yordamchi konfliktlardan foydalanadi. Qishloq xo’jalik ekinlarining ashaddiy dushmanlari chigirtka va kapalaklar o’z urug’larini paxtakorlarga tarqatmoqchi bo’ladilar-u, Tarvuz, Qovun, Chanoqvoy, Paxtaoy, G’ujumoy, Lavlagi hamda Sholg’om kabi kuchlar ta’qibidan qo’rqadilar. Qovoqvoyning befahm, landovur, beg’am hamda qo’rqoqligi zararkunandalarga ish beradi. Ular paxtazorlarga sochishni buyurib, tuxumlari solingan xaltachani Qovoqvoyga zo’rlab tutqazadilar. Hasharotlar undan o’z maqsadlari yo’lida foydalanish uchun harakat qilsa, ijobiy qahramonlar Qovoqvoyni tarbiyalamoqchi. Mana shu o’rtadagi kurash asar konfliktining boshqa yetakchi tomonini tashkil etadi. Mehnatga bo’yni yor bermay, darslarni o’zlashtira olmaganidan tashqari, Qovoqvoy tanbal, yalqov, fahm-farosati kam, bo’shang, ayni vaqtda u haddan ziyoda chiranchiq. Uning xarakteridagi bu sifatlar asardagi ijobiy kuchlar bilan bo’lgan ziddiyat va to’qnashuvlarda ochib tashlanadi, Qovoqvoy asta-sekin tuzalish tomon yo’naltiriladi. Bir-birini o’rtoqlarcha samimiy tanqid



qilishga asoslangan ijobiy kuchlar o'rtasidagi shu ziddiyatlar dramatik konfliktning yordamchi chizig'ini yuzaga keltiradi. Po'lat Mo'min Qovoqvoyning maqtanchoqligini fosh etib, uni izza qilishda to'g'ridan-to'g'ri zalga - tomoshabinlarning o'ziga murojaat etishi orqali asarning jonliligini ta'minlaydi. Qovoqvoyning "Mendan karra jadvalni so'rang, suv qilib ichib yubordim",- degan mazmunda kerilib savol-javob o'ynashi zalni faollashtiradi, maqtanchoqning miyasi g'ovlab, o'sal bo'lishi qalblarga samimiy kulgi shavqini soladi. Chiranchoq Qovoqvoyning jismoniy zaif va po'kligi kamtarin Tarvuz bilan yuz bergan tortishuv va to'qnashuvlarda, boks musobaqalarida bilinib, sharmanda bo'ladi. Qovoqvoy Tarvuzdan yengilib zil ketsa, ikkinchi tomondan qadam-baqadam g'ayratga kira boradi, badan tarbiya mashqlari foydasini, mehnatsevarlik manfaat keltirishini anglaydi. Qovoqvoyning qayta tarbiyalanishida ayniqsa Chanoqvoy hal qiluvchi rol o'ynaydi. Boshda Chanoqvoyning odilona, samimiy, do 'stona maslahatlariga mensimay qarab, quloq solmagan Qovoqvoy "Sehrgar" gaplarini jon dili bilan tinglaydi, uning ko'rsatmalariga amal qilib, karra jadvalni o'rgana boradi, g'ayratga kiradi, faollashadi; zararkunanda hashoratlarga qarshi kurashish, ularni tutishda faollik ko'rsatish darajasiga ko'tariladi. Biroq uning xarakteridagi zaif tomonlari tezda uzil-kesil yo'qolmaydi. U endi do'stlariga "Sehrgar"ni uchratganligi bilan maqtanadi. Muhimi shundaki, do'stlar uni qayta tarbiyalashga, o'z saflariga qaytarishga muvaffaq bo'ladilar. Pyesaning she'riy kuchi, yumoristik va satirik fazilatlar ham Chanoqvoy, Qovoqvoy, Tarvuzvoy nutqida, ularning dialog va monologlarida yaxshi ko'rinadi.

Bu asardagi yaxshi fazilatlar dramaturgning boshqa bir ertak-pyesasi «Suqatoy- konfetvoy»da ham ko'ringan. Mavzusi va g'oyaviy yo'nalishi, uslubi jihatidan bu ikki asar bir-biriga yaqin. Unda ham ilm, odob, halollik va mehnatsevarlik ulug'lanadi. Voqea Bilim xola, Janjal xola, Qurt o'rtasidagi kurash asosida rivojlanadi.



Po'lat Mo'minning butun e'tibori, ijodining mohiyati bolalarga hayot yo'lini ko'rsatib berishga intilishdan iborat. Shu pyesadagi Aqljon bilan Odobjon aytganidek:

Aql, Odob, Fan yo'li,

Yo'llarning eng ma 'quli, Kimki yursa uch yo'ldan, Ishi keladi o'ngdan, Yo'llar eltar maktabga, Yetkazadi maqsadga.

Anglashiladiki, Po'lat Mo'min ijodining yetakchi g'oyasi yosh avlod ma'naviy kamolotini yuksaltirish hamda axloqiy qadriyatlardan saboq berishdir.

Qudrat Hikmat **she'rlarining badiiy - tasviriy xususiyatlari** **(1925-1968)**



Qudrat Hikmatning bolalar shoiri sifatidagi qirralari rang-barang. Uning badiiy olami nihoyatda boy. Shoirning so'z va topilmalari, o'z fikrini badiiy tamsillar yordamida obrazli ifodalash orqali betakror badiiy nutq yarata olish mahorati o'ziga xos uslubini belgilaydi.

Qudrat Hikmat Toshkentning eng qadimgi mahallalaridan biri bo'lgan Sebzorda 1925-yil kambag'al dehqon oilasida dunyoga kelgan. U onasidan yoshligidanoq yetim qoladi. O'rta maktabni bitirib chiqqach, adabiyotga, she'riyatga bo'lgan ixlosi ijodkorlar huzuriga boshlaydi. U o'quvchilik chog'lardayoq, Q.Muhammadiy rahbarligidagi ijodkorlar to'garagiga qatnagan.



1945-yildan Qudrat Hikmat she'rlari o'sha davr matbuotida nashr etila boshlagan.

1947-yilda esa Oybek tavsiyasi bilan xalq og'zaki ijodini puxta o'rganish maqsadida Samarqandga borib, Islom shoirning kotibi sifatida ish boshlaydi. 1950- yilda yosh shoirning ilk kitobi "Mening Vatanim" nomi bilan nashr etildi. Shundan so'ng Qudrat Hikmat nafaqat matbuotdagi chiqishlari, balki birin-ketin chop qilingan "Baxtli bolalar"(1951), "Obodlik"(1954), "Do'stlik"(1955), "Moskvaga sayohat", "Chirchiq", "Ilonshoh va uning amaldori Ari haqida ertak", "Uch o'rtoqning sovg'asi", "Soatjonning soati "(1964) kabi she'riy to'plamlari orqali tanilib bordi. Qudrat Hikmatning mehnat faoliyati ham asosan, bolalar matbuoti va nashriyotlarida kechgan.

Qudrat Hikmat she'rlaridagi lirik qahramonlar obrazi, umuman bolalik olami ifodasi keng va mo'l. Ularning ko'pchiligi juda kichkina, hatto endi tili chiqqan-u shunda ham o'z mulohazasiga ega. Shoirning "Ajoyib" she'ri shu jihatdan e'tiborli. She'rda lirik qahramonning kechinmalari kichkintoy qizaloqning xarakter xususiyatini eng yorqin detallarda izohlay olishi orqali teranlashadi. U qizning do'mbillab yurishini, chug'irlashini behuda ta'kidlamagan. Demak qizchasi endi 3- 4 yoshga kirib, biyron gapirishga o'tayapti. Ammo hali na o'simliklar va na tabiat hodisalarini yaxshi tushunmaydi. Shu sababli osmondagi quyoshni ham o'zining qo'lidagi pufagi kabi tasavvur qiladi:

Talpinib der quyoshga
Qarang ular katta shar
Ustlariga o'rashib
Qo'yishibdi tilla zar
Unga o'rtoq yuboray
Qulog'iga gul taqib
Bog'imizdan ketmasin
Boshqa yoqqa uloqib



Qizcha o'z pufakiga gul taqib, yuqoriga uzatmoqchi. Quyosh boshqa yoqqa uloqib ketmasin tag'in, degan xayol uni bezovtalantirgan. Shoir lirik qahramon tilidan qizchadagi ana shu holatni yorqin tasvirlaydi.

Quadrat Hikmatning ko'pgina she'rlarida bolalar tilidan hikoya qilish ustuvor. Shoir she'rlarini o'qigan kattalar ham beixtiyor bolalar dunyosining sirli olamiga kirgandek his qiladi o'zini. "Yomg'ir va men" she'rida buni yaqqol ko'rish mumkin:

Asfalt yo'ldan kelardim

Uyim ham yaqin

Bo'ldi momoqaldiroq

Chaqnadi chaqin

Yig'lab tuya bulutlar

Qochdilar qirga

Yo'l yarqirar oynadek

Uchrab yomg'irga

Men o'zimga qoyilman

Bosib ancha yo'l

Botinkam yap-yangiday

Bo'lmapti hech ho'l

Quadrat Hikmat bola tilida uning dilidagilarni shundaygina qofiyaga sola olgan. Bulutlarni tuyaga o'xshatilishi, ularning qirga qarab qochishi esa aynan kichkintoy tasavvurlariga xos. Muhimi, bolajon botinkasining yomg'irda yap-yangiday bo'lishidan behad xursand. Bu detal shoirning kichkintoylar istagi va sodda tasavvurini yaxshi bilganligidan dalolatdir.

Quadrat Hikmatning bolalar uchun yozilgan ko'pgina she'rlari kitobxonlarni o'ylantiradi, ularni fikrlashga, hayot haqida mulohaza qilishga da'vat etadi. Jumladan, "Nok nusxa lampochka", "Qo'lqop kiygan askarga, o'xshaydi mix polvon ham", "Tog'dan kelar pildirab, ariqlarda shildirrab", "Serhosil, qaychi



bargcha, xuddi bir qarich archa” kabi satrlari ko’p jihatdan sodda topishmoqlarga o’xshaydi.

Shoir she’rlarining badiiy olami ulardagi rang-barang tasviriy ifodalar, obrazlar orqali ko’zga tashlanadi. Masalan, “Bahor” she’rida o’ziga xos topilmalar mavjud:

Uchib yurar mayin shamollar,

Yelpib- yelpib anhor yuzini.

Qirg’oqlarda soyabon tollar, Oyna suvda ko’rar o’zini.

Tong yellari o’ynoqlab sekin, Jiydazorga kirib yo’qolar
Maysa o’tlar tebranib sekin, Orqasidan kuzatib qolar.

Chumchuqlarning og’zida cho’p-xas, In qo’yishar tutlar
ustiga.

Ko’kni quchgan teraklar to’ymas, Oro berar kulrang
po’stiga

She’rni o’qigan har qanday kitobxon uning estetik tasviri va jozibadorligini darrov ilg’aydi. Bolalar she’riyatida fasllar to’g’risida ko’plab she’rlar bitilgan. Ammo, shoir bahorni shunday tasvirlaydi-ki, natijada she’rning har bir misrasida yangi-yangi obrazlar jilolanadi. Bunda shoir tashxis san’atidan mohirona foydalanib, ko’klam obrazini qaytadan inkishof etadi. Natijada, bahor o’ziga oro, zeb berib, husnidan sarxush bo’lgan go’zal qiz timsolida yaxlit umumlashma obrazga aylanadi; tonggi shabboda, tol, maysa, o’t-o’lanlar, chinor va teraklar bir-birlarini kuzatadilar, ilhomlanadilar, yoki o’zlarini yelpiydilar. Bunday tasviriy usul o’quvchilarning xayolot olamini yanada kengaytirib, mushohadalashga o’rgatadi. Shu bilan birga, yosh avlodga tabiat va jamiyat o’rtasidagi o’zaro aloqadorlik va o’xshashlikni anglashga yordamlashadi.

Qudrat Hikmat bolalar shoiri sifatida she’r ohangdorligiga katta e’tibor beradi. Uning “Eshak nega hangraydi?” she’rida dolzarb ijtimoiy g’oya ham aks etgan. She’r mazmunidan hayvonlarning podshosi sanaluvchi Sher bir kuni o’rmonda fil,



tulki, kiyik, eshak va cho'chqani chaqirib majlis qiladi. Ularga savol tashlaydi:

- Qaysi hayvon dunyoda

Kuch-quvvatda ziyoda?

Boshqa hayvonlar nima deyishlarini bilmasdan, o'ylanib qolishganda,"Eshak hangrab tepib yer: - Ho men, i-ho men der." Sher uni chindan ma'qullab: "-mayli, sen zo'r, ko'p kuching!" deydi. Sher yana:

- Qaysi hayvon dunyoda

Go'zallikda ziyoda?! – deb savol berganida, na bo'rsiq, na jirafa, na kenguru biror marta gapga og'iz ochmay, eshak yuqoridagi javobni qaytaradi."Xo'p, sen ko'rkam",- deb qutuladi Sher. Nihoyat, Bahsda go'yo tong otar,

Sher so'ng marta so'z qotar:

- Dunyoda eng ahmoq kim?

Majlis ahli qolar jim.

Bu gal ham el burundan

Eshak turib o'rindan

-I-ho men, i-ho men!- der

-Ha, sen o'zing!- deydi sher.

Demak, shoir ahmoqlik belgilarini eshak xatti-harakatlari misolida aks ettiradi.

Zukko o'quvchi she'rdagi kinoyani tez payqaydi. Jamiyatda, insonlar orasida o'zini dono sanaydigan nodonlar ko'pligi va ularning kulgili ahvoli haqida xulosa chiqaradi. Kamtarinlik insonga kamol bag'ishlashiga iqror bo'ladi. Zotan, shoirning g'oyaviy maqsadi ham shu. Qudrat Hikmat she'riyatning badiiy xususiyatlari serjilo, shoir fikrlarni rassom singari chizayotganga o'xshaydi.

Qudrat Hikmat "Ilon shoh bilan uning amaldori Ari haqida ertak" nomli she'riy- adabiy ertakda esa folklor motivlaridan keng foydalangan. Buni shoir quyidagicha e'tirof etadi:



Yangi emas bu ertak,

Tinglang aytib beraman, Uni xalqdan olgandim, Xalqqa qaytib beraman...

Darhaqiqat, shoir bu adabiy ertakni yozishda xalq rivoyatiga asoslanadi. Ammo uni ifodalashda, obrazlarni tasvirlashda, voqea sujetini bayon etishda bolalarbop ohang, sodda tilni asos qilib oladi. Shoir ertak- rivoyat boshlanmasida dastlab, ilon, bo'ri, tulki kabi hayvonlar fe'l-atvori, yashash tarziga ham e'tibor qaratadi. Shuningdek, qovoq arining "ayg'oqchiligi"ni uzun kun g'ung-g'unqlab turli mish-mishlarni shohga yetkazishi, hukmdor shoh Ilonning tulki kabi hiylakorlar ichida qanday siyosat yuritishni birma-bir ta'kidlab o'tadi.

Xalq rivoyatiga ko'ra, Ilon ariga eng shirin qonni aniqlashni buyuradi. Ari barcha jonzotlarning qonini birma-bir totib chiqqach, eng mazali qon insonning tanasida oqayotganini bilib oladi. Bu xushxabarni Ilonga yetkazish uchun shoshilib ketayotgan ariga duch kelgan qaldirg'och, bu ma'lumotni sevinch bilan qarshi oladi va tilidan o'pish bahonasida arining tilini uzib oladi. Shundan buyon xalq orasida ari nuqul "g'ung'illaydi", qaldirg'och esa inson tepasida in qo'yib, osoyishta yashaydi, degan inonch bor.

Bu sujet Qudrat Hikmat she'riy -adabiy ertagida yangicha talqin, qo'shimcha voqealar va obrazlar bilan to'ldirilib, she'riy ifodalangan. Shoir bo'rining yovuzlik, tulkinining ayyorligini xalq ertaklari an'anasiga tayanib, teranroq ochib beradi.

Masalan, hukmdor shoh vaziri - tulkini yurt kezib, yerning xayrixohligini, sir- asrorini bilib kelishga yuborganida, tulki o'z odati bo'yicha ish ko'radi. Avval qo'raga ko'z olaytiradi, g'ozni yemoqchi bo'lganida, it vovullab huradi. Shunda odamlar uni ushlab, kaltaklab uradilar. Arang qutulib qolgan tulki odamga nisbatdan kekini unutmaydi.

Yoki Ilonshoh do'lga qolib, betob bo'lganda tulki paytdan foydalanadi: qovoq ariga eng shirin qon topib kelish amrini buyuradi. Garchi adabiy ertak xalq rivoyatidagidek yakun



topsa-da, arining qon ta'mini aniqlashdagi sarguzashtlari, ari va qaldirg'och, qaldirg'och va Ilon shoh muloqotlari yorqin voqealar ta'sirida jozibador hikoya qilingan. Natijada asar nihoyasidagi g'oya tarbiyaviy xarakter kasb etadi: Ilon xilvatda baqa ovlaydi. Yuzi shuvut tulki esa har joyda pisib yuradi. U qush, odam bor joyda qorasini ko'rsatmaydi. Ammo:

Katta-kichik qaldirg'och, Uchib keng yer kaftida Yashar ekan shod- inoq. Har xonadon shiftida, Hanuzgacha insonlar, Uni chorlab qoshiga, Sof dilligi tufayli, Ko'tarishar boshiga.

Binobarin, xalq rivoyatidagi aqida she'riy ertakda yanada ta'sirchan tarbiyaviy g'oyalarga boy tarzda aks etgan. She'riy ertakda fabula o'zgarishsiz saqlansa ham shoir g'oyaviy maqsadini allegoriya va antropomorfizm usullari vositasida ifodalaydi. Ya'ni, tulki, arining xatti-harakatlarida kinoya, istehzo yarq etib ko'zga tashlansa, hayvonlar va qushlarning o'zaro so'zlashuvida, ularning hukmdor, vazir, soqchi va ayg'oqchi kabi vazifalarni bajarishida insonga xos xususiyatlar mujassamdir. Bu esa o'z navbatida, Quadrat Hikmat asarida ham ma'rifiy-axloqiy maqsadlarni singdirish imkoniyatini bera olgan. Zotan, bu kabi she'riy-adabiy ertaklar nafaqat xalq rivoyatlari talqini nuqtayi nazaridan diqqatga sazovor, balki, ular orqali bolalarga jamiyatdagi turli toifali insonlarning xarakter xususiyatlari, munosabatlari mohiyatini real ifodalashi bilan ahamiyatlidir.

Quadrat Hikmat bundan tashqari, "Chovkar", "Toshbaqalar hujumi", "Qum ostida qovunlar" kabi she'riy ertaklarida ham xalq og'zaki ijodining u yoxud, bu qirrasi zamonaviy masalalar omixtaligida talqin etiladi.

Zotan, Quadrat Hikmat she'rlaridagi voqeabandlik, ob-razlilik qofiyalarning ixchamliligi, hatto, sodda tuzilishi, til xususiyatlari - barcha-barchasi shoir she'rlarining g'oyaviy-badiiy emotsionalligini oshirishga xizmat qiladi. Hamchunin, Quadrat Hikmat she'rlarini o'qib- ulg'aygan o'quvchi o'z ona tilimiz boyliklaridan voqif bo'lib, badiiy so'z qudratini teran his etadi, Vatan va yurt iftixori bilan yashaydi.



Nosir Fozilov
ijodida bolalar va o'smirlar ruhiyati talqini
(1929-2018)



Nosir Fozilov 1929-yili Qozog'istonning Chimkent viloyati Turkiston tumanining Koriz qishlog'ida tavallud topadi. Uning ota va onalari dehqonchilik bilan shug'ullangan. "Ijod deb atalmish yo'lning boshi,- deb yozgan edi N.Fozilov,- tom ma'noda, tug'ilish, bolalik dunyosi, bu dunyoning ulg'ayib, katta yo'llar yaratishi bilan chambarchas bog'liq". Bu o'rinda yodga albatta, ota-ona, oila va muhit tarbiyasi keladi, zero bu har bir shaxs uchun hayot maktabi.

Bo'lajak yozuvchining otasi Fozil, onasi Jahonbibi - ismi-jismiga monand xulq-atvorli, mehnatsevar insonlar bo'lishgani adibning o'zi tomonidan e'tirof etiladi. Nosir Fozilovning bolaligi 1930-1933-yillardagi ocharchilik va urush davriga to'g'ri kelgan. Adibning xotirlashicha, ularning qishlog'ini ikkiga bo'lib yuborishadi. Ular ko'chib o'tgan Yoyilma degan qishloqdagi 70-80 xonadon chorva bilan shug'ullangan. U paytlarda odamlar o'qish-yozishga havas qo'yishdan ham ko'proq qorin qayg'usi bilan qattiq bog'langan edi. Qishloqda faqat bitta - Qahhor degan odamda patefon bo'lib, salgina bo'lsa-da, dillardan g'amlarni yuvib, kishini xayolan uzoqlarga olib ketardi. Biroq kitobxonlik kuchli bo'lgan. Odamlar o'qish- yozishni deyarli bilmasalar-



da, Nosir Fozilovga o'xshash 7-8 yoshdan maktabga borib, sharillatib o'qishni qoyillatadigan bolalarga kechalari xalq dostonlari - "Go'ro'g'li"dan "Hasanxon", "Ravshanxon", "Avazxon" dostonlarini takror va takror o'qitishgan, sel bo'lib tinglashlardan charchashmagan. "Keyinchalik tushunsam, mushohada yuritadi adib, - ular shu dostonlarda ushalmagan armonlarini ko'rishar, ular bilan birga tug'ilib, birga yashab, g'am-hasratlarini unutishar ekan. Adabiyotning kuchini qarang-a"...

Bo'lg'usi adib ham o'qib, ham mehnat qilgan. U o'z tengdoshlaridan ancha kech, ya'ni 1949-yilda o'rta maktabni tugatgan. So'ng Toshkentga kelib, universitetda o'qishga kiradi va uni 1954-yilda tugatadi. Shundan keyin "Gulxan", "Sharq yulduzi" kabi jurnallarda, "Yosh gvardiya", G.G'ulom nomidagi Adabiyot va san'at nashriyotlarida turli lavozimlarda ishlaydi.

Adibning birinchi hikoyasi "Lenin uchquni" (hozirgi "Tong yulduzi") gazetasida 1953- yilda bosilgan bo'lsa, uning birinchi kitobi 1959- yilda "Irmoq" nomi bilan chop qilinadi. So'ngra, "Oqim"(1962), "Robinzonlar"(1964), "Qush qanoti bilan"(1965), "Qorxat"(1968), "Ko'klam qiyoslari"(1970), "Diydor"(1979), "Tanlangan asarlar" 2 jildlik (1983-84), "Shum bolaning nabiralari"(1985), "Ustozlar davrasida"(1988), "Bolaligim-poshsholigim"(1989), "Topdim-u yo'qotmadim"(2010) kabi kitoblari nashrdan chiqadi.

1985-yilda unga "Shum bolaning nabiralari" kitobi uchun O'zbekiston Yozuvchilar uyushmasining G.G'ulom nomidagi, 1986-yilda esa qozoq adabiyotidan qilgan tarjimalari uchun Qozog'iston Yozuvchilar uyushmasining Boyimbet Maylin nomidagi, "Ustozlar davrasida" asari uchun esa Hamza nomidagi Davlat mukofoti beriladi. 1990-yilda esa u "O'zbekistonda xizmat ko'rsatgan san'at arbobi" unvoniga sazovor bo'ldi. Shuningdek, Qozog'iston Prezidentining "Tinchlik va ma'naviy hamjihatlik uchun" xalqaro mukofoti (1994), Qozog'iston Yozuvchilar uyushmasining "Olosh" nomli xalqaro Mukofoti



(2000), G'alabaniy 50 yilligi munosabati bilan medal (1995), "El-yurt hurmati" ordenlari (1999) sohibidir.

Yozuvchi qissalari mavzusiga ko'ra o'tmish va zamonaviy voqealarni ifoda etishi bilan ajralib turadi. O'tmish deganimiz, o'tgan asrning birinchi yarmi. Bunda milliy tariximizdagi dolg'ali yillarda xalq hayoti, bolalar va o'smirlar olami o'quvchi ko'z o'ngida yorqin gavdalanadi. N.Fozilovning o'ziga xos badiiy mahorati shundaki, u nafaqat o'zbek, balki qardosh xalqlar turmush tarzi, tilini ham yaxshi biladi va ularni tabiiy aks ettira oladi. Shu ma'noda, uning qissalarida turli davr va turli millat o'smirlarining obrazlari gavdalanadi. Binobarin, "Shum bolaning nabiralari" qissasi oddiy voqeadan boshlangan. Bolalar maktabdagi "Qizil iztoparlar" to'garagiga a'zo bo'lishadi va bu a'zolar ro'yxati "Gulxan" jurnaliga yuborilgach, muharririyat bolalarga maxsus xat yo'llab, urush veteranlari jasoratini o'rganish bilan bog'liq topshiriq beradi. Anvar Furqat nomiga kelgan shunday xatni pochta qutisidan o'g'irlyotgan payt o'rto'g'ining o'zi kelib qoladi va xatni na o'zi o'qiy oladi, na do'stiga ko'rsata oladi. Ammo Furqat maktabdagi yana bir shunday to'garak a'zosi G'ayrat nomiga kelgan xatdan xabardorligi uchun bu topshiriqni bajarish haqida Anvarga maslahat soladi. Yozuvchi Anvar obrazini tasvirlashda G'afur G'ulomning shum bolasiga taqlidan yondashgani sezilib turadi. Faqat Anvar taraqqiy etgan davr bolasi ekanligidan, uning shumliklari ham zamonaviyroq. Masalan, u maktabda fizika to'garagiga ham a'zo. Sababi, temir-tersak uning jon-u dili. Radiomi, eski televizormi, zvonog-u dazmolmi-ey, xullas qo'llariga nima tushib qolguday bo'lsa, bilsa-bilmasa kavlagani-kavlagan. Shuning uchun hatto choraklik baholari ham pasayib ketadi... Uyda ham shu sababli turli hangomalarni qo'zg'ab yuradi. Anvar maktabdan kelganida singlisi Mahfuza chiqib qoladi.

- Endi o'lasan!
- Nega o'lar ekanman?!-deydi Anvar hangumang bo'lib.
- Radioni buzibsanku...



- Buzganim yo'q. Proigrevatelni olib, maktabdagi radioga qo'ydik. Anu maktabda muzika to'garagidagi radio ishlamas ekan... Shunga qizlar tansa tusholmay... Shu orada oyisi chiqib qolgach, bu chorakda "ikki" tushmaganligidan maqtanmoqchi bo'lgan Anvarning sumkasidan dazmol ham chiqib qolib, tag'in bahona izlashga tushadi. Oyisining avzoyi buzuqligini sezgach esa, devordan oshib, qochib qoladi. Anvar oyisidan ham ko'ra singlisi Mahfuzadan jahli chiqqan edi. Go'yo hammasini o'sha oyisiga chaqib bergan. Endi ko'chada sovqotib, qayerga borishni bilmay asabiylashayotib, undan qasd olish rejasini tuzib, navbatdagi hangomani boshlaydi. Barcha qo'ni-qo'shnilarni bola-chaqasi-yu, butun oilasi bilan mehmonga, onasining "Tug'ilgan kuni"ga aytib chiqadi. Maqsadi esa mehmon ko'p kelsa, qozon-tovoq yuvishni yomon ko'radigan singlisiga ish ko'paytirib, o'ch olmoqchi... Rostdan ham kechqurun hovli mehmonga to'ladi. Mahfuzaga ish ko'payib ketadi. Anvarning shumtakaligi kattalar tomonidan kulgi bo'lib, uning bobosiga o'xshagani, Nazarbekdagi voqealarda kimlar ishtirok etgani tilga olinadi, shu tariqa qissada o'tgan asrning 20-yillaridagi voqealar hikoya qilinadi...

Nosir Fozilov ijodida qissadan qissaga ko'chib yuruvchi obrazlar (Karim ko'zoynak, Izatulla, Jalil, Abdunabi, Po'lat amaki, A'zam...), tasvir va tashbehlar, (chalov o'rish, "eshak karvon" bilan g'alla tashish, o'smir yigitlar o'rtasidagi o'zaro nizolar) talaygina... Bu uning o'ziga qadrdon dalalar, ang'iz va jing'il kabi buta-yu to'qayzorlar, bolaligidanoq ko'z o'ngiga jo bo'lgan manzaralar (masalan, "qishlog'imiz oqshomini bir ko'rsangiz: odamlar daladan qaytib kelayotgan, poda orqasida bulutdek chang qoldirib, qishloq sari siljiyotgan, kunbo'yi ang'iz ustida donlab, g'ujg'on o'ynayotgan qora zag'chalar qishloq osmonini ajib bir kuyga to'ldirib, Sir bo'yiga - qo'noq joyiga shoshilayotgan..." Yoki, "bolalarning qiy- chui-yu, sigirlarning mo'rashi, itlarning vovullashi, ...sigirlarning tuyoqlaridan ko'tarilgan oppoq changning kattakon juldur ko'rpaga o'xshab



havoda muallaq qalqib yurishi” kabi); odamlar va voqealar ekanligini anglash mumkin. Uning adabiy qahramonlari va sujet chizig’idagi tasvirlar ham betakror: Iriskeldi, Supabek otalarning podachilik sir-u sinoatlari, ularga yordam beradigan Qalmaqon, Karim, Kamola kabi o’smir yigit-qizlarning balog’at pallasiga yetishdagi tuyg’ulari... Bolalarning uyma- uy yurib osh-u halol yig’ishlari, chalov o’rishi-yu, xirmonda ishlab, eshak, ot va tuyada shahar bilan qishloq o’rtasida sut-u qatiq sotib, oilani tebratishga yordam berishi, “eshak karvon”larda g’alla tashishi, dala-dashtni kezib, to’qayzorlar kechib ov qilishi, daryo -yu dengizda baliq tutib, o’z mehnati lazzatini anglab yetishi kabilar yosh kitobxon uchun ohorli hikoyalardir. Qolaversa, bu qissalarda qozoq, o’zbek, tatar, qirg’iz, ukrain, polyak kabi turli millat vakillarining umumlashma obrazi mavjud. Qissa qahramonlari qaysi millatga mansub bo’lishidan qat’iy nazar o’zaro bir yoqadan bosh chiqarib, ishlaydilar, qahramonlik ko’rsatadilar, yoxud o’zaro birodarlik aloqalarini yo’lga qo’yadilar. N.Fozilov talqin etgan obrazlar chindan ham o’z asosiga ega. Turkistonlik, qoraqalpog’istonlik o’zbek-u qozoqlar ana shunday qon-qarindosh bo’lib yashayotgani ayni haqiqat. Demak, bu tabiiy jarayonni o’smirlar kitobxonligida N.Fozilov maromiga yetkazib tasvirlagani e’tirofga loyiq. Ayni paytda qissalarda bu yoshlarning o’zboshimchaliklar qilib, ba’zan tashvish ham tug’dirishi yoki, o’zlarini katta bo’lib qolgandek mustaqil ish tutishga intilishlari bolalar adabiyoti tabiatini ochishga xizmat qiladi.

O’tgan asr bolalar qissachiligidagi tarixiy, avtobiografik, sarguzasht, detektiv, fantastik yo’nalishlar uning alohida tamoyillarini belgilagan bo’lsa, yangi asr bo’sag’asida inson ruhiyati, aniqrog’i bolalar va o’smirlarning ichki olami teran tadqiq etilgan psixologik asarlar ijobiy mazmun kasb etayotganini ta’kidlash joiz, albatta. Binobarin, yuqorida zikr etilgan bolalar adiblarining asarlarida ham bu jihat o’ziga xos uslubda namoyon bo’lganligini kuzatish mumkin.



Nosir Fozilov ijodiga xos bosh fazilat uning faqat o'zi yaxshi bilgan, chuqur his etgan va puxta o'rgangan mavzu, voqea va odamlar to'g'risida qalam tebratishidir. Uning "Oqim", "Qush qanoti bilan" va "Qorxat" qissalari shu ma'noda kitobxonlarga alohida taassurot uyg'otadi. Yozuvchining "Qush qanoti bilan..." qissasi yetuk adabiyotshunos To'xtasin Jalolovga bag'ishlangan bo'lib, qatag'on qurbonlari, shaxsga sig'inish davri oqibatlari badiiy adabiyotda yoritilgan dastlabki asar sifatida dolzarb. Qissada tuhmatga uchrab nohaq qamalgan Akmal aka qismati o'smir yigit Sarvar tilidan hikoya qilinadi. Ya'ni davr ziddiyatlari, qamoqdan bo'shab surgun muddatini o'tagani Turkiston qishloqlaridan biriga yuborilgan Akmal akaga qishloq ahli, avvalo bolalar qilgan g'amxo'rlik, do'stliklarining tarannum etilishi mustabid sho'ro istibdodi avj olgan 60-yillar adabiyotida o'ziga xos jasorat edi.

Qissadagi yana bir jihat kitobxonning alohida diqqatini tortadi. Bu aynan bolalar va o'smirlar orasidagina uchrab turadigan yashirin til ifodasi. Akbar, A'zam, Sarvarlar dalada mehnat qilisharkan, ularga tushlikda qatiq olib keladigan Hasan ko'zoynakning aldayotganini sezib qolishadi. Ya'ni qatiqda mazamatra yo'q, suv qo'shib, suyultirib kelayotgani bilingach, uni nima qilish haqida bahslashayotgan paytda, ularga boshliq etib tayinlangan Akmal aka kelib qoladi. Bolalar nima qilishni bilmay turganda, Akbar gapida davom etaveradi:

- Lamaymizmipoy?
- Dayqan libqi?- deydi A'zam.
- Tato'rt labo libbo' laymizpoy. Rimizbi, maningfer nidayo, rimizbi tao'r dayo'l. Mixo'p?
- Tibo'p.
- Chonqa mizboshlay.
- Rbi atdanso ngso'.

Akmal aka bu qanaqa til degandek bolalarga qaraydi. Ular tushuntirishadi. Maktabda maynabozchilik uchun shunaqa



tilda gaplashishlarini, bir soʻzni aytmoqchi boʻlishsa, u soʻzning oxirgi boʻgʻinini oldiga olib gapiraverishlari, qizlarniki yanada boshqacharoq, masalan “Uyga ketasanmi?”- demoqchi boʻlsa: “Ultishga keltishasanmi?” tarzida ekanini tushuntirishadi.

Yozuvchining tasvir uslubi, leksik qatlami bolalar uchun katta xazina. Bunday ifodalar asarning bir necha oʻrnida takrorlanib keladi. Masalan, “Saraton” qissasi shunday tasvir bilan boshlanadi: “Arpa boshloqlari sargʻayib, bugʻdoy boshloqlariga rang kira boshlagan, qovun palaklari tanob yozib, tuynaklar etik boshiday boʻlib qolgan palla. Dehqonlarning tili bilan aytganda: yoʻgʻon choʻzilib, ingichka uziladigan payt...”

Shundan keyin asar qahramonlari Kamola va Toʻra, ularning podachilik kasblari haqida soʻz boradi. Podachilik oʻzbek-u qozoq, turkman-u tojik, qirgʻiz xalqlarining qadimiy va azaliy kasblaridan biri hisoblanadi. Vatan urushi yillarida ham bu asosiy tirikchilik hamda mehr oqibat manbayi sanalgan. Ammo uning oʻziga xos mashaqqatlari, qolaversa bu kasbga oʻsmirlarning munosabati juda kam asarlarda badiiy talqin etilgan. Jumladan, N.Fozilov baayni yaylov manzarasini shunday jonlantiradi: “Poda har kuni oftob tikkaga kelganida belariq boʻyiga - suvotga (mol sugʻoriladigan joy) olib kelinadi. Hozir ham Kamola bilan Toʻra poda ketida changga botib kelishyapti. Kun issiq, dim boʻlishiga qaramay, ular ustilariga qalin fufayka, paxtali shim, kirza etik kiyib olishgan, boshlariga quloch bogʻichlari qaytarilgan quloqchin. Egnilaridagi kiyimlarining rangi qanaqaligini bilish u yoqda tursin, chang-toʻzon orasida ularning qaysi biri Kamola-yu, qaysi biri Toʻraligini ham ajratish qiyin edi... Gʻiyos aka podaning oldida, eshakka minib olgan, ustida paxtalik sirma chopon, boshida koʻhna tulki tumoq... Suvot podachilarning, qolaversa mollarning bir oz orom oladigan joyi... Ariq boʻyida xuddi kampirning tishidek siyrak oʻn-oʻn besh tup tol bor, soya-salqin... tagidan gʻir-gʻir shabada esib turadi.”



Albatta, XXI asr o'smirlarining qiziqishi, intellekti tubdan farq qiladi. Ularga ibrat bo'ladigan obrazlar ilm-fanda, ixtirochilikda, favqulodda holatlarda qahramonlik ko'rsata olishi lozim. Ammo shu bilan birga yaqin tariximizdagi real hayot, ota-bobolar jasorati va urush yillaridagi chinakam hayot navqiron avlodlar bilishi joiz haqiqatdir. Qolaversa, o'sha davr o'smirlarining murakkab tuyulgan shu hayotni hech ranjimasdan qabul qilishi, ota-onalari qatori turmushning og'ir mashaqqatini yelkasiga ortib, boz ustiga har qanday hayot vaziyatlariga bo'yin egmaydigan bir tuyg'u -balog'atga yetishida sodir bo'ladigan ajib his-tuyg'ularga o'zlari sezmagan holda bandi bo'lish onlari ta'sirchan aks etadi.

Umuman, yozuvchining qissa va hikoyalari markazida asosan o'smirlar obrazi turadi. Aytaylik, "Tashvish" qissasida muallif Safaralining urush davri bilan bog'liq xatiga nazar tashlarkan, o'smirlarning kattalar olamiga qadam qo'yishi, undan o'z o'rnini qidirishi, qalblarda birinchi bor chechak otgan musaffo va shirin muhabbat romantikasini ilhom bilan tasvirlaydi. Huri, Muso, To'ra, Kamola muhabbatlari ana shunday bolalik beg'uborligi bilan yo'g'rilgan, andisha va hayoga to'la samimiy, pok hamda ilk tuyg'u sifatida o'quvchini hayratga soladi.

Yana, shunday adabiy janrlar bo'ladiki, ular o'quvchida nafaqat badiiy-estetik zavq uyg'otadi, balki ilmiy-nazariy bilimlarini oshirishda ham muhim rol o'ynaydi. Adabiy xotira - yodnoma asarlar shu jihatdan tadqiqotchilar va keng kitobxonlar ommasida alohida qiziqish uyg'otadi.

Adibning 1988-yilda nashr etilgan "Ustozlar davrasida" kitobi o'z vaqtida ham yuqori baholangan. Oradan yigirma yildan ziyodroq vaqt o'tib, yozuvchi bu asarni qayta to'ldirib, "Topdimu yo'qotmadim" nomi bilan e'lon qildi. Kitobda qirqa yaqin adabiyot salaflarining yorqin siymosi muallif xotirasi orqali qayta jonlantirilgan.



N.Fozilov o'z adabiy xotiralarida ustoz san'atkorlar hayotining nodir sahifalarini yosh avlodga "tiriltirib" beradi. Chindan ham muallifning umr bo'yi topganlari - do'stu birodarlari eng qimmatli gavharga teng. Ularning yodi, olgan saboqlari yo'qolmas inju. Buni keng kitobxonlar ommasi bilan baham ko'rmaslik esa bila turib ularni shunday ganjinadan mahrum etishday bir gap.

Shunga ko'ra, bu kitob bugungi avlodlar uchun ham ulkan ma'naviy -hayotiy tarbiya maktabini o'tay olishi bilan diqqatga sazovor.

Darhaqiqat, Nosir Fozilovning bolaligidan shu kungacha tanigan-bilgan ustozlari, o'zbeku qozoq ijodkorlar, umuman, yaxshi insonlar yodi, ruhi bilan yashayotganligi ibratli hayotining mazmunini belgilaydi. Binobarin, adib asarlari har jihatdan bugungi avlodlar uchun ulkan ma'naviy-hayotiy tarbiya maktabini o'tay olishi bilan e'tiborga loyiq.

Bolalar adabiyoti,- deb yozadi N.Fozilov,- nozik adabiyot. Bolalar adabiyoti biz bilgan kattalar adabiyotining boshi... Bolalar yozuvchilari o'z asarlari bilan katta adabiyotga boshlovchi darg'alar. Bu adabiyot - hurmattalab adabiyot, e'zoztalab adabiyot... Bolaning ko'ngli ham shunday. Uni sindirib bo'lmaydi. Unga hamisha e'tibor darkor."

Aytish mumkinki, yozuvchi ana shu e'tiqodiga umr bo'yi sodiq qoldi va o'z asarlari orqali butun mehrini, e'zozini namoyon qila oldi.



Farhod Musajon
(1933-2013) - ko'p qirrali ijodkor.



U 1933-yilning 19-dekabrida Toshkentda tavallud topgan, nosir, dramaturg va kinosenaristdir. 1956-yilga kelib, Toshkent Davlat universitetining Sharq fakultetini muvaffaqiyatli tugatadi. Respublika radiosi, televideniyesi hamda “O‘zbekiston madaniyati” gazetasi, “G‘uncha” va “Sharq yulduzi” jurnallarida ishlagan, “O‘zbekfilm” (1967) studiyasida xizmat qilgan. 1968-1970- yillarda Moskvada senaristlar Oliy kursida o‘qib, 1976-yildan esa “O‘zbekfilm”da turli lavozimlarda, “O‘zbekkino” aksionerlik kompaniyasida ishlaydi.

F. Musajonov adabiy ijodining boshlanishi 50-yillarning o‘rtalariga to‘g‘ri keladi. O‘z ijodini bolalarga she‘r va hikoyalar yozishdan boshlaydi. “Daradagi qishloqda” deb nomlangan birinchi hikoyasi 1956-yilda chop qilingan. Uning “Oftobni quvalab”, “Bo‘sh kelma, Aliqulov!”, “Bir qultum buloq suvi” kabi qissalari va oltmishga yaqin hikoyalari mavjud.

Ayni chog‘da u kattalar uchun ham “Bu ko‘zlarga ishonsa bo‘ladi”, “Zo‘raki kashanda” kabi asarlarni yaratgan. Bundan tashqari, F.Musajonov dramaturg sifatida “Oq kabutar”, “Najot



istab", Hamza teatrida qo'yilgan "Olifto", "Xizimatingga hozirman", "Talvasa" kabi dramalarni yozadi.

Shuningdek, "Jazirama oftob ostidagi uy", "Birovning boshi", "Minoralar ostidagi sirk", "Ko'zlarim yo'lingda", "Huvaydo", "Askiya", "Qiziqchi", "So'nmas ziyo" kabi senariylar muallifi hamdir. Uning "Dushanba, nonushtadan so'ng" (1974), "Bog' ko'chamni qo'msayman" (1977), "Qilich va shamshir", "Ko'rgulik", "Qilich va soz" (2000), "Lafz" (2003) kabi qissalari o'z o'quvchisiga ega.

Iste'dodli bolalar adibi, dramaturg va senarist F.Musajonov "Shuhrat" medali bilan taqdirlanadi (2000).

Farhod Musajonov taniqli bolalar adibi sifatida kichikintoylar uchun qator hikoyalar yozdi. Uning "Sovg'a", "Yaxshilik", "Saxiy bog'bon", "Yomg'ir" hikoyalari kichik maktab yoshidagi o'quvchilarda katta qiziqish uyg'ota oladi. Aytaylik, "Yaxshilik" hikoyasining qahramoni Erkin ismli maqtanchoq bola. U ko'chada o'ynab yurib, qo'shnilari Pirmat boboning tuguncha ko'tarib kelayotganini ko'rib qoladi va hovliqib o'rtog'iga maqtanadi:

- Hozir-chi, men borib Pirmat bobomlarga yordam bera-man. Qo'llaridagi tugunchani ko'tarib kelaman. Meni Pirmat bobo juda yaxshi ko'radilar. "Aqlli bola ekansan, haqiqiy o'quvchi shunday bo'lishi kerak",- deb maqtaydilar. Ishonmasang, men bilan yurgin, o'zing ko'rasan.

Bolalarga yaqinlashib qolgan Pirmat bobo Erkinning so'zlarini eshitib qoladi. Shu sababli uyiga yetganidan keyin Pirmat bobo Erkinning qo'lidan tugunchani oladi, lekin har galgidek, "Barakalla, rahmat bolam, aqlli ekansan",- deb maqtamaydi. Faqat "Rahmat" deydi va engashib Erkinning qulog'iga allanarsalar deb pichirlaydi.

Ha, Erkindagi maqtanchoqlik uning yaxshiligini yuvib yuborgandi. Pirmat bobo unga ana shuni tushuntiradi. Bu



xususiyat Erkin tengi ko'pchilik bolalarga xos, albatta. Bunday o'quvchilar biror kishiga yordamlari tegsa, maqtanish uchungi-na qiladilar, go'yo. Ammo buni ta'kidlash, o'z yaxshiligini ko'z-ko'z qilish odobdan emasligi hikoyaning tarbiyaviy ahamiyatini belgilaydi.

F.Musajonovning "Yomg'ir" hikoyasida ham asosan kichik yoshdagi bolalar orasida uchrab turadigan mug'ombirlik, yalqovlik alomatlarining paydo bo'lishi Erkinjon obrazi orqali ko'rsatib berilgan. Yomg'irli kunda issiqqina uyda mazza qilib derazadan ko'chani tomosha qilib o'tirgisi kelib, o'zini kasalga solgan yosh qahramon o'rnidan turgisi kelmaydi. Unga onasining: "Ha, nima bo'ldi senga, kasal bo'lib qolmadingmi?"- degan gapi xush yoqib, "Boshim og'riyapti",- deydi. Onasi ishga ketgach, u chaqirgan doktor keladi va Erkinjonga: "kasaling og'ir, oldini olmasang bo'lmaydi, ishing chatoq,"- deb haqiqiy tashxisni qo'yib ketadi. Shu tariqa, Erkinjondagi yolg'onchilik sababi yalqovlik ekani, qolaversa onasini mug'ambirlik bilan aldagani har qanday kasaldan ham xavfli ekani anglashiladi. Shubhasiz, bu hikoya tahlili jarayonida o'quvchilar o'zida mavjud shu kabi nuqsonlarni tuzatishga, ya'ni o'z "kasali"ni davolashga harakat qiladi. Erkinjondek izza bo'lmaslik uchun yalqovlikdan qochishi ham tayin. Hikoyada doktor Erkinjonga: "Shu dorini ichsang, tuzalib ketasan",- deydi. Bu dorining nima ekanligini zukko o'quvchining o'zi tushunib olishi lozim. Ya'ni, har ertalab barvaqt turish, badantarbiya bilan shug'ullanish, jismoniy sog'lomlik har qanday o'quvchini yalqovlikdan qutqazadi. Shunda yolg'on gapirishga ham o'rin qolmaydi.

Yozuvchining "Saxiy bog'bon" hikoyasida esa mehnatning haqiqiy maqtov hissini tuygan kichkintoy obrazi tasvirlangan. Odiljon otasi bilan birgalikda hovliga gul ko'chatini o'tqazishi, uni parvarishlab, g'uncha tukkanidagi cheksiz quvonchi, nihoyat, g'uncha uchi yorilib, qip-qizil piyoladay atirgulga



aylanganidagi shodligi jonli aks etgan. Shunday kunlarda o'zi tengi qo'shnisi Shohista uni tug'ilgan kuniga taklif qiladi. Oila a'zolari Odiljonning nima olib chiqishini maslahat qilishadi. Shunda dadasi:

– Atirgulingni olib chiqaqol, -deydi.

– Ho...- deydi Odiljon, - hali men Shohista uchun shuncha ovora bo'lib gulni o'stirgan ekanman-da. Kerak emas, - deb e'tiroz bildiradi. Shunda dadasi va buvisi ibratomuz fikrlar aytadi. Uning yolg'iz o'zi uchun ish qilishidan hatto xafa bo'lishadi. Shohistaning gulni juda yaxshi ko'rishini ta'kidlashadi. Odiljon shundagina rozi bo'lib, qip-qizil atirgulini Shohistaga sovg'a qiladi. Natijada hammadan shirin maqtov, yaxshi bog'bon shunday saxiy bo'ladi, degan gaplarni eshitib, xursand bo'ladi.

Farhod Musajonov hikoyalarida shu tariqa, kichkintoylarning rang-barang olami bilan birga, ulardagi endigina kurtak ota boshlagan nuqsonlarning tuzalishi tasvirlanadi. Bunday hikoyalarning o'rganilishi o'quvchilarda axloqiy tarbiya namunasi sifatida e'tirofga sazovor. Hikoyalardagi badiiy so'z mohiyati, ularda qo'llangan o'xshatish, gullarni parvarish qilish bilan bog'liq tasvirlar esa o'quvchining bu boradagi ma'rifiy sabog'ini oshiradi. Qolaversa, yozuvchida kichkintoylar ruhiyati, ular olamidagi turfa ranglarni tasvirlay bilishi hikoyalarning jonliligini, qiziqarliligini ta'minlagan. O'z navbatida, bu kichik yoshdagi o'quvchilarning hikoyalar mazmunini tushunishi va undan o'zi uchun kerakli bilimni olishiga yordam beradi.

Adibning “Bo'sh kelma, Aliqulov!”, “Bir qultum buloq suvi”, “Orzuga ayb yo'q” qissalari esa o'smirlar kitobxonligidan keng o'rin olgan. Unda o'smir yoshidagi qahramonlarning turli kechinmalari, kattalar bilan va o'zaro munosabatlari goh yumoristik, goh hazin, yoxud jiddiy mushohadalar tarzida ifoda etiladi.

Farhod Musajonov asarlari rus, ukrain, qozoq va qoraqalpoq tillariga ham tarjima qilingan.



Bilim, ko'nikma va malakani rivojlantirishga yo'naltiruvchi savollar:

1. Po'lat Mo'min she'rlarining mundarijasi haqida to'xtaling.
2. "Oftob ham yaxshi, odob ham yaxshi" she'ri xususiyatlari haqida fikr yuriting.
3. Po'lat Mo'min she'riy-adabiy ertaklari mavzusini oydinlashtiring.
4. Q.Hikmat she'rlari badiiyati haqida nima deya olasiz?
5. Q.Hikmatning "Bahor", "Qish to'zg'itar momiq par", "Ayamajiz" she'rlaridagi badiiy-tasvir vositalar haqida ma'lumot bering?
6. N.Fozilov hikoyalari mundarijasini aniqlang.
7. N.Fozilov asarlarida o'smirlar psixologiyasi qanday o'ringa ega?
8. N.Fozilovning "Saraton" qissasi haqida qanday mulohazaga ega bo'ldingiz?
9. "Topdim-u yo'qotmadim" qanday asar?

Mavzuga oid test savollari:

1. Po'lat Mo'minning ertak-pyesalari va ertak-dostonlari qaysi javobda keltirilgan?

- a) "Qovoqvoy bilan Chanoqvoy", "Suqatoy-konfetvoy", "Ona bolam deydi, bola onam";
- b) "Alla bilan Jalla", "Ziyrak fil va ziqna boqqol", "Har kimniki o'ziga, oy ko'rinar ko'ziga", "Unutgan o'g'il";
- c) "Oltin nay", "Dono bola", "Bilganni qari - bilmaydi pari", "Tish cho'tka, Poroshok va Atirsovun ertagi";
- d) A, B va C javoblar.



2. Po'lat Mo'minning she'riy to'plamlari qaysi javobda keltirilgan?

- a) "Hunardan unar", "To'g'ri o'sgan gul bo'lar", "Bir yarim Karim" "Bir yuz bir oltin qo'l", "Rahmatga rahmat", "Oftob va odob", "Bu juda soz";
- b) "Gazpolvon ertak aytar", "Do'sting qancha ko'p bo'lsa" "Eson va Omon" "Oltmish olti oltin qo'l";
- c) A va B javoblar;
- d) "Ayyor chumchuq", "O'zboshimcha chumchuq haqida ertak".

3. Po'lat Mo'minning "Suqatoy-konfetvoy" ertak-pyesasining g'oyaviy mundariyasi va obrazlari qaysi javobda to'g'ri?

- a) ilm, odob, halollik va mehnatsevarlik ulug'lanadi;
- b) voqea Bilim xola, Janjal xola, Qurt o'rtasidagi kurash asosida rivojlanadi;
- c) Qovoqvoy va Chanoqvoy o'rtasidagi kurashdan tashkil topgan;
- d) A va B javoblar to'g'ri.

4. Tarvuz, Qovun, Chanoqvoy, Paxtaoy, G'ujumoy, Lavlagi, Sholg'om qishloq xo'jalik ekinlari va zararkunanda hasharotlar chigirtka, kapalak hamda yalqov, tanbal, beg'am Qovoqvoylarning allegorik obrazi Po'lat Mo'minning qaysi asarida tasvirlangan?

- a) "Alla bilan Jalla";
- b) "Ona bolam deydi, bola onam deydi";
- c) "Suqatoy va Konfetvoy";
- d) "Qovoqvoy bilan chanoqvoy".

5. "Saraton" qissasining muallifi va qahramonlari qaysi javobda ko'rsatilgan?

- a) N.Fozilov; Kamol, To'ra;
- b) F.Musajonov, Tohir, Zuhra;



- c) H.Nazir, Damir, Omon;
- d) X.To'xtaboyev, Hoshimjon, Akram

6. “Qishloqdagi jiyanlarim”, “Besh baho”, “Cho'l havosi”, “Yaxshi ism”, “Meni taniysizmi?”, “Bolajonlarim” kabi hikoyalar qaysi bolalar adibi qalamiga mansub?

- a) Shukur Sa'dulla;
- b) Hakim Nazir;
- c) Omon Muxtor;
- d) Zafar Diyor.

7. Hakim Nazirning kichik yoshdagi bolalar hayotini aks ettirishga bag'ishlangan asarlari qaysi javobda to'g'ri?

- a) “Bir og'iz so'z”, “Rasmlı kitobcha”, “Davronning qushchasi”, “Qanddon”;
- b) “Qaysargina ukam”, “Yaxshi ism”, “Ikki o'rtoq”, “Bulbul”, “Igna”, “Bir tup g'o'za”;
- c) A,B javoblar;
- d) “Saraton”, “Lochin qanotlar”.

8. H.Nazirning “Yonar daryo” qissasida qanday manzaralar aks etgan va voqealar kimning tilidan hikoya qilinadi?

- a) Qizilqum sahrosi kishilarining jasorati va “Gaz qaynar” manzarasi;
- b) oiladagi bola tarbiyasi, bunda ota-onaning tutgan o'rni;
- c) voqealar o'n ikki yoshli o'quvchi Damir tilidan hikoya qilinadi;
- d) A, B va D javoblar

9. H. Nazirning “Kenjatoy” va “Tohir-Zuhra” qissalari-ning yetakchi mavzusi qaysi javobda to'g'ri?

- a) “Kenjatoy”da hunar maktabi hayoti aks etgan bolib, o'smirlarda ishchi kasbiga havas uyg'otishga xizmat qiladi;



b) “Tohir-Zuhra”da balogʻat yoshidagi oʻspirin va qizaloqlarning qalbida tugʻilgan ilk sevgi kechinmalari hikoya qilingan;

c) A va B javoblar toʻgʻri;

d) qissalarning har ikkida qishloq hayoti aks etgan.

10. Hakim Nazirning soʻnggi xotira-qissa kitobi va uning mavzui qaysi javobda koʻrsatilgan?

a) “Oq fotiha”, bolalik sarguzashtlariga bagʻishlangan; adib bu kitobida bolalik chogʻlari koʻrgan-kechirganlarini jonli lavhalarda hikoya qiladi; kichikligida ota-onasidan olgan ilk insoniy saboqlari uchun chuqur va samimiy minnatdorchiligini izhor etadi;

b) ijodiy yoʻli haqidagi adabiy suhbatlar;

c) urush yillaridagi qahramonlar hayotiga bagʻishlangan;

d) barcha javoblar toʻgʻri.

11. H.Nazir 1973- yilda qanday roman yozgan va uning asosiy obrazlari qaysi javobda toʻgʻri?

a) “Chiranma gʻoz, hunaring oz” ;

b) “Lochin qanotlari”, urushga ketgan ota-onalar oʻrnini bosgan farzandlar ; “Dadamni topib beringlar”, bir dehqon oilasi boshiga tushgan nohaqlik;

c) romanda Oʻktam, Umri kabi yosh vatanparvarlar obrazi gavdalantirilgan;

d) B va D javoblar toʻgʻri.

12. H. Nazir qanday pyesa yozgan?

a) “Bir tup gʻoʻza”;

b) “Koʻkorol chiroqlari”;

c) “Soʻnmas chaqmoqlar”;

d) “Chiranma gʻoz - hunaring oz”.



Tavsiya etilgan adabiyotlar:

1. Jumaboyev M. O'zbek va jahon bolalar adabiyoti. Majmua. - T. "O'qituvchi", 1996
2. O'zbek bolalar adabiyoti antalogiyasi. Ikki jildlik, 2-jild, -T., "O'qituvchi", 2006
3. Nazir H. Asarlar. 5 tomlik. - T., "Yosh gvardiya", 1977-1981yy.
4. Nazir H. Tohir-Zuhra qissasi. - T., "Yosh gvardiya", 1983
5. Nazir H. Dadamni topib beringlar. - T., "Cho'lpon", 1991
6. Nazir H. Oq fotiha. - T., "Cho'lpon", 1995
7. Fozilov N. Shum bolaning nabiralari. - T., "Yosh gvardiya", 1985.
8. Fozilov N. Ustozlar davrasida. - T., "Yosh gvardiya", 1988.
9. Fozilov N. Saraton. - T., "Sharq", 2006.
10. Fozilov N. Topdimu yo'qotmadim. - T., "Sharq", 2010.



IX. BOLALAR ADABIYOTI YUKSALISHDA

Reja:

- 1. Xudoyberdi To‘xtaboyev - bolalarning sargyzasht va romannavis adibi*
- 2. Miraziz A‘zam she‘riyatining falsafiy-badiiy o‘ziga xosligi.*
- 3. Safar Barnoyev - bolalar shoiri va nosiri.*
- 4. Tursunboy Adashboyev she‘riyatida bolalik va tabiat munosabati ifodasi*
- 5. Anvar Oobidjn - bolalar shoiri, adibi va dramaturgi*



Xudoyberdi To‘xtaboyev - bolalarning sargyzasht va romannavis adibi (1932-yilda tug‘ilgan)

Xudoyberdi To‘xtaboyev - katta-yu kichik bolalarning sevimli adibi. U hozirgi zamon o‘zbek bolalar adabiyotida sarguzasht va fantastika janrlarining rivojlanishiga katta hissa





qo'shib kelayotgan adib sifatida kitobxonlarga ma'lum va mashhurdir. Xudoyberdi To'xtaboyev 1932-yilning 17-dekabrida Farg'ona viloyatining O'zbekiston tumaniga qarashli Kattatagob qishlog'ida dehqon oilasida dunyoga keldi. Boshqa bolalar qatori Xudoyberdi ham poda boqdi, yer chopdi, paxta terdi, xullas, qishloqda bo'ladigan hamma mehnatlarda baholu qudrat ishtirok etdi, hayot nimadan iborat ekanligini yoshligidanoq bila boshladi. Bo'lajak adib ikkinchi jahon urushi yillarida o'qishni yig'ishtirib, dalada ketmon chopdi, hisobchilik qildi, mashaqqatli mehnat bilan suyagi qotdi. Qo'qon pedagogika bilim yurtini muvaffaqiyatli tamomlagan X.To'xtaboyev ona qishlog'ida muallimlik qilar ekan, unda ilmga cheksiz ishtiyoq uyg'onadi. Shuning uchun ham u o'qituvchilikni tashlab, Toshkent davlat dorilfununiga o'qishga kiradi. Bu yerda Alisher Navoiy, Bobur, G.G'ulom, Oybek, H.Olimjon, A.Qahhor asarlarini sevib o'qidi, o'rgandi. Universitetni tugatib, Bog'dod tumanida o'qituvchilik qildi. Ilmiy bo'lim mudiri, direktorlik lavozimlarida ishlab, ta'lim-tarbiya sohasida faoliyat ko'rsatdi. She'riy mashqlari vaqtli matbuot sahifalarida e'lon qilina boshladi. Bu esa bo'lajak adibni markazga Toshkentga ijodiy ish bilan jiddiy shug'ullanishga chorlar edi. Shunday ham bo'ldi. U 1958-yilda Toshkentga ko'chib keldi. "Toshkent haqiqati" gazetasida ishlay boshladi. X.To'xtaboyev bolalikdan to'g'ri so'z, halol, pok va mehnatsevar bo'lib o'sganligi uchun, gazetada ishlar ekan, ba'zi nopok odamlarni ko'rib, ularning qilmishlarini hazm qila olmadi. Bunday kishilarning sir-asrorlarini fosh etishga, el-yurt o'rtasida munofiqlarning yaramas tomonlarini ochib tashlashga qaror qildi.

Bu borada unga feleton janri qo'l keldi. 1962- yilda respublikamizning otaxon gazetasi - "O'zbekiston ovozi"ga feletonchi bo'lib ishga o'tadi va 300 dan ziyod feleton yozishga erishadi.

Bu orada X. To'xtaboyev bolalar uchun ham hikoyalar yarata boshlaydi. Uning "Birinchi daraxtim", "Qochoqlar",



“Qizg‘anchiq”, “Dadajon, yozmang”, “Kelvordim, dada”, “Vali bilan Salim”, “Shoshqaloq”, “Yaxshi-yaxshi” singari o‘nlab hikoyalari yosh kitobxonlarda katta qiziqish uyg‘otdi. X. To‘xtaboyev uzoq yillar feletonchi bo‘lib ishlab, kishilarning yurak dardini, hasratini qunt bilan o‘rgandi. Bunday shikoyatlarga sabab bo‘layotgan shaxslarning xatti-harakatlarini mufassal bilib olishga intiladi. Davrdan orqada qolgan, sarqit deb atalgan illatlar botqog‘iga botgan, molu dunyoga hirs qo‘ygan shaxslar haqida bir talay feletonlar yozar ekan, keyinchalik “Sariq devni minib”, “Sariq devning o‘limi” asarlari ana shu dalillarni umumlashtirish asosida yuzaga keldi, desak to‘g‘ri bo‘ladi.



Xudoyberdi To‘xtaboyevning birinchi yumoristik-sarguzasht qissasi bolalar hayotidan olingan “Sehrli qalpoqcha”dir. U tez orada o‘quvchilar hurmatiga sazovor bo‘ldi. Yozuvchining yumorga moyilligi, oddiy vaziyatlardan ham kulgi chiqara olish iste’dodi bunda yorqin seziladi.

Adib “Sariq devni minib” asarini qiziqarli sujet asosiga quradi: asarning hikoyachisi - bayonchisi qilib undagi barcha voqealarning ishtirokchisi, guvohi bo‘lmish Hoshimjonni qo‘yadi, tilga olinadigan voqealar uning nomidan hikoya qilinadi. Yozuvchi Hoshimjonning hikoyasi orqali uning hayot yo‘li sarguzashtlarini, o‘ziga xos xarakteri va psixologiyasini atroflicha ochib beradi. Shuningdek, Hoshimjon xarakterida Xo‘ja Nasriddinning va xalq ertaklaridagi “tegirmonga tushsa butun chiqadigan” zukko bolalarning fazilatlarini yaqqol



mujassamlashganini ko'rish mumkin. "Sariq devni minib"da o'qish, ilm cho'qqilarini egallash va insonning o'z orzusi, ezgu niyatiga erishish uchun barcha imkoniyatlarni yaratib bergan, zamonamizda yashashga qaramay, dangasalik, yalqovlik qilgan, hayotda yengil-yelpi yashashga yo'l axtargan va adashgan bolalar - hoshimjonlar kulgi ostiga olinadi: Hoshimjon dehqon oilasidan chiqqan, sho'xligi olamni buzadigan bir bola. U hayotdagi ko'p narsaga mehnatsiz, qiyinchiliklarsiz oson yo'l bilan erishgisi keladi. Mehnatsiz va ilmsiz ham kishi istagan narsaga erisha olishi, katta obro' orttirishi mumkin, deb o'ylaydi. O'z fikrida qat'iy turgan Hoshimjon muddaosini amalga oshirish uchun buvisi aytib bergan ertakdagi sehrli qalpoqchani izlashga tushadi, uzoq izlanishlardan keyin istagan ishini hech qanday mashaqqatsiz bajarishga yordam beradigan sehrli qalpoqchani tashlandiq molxona oxuridan topib oladi. Endi u o'zini orzulariga batamom erishadiganday his etadi, "Ortiqcha" fanlarni dars jadvalidan chiqarishni rad etgan direktor, har xil vazifalar berib "miyasini qotiradigan" o'qituvchilariga o'qimasdan ham xohlagan kasb egasi, mashhur odam bo'la olish, ko'krak to'la nishonlar bilan shon-shuhrat, katta obro'ga ega bo'lish mumkinligini ko'rsatib qo'ymoqchi bo'ladi; shu maqsadda sehrli qalpoqcha bilan safarga chiqadi. Nihoyat, uning sarguzashtlari boshlanadi. Ammo, sehrli qalpoqcha muhayyo etgan imkoniyatlar har safar kutilmagan ko'ngilsiz oqibatlarga olib kelaveradi. Hoshimjonning baxti endi kulay deb turganida ishning pachavasi chiqib qolaveradi. U davlat xo'jaligida agronom bo'lib ham, "shoirlik qilib" ham, qurilishda muhandislik qilib ham, qo'g'irchoq teatrida artistlik qilib ham ko'radi, mashhur sayohatchi sifatida butun dunyoni kezmoqchi ham bo'ladi. Lekin hamma yerda ilmining, tajribasining yo'qligi ishning pachavasini chiqaraveradi. Hoshimjon qayerga bormasin, qanday ish qilmasin, pirovardida sharmanda-yu sharmisor bo'ladi. Uning agronomlik va muhandislik "faoliyati" jinoyatga olib keladi, qamalishiga sal qoladi, shoir bo'laman deb



rasvo bo'ladi, "ulug' artist" teatrdan quviladi. Qissada Hoshimjon o'z sayohati davomida qanchadan-qancha ajoyibotlarning guvohi bo'lib, qiziq, kulgili sarguzashtlarni boshidan kechiradi. U o'qimay, mehnat qilmay, o'z ustida ishlaymay juda ko'p narsalarga erishmoqchi bo'lib, lekin amalda u hech narsaga erisha olmaydi. Chunki unga ilmsizligi pand beradi. Yozuvchi Hoshimjon obrazini butun qirralari bilan ochishga erishgan. Bolalarga xos o'yinqaroqlik ham, soddalik, beg'uborlik ham, g'ururlilik, to'g'ri so'zlik, shumlik bir oz maqtanchoqlik, hatto o'rnida yolg'onni do'ndirib yuboradigan ham, o'zini boshqalardan ajratib ko'rsatishga intilish odatlari, bolalarga taqlidchilik, dovyurak, epchil va ruhiy tetiklik, xafachilik va tushkunlikdan yiroqlik ham Hoshimjon xarakteriga xos xususiyatlardan.

X. To'xtaboyevning "Sariq devning o'limi" sarguzasht romani asosida ham Hoshimjon sarguzashtlari yotadi. Bu romanda ham sehrli qalpoqcha yana madadga keladi, ajoyib-g'aroyib karomatlar ko'rsatadi. U Hoshimjonga jiddiy masalalarda - o'g'ri, muttaham, tekinxo'rlarni fosh etishda yordam beradi. Endilikda Hoshimjon aynan avvalgi o'yinqaroq Hoshimjon emas, balki to'qqiz yillik maktabni bitirib, ulg'ayib, birmuncha quyulib, esi kirib, oq-qorani tanib qolgan yigitcha. Endi u o'z hayoti, taqdiri, jamiyatga foyda yetkazadigan odam bo'lib yetishi haqida jiddiy o'ylaydi, biror kasb egallash haqida bosh qotiradi. Boshida sartarosh bo'ladi. "Bilasizku, bir ishga ahd qilsam, uni oxiriga yetkazmaguncha qo'ymaydigan odatim bor. Jonimni qiynab bo'lsa ham maqsadimga erishaman", deb shu kasb orqali odamlarga xizmat qilishga bel bog'laydi. Keyin militsiya maktabiga kirib o'qiydi, uni bitirgandan so'ng militsionerlikka ishga o'tadi. Kitobdagi barcha voqea-hodisalar, sarguzashtlar Hoshimjonning ana shu militsionerlik nuqtasidan boshlanadi, barcha gap-so'zlar qahramonning shu kasb-kori bilan bog'liq holda davom etadi. Romanda yaxshilik, ezgulik ramzi sifatida militsiya polkovnigi Salimjon, uning madadkori Hoshimjon, yomonlik, eskilik ramzi tarzida Odil battol gavdalanadi. Ular



o'rtasida tinimsiz shiddatli kurash ketadi. Odil nihoyatda makkor, u Salimjon boshiga juda ko'p og'ir savdolar solgan, uyiga o't qo'ygan, uning yakka-yu yolg'iz farzandining qo'liga to'pponcha tutqazgan, jinoyatga yetaklagan. Asar pirovardida butun umri davomida xalqqa, yaxshi odamlarga zarar yetkazish bilan shug'ullangan Odil battol va uning hamtovoqlari qonuniy mag'lubiyatga uchraydi, haqiqat, adolat, ezgulik g'olib chiqadi. Xudoyberdi To'xtaboyev o'z romanida yulg'ichlarga, qalloblarga qarshi kurashda butun xalq bir kishiday bo'lib birlashsa, bu ishni butunlay o'z qo'liga olsa, Odil battollarga qiron keladi, ulardan nom-nishon ham qolmaydi, degan fikrni o'rta tashlaydi.

“Qasoskorning oltin boshi” romani markazida esa bosh qahramon - tarixiy shaxs, xalq qasoskori Namoz taqdiri yotadi. Ammo bu asar tarixiy-biografik roman emas, shuning uchun ham muallif Namozning hayotini batafsil yoritib berishni maqsad qilib olgan emas. Shunday bo'lsa-da, adib o'rni-o'rni bilan uning hayotiga doir ma'lumotlar berib borgan. Namoz faqat jismonan emas, aqlan ham yetuk. U haqiqat uchun qasoskor, qo'rqmas, tadbirkor, ochiq ko'ngilli qahramon sifatida gavdalan tirilgan. U atrofiga o'zi kabi dovyurak yigitlarni to'plab, zulmkorlarga qarshi kurashga undaydi. Halolligi, mardligi, adolatliligi, yetimparvarligi uchun xalq Namozni yaxshi ko'radi va uni Go'ro'g'liga qiyos qiladi. “Go'ro'g'libek Namozboy qiyofasida paydo bo'lgan emish. Afsun o'qisa, ko'zdan g'oyib bo'lib qolarmish, undan o'q o'tmas emish, qilich chopmas emish...”

Namozning mardligi, jasorati xalq qalbida mangu yashab kelayotganligi “Qasoskorning oltin boshi”da yaxshi chizib berilgan.

Talantli bolalar adibi Xudoyberdi To'xtaboyevning “Sir ochildi”, “Aka-uka Omonboy bilan Davronboyning qishloqqa gaz olib kelganlari haqida qissa”, “Besh bolali yigitcha”, “Shirin qovunlar mamlakatida yoki sehrGARlar jangi”, “Mungli ko'zlar”, “Jannati odamlar” kabi yirik asarlarining vujudga kelishi



o'zbek bolalar adabiyotining yutug'i hisoblanadi. U bolalar uchun yanada o'qimishli asarlar yaratish maqsadida tinimsiz izlanmoqda. O'zbek xalq yozuvchisi, bolalarning sevimli adibi X. To'xtaboyevning asarlari nafaqat respublikamizda, balki chet ellarda ham ma'lum va mashhurdir.

“Sariq devni minib” asarimning jahon tillariga tarjima qilinishiga sabab - 1971-yili Italiyaning Rim shahrida bo'lib o'tgan jahon bolalar yozuvchilarining kengashida J.Rodarining shu asar haqida aytgan iliq gaplaridir.

Xo'sh, adibning nomini mashhur qilgan bu asarning siri nimada?

Nima uchun roman aynan shunday nomlangan?

Shu o'rinda, avvalo, “Sariq dev” iborasining majoziy ma'nosini ifodalash joiz. Nima uchun aynan “sariq”, qora yoki oq emas? Ma'lumki, sariq - nafs, olov ma'nolarini bildiradi. Xalqimizda nafsini tiya olmagan, nafsining quliga aylangan, ya'ni nafs bandalari “Nafsi olovlar” deb ham ataladi. Darhaqiqat, kimki nafsini tiya olmas ekan, bir kunmas bir kun, nafs olovida kuyib kul bo'ladi. Olov esa, tabiiyki, sariq rangdadir.

Ibora tarkibidagi “dev” afsonaviy yovuzlik timsoli sanaladi. Ertaklarda bayon qilinishicha, yovuz dev komiga tushgan har qanday jonzoat hech qachon tirik qolmagan. Asar qahramoni Hoshimjon ham o'z nafsiga anchagina erk beradi: Nafs deviga minib yo'lga tushadi. Undagi voqealar bosh qahramon Hoshimjon tili bilan sodda, aniq, qolaversa, bolalarcha o'y-fikrlar orqali hikoya qilinadi. Hoshimjonning gap-so'zlari va xatti-harakatida bolalarcha tafakkur tarzining saqlanishi asar sujetining yutug'ini ta'minlashga xizmat qilgan. Romanning keng kitobxonlar ommasiga manzurligining bosh sabablaridan yana biri -sehrli qalpoqchaning ishtirokidir. Hoshimjon aynan sehrli qalpoqcha vositasida bir-biridan ajoyib va g'aroyib sarguzashtlarni boshdan kechiradi.



X.To'xtaboyev qahramonlarining har biri o'ziga xos qiyofa va gapirish tarziga ega bo'lsa-da, ularni adib asarlaridan asarlariga sayqal topib kelgan quvnoq va hayotbaxsh yumor birlashtirib turganini ilg'ash qiyin emas. "Rostini aytsam, - deydi Hoshimjon, - o'zim ham unchalik yomon bola emasman. Aqlu hushim joyida, odobim ham chakki emas, oltinchi sinfning intizomli o'quvchilaridanman. Bir xil, haligi sho'x bolalarga o'xshab, kun bo'yi ko'cha changitib yurmayman. Yashirib nima qilaman, k'ocha changitib yurgandan k'ora komandaga bo'linib olib, to'p tepgan yoki xoliroq joyga, masalan, oying harchand chaqirsa ham ovozi yetmaydigan joyga borib olib, chillak o'ynagan ming marta yaxshi".

"Xudoyberdi To'xtaboyev ijod qila boshlaganidan beri,- deb yozadi A.Rasulov,- zamon, tuzum, mafkura, adabiy-estetik qarash o'zgardi. Lekin yozuvchi salkam ellik yillik ijodi davomida qanday roman, qissa yozgan bo'lsa, ularga bo'lgan qiziqish susaymadi. Chunki yozuvchi hamisha tirik insonni, o'z "men"i, yo'l-yo'siniga ega odamni tasvirlagan edi." Darhaqiqat, olim to'g'ri ta'kidlaganidek, X.To'xtaboyev "Sariq devni minib", "Shirin qovunlar mamlakati", "Mungli ko'zlar" asarlari orqali XX asrning 2-yarmidagi ijtimoiy, ma'naviy-ruhiy hayotining badiiy tarixini ishonarli ochib bergan. Zafarning ("Mungli ko'zlar") ota- onasi pul, oltin yig'adi. Ular boyiganlari sayin o'zlarini boshqara olmay qoladilar. Topilgan pullar oilaga kulfat, baxtsizlik, fojea olib keladi. Yoqutxon, Saidlarning pul-boyliklari do'st-dushmani tanib olishda o'ziga xos vosita vazifasini o'tagan. Oila boshiga tushgan tashvishlar farzandlar ruhiyatiga keskin zarba beradi. Katta o'g'li nogiron Akbarjon dang'illama hovliga qo'shib, o'ziga o't qo'yib yuboradi, Zufar avtohalokatga uchraydi, Zafar ota-onasining sadoqatsiz do'stlaridan o'ch olish maqsadida jinoyat yo'lga kiradi, Nigora esa qattiq iztirobdan teri kasaliga chalinadi. Umuman, asarni ko'zda yosh bilan o'qigan kitobxon mol-dunyoni har narsadan ustun bilgan va oxir-oqibatda guldek



farzandlarning achchiq qismatiga sabab bo'lgan ota-onalarga achinishi, shubhasiz.

“Xudoyberdi To'xtaboyev ijodida Zafarlar yangi, avval ko'zga tashlanmagan qahramonlar”,- deb yozadi A.Rasulov. Olim yozuvchining boshqa asarlaridagi Orif (“Besh bolali yigitcha”), Hoshim (“Sariq devni minib”), Akrom (“Shirin qovunlar mamlakati”) kabi qahramonlar bilan Zafar, Zafarlarni taqqoslab, “Mungli ko'zlar” romani qahramonlari katta shaharda, dang'illama koshonada yashashlari, ular boy ota-onaning farzandlari ekanini ta'kidlaydi. Chindan ham to'g'ri ta'kidlanganidek, yozuvchi bir koshona tanazzulini ochib beradi: otning o'limi - itning bayrami degandek, Yoqutxon ko'zining yog'ini yegan kazo-kazo ulfatlari ro'y-rost tubanlik, talovchilik, muttahamlik qila boshlaydilar. Qo'mondon xola “Volga”ni ilib ketadi, Qozi xola tilla taqinchoqlarni o'maradi; ular olgan narsalaridan tonadilar. Yoxutxonni ayblab, Zafarni jinniga chiqarib qo'yadilar... Bir oilaning tag-tomiri bilan yemirilishi sabablari asar konsepsiyasini belgilaydi.

“Mungli ko'zlar” asari qahramonlariga, chunonchi, Yoqutxon, Said Karimov, Qozi xola, Qo'mondon xola, Shahodat amma singarilarga insof, diyonat, qanoat yetishmasligi haqiqat. Sho'ro hukumati ilk qadamidanoq xalqning e'tiqodiga, qadriyatlariga qarshi murosasiz kurash boshlagan. Natijada, minglab oilalar e'tiqodidan, ma'naviyatdan, komillikdan mahrum yashaganlari ham achchiq haqiqatdir. Zotan, Yoqutxon va Said oilasini qanoatsizlik, gunohdan qo'rqmaslik yemirgani rost. Zafaru Zafarlar sirtdan tomosha qilguday bashang, kelishgan bo'z bolalar edilar. Ammo ularning qalbi, ma'naviyati o'ta qashshoq edi.

Xudoyberdi To'xtaboyevda yozuvchilikka ishtiyoq uyg'otgan, qobiliyatining shakllanishida muhim rol o'ynagan, asarlariga qaytarilmas rang va jilo bergan narsa hayot, vaqtli matbuot, redaksiyalardagi qaynoq ijodiy muhit, shu bilan birga qunt, chidam bilan o'qish, o'rganish, o'z ustida ishlash bo'lganiga shubha yo'q.



Miraziz A'zam
she'riyatining falsafiy-badiiy o'ziga xosligi
(1936-yilda tug'ilgan)



Miraziz A'zam o'zbek bolalar adabiyotining taraqqiyotiga barakali hissa qo'shgan shoirlardan hisoblanadi. U ham bolalar, ham kattalar shoiri, ayni chog'da publitsist, yetuk tarjimon hamdir. Shoir 1936-yili Toshkent shahrida tavallud topgan. Maktabda o'qib yurgan kezlari dayoq she'riyatga qiziqadi. She'riy mashqlarini taniqli bolalar shoiri Quddus Muhammadiy va keyinchalik Qudrat Hikmat boshchilik qilgan adabiy to'garakda sinovdan o'tkazar, ijodiy izlanish, o'qish va o'rganishni qizg'in davom ettirar edi. Adabiyot va she'riyatga bo'lgan chanqoqlik uni ToshDuga yetaklaydi. Adabiy mashqlari bolalar va o'quvchilar gazetalarda, "Gulxan", "G'uncha" jurnallarida bosila boshladi.

M.A'zam Toshkent Davlat universitetini muvaffaqiyatli tugatgach, Toshkent telestudiyasida, "G'uncha" bolalar jurnalida, so'ngra, "Yosh gvardiya", G'afur G'ulom nashriyotlarida muharrir bo'lib ishlaydi. Ko'p yillar O'zbekiston Yozuvchilari uyushmasida maslahatchi, boshqaruv kotibi vazifasini bajargan.

Miraziz A'zam ijodi talabalik yillarida sermahsul bo'lib, birinchi she'ri 1960- yilda "G'alati tush", birinchi she'riy to'plami esa "Metallurg" (1964) nomi bilan nashr qilingan. Shundan so'ng



shoirning “Aqlli bolalar” dostoni (1969), “Senga nima bo’ldi” (1970), “Yer aylanadi” (1973), “Yerga dovruq solamiz” (1970) to’plamlari, “Bir cho’ntak yong’oq” saylanmasi (1990) e’lon qilindi. Ularda shoir bolalarning qalbi va tuyg’ulari tasviri orqali olamni, odamni bilishga, yaxshilik bilan yomonlikni farqlashga, halol va pokiza mehnatni ulug’lashga intiladi.

Miraziz A’zam dunyo bolalar adabiyoti vakillaridan yuzga yaqin muallif asarlari, chunonchi, Korney Chukovskiy, Edvard Lir, Uolter De la Mer, Janni Rodari, Jak Prever, Jeyms Kryus, Yulian Tuvim, Iskandar al-Huriy, Tavfiq Fikrat, Ali Oqbosh, Mustafo Ruhiiy Shirin, Mustafo Rahmondo’sst, Dzyun Takami va boshqalarning asarlarini tarjima qilgan. U “Dunyo bolalar adabiyoti” degan antologiya muallifidir.

Miraziz A’zam ijodida bolalar uchun yozilgan asarlar salmoqli o’rin tutadi. Jumladan, uning “Aqlli bolalar” (1969), “Senga nima bo’ldi” (1970), “G’alati tush” (1972), “Yer aylanadi” (1973), “Yerga dovruq solamiz” (1976), “Bir cho’ntak yong’oq” (1990), “Qirq bolaga qirq savol” (2000) kabi qator she’riy to’plamlari, “Eng yorug’ yulduzlar” (2003) nomli maktab sahnasiga mo’ljallangan pyesalar, tarixiy hikoyachalar, maqolalar to’plami, 2005-yilda esa uning bolalar uchun yozgan asarlari “Saylanma” holida nashr etildi.

Miraziz A’zam she’riy asarlarining obrazlar olami rang-barangdir. Ularda ikki oylik chaqaloq obrazidan boshlab, turmushning achchiq-chuchugini totgan, kekxa bobo-buvilar obrazigacha tasvir etilganligini kuzatish mumkin.

Aytish kerakki, shoirning bolalarbop she’rlarida bola obrazi yetakchi o’rin tutadi. Uning “Ko’zlari xayolga tomgan hoy bola” she’rida bola obrazi asosiy o’rin egallagan. Shoir bu she’rida nimadandir ruhiy azob chekayotgan, qalbidagi hasratini bayon etolmay, cheksiz xayolotga berilgan bola timsolini gavdalan tiradi. Shuning oqibatida bolaning kundan-kunga zaiflashib, ozib-to’zib borayotganidan xavotirga tushadi va unga dalda berishga shoshiladi.



Miraziz A'zamning "Yo'tal bola" deb nomlangan she'ri ham bor. Bu she'rida shoirning yana yuqoridagi kabi bolaga hamdardlik ko'rsatishga urinishini his etish mumkin. Chunki bu bola avji o'ynab-kulib, o'qib, yayrab yuradigan yoshida kattalar tomonidan bajariladigan qiyin ish - paxta yig'im-terimiga jalb etilgan...

Miraziz A'zamning bola obrazi aks etgan she'rlarini ularning nomlanishidan ham bilib olish mumkin. Jumladan, shoirning "Bolalar ko'chalarda", "Tog'lik bolalarga", "Otasiz bolalar", "Bolaligimda" singari she'rlari bu jihatdan fikrimiz dalili bo'la oladi.

Shoir "Bolalar ko'chalarda" she'rida ko'chaga to'planib, hammompish o'ynayotgan bolalarning o'ziga xos obrazini, shu bolalar o'yinining muhim tomonlarini chizib ko'rsatishga harakat qilgan. Shoir "Tog'lik bolalarga" she'rida o'zbek bolalarini boshqa joydagi bolalardan sira qolishmasligini shunday uqtiradi:

Siz ham boshqalardan kam emassiz.

Uchoqlar yasashni o'rganing, shunday uchsinki uchoqlaringiz havasdan entiksin boshqalar ham. Siz ham boshqalardan kam emassiz, bizning ham ajoyib san'atimiz bor, O'zbek ohangini kiriting yaxmalak o'yinlariga.

Shoir "Otasiz bolalar" she'rida 1941-45- yillarda yuz bergan urush oqibatida jangohlarga ketib halok bo'lgan otalarning yetim bolalari obrazini yaratgan. Bunday bolalarning oilada yetar-yetmaschilik bilan ulg'aygani, ayniqsa, to'ng'ich farzand bo'lsa, otasi o'rnini bilintirmaslik uchun onasi qanotiga kirib mehnat faoliyatini juda erta boshlagani, ukalariga bosh bo'laman deb, o'z bolalik orzularidan voz kechgani, ba'zan ayrim nokaslar tomonidan "yetim" deb kamsitilgani ham lirik ifodalarda o'z aksini topgan.

Shoir she'rlarida milliy madaniyatimiz, tilimizni qadrlashga doir she'rlar o'tgan asrning so'nggi choragidayoq ko'zga tashlangan edi. Ona tili haqida qayg'urish yosh avlod



ma'naviyatiga poydevor bo'luvchi bolalar adabiyotida ham shu tariqa ko'zga tashlandi, desak yanglishmaymiz. Shoirning "Til darsi" she'rini falsafiy, ta'lim-tarbiyaviy jihatdan o'zlikka qaytish, deyish mumkin. U 1975- yilda yozilgan. She'rdan anglashilishicha, lirik qahramon gruzin bolasidan shunday saboq oladi:

- Gruzin tilini bilasizmi? - dedi,
- Gruzin tilini bilmayman, - dedim.
- Gruzin tilini o'rgataymi?- dedi.
- O'rgat,- dedim.

Fiala ismli bola "mehmon"ga o'z ismi, qishlog'ining nomini faxr bilan aytib, darrov o'z ona tilini o'rgata boshlaydi. Natijada, "aka", "opa", "qo'l", "oyoq", "men", "sen", "kitob" kabi so'zlarning gruzinchasini bilib oladi; ayni paytda o'zi ham Fialaga "uy", "xalq", "ko'cha" degan o'zbekcha so'zlarni o'rgatayotganda manziliga yetib kelgan bolakay, bekatga tushib qoladi. Ammo, ana shu qisqa muddat katta hayot darsi vazifasini o'taydi: boladagi o'z tiliga munosabati, iftixori lirik qahramon ong-u shuurini sergaklantiradi:

Lekin qulog'imda qoldi, so'zlarining qo'ng'irog'i,
Ko'zlarimda, "bilingizmi",- deganday, Ko'zlarining jovdirashi

- Bolalar! Siz shunday qilasizmi hech?

Sizning shahringizga, qishlog'ingizga,

Mehmon kelsa, uzoq ellardan, Siz o'zbek tilini o'rgatasizmi?
O'zbek so'zlarining jarangini, Mehmon qulog'ida yangratasizmi?

Ko'rinadiki, shoir lirik qahramon tilidan yosh kitobxonlarga murojaat etish orqali ona tilimizga yuksak muhabbat tuyg'usini shakllantirishni ko'zlagan. Shoirning "Qirq bolaga qirq savol" she'ridagi ayrim detallar ham kichkintoylarning o'z eli, millatini anglash, uni sevis va obod etishga qaratilgan.

Eng muhimi, shoir yosh avlodning ertasiga umid qiladi. Ularga berilgan tarbiya bejiz ketmasligiga ishonadi. Shu sababli



M.A'zamning ona tili haqidagi she'rlari istiqlool yillarida asl mohiyati bilan namoyon bo'ldi. Shoirning lirik qahramoni endi o'z ona tilini kattalardan kam sevmaydi:

Ona tilim, turkiy tilim,
Ardoqligim o'zbek tilim,
Avaylayman seni doim
Qaboq ila ko'zdek, tilim.

She'rda o'zbek tilining qadimligi, ko'rki, donoligi, onaga tengligi uchun ham uni almashtirib bo'lmasligi ta'kidlana boriladi. Shoir ona tilini avaylashni ko'z-u qaboqqa mengzashi ham bejiz emas. Ko'z insonga berilgan ilohiy ne'matlar ichida eng ardoqlisi. U yorug' olam ma'nosi bo'lishdan tashqari, inson botinini o'zida namoyon etadi. Donishmandlar odamni ko'ziga qarab, kimligini ayta olishgan. Ko'zimizni asrash bilan nafaqat, hayot mazmunini, demakki, o'zligimizni, ko'nglimizni asragan bo'lamiz. Xuddi shu xususiyat ona tiliga ham xosligini shoir:

Turkiy tilim, ko'rkli tilim,
O'zbek tilim, ko'zdek tilim,

misralariga jo etgan. Muhimi, bolalarda yoshligidanoq o'z ona tillarini sevlashga da'vat etish ana shunday satrlar ta'sirida ommalashdi. Istiqlool yillarida bolalar adabiyotida bu mavzu turli ohang va shaklda jilolandi.

Miraziz A'zamning juda ko'p she'rlari tarbiyaviy mazmunining chuqurligi, ixcham va qulay badiiy usulda ifoda etilgani nuqtayi nazaridan boshlang'ich sinf darsliklariga ham kiritilgan. Aytaylik, "Vatan" she'rida eng muqaddas va ulug' tuyg'u oddiy manzara hamda detallar orqali bolalabop aniq tasavvurda gavdalanadi:

Vatan - bizning uyimiz,

Vatan - bizning ko'chamiz, Soylandagi suvimiz, Maza qilib ichamiz.



Vatan - bizning tog'imiz, Olma-anor bogimiz, Bug'doy, arpa
dalamiz, O'ynab maza qilamiz.

Oltin tola konimiz, Tandir tola nonimiz.

Vatan - maktab - onamiz, O'qishni o'rganamiz.

Miraziz A'zamning "Mardlik va aql yorug'ligi" she'rida esa o'qish, ilm cho'qqilarini egallash uchun va insonning o'z orzusi, ezgu niyatiga erishishi uchun barcha imkoniyatlarni yaratib bergan zamonamizda yashashga qaramay, dangasalik, yalqovlik qilgan, hayotga yengil-yelpi yo'l axtargan va adashgan bolalarga tanbeh beriladi. Ayni paytda shoir bolalarni hamisha mard bo'lishga chorlaydi:

Mardlik buzilib ketgay, Miltiq chiqqan zamonda. Yuzta mardni bir nomard Otib tashlar maydonda. Miltiqni mardlik bilan O'rganib bolmas lekin. Kitob varaqlash kerak Qunt bilan sekin-sekin.

Aqlni faqat ilm

Yorug qilar, ukajon.

Yorug' aql Vatanni Olg'a boshlar begumon. O'g'ilga mardlik kerak, Ilm ham kerak tayin. Ilmsiz mardning esa Holiga yig'lar maymun.

M.A'zam mustaqillik, ozodlik mavzusida ham bolalar uchun qator she'rlar yozgan. Shoir "Qo'lni qo'lga beraylik", "Nima yaxshi-yu, nima yomon" **she'rlarida** do'stlik, hamjihatlik, ona-Vatanga cheksiz muhabbat, odobli bo'lish, sidqidildan o'qish uchun intilish, kurashish kabi masalalarni ko'proq ochib berishga harakat qiladi.

M.A'zam bolalar uchun turli janrlarda ijod qildi. Ayniqsa, uning ijodida doston, adabiy ertaklar ko'p uchraydi. Shoir xalqning ertakchilik tajribalariga murojaat etar ekan, avvalo, o'z asarlarining g'oyaviy-badiiy va mavzuviy jihatdan barkamol, qiziqarli bo'lishiga ham erishishini ko'zda tutgan. U o'zi yaratgan asarlarning xalqchil bo'lishi uchun ertaklardan mahorat bilan



foydalandi. Shoirning barcha ertaklarida yaxshilik yomonlikka, soddalik ayyorlikka, olijanoblik yovuzlikka, go'zallik xunuklikka qarshi qo'yiladi.

Miraziz A'zam yaratgan she'riy adabiy ertaklar o'nga yaqin. Shoirning qaysi ertagiga nazar tashlamang, barchasida bolalar zavq oladigan qirralar bor. Xususan, uning "Erk qushi" ertak-dostoni ancha mashhur.

Ta'kidlanishicha, bir mamlakatning dong'i uzoq ellargacha taralgani sabab unga dunyoning turli tomonlaridan juda ko'p mehmonlar, savdo karvonlari yog'ilib kelib turar ekan. Tashrif buyurgan mehmonlar esa uning ko'rkiga hayrat bilan boqarkan. Ayniqsa, mamlakatning osmono'par minoralari, muhtasham arklari sirli jilva taratib, kelganlarni lol-u hayron qoldirar ekan. Shahar tevaragidagi qir- adirlardan ajoyib atir hidi ufurib turarkan.

Mamlakatning bozori ham dunyoga dong taratgan, undagi turli-tuman mollarning xaridori juda ko'p ekan. Ertakda bu bozor xuddi xalq dostoni "Ravshanxon"dagiday alohida ta'riflab keltiriladi:

Turli-tuman mollari

Gavjum ekan bozorlar.

- Kep qoling, - der chollar mana, olma-anorlar!..

Dostonda shu tariqa o'zbek bozorlarining jonli tasviri aks etadi. Unda meva- cheva, gazmol va zargarlik mollari bozori jonli ko'rsatilgan. Savdogarlar bunday yurti hech qachon ko'rmaganidan bu yurtning ovozasini boshqa yurtlarga ham yetkazishibdi. Ko'p vaqt bu yurt uzoq ellarga andaza bo'libdi. Biroq qo'shni yurtning hokimi bu gaplarni eshitib, hasadi qo'zib, ko'p sonli lashkar to'plaganicha uning ustiga bostirib kelibdi. Yetmish makkorlikni bilgan yovuz bosqinchi chigirtka galasiday qo'shini bilan yopirilib, yurti xonavayron etibdi. Bozor rastalari toptalibdi. Hamma yoqqa o't qo'yilibdi. Shahar uch kecha-yu uch kunduz tinmay yonibdi. Xalqi esa butunlay talanib, haqoratlar



va qiynoqlar bilan qullikka mahkum qilinibdi. Lekin bosqinchi shoh har qancha zulm o'tkazmasin, xalq baribir qullikka bo'yin egishdan bosh tortibdi. El bo'ysunmabdi va erk istab kurash yo'liga kiribdi. Mamlakatdagi barcha hunarmandlar: kulol, kosib, qassob-u boshqalar sher yanglig' jangga otilib, yovni boplab qiribdi. Bundan jigar-bag'ri xun bo'lgan bosqinchi hoqon hiyla yo'liga o'tibdi.

Voqealarning mana shu rivojlanish o'rnida shoir lirik chekinish qilib shunday deydi:

Ammo, do'stlar, bilasiz, baravar emas besh qo'l. Har el aro, shubhasiz, uchrab turar besh-o'n go'l.

Elu yurt ozodligi uchun hamma bir jonu bir tan bo'lib kurashayotgan pallada daryo bo'yida istiqomat qiladigan Nahang qassob alohida matonat ko'rsatadi. U nihoyatda sershijoat va sershitob yigit bo'ladi. Achinarli tomoni shundaki, uning sevib olgan nihoyatda go'zal xotini kutilmaganda vafot etadi. Bundan yigit juda chuqur tushkunlikka tushadi. Unga xotinidan o'n yoshli Olmos ismli qiz va sakkiz yoshli O'lmas ismli o'g'il qoladi. Yurtdoshlari Nahang boshiga tushgan ayriliqqa juda achinishadi. Lekin yurt boshiga ish tushib, dushman bostirib kelganda, Nahang o'z dardini unutib, xalq dardi bilan yashay boshlaydi. U elu yurti mustaqilligi va erki uchun kurashga otilib, dushman bilan beayov jang qiladi. Bahodir va o'ktam yigit Nahang qassob na'ra tortib jangga kirar ekan, uning boltasi zarbidan yov lashkari parday to'zg'ib ketadi. Bundan vahimaga tushib qolgan dushman lashkari esa zudlik bilan o'z hoqoniga chopar yuborib, pahlavon Nahang shijoatidan uni ogohlantiradi. Shunda dushman hoqoni quda bo'lish bahonasida elni hiyla bilan bo'ysundirmoqchi bo'ladi. Bu haqda ertakda shunday deyiladi:

Bo'ysunmagan ellarni oladi quda bo'lib, "Qizlar olgan bu yerni!" - der so'ng ko'krakka urib.

Hoqon kekxa vaziri bilan maslahatlashib, uning o'gitiga binoan tul yigit Nahangni kuyov qilish hiylasini ishlab chiqadi.



U Nahangga yoshgina qizini bermoqchi bo'ladi. Bu gapni Nahangga yetkazganlarida, dastlab u qovoq uyadi. Ammo hoqon tomonga borib, uning qizini ko'rgach, uylanishga rozi bo'ladi. Uni hoqonning qizi bir qarashda maftun etadi. Shundan so'ng Nahang:

- Uylanaman qiziga!

To'y o'tgan kun ertasi lashkar qaytsin iziga! -

deya qat'iy xulosaga keladi. Keyin to'y va sulh sharafiga katta ziyofat bo'lib o'tadi. Barcha ziyofat bilan bo'ladi. Hech kim dushman hiylasini sezmaydi. Dushman lashkari esa tun bo'yi ishlab, xalqni zanjirband qilish uchun kishan tayyorlab chiqadi. Odamlar sahar turib qarasa, shahar darvozasiga g'alaba nishoni sifatida dushman tug'i osilgan. Nahang esa bundan bexabar, mast uyquda yotibdi.

Shunday qilib, yillar o'tibdi. O'gay ona O'lmas va Olmos qachon bo'lsa-da bizdan o'ch oladi deya, ularni turtkilar, kamsitar ekan. Ammo bolalar bunga parvo qilmay, mag'rur bo'lib o'saveribdilar. Ayniqsa, Olmos juda haqgo'y ekan. U o'gay onaga qarata shunday ta'nali she'rlar aytarkan:

- Oftob chiqdi olamga, yugurib bordim onamga. Ona, ona, kulcha ber, onam dedi, o'tin ter.

O'tin terdim bir quchoq, kulcha yopdi bir o'choq. Yedi o'zi suyugin.

Menga berdi kuyugin.

Olmosning bu gaplari o'gay onaning jon-jonidan o'tib ketarkan. U bu gaplarga dosh berolmay, alamdand to'lg'anib, yuragi yonarkan. Xususan, o'gay ona O'lmasdan juda hadiksirar va qo'rqarkan. Negaki:

Qo'rqinchli ekan rosa

Olmosidan O'lmasi, bir xo'mrayib qarasa qisilarkan nafasi: "Shuning ko'zini o'ysam... indamay qo'yib qo'ysam yigit bo'lar burgutdek", - derkan.



O'gay ona shu alam tufayli bir kuni Nahang uyga kelishi bilan yig'lab turib, unga tush ko'rganini, tushida bir chol ko'rinib, homilador bo'lganini bildirganini, ammo O'lmas tirik ekan, sen yasholmayсан deganini aytadi. Nahang go'llik qilib, xotining bu gapiga ishonadi. U yo o'g'lini, yo xotinini deyishi kerak bo'ladi. Nahangga xotini aziz tuyuladi. Otasi bir kuni yarim tunda hamma uxlaganidan foydalanib, o'g'lini dast ko'targancha oq tulporga ortadi-yu qirga jo'naydi. U yerda o'z qo'li bilan o'g'lini o'ldiradi.

O'lmasning opasi - Olmos bo'zlagancha ukasining jasadini izlab qirlarni kezadi. Qirdan uning suyakchalarini topib, etagiga yig'ib oladi. So'ngra ularni ko'k lattaga solib, gul tagiga ko'madi. Qiz ukasiga bag'ishlab shunday yig'i qo'shig'i kuylaydi:

"Ona mehrin ko'rmagan, ozod Vatan istagan, o'z uyiga sig'magan voy ukam, voy ukam. Otam seni so'ydimi, o'gay onam to'ydimi, qismating shu bo'ldimi, voy ukam, voy ukam. Rozimasman, ishqilib, tirilmasang qush bo'lib, uchib yurgin o'ch olib, voy ukam, voy ukam".

Navro'z kelgan vaqtda O'lmasning ruhi bir qush bo'lib shu qizil gulning tagidan uchib chiqibdi va chappar urib havoda ucha boshlabdi. U juda go'zal va biyron qush ekan. U yurt osmonida mag'rur-mag'rur qanot qoqib parvoz qilaveribdi. Ammo qushning ko'ksida bir oh borligi sezilib turarkan. Shuning uchun uning sayrashlari odamlar ko'nglini ezibdi. Bir kun qush bozorga uchib kelibdi va bir attorning boshida charx urib uchib, qo'shiq ayta boshlabdi. Uning qo'shig'i shunday ekan:

"O'z otam so'ydi, o'gay onam to'ydi, omon bo'lgur egachim ko'k lattaga tugdi, gulning tagiga qo'ydi, kuk-ku, kuk-ku!"

Attor bu gapiradigan qushni ko'rib, hayron bo'lib qolibdi. "Nima deding, yana ayt?" - desa, qush evaziga o'nta juvoldiz so'rabdi. Qush juvoldizlarni olib, otasining boshiga uchib boribdi. Otasi ham bu gapiradigan qushni ko'rib lol qolibdi va she'rini takrorlashni so'rabdi. Ammo qush otasiga ko'zingizni



yumib, og'zingizni ochib tursangiz aytaman, deya shart qo'yibdi. Otasi shunday qilgan ekan, qush juvoldizlarni uning og'ziga tashlabdi. Otasi juvoldizlarni yutib, halok bo'libdi. Qush esa qah-qahlab uchib ketibdi.

U o'gay onasini ham shu tariqa o'ldiribdi. Hoqon qalbiga vahima solib, xalqni erk va ozodlik kurashiga chorlabdi. Qushchani birgina opasi tanibdi.

Qushchaning chaqirig'i bilan katta jang boshlanibdi. Bu jangda opasi Olmos ham Barchinoyday kurashib, g'alabaga bosh bo'libdi. Xalq Olmosni o'ziga podsho qilib belgilabdi. Olmos yurtni adolat bilan boshqarib, xalqning ko'nglini so'rabdi. Mamlakatni tiklab, avvalgiday gulga burkabdi...

Ertak yaratishda Miraziz A'zam xalq badiiy an'alariga sodiq qoladi. Ertak qahramoni fahm-farosat, aql bilan ish ko'rib, o'z murod-maqsadiga yetadi, baxtiyor bo'ladi. Binobarin, Miraziz A'zam asarlarining barcha personajlari pishiq-puxtaligi bilan ajralib turadi.

Darhaqiqat, zamon muammolarini ertak libosida ifodalashda Miraziz A'zam alohida rag'bat va g'ayrat ko'rsata oldi. U ijodiy imkoniyatlarini shu janrda sinab ko'rar ekan, butun mahoratini ishga sola olgani uchun bolalarning sevimli ertakchi shoirlaridan biri sifatida ham tanildi.

Ertak-doston o'z nihoyasida ezgulikning yovuzlik, oydinlikning qorong'ulik, haqiqatning nohaqlik, hayotning o'lim, aqllilikning nodonlik, adolatning jaholat va to'g'rilikning egrilik ustidan g'alaba qozonishini tarannum etadi.

Shoir ertaklari badiiy qurilishining ixchamligi, soddaligi va yaxlitligi bilan alohida ahamiyat kasb etadi. Ulardagi har bir tafsilot, badiiy detal va obraz, voqea, motiv, ifoda vositalari, poetik usul ijodkor estetik qarashlarini ifodalash uchun xizmat qiladi.



Safar Barnoyev
- bolalar shoiri va nosiri
(1938-2001)



U jurnalistika fakultetida o'q'iy boshlagan kezlari shu haqiqatni anglab yetdiki, bolalar uchun yozmaslik "dadajoni janggohlarga olib ketgan bolaligi"ga xiyonatdir. U yana shuni ham anglab yetdiki, bunday xiyonatning oqibati behad og'ir. Shundanmikan, butun ijodida ikkinchi jahon urushi davridagi bolalikni ketidan qayta tiklash va undan axloqiy-estetik saboq chiqarishni yetakchi tamoyil qilib oldi.

Safar Barnoyev o'zbek bolalar adabiyotining Zafar Diyor, Sulton Jo'ra, Quddus Muhammadiy, Shukur Sa'dulla, Hakim Nazir, Mirkarim Osim, Quddus Hikmat va Po'lat Mo'min singari namoyandalari, shuningdek, jahon xalqlari bolalar adabiyotining zabardast vakillari ijodini qunt bilan o'rgandi, xususan, xalq ijodiyotiga, bolalar folkloriga hayratlanib nazar soldi. U iste'dodini bolalar adabiyotining betakror namoyondalaridan biri Sulton Jo'raning adabiy vorisi sifatida bo'y ko'rsata oldi.

Ya'ni, Sulton Jo'ra ikkinchi jahon urushida bevosita qatnashib, uning bolalar qismatiga ko'rsatgan fojeali ta'sirini ifodalab, o'zbek bolalar she'riyatida shu mavzuni yuksak sa'natkorlik bilan ifodalovchi "Sog'inib", "Sog'inchli salom" singari go'zal epistolyar she'rlar yaratib q'oldirgan sa'natkor edi. U jangchi sifatida urush dahshatini o'z tanasida sinagan.



Safar Barnoyev esa bola sifatida urushning barcha kulfatlarini ko'rdi, otasini yulib olib, uni yetim qilgan urush haqida, o'zga xonadonlarga qora xatlar kelganida ko'kka o'rlagan faryodlarni eshitib o'shandagi iztirobli yig'ilardan q'albi ozurda bo'lib:

Iztirobli yig'idan



Uyg'ondi tor ko'chamiz

Qora xatday qorayib

Ketdi bizning kechamiz,-

deya o'sha ma'shum kunlarga nazar sola olgandi.

Zotan, urush mavzusida Sulton Jo'ra she'rlari tugagan joyda, urush haqidagi bolalik xotirasi bilan Safar Barnoyev bo'y ko'rsata boshladi. Urush uning qalbida bitmas-tuganmas alam va jarohat qoldirgan. Shoirning "Non", "Nur yog'ilgan kun" hikoyalari, "Oq laylaklar" qissasi, yoxud, afg'on bolalari turmushiga bag'ishlangan hikoyalarida urush xotiroti asosida bolalik qismatiga nazar solinadi.



Safar Barnoyev asarlarida moziy bilan bo'y o'lchashgan Buxoroyi sharifning bolalarga xos tasavvuridagi suvratini ko'rish mumkin. Muhimi, shoir she'rlarida jaji bolakaylar timsoli yarq etib ko'zga tashlanib turadi.

Bilasizmi, dadam meni erkatoyim deydilar,

Yozda bayram bo'lganida toychoq olib berdilar.

Bilasizmi, oyim meni yurardilar o'ynatib, Tili shirin o'g'lim deya, yurardilar so'ylatib. Qo'ldan-qo'lga olib uni ko'tarishib yurishar.



15 hijoli satr negizidagi bu she'rdagi poetik nutq vositasida maktabgacha yoshdagi kichkintoylarga xos haya-jon tovlanishlarini g'oyat jozibali ohanglarda ifoda etilgani anglashiladi. O'zi hali kichkina bo'lgan lirik qahramon o'rnini egallayotgan ukajonidan kuyayotganini yopish uchun "yig'lashni qo'ymayotgani, dadasi uxlayolmayotganligi"ni vaj ko'rsatib, o'z haqiqatini himoya qilayotir. Fe'lida yilt etgan shu qarama-qarshi mayllar asosida zuvalasi bichilayotir. Bolaning shakllanishidan iborat murakkab jarayon bor bo'yicha shunday ko'rinib turibdi.

Safar Barnoyev buni bola nutqidagi takrorlar bilan yanada jonliroq qilib aks ettirgan. Garchi bu yoshdagi kichkintoylar uchun 3-7 va 8-9 hijoli tizimdan iborat she'rlar yozish an'anaga aylangan bo'lsa-da, Safar Barnoyev bu yoshdagilar uchun bolalar nutqiga xos ohang tovlanishlarini asos qilib, behad samimiy va ravon she'rlar yoza olgan:

Mehmon kelsa uyimizga, menga bayram bo'ladi,
Shokolad-u konfetlarga cho'ntaklarim to'ladi.

Boshqa paytlar konfet desam, oyim berar urishib, "Konfet yesang, labi-lunjing ketar deya burishib".

15 hijoli bu satrlar kichkintoyning poetik nutq'i. 14 hijoli tizimga asoslangan "Feruza" she'ri aslida kattalar erkalamasi. Unda Feruzaxonni kuta-kuta intiq bo'lgan, nihoyat uning kelganidan qalbi quvonchga to'lgan lirik qahramonning farahbaxsh qiyofasi tiniq chizilgan. Bunda anafora san'ati ohang samimiyatini ta'minlagan:

Feruza quyosh bilan tongda turar jilmayib, Feruza quyosh bilan tongda kular jilmayib. Feruza kulsa agar, olam yayrab ketadi, Feruza kulsa agar, qushlar sayrab ketadi, Feruza kulgisidan har uyga kelar sevinch, Feruza kulsa agar, demak olam bo'lar tinch.

Shoir "Mening tarjimayi holim" she'rida quyidagi satrlarni bitgan:



Qaysi kun,

Qaysi yilda tug'ilganimni, Taxminan

Bitib bergan sho'ro kotibi, Necha bor daraxtdan
yiqilganimni Hamon aytib yurar qo'shnimiz xotini. Tut pishig'ida
tug'ilgansan deb, Onam aytganlar, Pishiqchilikda...

Safar Barnoyev - Buxoro yurtining farzandi. Uning bolaligi
shu qadim shahar ko'chalarida o'tgan. Labihovuz, Registon,
moviy gumbazlar, Minorayi kalon, hatto unda in qo'ygan oq
laylaklar... Bularning barchasi adib ijodiga umr bo'yi ilhom
baxsh etib keldi. Yana sharif shahar jinko'chalari, muhtasham
yodgorliklar-u zalvorli toshdevorlar ijodkor armonlarining tilsiz
guvohi...

Safar Barnoyev ijodiga o'zbek bolalar adabiyotining rang-
barang muammolari, chunonchi, bolalar taqdirida o'chmas iz
qoldirgan urush dahshatlari aks etgan. "Chehralar" to'plamidagi
she'rlar va balladalarining, "Afg'on hikoyalari" turkumidagi
asarlarning asosiy qismi ushbu mavzuni badiiy yoritishga
bag'ishlangan.

"Qirq yettinchi yil hikoyalari" deb nomlangan turkumga
kirgan asarlarida butun bir avlodning urush tugagan pallalarda
voyaga yetgan, oq-qorani tushuna boshlagan, ko'ngli bir umr
yarim bo'lib qolgan bolalar avlodining qiyofasi aks etgan. Ota
diydoriga to'ymagan bu avlodning bir vakili sifatida Safar
Barnoev "Ota o'g'li", "Dadamning qo'llari", "Dadam haqida
qo'shiq" asarlarida o'sha davr bolalarining armonlarini
tasvirlagan.

Safar Barnoyev asarlarida fikriy tarbiya tasvir va talqin,
tushunish va tushuntirish, hissiy idrok va badiiy ifoda vositasida
amalga oshiriladi. Shuning uchun hatto aksariyat she'rlari
sujetli-voqeaband. Ko'rgan, bilgan, his qilgan narsalarni voqealar
jarayoni ila yaxlit bir butunlikda ko'rsatishga mayli kuchli.
She'rlar xotimasidagi poetik obraz zimmasiga yuklangan ma'no
ana shu mohiyatni, hikmatli mazmunni aks ettiradi. Shoirning
"Sirli sado" she'ri bunga dalil bo'la oladi:



Amakimning yo'qdir ikki
Oyog'i.
Oyoqlari - uning qo'ltiq Tayog'i.
Qo'ltiq tayoq ingrab borar,
"To'-o'q, to'-o'q".
Bu degani urushga yo'l-
Yo'-o'q, yo'-o'q!

Inson – hayot guli. Voqelikdagi xunuklik ko'rinishlarini bartaraf etilgani sayin hayot ham, tiriklik ham yanada chiroyli bo'la boradi. Safar Barnoyev asarlaridagi tarbiyaviy jihatlar xilma-xil. Ijodkorning "Urush bolalari", "Tunda osoyishtalik cho'kkanida borliqqa", "Jabbor otaning aytganlari", "Uka, men senga aytsam", "O'ttiz yoshlilar", "Mening o'z burchim bor", "Bobomning qo'llari", "Otamning o'rtoqlari" singari qator she'rlari va inson taqdiri masalasini poetik tadqiq etishda o'ziga xos yo'nalishga ega. Ularda, avvalo, qalbning iztirobli tajribalari - dardlari muhrlangan; u aynan shu avlodning qalbidan silqib oqqan, ko'z qorachig'ida tugilib qolgan dard.

"Bolalar xulosalarni, isbot-dalillarini va mantiqiy tafsilotlarni talab qilishmaydi, - deydi V.G.Belinskiy, - ularga obrazlar, bo'yoqlar va ohanglar kerak. Bolalar g'oyalarni unchalik xush ko'rmaydi; ularga sarguzashtlar, qisqa-qisqa tarix saboqlari, qissalar, ertaklar, hikoyalar kerak. Obrazlar bilan so'zlash uchun shoir bo'lmasa-da, jilla qursa jonli, ziyrak va quvnoq fantaziyaga ega bo'lgan hikoyachi bo'lish lozim. Bolalar bilan obrazlar vositasida so'zlashish uchun bolalarni bilish kerak, shoirning o'zi, katta yoshli bola bo'lishi lozim. Ya'ni, oq ko'ngil, soddadil, go'dak tabiatli bo'lib tug'ilishi zarur".

Zotan, S.Barnoyev "Uchburchak maktublar", "Jabbor otaning aytganlari", "Bobomning qo'llari", "O'ttiz yoshlilar" singari she'rlarida bolalar bilan ana shunday jonli, obrazli tilda so'zlashadi. O'quvchi xotirasida uzoq saqlanib qoladigan tiniq manzaralar chizadi.



Shoirning aksariyat she'rlarida urush va inson taqdiri masalasini turli xil qirralardan o'ziga xos yo'sinda yoritishga mayl kuchli. "Jabbor otaning aytganlari" she'rida urishda bedarak yo'qolgan o'g'lini hamon intiq kutayotgan, o'z mehriga o'zi isinib yashayotgan yetim mo'ysafidning ("Men deyman:- Juda yomon otalar yetim qolsa") armonli hasratini eshitamiz. "Uka men senga aytsam" asarida esa urushda ko'plab jarohat orttirgan, hozirgi kunda ham ba'zi olchoq va "qochoqlar"dan yuragidagi jarohati kuchaygan jangchi o'z ko'nglini bo'shatadi. "Otamning o'rtoqlari"da oltmishning teng yarmida ota degan nomga ega bo'lgan lirik qahramonni keksa jangchilar g'oyat izzat qilishadi ("Otam o'rnida ko'rib, ular meni sizlashar"), ularning borligidan lirik qahramon ham cheksiz faxrlanadi. Ular yurtga jon fido qilishgan, bugun hamon hayot jabhasining oldingi safida. Shu boisdan ham otasining o'rtoqlari oltmishdan oshib qolsa-da, belidagi belbog'lari unga jangchining kamarini eslatadi. "Qo'shni kampir iltijolari" she'rida esa uch o'g'lini urushga jo'natib, uchovidan ham qora xat olgan, yo'liga qarayverib ko'zlari to'rt bo'lgan mushtipar kampirning dil nolalari yuraklarni zirqiratadi.

E'tiqod tuyg'ulari, yaxshi xulq, yoki yaxshi odat malakalari inson bilan birga tug'ilmaydi. Ularni jamiyat va odamlar shaxs tabiatida tarbiyalab kamolga yetkazadilar, ya'ni, ushbu fazilatlarni biz hayotimiz davomida o'qish, o'rganish, turli xil tarbiya ko'rinishlari orqali o'z shaxsimizda shakllantirib boramiz. Shaxsning ma'naviy saviyasini, intellektual darajasini voqelikning ijtimoiy-falsafiy asoslari belgilab beradi. Safar Barnoyev she'rlarining yoshlar tarbiyasida salmoqli o'rni, burchi-vazifasi bor. Bu o'ziga xoslik - ota-bobolarning ezgu ishlariga sadoqatda ko'rinadi. Bu borada shoirning "Mening o'z burchim bor" she'ri ibratlidir. Unda lirik qahramon ellar - elatlarga ezgulik urug'ini ekmoqlikni, yomonlarning boshlarini egmoqlikni, go'daklar kulgisini, Vatanning sof havosini asramoqlikni o'z burchi, deb biladi. Shu boisdan ham "Agar



yaxshilik deb kurashmasam, hech kimman”, - deya qat’iy ayta oladi.


S.Barnoyev asarlarida ruhiy holat tahlili yetakchi. Bu avvalo, ijodkor bolaligi xotiralarining mustahkamligidir. “Menga qolsa, umr daftarini - bolalik daftari deb atardim, - deydi adib “Beg’ubor damlar” maqolasida. - Chunki bolalikda ko’rgan, bilganing, eshitganing bir umr senga hamroh bo’ladi. Ana o’shaning zavqi bilan yashaysan. Har bir daqiqada bola bo’lging kelaveradi. Bolalik dunyosi o’ziga chorlab turadi. Bu dunyo qalbga muhrlanib qolgan. O’tgan kunlarni eslash, bugungi kunlarning qadriga yetmoq kerak, degan gap-da”.

Umuman, Safar Barnoyev hikoyalaridagi bosh qahramonlar kitobxon bolalar qalbiga yaqin bo’lib qoladi. Yozuvchi o’tmishga aylangan urushni ko’rsatish orqali bugungi hayotimizning naqadar mashaqqat va yo’qotishlar evaziga, ota- bobolarimizning mislsiz qahramonliklari va mardliklari hisobiga yaratilayotganligini ta’kidlaydi. Maqsad esa bolalarni Vatanni sevishta, uni asrashga undashdir, o’tmishni bilmasdan turib, bugungi va ertangi kunning qadriga yetib bo’lmasligini uqtirishdir.

Binobarin, Safar Barnoyev yigirmaga yaq’in she’riy va nasriy kitoblarini bitib, o’zbek bolalar she’riyati va nasrini goho hazin, goho quvnoq ruhiyatga sug’orilgan she’rlar-u, hayajonbaxsh adabiy ertaklar, xilma-xil mavzulardagi hikoyalar-u qissalari bilan boyitdi. U istiqlof tufayli mamlakatimizda bolalikka munosabatning tubdan qayta qurilayotganiga teranroq razm sola boshlagan edi. Bu hol uning ijodida bolalik muammolaridan bahs etuvchi publitsistikaning faollashuviga yo’l ochdi. Zotan, uning qator dolzarb publitsistik maqola va ocherklari yuzaga keldiki, bular XX asrning so’nggi choragidagi o’zbek bolalar publitsistikasi qiyofasini belgilashda alohida ahamiyat kasb etadi.




Tursunboy Adashboyev
she'riyatida bolalik va tabiat munosabati ifodasi
(1939-2017)



Tursunboy Adashboev 1939-yilda Qirg'izistonning O'sh viloyatiga qarashli Olabuqa tumanidagi Safed Bulon qishlog'ida tug'ilgan. U bolaligidan har ikki xalq tili, qadriyatlari, ma'naviyati, madaniyati, ma'rifatidan bahramand bo'lib o'sadi va haqli ravishda o'zini har ikki xalq farzandi deb hisoblaydi. Bo'lajak shoir qalbida she'riyatga oshnolik tuyg'usi maktabda o'qib yurgan vaqtidayoq tug'iladi. Uning «Maktabim» sarlavhali birinchi she'ri 6-sinfda o'qib yurgan paytida «Lenin uchquni» (hozirgi «Tong yulduzi») gazetasida e'lon qilinganligi fikrimizni tasdiqlovchi dastlabki dalildir. Ikkinchi misol: 1956-yilda «Qirg'iziston haqiqati» gazetasi eng yaxshi hajviy she'rlar uchun tanlov e'lon qiladi. Tanlov yakunida 1- mukofot hech kimga berilmaydi, 2-mukofot maktab o'quvchisi T.Adashboyevga beriladi. Yana bir misol: u maktabda o'qib yurgan paytida «Qizil O'zbekiston» gazetasida folklorshunos olim H.Zarifov nomidan gazetxonlarga murojaat qilinib, ertakchi bobo-buvilari hamda baxshilardan o'zbek xalq og'zaki ijodi namunalarini yozib olib, tahririyatga jo'natish va shu bilan xalq og'zaki ijodining xalqimiz orasidagi nodir namunalarini saqlab qolishdek xayrli ishga



hissa qo'shish tashabbusi bilan chiqilgan edi. Yosh o'quvchi T.Adashboyev qalbida bu tashabbus, ehtimolki, endi-endi nish urib kelayotgan badiiyatga oshnolik tuyg'ularini uyg'otib yuboradi. U peshqo'rg'onlik Olim baxshi Soyibboyevdan «Yozi bilan Zebo» dostonini yozib olib, Toshkentga yuboradi va ko'p o'tmay folklorshunos olimlar H.Zarifov va Muzayyana Alaviyadan yangi izlanishlarga undovchi minnatdorchilik maktubi ham oladi. Baxshilardan, bobo-buvilardan eshitilgan ertak va rivoyatlar, doston-u qo'shiqlar, tez aytish-u topishmoqlar T.Adashboyev qalbiga, o'zi aytganidek, «cho'g' solgan bo'lsa, ajab emas» . Shu sababli ham u o'rta maktabni tugatgach, Toshkent davlat universiteti (hozirgi O'zbekiston Milliy universiteti)ning jurnalistika fakultetiga hujjat topshiradi. Universitetda o'qish jarayonida she'riyat sirlarini yanada puxta egallagan yosh shoirning dastlabki asarlari birin-ketin matbuotda e'lon qilina boradi hamda talabalik chog'idayoq, 1964-yilda, "Kamolning olmasi" deb nomlangan hammualliflikdagi birinchi kitobi nashr etiladi. T.Adashboyev Toshkent davlat universitetini tugatganidan keyin o'z bilimini yanada oshirish, qalamini charxlash maqsadida Moskvadagi Jahon adabiyot institutining ikki yillik kursida ham tahsil oladi. U o'qishni tugatganidan keyin uzoq yillar mobaynida O'sh viloyat gazetasida adabiy xodim bo'lib ishladi. Shoirning 1987-yildan keyingi taqdiri Toshkent bilan bog'liq. U "Yulduzcha" (hozirgi "Cho'lpon") nashriyotida salkam yigirma yil bosh muharrir o'rinbosari vazifasida ishladi. Bu davr mobaynida shoirning "Biz sayohatchilarmiz" (1966), "Ola-Tovlik bo'laman", "Arslonbob sharsharasi" (1969), "Surnay", "Nur daryo" (1975), "Guldasta", "Olatog'-lolatog'" (1978), "Jo'nataman quyoshni" (1982), "Oqbura to'lqinlari" (1985), "Sovg'a" (1986), "Arslonbob afsonasi"(1988), "Uch bo'taloq va sirli qovoq" (1990), "Topishmoqli alifbe"(1997), "Oltin yolli tulpor qissasi" (2003), "Orzularim - qo'sh qanotim" (2003), "Osmondagi darvoza" (2012) singari kitoblari nashr qilinadi.



T.Adashboyevning sermahsul va mohir tarjimon sifatidagi faoliyati ham o'ziga xosdir. U avvalo, jahon bolalar she'riyatining juda ko'plab yetakchi namoyandalarining she'riy asarlarini o'zbek tiliga tarjima qilib, bolalar adabiyoti xazinasini boyitishga hissa qo'shadi. Shoirning "Men suv ichgan chashmalar" turkumidagi tarjimalari ijodkor iste'dodi va mahoratining serqirraligini asoslaydi. K.Chukovskiyning "Eshitmadim demanglar", "Toshbaqa", "Kular tipratikanlar", "Jenni"; V.Berestovning "Ko'lmakdagi suratlar", "O'qishni bilsang o'zing"; B.Zaxoderning "Samovar", "Bo'ri maqtasa...", "Itbaliq"; gurji shoiri Nodar Dumbadzening "Ketino", "Igna"; tatar shoiri N.Yusupovning "Kechirasiz", Rustam Ming'alimning "Gilos", "Shamol esgach"; yahud shoiri Ovsey Druzning "Kutilmagan hodisa", "Tarozilar"; litva shoiri Y.Markinkyavichyusning "Jang tugadi", "Mening kitobcham"; V.Dankoning "Qorbobo bo'lsam agar", "Hasrat"; tojik shoiri Saydali Ma'murning "Yaxshi odamlar", "Nima shirin?"; qirg'iz shoiri KJunushevning "Qayiq", "Qaydan bilsin?", "Necha so'mlik bolasan?", "Toshbaqaning shiori", "Boshi bormi?"; qozoq shoiri Q.Murzalievning "Xolmirzaning oti", "Tikan terdi"; turkman shoiri O.Annadurdiyevning "Tovus", "Ninachi", "Savol-javob"; polyak shoiri Yan Bjexvaning "Tuxum va tovuq", "Tuz haqida ertak"; uyg'ur shoiri Uchqunning "Muhammadning savollari"; arman shoiri G.Gabrielyanning "Misol", "To'g'ri javob", "Vachikning panjasi"; belorus shoirasi N.Tulupovanning "Dars", "Nikitaning yoshlari"; arab shoiri Bayon as Safadiyning "Rimaning savollari", "Shamol ham



yig'laydimi?"; ingliz shoiri Uolter De La Merning "Pat saqlanar yostiqa", "Berkinmachoq" she'rlari; "Otboqar" nomli nemis xalq ertagi, makedoniya xalq she'riyatidan "Teskari hisob" she'rlari tarjimalari shular jumlasidandir.

U qirg'iz adabiyotidan 30 ga yaqin asar tarjima qilgan. Ular orasida "Manas"ning nasriy bayoni, "Singan qilich" romani bor. T.Adashboyev "O'zbekiston xalq maorifi a'lochisi"(1993), "Qirg'izistonda xizmat ko'rsatgan san'at arbobi" (1999), "Do'stlik" ordeni (1999), "Manas" ordeni (1995) sohibidir.

T.Adashboyev bola ruhiyatini yumorga moyil tarzda nozik ifodalaydi. Uning kattalar uchun yozilgan asarida ham o'ziga xoslik sezilib turadi. T.Adashboyev o'zi tug'ilib o'sgan qardosh Qirg'iziston Respublikasi O'sh viloyati tabiatini shu qadar mehr; samimiyat bilan tasvirlaydiki, ko'z oldingizda marjon-marjon manzaralar xushbo'yini sohib tizilaveradi:

Asqar tog'dan suv tushar Qoyalarda yanchilib.

Deysan, nahot qarag'ay Ko'kda qolgan sanchilib. Kelar chanqoq bosgani Kiyik, qulon ohista, Arxar shohi ilinib To'kilar xandon pista. Qorli cho'qqi eslatar Qirg'iz og'am tumog'in. Tog' asalning hididan Bitib qolar dimog'ing. ("Sarichelak")

Bolalarda bir xususiyat bor - o'yinga, mashg'ulotga shu qadar beriladiki, uning o'yinligini ham unutadilar. Yosh qalbdagi hali rost-u yolg'on, soxta-yu haqiqiy degan tushunchalar o'rtasida aniq chiziqlar tortilmagan. Ular hamma narsaga ishonadilar, tabiiy deb qabul qiladilar. Hattoki, o'zlari o'yin uchun yaratgan narsalarni ham tirik mavjudot kabi yaxshi ko'rib qoladilar:

Eh xayriyat, yomg'ir bu gal
 "Suvga oqib ketmasaydi
 Yo'lda qolgan rasmlar" deb,
 Dilshod tunda uxlay olmay
 Tashvishlanib chiqdi hadeb,



Suratlarni o'chiribdi
Mashinalar, kaparlarni
Cho'chitmabdi, uchirmabdi.
(*"Asfaltdagi rasmlar"*)

Taraqqiyot sari intilish - zamonlar uchun qonuniyat. Lekin taraqqiyot munis o't-o'lanlar o'sgan jaydari yerlarni bosib-yanchib o'tmasligi, bir-biriga oqibatli mehnatkash chumolilarning uyini buzmasligi kerak. Fan-texnika nechog'li taraqqiy etmasin, inson bolasi, o'zini eng avvalo, ona- tabiat bag'rida to'laqonli his etadi. Katta zamonaviy shaharlarda tug'ilib o'sgan bolalar qishloqqa borib qolsa, mitti qo'ng'izcha bilan kun-tun o'ynab zerikmasligida hikmat ko'p. T.Adashboyev she'rlarida bola qalbining quvonchi, hayratlari, beg'uborliklari ufurib turadi:

Chaqmoq ko'kda yong'oq chaqdi,
Qizg'aldoqlar selda oqdi, Quyosh yana kulib boqdi.

T. Adashboyev she'rlarining qahramonlari "Loyni bir oz tindirib suv zahrini sindirib" g'isht quyayotgan, "Sapchib oqqan suv bilan kim o'zarga yugurgan", xolasiga yordam uchun "... nonni botirib, qotirib qaymoq yegan", "Tog'dan ko'tarilgan quyoshni onasi yopgan patirga" o'xshatgan, buvisining ajinlariga qarab "Dazmol bosib olsangiz, tekis bo'lib ketardi", deb maslahat beradigan, kun bo'yi bog'dagi sirpanchiqda "vagon" bo'lib uchishgach, "Oqshom uyga... Shimning orti suzilib" qaytadigan quvnoq, topqir, xayolparast, mehnatkash, zavqi-yu ishtahasi tobida bo'lgan bolalardir.

Ayrim she'rlardagi voqelik, tuyg'ular kechinmasidan shoir bu she'rni o'z boshidan kechirganlari ta'siridanmi yoki kuzatganlari asosida yozganmi - bilinib turadi. Lekin T.Adashboyev she'rlarida bunday chegara yo'q - oddiy chizgilardan salmoqli voqealargacha lirik qahramonning yuragidan o'tgan.



Ag'darishmachoq soz o'yin,
Polvonlar egmas bo'yin.
Davrani keng olamiz.
Chunki tengqur bolamiz.

Shaylandim minib eshak, Akmal ham chiqdi beshak.
Tushim ekan, xayriyat,

Shoir bolalar, kattalar tabiatining, o'zligining yarq etgan
har bir qirrasini ko'rsatib qo'yadigan manzara, voqea, bahsning
suratini so'zlarda chizadi. Shu orqali o'quvchilarni bag'ri
kenglikka, mustaqil mushohada yuritishga o'rgata boradi.

Bolalar arzimagan bir xasdan ham kashfiyot qilishlari,
uni langarcho'p deb miriqib o'ynashlari mumkin. Ba'zan
farzandlarimiz ertak qahramonlariga aylanadilar: gullar bilan
suhbatlashadilar, xazonlarni qayiq qilib sayohatga chiqadilar,
nima uchun qushlar ularning qo'liga qo'nmayotganidan
ajablanadilar...

Dunyo bolalar adabiyotida kichkintoylarning shu kabi
xislatlariga asoslangan ajoyib ertaklar bor.

T.Adashboyev ijodida ixcham, manzara she'rlar borki,
bolalar uchun filmlar yaratuvchi mohir rejissor ular asosida
ajoyib asarlarni suratga olishi mumkin. Mana bu to'rt qator she'r
go'yo multfilmday.

Boychechaklar nish urib

To turguncha o'rnidan Bahor qishni tarnovga Osib qo'ydi
burnidan.

Yoki,

Tolning bargi suvga tushib
Qayiq bo'ldi.
Bu ayniqsa qumursqaga
Loyiq bo'ldi.
Qo'sh qirg'oqni to'lqin yalab



Ko'kka sapchir,
Eshkakni-chi, o'zi yakka
Eshar abjir.
Teng-tushlari qoldi gap-so'z
Tayinlashmay.
Qumursqa ham jo'nab ketdi
Xayrlashmay...

T.Adashboyevning turli davrlarni, ya'ni o'zining bolalik yillarini eslatuvchi she'rlarini, farzandlarining bolaligini tasvirlovchi she'rlarini - barchasini ichki bir yaxlit tuyg'u - mehr, mehribonlik birlashtirib turadi. Shoir yaratgan obrazlarning hayotiyliigi bola tabiatiga yaqinligidadir. Uning "Do'ppi", "Kesib turdim", "Mayiz" nomli she'rlari quvnoq yumor bilan sug'orilgan bo'lib, ularda kichkintoylarning goh sodda, goh beg'ubor, goh esa ozgina quv, ayyor xarakteri ochib beriladi. Aytaylik, "Mayiz" she'rining qahramoni - Lola ismli jajji qizcha. U mehmon tog'aning savollariga juda aqlli javob qaytaradi:

- Oting nima, qizaloq?
- Men-mi, tog'a, Lolaman.
- Ol mayizdan bir hovuch,
- Yo'q, odobli bolaman.

Hovuchingiz kattaroq, Siz bersangiz olaman...

She'rda bolalarning o'ziga xos topqirligi ham aks etib turibdi. Chunki, qizcha mayizdan o'zi olib yesa odobsizlik ekanini biladi, mehmon tog'a olib bersa, uning qo'lini qaytarib bo'lmaydi-ku, axir... Mehmon tog'aning hovuchi ancha kattaligi esa ayni muddao.

"Alam, alam" she'rida Lolaning teskarisi bo'lgan Saida ismli qizaloq xarakteri yaratiladi:

- Betoqat qiz Saida
- Sensan nafsing payida,



Turmaysan dasturxondan Uyalmaysan mehmondan. Uyat-uyat!

- O'zing anor yeyolmay,
Ozgina ber deyolmay,
Ko'zing to'rt-ku bechora,
Ololmasang ne chora, Alam-alam!

T.Adashboyevning juda ko'p she'rlarida maktabgacha tarbiya yoshidagi bolalar va qizaloqlarning turli fe'l-atvori quvnoq va samimiy talqin etiladi. Kichkintoy lirik qahramonlar goh o'z soddaligi tufayli kulgili holatga qoladi, gohida o'zlarini dono hisoblab, kattalarga gap uqtiradilar: tufllilari eski bo'lmasligi uchun sandiqqa solib qo'yadilar, kiyishga qizg'anib, asrab yurgan tor kelgan shimni katta bo'lsam kiyaman deydilar, do'ppisini o'rtoqlari koptok qilib tepganda darvozabon bo'lgani uchun choki so'tilganida ham o'zini aybsiz hisoblaydi, yoki qo'g'irchoqlari - o'quvchilarining hammasiga qattiqqo'llik bilan ikki qo'ygan "o'qituvchi" barcha beshni o'ziga qo'yadi va h.k.

T.Adashboyev umrining oxirigacha qalbi bolalik beg'uborligi, samimiyati, soddaligi, yorqin hayrat-u quvnoq topqirliklari olamida sobit turdi. Binobarin, shoir ijodi adabiyotshunoslikda keng o'rganilib, alohida tadqiqot mavzuiga ham aylanib ulgurgan. Jumladan, B.Ashurov o'z ishida shoir ijodining uch asosiy bosqichini ajratib ko'rsatadi:

1. XX asrning 60-70-yillari. Bu davrda u xalq og'zaki ijodi, jahon bolalar adabiyoti hamda o'zbek bolalar adabiyoti yetakchi namoyandalarining eng yaxshi an'alarini o'zlashtirgan.

2. XX asrning 80-yillari. Bu davrda T.Adashboyev o'zbek bolalar adabiyotida o'z o'rniga, o'z so'ziga ega bo'lgan shoir sifatida shakllandi, ijtimoiy dolzarb masalalarni bolalar she'riyatiga olib kirdi.

3. Istiqlool davri. Bu davr T.Adashboyev ijodiy kamolotiga rivoj qo'shdi. U ona-Vatan, kindik qoni to'kilgan muqaddas



tuproq, milliy, tarixiy, madaniy va adabiy qadriyatlarimiz haqida to'lib-toshib kuylovchi, yosh avlodni ularga sadoqat ruhida tarbiyalashga da'vat etuvchi sermahsul ijod bilan mashg'ul bo'ldi.

Shoir salkam ellik yillik ijodi davomida ko'plab ballada, ertak va dostonlar yaratgan. "Ustaning baxti", "Dovonlar", "Burgutning o'limi", "Qismat" balladalari; "Sirli sharshara", "Nur daryo" dostonlari; "Adolatli qozi", "Oriyatli xo'roz", "Oltin yolli tulpor qissasi", "Roston xola - doston xola" ertaklari xalq og'zaki ijodi ta'sirida yozilgan.

Uyg'ur xalq ertagi asosida qayta yaratilgan "Adolatli qozi" ertagi sujetini jo'jalarga qiron keltirayotgan Tulki ustidan tovuqlarning qoziga arz qilishi bilan bog'liq voqealar tashkil etadi. Majoziy usulda bitilgan ushbu ertakda birinchi qozi - Arslon. Tovuqlarning arz-dodini tinglagan qozi haqiqatni ayon qilish uchun Tulkini so'roqqa chaqirtiuradi:

Paydo bo'ldi quv Tulki,

Yetmish yetti bukilib.

Qo'ltig'ida paryostiq,

Ta'zim qilar yukinib:

– Davlatingiz bir umr, Bo'lsin bekam, ziyoda.

Ayyor, xushomadgo'y Tulki men tovuqning go'shtiga emas, patiga o'chman, chunki men yostiqdo'zman, mana, tovuq patlaridan sizga atab paryostiq tikdim, deya paryostiqni Qozining yonboshiga suyaydi. Sovg'a-salom olgan qozi ishni tekshirtirishni orqaga tashlaydi. Natijada Tulki qutulib qoladi.

Kun ortidan tun o'tib,

Falak charxi aylandi.

Bu orada Qashqir

Qozi qilib saylandi.

Tovuqlar endi bu qozi haqiqatni ro'yobga chiqarar, jinoyatchining jazosini berar degan umidda Qashqirga murojaat



qiladilar. Tulki yana eski usulni qo'llaydi, bu qoziga ham paryostiq sovg'a qilib, qutulib qoladi. Ammo uchinchi marta Tayg'on qozi etib saylangan vaqtda tulkinging hiylasi o'tmaydi. Shu sababli Qozi:

– Bu makkorni hoziroq,
Qirga quvib chiqinglar.
Tulki zoti uchrasa,
Tutib somon tiqinglar.

deb farmon beradi. Shu tariqa, xalq ertaklaridagidek, yaxshilik murodiga yetadi.

“Oltin yolli tulpor qissasi”da Olabuqa qishlog'idan o'n chaqirim naridagi Chotqol tizma tog'larining etagida joylashgan, “chor atrofni archazorlar kiprik misol to'sgan” Tulporko'l afsonasi qalamga olinadi. Bu adabiy ertakda inson tabiatidagi azaliy ochko'zlik, boriga qanoat qilmaslik oqibatlarini xalq ertaklariga monand aks etgan. Adabiy ertakdan ma'lum bo'lishicha, Chotqol tomondan baytalini yeldirib, ovuliga qaytib kelayotgan cholning ayni peshin chog'ida Tulporko'l bo'yiga yetib kelishi voqea sujetiga asos bo'lgan. Chol issiqdan tolganligi sababli ko'lining yam-yashil qirg'og'i yaqinida bir pas dam olmoqchi, qolaversa, peshin namozini o'qish niyatida otdan tushadi. U namoz o'qish bilan mashg'ul bo'lgan vaqtda esa ko'lining o'rtasidan oltin yolli tulpor chiqib, “ko'kka sapchib pishqirib, ko'zi yonib, shaylanib”, bo'z baytal atrofidan uch marta aylanadi.

Cho'pon esa beg'am, befarq,
Ibodatin buzmasdan-
Turib boqsa duldul ayg'ir Sho'ng'idi ko'l qatiga.

... Oradan o'n ikki oy o'tib, cholning baytali oltin yolli qulun tug'adi. Ammo mol-dunyoga hirs qo'ygan kampir yana bitta shunday qulunli bo'lish dardida qaysar cholni aldab-avrab, Tulporko'lga qayta borishga ko'ndiradi. Chol baytalni minib, ko'l tomonga yo'l oladi, oltin yolli toychoq ham onasining ketidan



qolmay, ularga ergashadi. Chol yana avji peshin chog'ida ko'l bo'yiga yetib keladi va:

Yozdi shoshib chakmonin

Olib-olmay tahorat.

Chol shunchaki, nomi uchun

Namoz o'qib o'tirar.

Oltin yolli ot tashvishi

Yuragini o'pirar.

Shunga yarasha, ko'ldan chiqqan tulpor toychoqning bo'ynidan tishlab, o'zi bilan ko'l ostiga olib ketadi. Chol esa barmog'ini tishlab qolaveradi.

Bu adabiy ertakda ham xalq og'zaki ijodi va A.S.Pushkin ertaklariga o'xshash insonning ochko'zligi, qanoatsizligi tufayli boridan ham ajrab qolishi, mahrum bo'lishi haqqoniy ochib berilgan.

Xullas, T.Adashboyevning ertak va she'rlarida zamondosh o'quvchiga ma'naviy-ma'rifiy oziq bera oladgigan qahramonlar, obrazlar hamda detallar juda ko'p.



Anvar Oobidjon
- bolalar shoiri, adibi va dramaturgi
(1947-yil 8-yanvar — 2020-yil 11-aprel)





O'zbekiston xalq shoiri **Anvar Obidjon** 1947-yilning 8-yanvarida Farg'ona viloyatining Oltiariq tumanida tug'ilgan. U o'zbek bolalar adabiyotini o'zining qisqa va mazmunli she'rlari, qiziqarli hikoya, qissa, pyesalari bilan boyitib kelayotgan adib va dramaturgdir. A.Obidjon hozirgi O'zbekiston milliy universitetining jurnalistika fakultetini tamomlagan. U bir qator gazeta va jurnallarda xodim, bo'lim mudiri bo'lib ishlagan.

A.Obidjon sermahsul ijodkor. Uning “Ona Yer” (1974, she'rlar), “Bahromning hikoyalari” (1980, she'rlar), “Ey, yorug' dunyo” (1983, qissa), “Olovjon va uning do'stlari” (1983, qissa va hikoyalar), “Bezgakshamol” (1985, hajviy she'rlar), “Masxaraboz bola” (1986, she'rlar), “Akang qarag'ay Gulmat” (1987, qissa va hajviyalar), “Juda qiziq voqea” (1987, she'rlar), “Oltin yurakli Avtobola” (1988, qissa va hikoyalar), “Dahshatli Meshpolvon” (1989, qissa va pyesalar), “Yerliklar” (1990, hajviyalar), “Alamazon va Gulmat hangomasi” (1992, qissa, pyesa, she'r), “Ajoyibxona” (1993, she'riy taqvim), “Meshpolvonning janglari” (1994, qissa va doston), “Alisher ila Husayn yoki uch dono va o'g'ri” (1996, doston va she'rlar), “Alamazon va Gulmat” (1998, qissa va she'rlar), “Oltiariq hangomalari”, (1999, hajviyalar), “Bulbulning cho'pchaklari” (2001, she'r va hikoyalar), “Odobli



bo'lish osonmi?" (2001, hikoya), "Meshpolvon" (2003, qissa), "Bezgakshamol-2" (2003, hajviy she'rlar) kabi to'plamlari nashr etilgan.



Respublika yosh tomoshabinlar teatri hamda Farg'ona, Qarshi, Qo'qon, Guliston teatrlarida Anvar Obidjonning "Qo'ng'iroqli yolg'onchi", "Pahlavonning o'g'irlanishi", "Topsang, hay-hay", "To'tiqul", "Qorinbotir", "Navro'z va Boychechak" pyesalari sahnalashtirilgan. Uning asarlari asosida "O'zbekfilm" kinostudiyasi tomonidan "Tilsimoy-g'aroyib qizaloq", "Dahshatli Meshpolvon" komediyalari kino tasmasiga tushirilgan. Anvar Obidjon she'rlariga bastalangan qo'shiqlarning asosiy qismi bolalarga bag'ishlangandir.

Uning "Kulchalar" va "Botirvoyning kundaligi" turkumlaridagi qahramonlarning deyarli hammasi turli yoshdagi bolalardir. Bu she'rlarda bolalik tuyg'ularining sofliqi, orzu-umidlarining beg'uborligi, tabiatan bir oz shumligi, quvnoqligi katta iste'dod bilan ochib beriladi, o'quvchini goh yayrab-yayrab kulishga, goh jimgina o'ylashga, fikrlashga, xulosalar chiqarishga undaydi. Adibning mahorati shundaki, u bola dunyoqarashidagi o'ziga xosliklarning tub- tubini ko'ra oladi. Ichki olamini, o'y-xayollarini, kichik qalbida kechayotgan ruhiy jarayonlarni nozik did bilan kuzatadi. Bir qaraganda, juda oddiy ko'rinadigan kichik-kichik she'rlarda inson tabiati shakllanishining dastlabki bosqich jarayonlari keng ko'lamda tahlil etib beriladi. Samimiy yumor, yengil hajv elementlari yorqin ko'zga tashlanadi.



Shoirning “Hali o‘zim bolaman-ku!”, “Sinchkov bola”, “Shu ham fil-mi?” kabi o‘nlab she‘rlari shu jihatdan nihoyatda xarakterlidir.

Dadajonim,

Dadajon,

Otim nega

Otajon?

Axir kimga “Ota”man? Shuni o‘yla-a-ab Yotaman.

She‘rni o‘qiganda endigina so‘zlar ma‘nosini anglay boshlayotgan bolakayning holati koz o‘ngimizga keladi. Uning kutilmagan “muammo”li masala oldidagi o‘ychanligi o‘quvchining labiga nurli tabassum paydo qiladi.

Anvar Obidjon she‘riyati obrazlar olamining kengligi va rang-barangligi bilan ajralib turadi. Aytaylik, “Siz eshitmagan qo‘shiqlar” turkumida ellik besh qo‘shiq bor. Bu o‘rinda “qo‘shiq” atama sifatida qo‘llanmaydi. Balki, turli jonivorlar, qushlarning sayrashi, yoxud predmetlarning kechinmasi tarzida berilib, ramziy mohiyat kasb etadi. Masalan, “Kaklik qo‘shig‘i”, “Koptoklar qo‘shig‘i”, “Chirmanda qo‘shig‘i”, “Miltiqcha qo‘shig‘i”, “G‘ulg‘ultovuq qo‘shig‘i”, “Qirchang‘i qo‘shig‘i”, “Shippak qo‘shig‘i”, “Ruchka qo‘shig‘i” kabilar. Jumladan, “Bedana qo‘shig‘i” shunday yangraydi:

Mayli quring to‘r qafas

Pit-piliq,

Hech yo‘q, sayrab tursam bas,

Pit-piliq,

Azal erkindir zog‘lar,

Pit-piliq,

Qafasdadir sayroqlar Pit-piliq

Shoir xulosasi shuki, zo‘r sayroqi qushlarni qafasga soladilar, zog‘lar ozod yuribdi. Anvar Obidjon she‘riyatining yana bir ahamiyati shundaki, shoir she‘rning rang-barang shaklidan



keng foydalangan. Bir misrali she'r, ikki, uch, to'rt, besh misrali she'rlar: bu bandga ko'ra rang-baranglik. Ayni damda, to'rt hijodan boshlab, to'qqiz hijo, ba'zan o'n bir hijoli she'rlar ham yaratgan. "Chumoli" she'ri ancha sodda:

Qayga borar
Chumoli
Boshda parang
Ro'moli
Yelkasida chamadon
Chamadonda
Arpa non

Shoir she'rlarining kaliti sarlavhasidadir. Aks holda bunday she'rlar oddiy bir qofiyabozlikdan iborat bo'lib qoladi. Masalan, "Quyoning tug'ilgan kunida" she'rining sarlavhasi bo'lmasa, uning mohiyati ochilmaydi, she'r ma'noga ega bo'lmaydi. Chunki tug'ilgan kunda:

Ari keldi.
Asal olib,
Echki qopga
Karam solib
Ayiqlik keldi
Qoshiqlik bilan
Bo'ri - pichoqlik
Sochiqlik bilan.

Shundagina har bir hayvonning o'zi nimani xush ko'rsa, o'shani ko'tarib kelgani ayon bo'ladi.

O'zbek bolalar adabiyoti taraqqiyotida o'z o'rni, hissasi bo'lgan shoir she'riyati o'ziga xos shaklga, obrazlar tizimiga qo'qiyalanish tartibiga egaligini alohida qayd etgan Z. Ibrohimova yozadi: "... u bola dunyoqarashidagi o'ziga



xosliklarning tub-tubini ko'ra oladi. Ichki olamni, o'y xayollarini, kichik qalbida kechayotgan jarayonlarni nozik did bilan kuzatadi. Bir qaraganda, juda oddiy ko'rinadigan kichik-kichik she'rlarda inson tabiati shakllanishining dastlabki bosqich jarayonlari keng ko'lamda tahlil etib berilgan" Darhaqiqat, Anvar Obidjon bolalar uchun shunchaki yozmaydi. Uning she'rlari o'quvchiga ta'lim va tarbiya beradi. Shoir kichik yoshli o'quvchilarga she'rlar taqdim qilar ekan, ular tushunmaydilar deb fikrni soddalashtirmaydi :

Ona quyosh , aksingni

Chizdim yo'lakka

Sen hammaga mehribon,

O'zing bo'lakcha

Nur tushmagan joylarda,

Kezarmish kulfat.

Yo'lagimni hech qachon , Bosmasin zulmat.

Barmoq vaznida yozilgan bu she'rni bog'cha bolasidan tortib, istagan yoshdagi o'quvchi o'qishi, undan zavq olishi mumkin. Sababi, vazni yengil , ya'ni hijolar soni kam. Anvar Obidjon o'z she'larida o'simliklar dunyosini ochib beradi.

Ismim:-

Kadi - oshqovoq

Barg ostida

Yotaman

Tomga

Palak otaman.

She'rxon oshqovoqning shevada "kadi" deb yuritilishini, bargi katta bo'lib, palak otib, tomga chiqib ketishini o'rganadi. Shu bilan birga uning tabobatdagi ahamiyati oydinlashadi:

Qo'shib yesang

Shakarga,



Dori-darmon

Jigarga...

Shoir oshqovoqning foydasi haqida so'zlashdan tashqari,
o'quvchiga hazillashib qo'yishni unutmagan:

Nega uzding

Bandimni,

Sog'indingmi

Mantimni ?

Bunday she'rlarda biologiya, zoologiya, tabiatshunoslik va boshqa fanlarga doir ma'lumotlar badiiy talqin etilishi orqali ma'rifiy-tarbiyaviy ahamiyat ko'zlangani e'tirofga sazovor. Shu ma'noda, shoirning "Turp", "Piyoz", "Nok", "Shaftoli", "Anor", "Gilos", "Pomidor" va boshqa mevalar talqin etilgan she'rlari kichkintoy o'quvchilarda sabzavot va mevalar haqida yaxlit tasavvur uyg'ota olishi bilan e'tiborli.

Anvar Obidjon "Anor" she'rida anorning donalarini askarlarga o'xshatgan. Ma'lumki, Alisher Navoiy "Anor" chistonida anorning foydali xususiyatlarini yashirib bersa, Uvaysiy anorni gumbazga o'xshatadi, anor donalarini "yuzlarida parda tortig'liq, bag'ri qon", deb ta'riflaydi. Anvar Obidjon she'rini lug'z desa arziydi. Shoir anor so'zini tilga olmay, "har donasi bir askar, bir qal'ada ming lashkarligini, ular panada oq pardali xonada tinch" yotganini tasvirlaydi. She'rning yakuni hamo 'ziga xos :

Xonalar tinch

Atrof jim,

Qal'achani

Buzsa kim

Boshlanadi

To'polon....

U yog'i

Sizga ayon.



Shoirda she'riy topishmoq deyishga loyiq she'rlar talaygina. Faqat shoir dastlabki satrda, yoki she'r nomida o'sha jismni aytib qo'yadi. "Baqlajon", "Mosh", "Handalak", "O'rik", "Pista", "Sarimsoqqiyoz", "Qalampir" kabi she'rlarida shunday holatni ko'rish mumkin. Ammo "Ho'kizning tarjima yi holi", "Maymunning tarjimayi holi", "Qizilishtonning tarjimayi holi" kabi she'rlaridan

sarlavhani olib tashlash kifoya: bola uchun topshiriq tayyor bo'ladi. Bu turli yoshdagi, har xil saviyadagi bolalarni fikrlashga o'rgatadi.

Aslida shoir bunday she'rlarni "Topishmoqlar" nomi ostida berib, sarlavhasini olib qo'ysa, she'rlarning g'oyaviy-badiiy qimmatini yanada oshadi:

Bahorda to'n

Bichaman, Uni kuzda Yechaman. Shamol kelsa Guvillab, To'kilaman Duvillab. Oling meni, Akalar, Yeb ketmasin Hakkalar. Bolangizga Yoqaman. Ham meva, Ham soqqaman.

Bolalar she'riyatida ramzlar va timsollar o'rni haqida fikr yuritilar ekan, Anvar Obidjon she'rlari, ayniqsa, bu borada alohida ahamiyatga molikdir. Uning she'rlarida istibdod tig'i ostida bo'yni egilgan bo'lsa-da, erk his-tuyg'ulari qalbini tark etmagan xalqimiz timsoli ramzlarga o'ralgan holda tasvirlanadi. "Kumush uy" turkumidagi "Yaylovni sog'ingan qo'y" she'ri ana shunday asarlardandir. Avvalo, turkum nomiga e'tibor beraylik. Aslida "Kumush uy"ning o'zi ham Vatan ramzi. Zero, ipak qurti qurgan eshigi-derazasi yo'q kumush uy aslida xalqimizni yetmish yil tentiratgan kelajagi qorong'u, xayoliy sho'roviy tuzum, "Yaylovni sog'ingan qo'y" esa istibdod zanjirlari ostida ezilgan, qorni to'q bo'lsa-da, qadri yo'q, boshi egiklar timsoli:

- Ishlar qalay, -

Desam, Qo'y



Javob berdi

Surib o'y:

– Kamchilik yo'q

Oziqdan...

Bezor bo'ldim

Qoziqdan.

«Aka-uka» she'rida mustaqil Vatan kelajagi bo'lmish o'sib kelayotgan yosh avlod ramziy yo'sinda kechagi kunimizdagi qo'li bog'liq, ko'zi bog'liq, istibdoddan yurak oldirib qo'ygan katta avlodga qiyoslanadi. Akaning pastga, jarlikka «taka- puka termilishi» bejiz emas, chunki jarlik aslida tubanlik ramzi, ikkinchidan esa, uning ko'z oldida xalqimizning istiqlol yo'lida qurbon bo'lgan minglab farzandlari taqdiri turibdi:

Jar bo'yida turishar

Aka-uka.

Aka pastga termilar

Taka-puka.

Yuksakdagi lochinga

Boqar uka,

Guyo ko'kda jim qanot -

Qoqar uka.

Ukaning nigohi esa ko'kda parvoz qilayotgan lochinga tikilgan. Chunki ko'k ham, unda parvoz qilayotgan lochin ham aslida erk ramzlari, ukaning esa parvozi baland, nigohi istiqlolning yorishib kelayotgan porloq nurlariga tikilgan. Shu bois uka yosh kitobxon ko'z o'ngida Lochin yanglig' Erkin, erki uchun kurashga tayyor Inson timsoli sifatida namoyon bo'ladi.

“Yantoqlar haqida qo'shiq” ham ozodlik, erk uchun kurash tuyg'ulari yetakchilik qilishi bilan e'tiborga molikdir. “Suvsizlikdan so'lmasdan, garmseldan jon saqlab, yovuz sahroni yengib” yashayotgan “yantoqlar” ham aslida xalq ramzi. Garchi



u “yovuz sahro”da “suvsizlikdan so‘lish”ga, “Garmsel”ning o‘tli shamollari ta’sirida asta-sekin o‘limga mahkum qilingan bo‘lsa-da, biroq “yantoqlar”ning chuqur o‘rnashgan, mustahkam ildizi har qanday sharoitda ham yashash uchun kurashga chorlaydi, shu bois ham yantoqlar doimo gullaydi, meva tugadi, kelajak avlodni yaratadi. Binobarin, zukko kitobxonning sinchkov nigohi bu she’rda xalqimizning istibdod tig’i ostida o‘tgan keyingi yuz yildan ortiqroq davr mobaynidagi tarixi ramziy yo’sinda aks ettirilganini darrov payqab oladi:

Ezib o‘tdi yilqilar,
Ezib o‘tdi nortuya,
Tikladingiz qaytadan
Olamda biz bor, deya, Balli sizga, yantoqlar!
Yancholmadi bo‘ronlar,
Kuymadingiz otashdan
G‘animlar ham hayrondir
Bunday chidam, bardoshdan,
Balli sizga, yantoqlar! (“Masxaraboz bola”)

Bu misralardagi “yilqilar” va “nortuya” yurtimizga bostirib kelgan turli g‘animlar timsoli yanglig‘ namoyon bo‘ladi. Chingizxon suvoriylarining yilqilari va arablarning tuyalari oyog‘i ostida ezilgan, toptalgan xalq o‘zini baribir tiklab olgani, uni turli taloto‘plarning bo‘ronlari-yu otashlari ham yo‘q qilolmaganidan hatto g‘animlarning o‘zi ham hayronligi ishonarli tasvirlangan. Ehtimol, yosh kitobxon bu imo-ishoralar, ramzlarni to‘la tushunmas, biroq masal ko‘rinishidagi (ramzlar, timsollarga asoslangan) asarlar shunisi bilan ham xarakterliki, ulardan har bir kitobxon o‘zi uchun kerakli saboqni oladi.

Anvar Obidjonning istiqlol yillaridagi ijodi yanada barakali bo‘ldi. Milliy, madaniy, adabiy va abadiy qadriyatlarimiz bor bo‘y-bastini qayta rostlayotgan bugungi kunda shoir ijodida



ma'rifiylik-tarbiyaviylik masalasi alohida o'rin egallamoqda. Jumladan, uning "Maktab" she'ridagi:

Qunt ila qirq hunar olmoqqa shahd aylang,
Shamoldan ham shakar olmoqqa shahd aylang.
Zamondan-da yurib ilg'or, bo'lib koshif,
Har ilmdan samar olmoqqa shahd aylang.

O'qing, qudrat ila shuhrat kerak yurtga, Ma'rifatga tashna millat kerak yurtga, - satrlari fikrimizning yaqqol dalilidir.

Olti to'rtlikdan tashkil topgan va har bir to'rtlikka "kerak yurtga" radifi bilan tugallanadigan ikki misra qo'shilgan kattagina hajmli ushbu she'rda yosh avlod dunyoga dong'i taralgan ajdodlarimizdan o'rnak olib, buyuk kashfiyotlar qilishga, dunyo sari yo'l ochib, millat nomini besh qit'ada doston etishga da'vat etiladi.

Faxriya tarzidagi ushbu she'rning ma'rifiy-tarbiyaviy ahamiyati nihoyatda beqiyos. She'rning birinchi to'rtligida maktab "baxt narvoni", "bilim koni", "zakovat donining xirmoni" singari an'anaviy ta'riflanib, "o'g'il-qizlar" ulkan murodni ko'zlab o'qishga da'vat qilinar ekan, to'rtlikka naqarot sifatida kelayotgan "O'qing, minglab ahli dono kerak yurtga, / Yana Bobur, Ibn Sino kerak yurtga" misralarida shoir yurtimizga Bobur-u ibn Sino singari "minglab ahli donolar" kerakligini alohida ta'kidlaydi.

Shunisi diqqatga sazovorki, she'rning har bir to'rtligida ulug' ajdodlarimiz ilm sharofati bilan erishgan darajalarning alohida bir qirrasini qalamga olinadi. Jumladan, ikkinchi to'rtlikda qiyoslar yanada baland darajaga ko'tarilib, Navoiy so'zni zar darajasiga ko'targani (ya'ni so'z zargari ekanligi), imom Buxoriy payg'ambarimizning ishonchli (sahih) hadislarini izlab dunyo kezganligi, Xorazmiy riyoziyot shohi darajasiga erishganligi, Mirzo Ulug'bek yulduzlarga yetganligi - barchasi ilm istash (izlash)ning munavvar natijalari, deya ta'riflanadi. Qissadan hissa sifatidagi naqarot orqali esa yosh kitobxonga murojaat



qilinib, bugungi kunda yurtimizga o'z ilmi bilan Farg'oniy, Huvaydo, Beruniy, Termiziy, Najmiddin Kubro izdoshlari, o'rinbosarlari darajasiga ko'tarilajak avlod kerakligi yuksak ishonch sifatida ta'kidlanadi

Uchinchi to'rtlikda yurtimiz tarixiga murojaat qilinib, bugungi mustaqillikka o'z-o'zidan erishilmaganligi, xalqimizning minglab yillik tarixi ozodlik, mustaqillik uchun kurashlar tarixidan iborat ekanligi, demakki, bugungi navqiron avlod ilm cho'qqilarini egallash bilan buyuk yurt tarixini anglab, yurtimiz ozodligi uchun sohibqiron Amir Temur, Shiroqdek vatanparvar, idrokli posbonlar bo'lishi kerakligi uqtirilgan.

Qiyoslar asosiga qurilgan oxirgi band ("ma'rifatsiz elat maqsadda jam bo'lmas" - "ma'rifatli o'lka yotga qaram bo'lmas", "maktab quyosh ersa, ilm nurdir") nazarimizda, she'rda ilgari surilgan barcha fikrlarning mantiqiy yakuni, qaymog'i sifatida jaranglaydi hamda kelajak taraqqiyoti uchun yurtga "fikri yorug' avlod" kerakligini qat'iy ta'kidlaydi.

Anvar Obidjonning "0099-raqamli yolg'onchi", "Ey, yorug' dunyo", "Alamazon va uning piyodalari" kabi qissalari, shuningdek, "Botinkaning tufliga xati" tipidagi turkum she'rlari ham o'quvchini befarq qoldirmaydi. Anvar Obidjon faqat tabiatni tasvirolovchi, turfa xil ramziy, majoziy obrazlar yaratuvchigina emas, balki ijodining katta qismida bolalar dunyosi, ruhiyatini ham tasvir eta olgan. Uning "Dahshatli Meshpolvon" ertak-qissasi esa mustaqillik arafasida yozilgan tom ma'nodagi "ozodlik varaqalari" edi (Sattorov M.). Asarda vatanparvarlik va mustaqillik tuyg'usi yosh qahramon timsolida gavdalangan. Adib bu ertak qissani "Alpomish", "Ravshan" kabi xalq dostonlari ohangida yozadi. Bu o'z navbatida bolalar adabiyotiga xalq dostonlari ruhini olib kirdi, desak yanglishmaymiz. Yozuvchi qahramonini o'z tilidan xomsemiz, anchayin mechkay, yebto'ymas, hatto bir qadar tekinxo'r tasvirlaydi. Bolaligida buvisining qo'lga qarab o'sgan bo'lsa-



da, aqli kira boshlagach, ota-onasini bosqinchi dushmanlar asir qilib olib ketgani, ularning qiynoqda azoblanayotganlarini his qilgach, qalbida isyon tuyg'usi jo'sh uradgi. Meshpolvon ozodlik yo'lida tish-tirnog'igacha qurollanadi: ostida oqsoq xachir, qo'lida dastkalla, o'qlov, qalqon -qozonning yog'och qopqog'i. Bu yurish ishtirokchilaridan biri do'sti, Go'ro'g'libek va Ravshanxonlar avlodidan bo'lgan Oshiqbola. Muallif Oshiqbolani ham polvonlikda bobolaridan kam emasligini xalq dostonlariga monand tasvirlaydi: masalan, oltisida o'zini otda erkin tutadigan, yettisida nonga xanjarda yog' surtadigan, sakkizida o'q-yoy bilan tangani yirtadigan... o'n birida uyida oshna kutadigan, o'n ikkisida haftalab ovga ketadigan va h.k. Meshpolvon o'z lashkari bilan bosqinchi Sepkilshohga qarshi ayovsiz jang qiladi. Ular Qizqo'rg'onga yetib kelgach, shundan voqif bo'ladilarki, bu yerda turli mamlakatlardan qul - asira qilib keltirilgan go'zal qizlarni qo'rg'onda "tarbiyalab", so'ng sayillarda katta pulga sotar ekanlar. Asarda Sepkilshoh saltanatining ma'naviy chirikligi bukri chol tilidan aytilgan fikrlarda oydinlashgan. Doston-qissa nihoyasidagi hayot-mamot jangi ezgulik va adolatning g'alabasi bilan tugaydi. Sepkilshoh bandilari ham isyon ko'targach, Meshpolvon lashkarlarining qo'li baland keladi. Meshpolvon boshiudan qattiq jarohatlansa ham uning ota-onasi, qarindosh-urug'lari, millatdoshlari, Vatani ozod bo'ladi. Qahratoniya Meshpolvonning do'sti Oshiqbola qo'liga o'tadi. Uni Oytumorga o'ylantirib qo'yishadi. Meshpolvon ota-onasi va tabib qiz Achaxon bilan o'z yurtiga qaytadi. Umuman, ertak-qissada xalq og'zaki ijodining ko'pgina janrlaridan keng foydalanilgani uning xalqchilligi, qiziqarililigini ta'minlashga xizmat qilgan. Asarning g'oyaviy dolzarbligi esa hamon pasaygani yo'q.

Anvar Obidjonning bolalarga atalgan nasriy asarlaridan yana biri "Alamazon va uning piyodalari"dir. Adibning bu turkum qissalari ham yosh avlodga, aniqrog'i "ona yurtining jasur farzandlariga bag'ishlangan". Bu asarning qahramoni ham o'smir



yoshidagi olovqalb yigit - Alamazon. U toshdaqaliklar shevasida gurkirab yonayotgan gulxanni anglatadi. Alamazon turkumidagi qissalar ikki mustaqil asardan iborat. Birinchisi - "Alamazon va uning piyodalari", ikkinchisi- "Yaltiroq tugma". Ularning har ikkalasi ham mustaqil sujet, maqsad-mohiyatiga ega. Har ikkala asarda qahramon o'z nomiga munosib ekanligi ayonlashadi. Ular o'z yurti, qishlog'i qismatiga loqayd bo'lmagan bolalardir. Alamazonda mushohadakorlik, hayot jumboqlarini yechishga kuchli ishtiyoq, jamiyatda faol munosabatda bo'lishi sezilib turadi. Jumladan, Alamazon - tafakkuri uyg'oq bola. U katta odamlarga o'xshab, xohlagan kitobini tanlab o'qiy olmasa-da, jahon bolalar adabiyotidagi mashhur Chippolino, Buratino, Tom Soyer, Gek Finn, Ravshanbek, Alpomish kabi qahramonlar bilan "Alifbe"ni yod olgandan buyon olishadi. Shuningdek, akasining kitob taxmonidan "O'tkan kunlar"(A.Qodiriy), "Sarob"(A. Qahhor), "Choliqushi" (Rashod Nuri Guntekin), "Anna Karenina" (L.N.Tolstoy)ni ham o'qib chiqishga muayassar bo'lgan.

Bu kitoblardan ta'sirlangan Alamazon do'sti Eshmat bilan birga xazina qidirishga, agar topsalar yaylov etagida o'n ming kishilik stadion, ko'p qavatli uy qurish, marmar devorli kattakon choyxona qurish, ko'chalarga asfalt yotqizish, o'zlari yashayotgan Qo'chqorsaroy ustidagi ko'priknini yangilash, hatto qishloqda bitta durustroq oshxona qurishni ham mo'ljallashadi. Shuningdek, butun umri boshlang'ich sinflarga dars berish bilan o'tgan Ahmadali otaga atab, terak bo'yi haykal o'rnatmoqchi bo'ladilar.

Umuman, qissalardagi obrazlar, nomlar va tafsilotlar goh fantastik detallar orqali, goh tamsiliy, kinoyaviy usulda ifoda etilarkan, yozuvchining ko'zlagan maqsadi yosh kitobxonlarni mushohadaga undash, o'z yurti tarixini o'rganish, Vatani va xalqining taraqqiyotiga hissa qo'shishga undash ekanligi anglashiladi. Alamazon tog'asi kashf qilgan uxlatadigan doridan ichib uxlab qoladi-da, asar tarkibidagi sarguzashtlar, g'orga



qilingan sayohatlar aslida tushda bo'lgani, Zimistonsaroy, Yulduzistondagi voqealar, kishilarni uyqusida ko'rgani dori ta'siri ketgach ayonlashadi. Ammo, Alamazon uyqudan uyg'onsa ham uning ta'siridan qutulolmaydi. U g'ordagi odamlarga yorug' dunyoni boshlab borishiga va'da beradi:




“-Azizlarim, menga ishoning, men baribir sizlarni yolg'iz qoldirmayman. Sizlarni, siz bilan birga Yulduzistondagi hamma odamlarni qorong'u g'ordan yetaklab chiqaman. Hammangiz quyoshni ko'rasiz, quyoshni! Men Yorug' dunyo nomidan gapiryapman...”

Anglashiladiki, Anvar Obidjonning yuqoridagi qissalarida Vatan mustaqilligi orzusi ilgari surilgan.

Xulosa qilib aytganda, o'zbek bolalar adabiyotining yosh avlod dunyoqarashini shakllantirishdagi muhim o'rni avvalo, shunday asarlar orqali yaqqol ko'zga tashlanadi. Zero, istiqlol davri o'zbek bolalar adabiyotida ham mavzularning rang-barang talqini, g'oyaviy dolzarbligi obraz va mundariyasi takomillashdi. Yangi voqelikni o'zida teran aks ettirayotgan adabiy ijod namunalari bugungi bolalar adabiyotining eng katta yutug'idir. Bu jihat A.Obidjonning ertak- dostonlarida ham yaqqol ko'rinadi:

“Odil Burgutshoh va “Zamburug’”

Anvar Obidjonning Odil Burgutshoh va “Zamburug “ laqabli josus haqida ertak” ertak -dostonining bosh qahramoni-Burgutshoh. Shoir bu asarda kontrast usuli, ya'ni holatlarni qarama-qarshi qo'yishdan foydalanadi Asarda burgut va qarchigay, lochm va sor, qtzilishton bilan qorayaloq, bulbul bilan boyqush qarama-qarshi qoyilgan. Yosh kitobxon o'zaro zid qo'yilgan obrazlarni sofishtirib, tabiatda ular qanday qushligini o'rganish bi lan birga, shoir ularni bejizga zidlantirmaganini anglay oladi.





MAVZUGA DOIR TAYANCH TUSHUNCHALAR:

Bilim, ko'nikma va malakani rivojlantirishga yo'naltiruvchi savollar:

1. Safar Barnoyev she'riyatidagi urush bolalari taqdiri ifodasini izohlang?

2. Miraziz A'zam she'rlarining obrazlar olami qaysi jihatlari bilan o'ziga xos.

3. 1940-80-yillar o'zbek bolalar nasridagi tamoyillar haqida nima deya olasiz?

4. Anvar Obidjonning meva va sabzavotlar to'g'risidagi she'rlar turkumiga munosabat bildiring?

5. Milliy istiqlol yillaridagi bolalar nasri tamoyillari haqida ma'lumot bering?

6. Safar Barnoyevning zamonaviy mavzudagi qanday asarlarini bilasiz?

7. Tarixiy mavzudagi-chi?

8. Tursunboy Adashboyev she'riyatining mavzular olami haqida mulohaza yuriting?

9. Milliy istiqlol yillarida bolalar publitsistikasi qanday tamoyillarga boy bo'ldi?

10. M.A'zamning til to'g'risidagi she'rining g'oyaviy dolzarbligi nimada?

Mavzuga oid test savollari:

1. Bolalarning sehrli-fantastik va sarguzasht roman-navis adibi qaysi javobda to'g'ri ko'rsatilgan?.

- a) X. To'xtaboyev;
- b) H.Nazir;
- c) A.Obidjon;
- d) S.Barnoyev



2. “Lochin qanotlar” romani muallifi va mavzusi to‘g‘ri belgilangan javobni aniqlang.

- a) X.To‘xtaboyev; urush va bolalik mavzui talqini;
- b) H.Nazir, urush va bolalik mavzui talqini;
- c) S.Barnoyev, urush bolalari;
- d) A.Obidjon, istiqlof g‘oyasi.

3. Badiiy adabiyot tilida voqea-hodisa, tushuncha va kishilarning belgi-xislatlarini aniqlash-izohlash, tavsiflash usuli qaysi badiiy tasvir vositasiga xos?

- a) sifatlash;
- b) mubolag‘a;
- c) o‘xshatish;
- d) metafora.

4. Odamlarga xos bo‘lgan xislatlarni jonsiz predmetlar, tabiat hodisalari, hayvonot, parranda, qush kabilarga ko‘chirish orqali paydo bo‘ladigan tasvir usuli

- a) jonlantirish;
- b) sifatlash;
- c) o‘xshatish;
- d) sinekdoxa.

5. Anvar Obidjon o‘zbek bolalar adabiyotiga qaysi mumtoz janrni olib kirishda hissa qo‘shdi?

- a) G‘azal;
- b) Ruboiy;
- c) Tuyuq;
- d) Qit‘a



Tavsiya etilgan adabiyotlar:

1. O'zbek bolalar adabiyoti va adabiy jarayon. - T.:Fan, 1989.
2. O'zbek bolalar adabiyoti antalogiyasi. Ikki jildlik. 1-2-jild. - T.:O'qituvchi, 2006.
3. O'zbek bolalar adabiyoti. Maqolalar. - T.: Yosh gvardiya, 1969.
4. O'zbek bolalar adabiyoti va adabiy jarayoni. - T.: Fan, 1989
5. Jumaboyev M. O'zbek va jahon bolalar adabiyoti. Majmua. -T.: O'qituvchi, 1996
6. Yo'ldoshev S. Qudrat Hikmatni eslab. // "Gulxan" jurnali,1998, 11-son 8-13 bet.
7. Yo'ldoshev S. Baxtiyorlar kuychisi. - Kitobda: Sayidjonning soati. - T.: Yosh gvardiya, 1964.
8. Barnoyev S.Karimjon-Karlson. -T:Yosh gvardiya, 1988.
9. Barnoyev S.Oq laylaklar . -T.:Yosh gvardiya, 1982.
10. Nazarov B. Qorachiqqa singgan chehralar. // O'zAS, 1984-yil, 17-avgust
11. Anvar Obidjon. Ey, yorug' dunyo... - T.: G'Gulom nomidagi adabiyot va san'at nashriyoti , 1985. -B.66.
12. Anvar Obidjon. Juda qiziq voqea . - T.: Yulduzcha, 1987. -B. 224
13. Anvar Obidjon. Alamazon va Gulmat hangomasi. - T.: Cho'lpon, 1992. -B 352 .
14. Anvar Obidjon.Meshpolvonning janglari. - T.: Cho'lpon, 1994. - B.352
15. Barakayev R. Jonajonim she'riyat. - T.: Cho'lpon, 1997.
16. Isomiddinov Z. Dil ko'prigi. // Jahon adabiyoti, 1998, 12-son.



X. ISTIQLOL DAVRI BOLALAR ADABIYOTI

Reja:

1. *Istiqlol davri bolalar adabiyotining o'ziga xos xususiyatlari.*
2. *Hamza Imonberdiyev ijodida istiqlool g'oyalari ifodasi.*
3. *Kavsar Turdiyeva - bolalar shoiri va dramaturgi.*
4. *Dilshod Rajabov - bolalar shoiri.*
5. *Abdusaid Ko'chimov ijodida bola ruhiyati talqini.*

MAVZUGA DOIR TAYANCH TUSHUNCHALAR: *istiqlol, g'oy, in'ikos, shakl, mazmun, adabiy tanqid, falsafiy, hajviy-yumoristik, ruhiyat manzaralari, ilmiy- nazariy aspekt, salaflar, muqoyasa, lirik qahramon, obrazlar tizimi, bolalar kinochiligi, monografik risola, inkishof, nasr material, voqeaband sujet, umummasala, konseptual, mahorat, hurfikrlilik, ballada, doston, badiiyat, ohangdorlik, esse, publitsistika, tamoyil.*

Istiqlol davri bolalar adabiyotining o'ziga xos xususiyatlari. Mustaqillik davri o'zbek adabiyoti hayotni o'rganish-bilishning badiiy vositasi sifatida muhim ahamiyat kasb etadi. U zamondoshlar, jumladan, yosh avlodning ruhiy holatini teran tadqiq etishga, fikr doirasini kengaytirishga, his va tushunchalarining shakllanib, voqelikka to'g'ri munosabatda bo'lishga da'vat etayotir. Bugungi adabiyot tom ma'noda hayot darsligiga aylanayotgani shu jihatdan e'tirofqa sazovor.



O'zbekiston Respublikasining birinchi Prezidenti I.A.Karimov mustaqillikning ilk yillaridayoq jamiyat taraqqiyoti, ravnaqi uchun ma'nan va jismonan sog'lom avlod tarbiyalash masalasini kun tartibiga qo'ydi. Zero, har bir oqil insonning va jamiyatimizning muqaddas vazifasi, aytish mumkinki, umrining ma'nosi qobil farzandlar o'stirish, ularni ham jismoniy, ham ma'naviy jihatdan mukammal qilib tarbiyalash, kamolini ko'rish, ota-onasiga, Vataniga sadoqatli kishilar etib voyaga yetkazishdan iboratligi haqidagi ta'kidlar bejiz emasdi.

Chindan ham mustaqillik davri bolalar adabiyotining mazmun va mohiyatidagi tub burilish yaqqol ko'zga tashlanadi. Bunda yosh qahramonlar xarakteri tahlili masalasiga alohida e'tibor qaratilishi, shakl va mazmun jihatdan- da yangi tamoyillar kasb eta borgani yorqin ko'rina boshladi. Milliy bolalar matbuoti ham mavzu material, g'oyaviy- badiiy jihatdan o'sib, bolalar ijodkorligi namunalari ko'proq ommalashtirilayotgani ta'kidga loyiq.

Shu bilan birga yangi asr kichkintoylarining qiziqishlari, ruhiy, ma'naviy olami, ularning ijtimoiy hayotga munosabati masalalari aks etgan asarlar tahlili orqali o'quvchilarda axloqiy- ma'rifiy, ijtimoiy-siyosiy tarbiyani shakllantirishga ahamiyat berilayotgani diqqatga sazovor. Binobarin, istiqlol davri o'zbek bolalar adabiyotida jamiyat taraqqiyoti bilan bog'liq mavzu talqinlari ustuvorligi (S.Barnoyev, E.Malikov, T.Malik asarlarida); kichkintoylar va bolalar fe'l- atvoridagi xarakter xususiyatlarning hajviy-yumoristik, fantastik, sarguzasht ifodasi (X.To'xtaboyev, A.Obidjon ijodida); bolalar va o'smirlarning murakkab ruhiyat olami (psixologizm) teran aks etgan asarlar, qolaversa, tabiat va jamiyat muammolari falsafiy talqin etilayotgan badiiy ijod namunalari (N.Fozilov, M.A'zam, A.Obidjon, T.Adashboyev asarlari) yarq etib ko'zga tashlanadi.

Bunda asrimiz boshlaridayoq bolalar asarlarining g'oyaviy-badiiy, axloqiy- ma'rifiy, falsafiy va psixologik jihatdan



monografik tahliliga oid salmoqli tadqiqotlar, risola hamda adabiy-tanqidiy maqolalarning vujudga kela boshlagani muhim hodisa bo'ldi. Adabiyotshunos olimlar o'zbek bolalar adabiyoti tarixi va muammolarini yangicha tafakkur, istiqlol mafkurasi nuqtayi nazaridan o'rganish joizligini asoslab berdilar.

Istiqlol davri yangi bolalar adabiyotining maydonga kelishiga 80-yillarning ikkinchi yarmi katta ta'sir ko'rsatgani bejiz emas. Ayni shu davrda bolalar adabiyotimiz tom ma'nodagi haqiqatga tik boqadigan adabiyotga aylandi, yosh avlodni erksevarlik tuyg'ulari ruhida tarbiyalashda ilk qadamlarini qo'ydi. Bu ishga badiiy so'z qudrati bilan hissa qo'shib kelayotgan iste'dodli yozuvchilarning yangi avlodi yetishib chiqqanligi e'tirofga sazovor. Ya'ni, nafaqat Anvar Obidjon, T.Adashboyev, Miraziz A'zam, R.Tolipov, S.Barnoyev singari professional adib va shoirlarning o'zgacha talqin hamda yo'nalishdagi ijod namunalari balki Q.O'tayev, H.Imonberdiyev, K.Turdiyeva, Abdurahmon Akbar, Dilshod Rajab, Rustam Nazar, Vali Ahmadjon, S.Inoyatov, Qo'zi Ismoil, Zafar Isomiddin, Erpo'lat Baxt kabi ijodkorlarning bolalar adabiyotiga "yangi havo" olib kirishlari bilan e'tibor qozondi.

Hamza Imonberdiyev **(1954-1997)**

shu ma'noda o'zbek bolalar adabiyoti rivojiga hissa qo'shgan shoirlardan. U uzoq yillar "Tong yulduzi" gazetasida, so'ngra, 1986-yildan umrining so'nggi damlarigacha "Cho'lpon" bolalar nashriyotida faoliyat ko'rsatgan. Uning turli yillarda nashr qilingan "Quvnoqlar quvonchi", "Shokoladxo'rlar", "G'aroyib pufak", "Kulgi shaharchasi", "Oydagi tomosha", "Lofchilar - aldoqchilar", "G'aroyibkent hangomalari", "Bir kunlik mo'jiza" singari she'riy va nasriy to'plamlari bolalar kitobxonligida shuhrat qozongan. Shoir she'rlarida bolalarning



xarakter-xususiyati, orzu-o'ylari aks etgan. Masalan, "Bir so'z" she'rida Loladan astoydil ranjigan, unga birgina "shaddod" degan so'zi uchun "badbashara", "xumbosh" kabi yomon so'zlarni eshitganidan arazlab, boshqa o'rtoq topishga ahd qilgan bola timsoli gavdalanadi. "Urishqoqlar"da esa o'g'il bolalar ko'proq o'ynaydigan "urush-urush" o'yini manzarasi chizib berilgan. Ayniqsa, qo'lda yog'och-avtomat bilan kalishlardan esa granata o'rnida foydalanishlari, bir-birlarini poylab turib, "o'q" uzishlari bolalar tilidan mardona hikoya qilinadi.

– Paq-puq, otdim, yiqil,- deb.

Dushman tan olmas: – O'qing Qiyshiq ketdi,-nuqul deb.
Hamma bola o'yinda "Jang" qiziydi tobora...

Faqatgina Nodir bu jangga qo' shilmay, raketa yasash bilan ovora bo'ladi. Chunki:

– Urishqoqlar ichida

Yashab netaman, – der u.

Olis sayyoralarga

Uchib ketaman,- der u.

Buni eshitib, qolgan bolalar "o'zing bilan bizni ham ola ket",- deb so'raydilar. Do'stlari rozi bo'ladi:

– Chiqinglar, – deb imlaydi.

– Biz kashf etgan sayyora

Urush nima bilmaydi!

Bolalar garchi "urush-urush" o'ynasalar ham, aslida, urush nimaligini bilmaydigan sayyorani kashf etmoqchi. Uning salbiy oqibatlarini his qila olgan bolagina shunday fikrlaydi. Barcha bolalar tinchlikni sevishlari Nodirga ergashib ketmoqchi bo'lgan do'stlar niyatidan anglashiladi. Binobarin, H.Imonberdiyev yosh qahramoni tilidan, urushqoqlar o'yinini qoralaydi. Ular orasida yashashni xohlamaydi.

Shu o'rinda shoirning "Alla" she'ridagi quyidagi misralar ham e'tiborli:



– Ana, Bo‘ri kelyapti!

Uxlay qol, ovunchog‘im.

Qo‘y shunday deb qo‘rqitib, Uxlatar qo‘zichog‘in.

– Vuy, anovi ilonni!

Uxla tez, bolajonim, - Chumchuq shunday qo‘rqitib, Uxlatar polaponin.

– Uxla, Olabo‘jiyov

Ko‘rsatgan qorasini. -

Odam shunday qo‘rqitib, Uxlatar bolasini.

Ona Burgut allalar:

– Uxla, kuchga to‘lib o‘s.

Ushbu tog‘ -tosh, osmonning

Hukmdori bo‘lib o‘s!

Pisand etmay xatarni Shundanmi polaponi, Tushlarida charx urar To‘ldirib keng samoni.

Nazarimizda, ushbu kichik she‘r ulkan ma‘naviy-ma‘rifiy ahamiyat kasb etadi. Zero, o‘zbek bolalar adabiyoti mustaqil O‘zbekistonning kelajagini yaratuvchi yosh avlod tarbiyasiga mas‘ul ekan, farzandlarimizning erksevar, mard, komil insonlar bo‘lib yetishuvi yo‘lida doimo baland pardalarda yangramog‘i kerak. Toki ijodkorlarimizning har bir asari yosh kitobxon qalbida ezgulik, insoniylikning bir niholi ildiz otishiga xizmat qilsin. Ushbu she‘r, dastavval, ana shu jihati bilan e‘tiborga loyiq. Chunki, ona burgut polaponi qalbiga “ushbu tog‘- tosh, osmonning hukmdori bo‘lib o‘sish”ni go‘dakligidan alla bilan singdirayotganligi sababli burgutcha hatto tushida ham keng samoni to‘ldirib charx uradi. Xuddi shuningdek, mustaqil ona yurtimizning kelajagi bo‘lmish farzandlarimiz ham bolalikdan o‘zlarining shu aziz Vatan egalari, uning baxt- saodatini, porloq kelajagini yaratuvchilar ekanliklariga komil ishonch ruhida tarbiyalanmoqlari lozim.



Bular - masalaning ijtimoiy, ilmiy va amaliy jihatlari. Biroq muammoning ahamiyati bulardan kam bo'lmagan badiiy-estetik jihati ham mavjud. Zero, she'riyat bolalar uchun beg'ubor go'zallik, mehribon va talabchan murabbiydir. She'riyatga oshno qalblar go'zallikni his qiladi, zavq oladi, bunday qalbning o'zi ham go'zal bo'ladi. Ana shu ma'noda ushbu she'r hayotga endigina qadam qo'yib kelayotgan yosh avlodning pok qalbini go'zallik nuri bilan munavvar qiladi, bu beg'ubor qalblarga ezgulik urug'ini sochadi, ularni go'zal ona Vatanimizning porloq kelajagini yaratuvchi tom ma'nodagi go'zal Insonlar qilib tarbiyalashdek mas'uliyatli ishga o'zining xolis hissasini qo'shadi.

H.Imonberdiyev she'rlari qahramonlari haqida gap ketar ekan, ular safi rang- barangligini qayd etish kerak. Bu qahramonlar orasida do'stining imtihondan o'tishiga "yordam" beradigan Toshmatday "mehribon" "Vohay bola"chilar ham, Ali-Valiga o'xshash lofchilar ham, hayotga jiddiy boqadigan, o'z o'rni, insoniy qadr-qimmatini hamma narsadan ustun qo'yadigan, qadri uchun noteng kurashdan ham qaytmaydigan G'anichaga o'xshashlari, biroz hazilkashroq, ozgina shirinlikka o'chroq, ozgina o'yinqaroqroq, ozgina yalqovroq bolakaylar ham yosh kitobxonlarga begona emas, bu "qahramon"lar qiyofasida ular darrov o'zlarini tanib oladi.

Ular orasida "O'jarlar" turkumining qahramoni G'anicha va "G'alati Omon" turkumidagi Omonni alohida tilga olish joiz. G'anining jussasi kichikligi, zaifligi uchun ismiga kichraytiruvchi "cha" qo'shimchasi qo'shilgan. Biroq shunisi qiziqki, qishloq bolalari zo'ravon, "qishloqning shefi" deb nom chiqargan Sanjarni ko'rishlari bilan tumtaraqay bo'lib ketishsa, o'jar G'anicha tap tortmay turaveradi, Sanjar uni har qancha kaltaklasa ham, suvga pishsa ham cho'miladigan joydan ketmaydi. Chunki u cho'miladigan joy birgina zo'ravon Sanjarga emas, barcha bolalarga tegishli deb hisoblaydi. Qo'y boqishga chiqqanlarida bolalarning barchasi navbatma-navbat Sanjarning qo'ylarini



boqishsa, ushoqqina G'anicha Sanjarga xizmatkor bo'lishni istamaydi va o'jarligi uchun yana Sanjardan kaltak yeydi. Hamqishloqlari har qancha "bu yo'lingdan qayt, bo'lmasa kaltak tagida mayib bo'lib ketasan" deyishsa-da, u yo'lidan qaytmaydi, haqiqat yo'lida, insoniy qadr-qimmat yo'lida o'zidan kuchli raqib bilan ham tinmay mushtlashaveradi:

Navbatdagi haqorat Toshi otilgan payti, G'anidagi jasorat Iziga ketdi qaytib.

"Menga nima olishib, Hech biri olmas yonim. Nima azob solishib Og'ritib shirin jonim.

Itligin qo'ymas anu, Qancha yonmay, kuyinmay..." Shu choq diliga qo'rquv Bosib keldi quyunday.

G'ani bir dam tosh qotdi, Borliq rangin yo'qotdi. Oyoq-qo'li bo'shashib, Turib qoldi karaxtday.

Qalqib ketdi, kesilib Qulayotgan daraxtday. Birdan hayqirdi: - Yo'q! Yo'q! Va Sanjarga tashlandi.

Yana mushtu yana do'q,

Yana ur-sur boshlandi.

Ha, bu gal ham qochmoqni Ep bilmadi G'anicha. Ko'p-xo'p yedi kaltakni, Solishdi to'yganicha.

Har yon ketdi raqiblar Bir-biriga demay so'z. Barcha bola jim boqar, G'anichadan uzmay ko'z.

Ushbu she'rda shoir qahramoni xarakterini, fe'l-atvorini ancha jonli yaratishga erishgan. Shuncha voqealar bo'lib o'tganida G'anichaga "o'jarligingni qo'y, kaltak yeb mayib bo'lib ketasan" deb "maslahat" berishgagina yaragan, haqiqatning yonini olishga botinmagan, joni ko'ziga aziz ko'ringan bolalar oxirida G'anichaga hech so'z demay, tikilib qoladilar. Aslida ham so'zga o'rin yo'q. Chunki haqiqat egilishi, bukilishi, haqoratlanishi mumkin, biroq sinib, yo'q bo'lib ketmaydi. Shu boisdan ushoqqina haqiqatning oxir-oqibat g'olib chiqishi tabiiy va u aslida, katta haqiqatga yo'l ochadi. Shu ma'noda bu she'r



katta ijtimoiy-ma'rifiy ahamiyat kasb etadi: millionlab kilometr masofadan kelayotgan bir tutam nur yo'limizni yoritgani singari ushbu kichkinagina haqiqat ham qalblarga chiroq yoqadi. H.Imonberdiyev esa yuqoridagi singari adabiy obrazlari bilan "bugungi bolalar adabiyotimizning qahramoni kim bo'lishi kerak?"- degan savolga ham amaliy javob beradi.

"Lofchilar-aldoqchilar" she'rida esa mutlaqo boshqacha tabiatga ega xushchaqchaq bolakaylar bilan uchrashasiz, ularning beg'ubor loflarini maza qilib tinglaysiz:

Ali, Vali lofchilar -

Xushchaqchaq aldoqchilar Rosa lofni urishar.

Ko'pikdan uy qurishar, Maza qilib kulishar.

Ali debdi: - Vali, kel, Rasmimga baho ber. Qushcha chizdim ajoyib, Ajoyibu g'aroyib. Ana u don yeyapti, Menga rahmat deyapti.

Vali boqsa varaqqa, Shakl yo'q hech qanaqa. - Aldabsan-ku, qani don? - Qush yeb qo'ydi-da, nodon! - Yo'qotdingmi hushingni, Ko'rmayapman qushingni?! -To'ygach, qushcha chirq etdi, "Rahmat!" deb uchdi-ketdi!

Ali, Vali lofchilar - Xushchaqchaq aldoqchilar

Rosa lofni urishar,

Ko'pikdan uy qurishar.

Maz-za qilib kulishar.

Ushbu satrlarni o'qish bilan har bir kishining ko'z o'ngida o'z yoshligi "yarq" etib namoyon bo'lishi turgan gap. Chunki deyarli har bir yosh bola, aslida, ana shunday ozgina lofchiroq, ozgina aldoqchiroq, ozgina vahimachiroq bo'lishi turgan gap. Shu bois ham yosh bolaning beg'ubor nigohi oddiygina tol chiviqdan chopqir duldul ot, oyoq botmas ko'lmakdan bepoyon ummon yaratadi va aslida, olamshumul kashfiyotlar ham ana shu beg'ubor nigoh mahsulidir. Shu sababli bu loflar-yolg'onlar



ham kitobxonga zarracha malol kelmaydigan, bolakaylarning had-hudud bilmas xayolot olami bilan oshno qiladigan g'aroyib topilmalar sifatida Sizni beixtiyor ishontiradi, o'sha oppoq qog'ozda hozirgina don yeb yurgan qushchaning oyoq izlarini ko'rasiz.

Shunisi qiziqki, "Lofchilar-aldoqchilar"ni o'qib, Ali bilan Valining yolg'onlaridan xafa bo'lmaysiz, chunki ular yolg'on aytib bironi aldamaydilar, balki xayollariga kelgan loflarni bir-birlariga aytish bilan go'yoki kim zo'rroq lof aytishga bahslashadilar. Ularning loflari beg'ubor, bu loflarning yolg'onligini ularning o'zi ham bilib turadi, faqat mana shu kim o'zarga aytilgan loflardan bolakaylar o'zlaricha zavq topadilar.

"Qish tongida" she'ri tabiiy manzara talqiniga bag'ishlangani bilan diqqatga loyiq:

Erta tursam hovuzda

Birov oyna solibdi.

Ko'm-ko'k, tiniq, zilol suv Eng ostida qolibdi.

Oynani solgan usta Unutgan-ov, hoynahoy. Suv olishga ozgina Qoldirmabdi ochiq joy.

Bola tasavvuri, tafakkuri aynan shunday fikrlashga moyil. Zotan, she'r jonli tasvir asosida yaratilgan. Shoirning "Qo'pollik" she'rida esa kichkintoy bolakaylarning uchqur xayoli, qahramonlik ko'rsatishga moyil tabiati ochib beriladi. Ya'ni, qo'pollik qilib, akasidan "- Bor, ko'zimga ko'rinma, hech keraging yo'q",- degan do'qni eshitgan ukaning ginalari, shu bilan birga, akasining o'z yoniga kelishi uchun hatto:

Balki sharga osilib,

Uchaman oyga.

Balki minib

G'irko'kni

Jangga kiraman.

Yog'och qilichim sermab



Yovni qiraman.

Dushman bilan solishib

O'larman oxir.

Nima qila olardim

Akamsiz axir.

Kelib qabrim boshiga

Akam bosh egar, Kechir meni, uka, deb Balki yosh to'kar,- degan xayollarga boradi. Shu payt "Uka!" deb akasi boshiga kelganda, xayollari har yoqqa sochilib ketadi. Yosh qahramonning xufton dili charaqlab ochilib ketadi va quyidagi qarorga keladi:

Akam bo'lsa yonimda

Quvnab ketaman.

Shunday akam turganda O'lib netaman?!

Chindan ham she'r voqeaband sujet asosiga qurilgan. Aka-uka munosabatlarida tabiiylik ustuvor. O'zbek oilalarida uka har doim akaga suyanadi. Aka ham o'z navbatida ukani suyaydi, ko'nglini cho'ktirmaslikka harakat va g'amxo'rlik qiladi. Bu hissiyot bolalikdan boshlanishi esa yuqoridagi she'rda yorqin aks etgan.

Umuman, H.Imonberdiyev she'rlarida fikr ustuvor, g'oya dolzarb, tasvir hayotiy. Uning qator ertak-dostonlarida esa bahodirlik, mardlik motivlari kuylanadiki bu Sor burgutning o'z polaponini uchishga o'rgatishda baland qoyalardan pastga otib yuborishi orqali yanada yorqinroq aks etadi.

Kavsar Turdiyeva **(1958-yilda tug'ilgan)**

Toshkent davlat universiteti va Sankt-Peterburg davlat universitetida o'qigan. 1994-yilda "Hozirgi zamon bolalar she'riyatida ma'naviyat muammolari" mavzusida nomzodlik disser-



tatsiyasini himoya qilgan. Shoiraning “Varrak”, “O‘ynayapman, o‘ylayapman”, “Qush bo‘lib uchgan ona”, “Raqamlar bo‘ylab sayohat”, “Quvnoq alifbo bo‘ylab sayohat” kabi kitoblari chop etilgan.

Kavsar Turdiyeva ijodida ona tili va ona tili faniga oid she‘rlarning rang- barang namunasini uchratishimiz mumkin. Xususan shoiraning “Ona tilim” she‘rida ona tilining naqadar go‘zal va ma‘no mazmunga boy ekanligi aytib o‘tilgan. Bu barmoq vaznida yozilgan bo‘lib, 4+3 shaklida turoqlangan. “Ona tilim” she‘rida ona tilimiz onalarning allasiga, opa-singillarning yallasiga, momolarning hikoyalarida namoyon bo‘lishi she‘rda juda chiroyli tasvirlangan.

Shoiraning “Tillar ko‘pdir dunyoda” she‘rida esa tillar haqidagi ta‘rif shunday boshlanadi:

Tillar ko‘pdir dunyoda, Bir- biridan ziyoda.

Kulib bizlarga qarab, Arabcha so‘zlar arab.

Kavsar Turdiyeva ijodida nafaqat ona tilimizga muhabbat, balki o‘zbek tilining nazariy qirralarini poetik talqin etishi muhim ahamiyatga ega. Shoiraning alifbodan boshlab, o‘zbek tilining so‘z turkumlari, gap bo‘laklari, kelishik 278 qo‘shimchalarigacha lirik ifoda etishi diqqatga sazovor. Aynan shu jihat shoiraning o‘ziga xos yo‘nalishini belgilaydi desak, yanglishmagan bo‘lamiz. Ilmiy tushuncha, nazariy ma‘lumotlarni badiiy so‘z yordamida obrazlantirib, mustaqil sujet, kompozitsion butunlikda lirik ifodalaydi.

Masalan, uning “Ot” she‘rida ot so‘z turkumi shunday ta‘riflanadi :

Bosh so‘z turkumi , “ot”dir u

Barchaga ham yoddir u.

“Atoqli “, “Turdosh “ bo‘lar, Ba‘zan harfi bosh bo‘lar.

Haqiqatan, mustaqil va yordamchi so‘z turkumlari ichida birinchi bo‘lib Ot so‘z turkumini o‘rgnamiz. Kavsar Turdiyeva



ijodidagi ushbu she'r o'quvchiga aniq va tushnarli tarzida ot so'z turkumini ifodalash uchun ikki guruhga bo'linishi ta'kidlangan. Yoki:

Yigirib turli ipak,
Kiygandek turfa ko'ylak.

Go'yo bir - bir kelishib, Kelgach olti " Kelishik".

Shoiraning ushbu she'rida nafaqat atoqli va turdosh ot balki, kelishiklarga ham murojaat qilishini ko'rish mumkin. She'rda kelishiklar badiiy san'atning "tashxis" san'ati asosida aytib o'tilgan.

Ot go'yoki nurlanar,
Kelishikda turlanar.

So'ng o'zgarib bir onda, Tuslanadi shaxs-sonda.

She'rda so'zlar kelishik qo'shimchalarini olib turlansa, shaxs-son qo'shimchalari bilan tuslanishi nazariy jihatdan haqiqatligi ayonlashadi. Kavsar Turdiyeva yana bir she'rida o'z va ko'chma ma'noda ishlatiladigan so'zlarni ajratishni poetik ifodalaydi:

Ovqat achchiqdir, yema!
Menga achchiq so'z dema.
Kelib qoldi kumush qish,
Men qo'ydirdim oltin tish.

Bundan biz qaysi so'z birikmasi o'z ma'nosida, qaysi so'z birikmasi ko'chma ma'noda ekanligini yaqqol ko'rish mumkin. Ya'ni ushbu misrada achchiq ovqat o'z ma'nosida va achchiq so'z ko'chma ma'noda ekanligini o'quvchilar qiynalmasdan topa oladilar. Keyingi misradagi " kumush qish" hamda "oltin tish" shunga misol bo'la oladi. Ushbu misradagi "Kumush qish" so'z birikmasi ko'chim ma'noning metafora asosida qo'llanilgan.

Alifbe – she'rlar turkumi nafaqat boshlang'ich sinf o'quvchilarining savod chiqarishlari uchun, balki harfiy san'at



asosidagi badiiy ijodga daxldorligi bilan e'tiborni tortadi. Istiqlol yillarida alifbe she'rlarning yanada rang-barang namunalari yaratildi.

“Alifbe-she'rlar odatda,- deb yozadi adabiyotshunoslar,- yangi alifbo qabul qilinishiga bevosita aloqadordir”

Darhaqiqat, lotin yozuviga asoslangan yangi alifboni yosh avlodga teran singdirish, shu bilan birga katta avlodning ham bu jarayonga o'rgatishda she'riy alifbolarning ahamiyati katta. Xususan, alifboni badiiy ijodning turli kompozitsion shakl va usullarida, janriy xilma-xillikda ifoda etish bu maqsadning ijobiy ko'rinishlaridir. Jumladan, o'zbek bolalar she'riyatida Kavsar Turdiyeva ijodi aynan lotin yozuviga asoslangan alifbe-she'rlarga boydir. Shoiraning ko'pgina she'rlari o'quvchiga alifboni nafaqat nazariy jihatlarini, balki uning mumtoz adabiyotimizga xos an'analar, she'riy san'atlar vositasida anglatishga xizmat qiladi.

Aytaylik, K.Turdiyeva “Biz shunaqa bolamiz” she'rini “ she'riy alifbo” deb ko'rsatadi. Unda lotin alifbosidagi 29 ta harfning har biri bilan boshlanuvchi so'zlar alifbo tartibida she'riy vazn va qofiyaga solingan. Mazmunida esa aqlli, besh baho oladigan, do'stlari ko'p va eli mustahkam, jajji botirlar, Vatanga qo'shqanot bo'lgan eng ibratli avlod tarannum etiladi. Shoiraning “Sehrli harflar oroli” she'rida esa harflar endi o'zining imloviy vazifasini tushuntiradi:

Aa - Men “A”dirman, “A”dirman,

Ko'p narsaga qodirman,

“Qor”, “Bol”, so'zlarga qara:

Yasadim “Qora, bola”.

Bunda har bir harfga bag'ishlangan misralarning mustaqil kompozitsiyaga, mustaqil qofiya va mazmunga egaligi, qolaversa butun she'rni birlashtiruvchi yagona yetti hijoli ritm esa misralarning 4+3 tarzidagi turoqlanishi bilan she'riy ritmni tashkil etgani e'tiborga loyiq. To'rtliklarning rang-barangligi - o'zini tavsiflayotgan harflarning so'zga qo'shilish o'rnidir. Shoir



alfavitdagi harflarning joylashuvini yaxlit qit'aga o'xshatsa-da, go'yo harflarning har biri alohida oroldir. Ularning xususiyati, vazifasi, so'zdagi o'rni, unli-undoshligi xilma-xil. Buni shoira ayrim harflar misolida yaqqolroq tushuntiradi:

Ff- Men unliman, undoshman,

Fazo so'zida boshman.

Ba'zan "V"dek jaranglab, Qolsam yurma alanglab.

Shu tariqa, o'quvchiga harflarni tanishtiribgina qolmay, uning yuqori sinflarda beriladigan ilmiy ta'rifi haqida ham tushuncha berayotganidan dalolatdir. Shu jihatdan bunday she'rlarni harfiy san'atga asoslangan pedagogik she'rlar qatorida e'tirof etish mumkin. She'rdagi ayrim harflar ta'rifi esa Shermuhammad Munisning "Savodi ta'lim" manzumasiga yaqinligi bilan ya'ni, harflarning shaklini tabiatdagi narsalarga qiyoslash orqali aniqroq tasvirlash kuzatiladi. Masalan, alifbodagi "Ch" harfi o'zini shunday tanishtiradi:

Chaqqondirman, chiroyli,

Shaklim *narvon* va *yoyli*.

Men qo'shilsam oynakka

Ko'zing tushar choynakka.

Bu jihat shoiraning alohida turkum she'rlarida ham uchraydi. Jumladan, "D" o'xshaydi Ilhomga" she'rida lotin alifbosidagi harflar quyidagicha obrazlanadi.

"O" dumaloq go'yo shar,

"N" o'xshaydi narvonga,

"L"ilingan javonga,

"S" o'xshaydi oqqushga,

"V" qanot yozgan qushga, "A" o'xshab ketar tomga, "D" o'xshaydi Ilhomga Yurar qaddin qilib dol. Go'yo yuz yasharli chol.

K.Turdiyeva shu tarzda alfavitdagi har bir harfga to'xtalib, harflardan goh topishmoq, goh o'yinchoq, ba'zan esa bolalarga



o'git berish maqsadida foydalanadi. Natijada, harfiy san'atlar-ning yangi talqinlari namoyon bo'ladi.

Muallifning "Kasblar she'rga aylandi, alifbega joylandi" she'rida alfavit tartibidagi harflar saf tortib, o'zi bilan boshlanuvchi kasblar haqida so'z yuritadi. Har biri 10-14 misralik she'rda aniq bir kasb-hunar haqida so'z boradi, ular o'zaro mustaqil sujetga ega bo'lsa-da, barchasi "yo bo'lsammi" so'zidan boshlangani, mantiqiy bog'liqligiga ko'ra yaxlit she'rdir. Alifbe she'r orqali o'quvchilar o'ttizdan ortiq kasb-hunar haqida tasavvurga ega bo'ladilar. Rost, she'rda kichkintoy bolalarning tasavvuriga hali sig'maydigan kasblar haqida ham fikr yuritiladi. Masalan, elchi, g'avvos, lug'atshunos kabi. Ammo shoira o'zining zamondosh o'quvchilarini yangi voqelik, chet tillarini 1-sinf dan o'rgatilishi va xalqimizning iqtidorli farzandlari tafakkuriga mos fikr yuritishni ko'zlaydi. Bunda shoira tajnisli so'zlardan ham foydalangan:

Y (yozuvchi)

Yo bo'lsammi **yozuvchi**, Hikoyalar **yozuvchi**.

Roman, qissam yozilsa, Kitoblarim bosilsa.

Taniqli bo'lsam behad Darrov so'rashsa dastxat. Intervyular olishsa, Tinglab qoyil qolishsa. Menga berganlar savol Javobimga qolsa lol.

Bu istiqloq davri alifbo-she'rlarining yorqin namunasi ekanligi bilan ham e'tiborli. Unda davrning nafasi ufurib turishidan tashqari, mazmun mohiyatida XXI asrning intellektual salohiyati aks etgan. Masalan, jurnalist bo'lishni orzu qilgan yosh lirik qahramon xabar yozib, elektron pochta orqali tashlashni reja qiladi, uchuvchilik haqida oy'laganda Marokash va Anqaradan bemalol Vataniga uchib kelishni xohlaydi. Shu kabi yuksak orzular qanotiga shaylangan lirik qahramon cho'ponlik, nonvoylik, kulolchilik, zargarlik kabi ota-bobolarining kasbini ham unutmay, ular to'g'risida o'rinli mulohaza yuritadi. Natijada, bunday alifbe she'rlar faqat jajji o'quvchilarni emas, balki



o'smirlarning kasb tanlashga bo'lgan qiziqishlarini uyg'ota olishi bilan ham ahamiyat kasb etadi.

Umuman, alifbe she'rlar asosida yangi she'riy shakllarning yaratilishi o'zbek bolalar she'riyatining janriy jihatdan boyib borayotganligidan dalolatdir. K.Turdiyevaning "Alifbeda nasihat" she'ri shu jihatdan xarakterli. Shoir har bir harf bilan boshlanuvchi o'gitlarni alifbo ipiga marjondek tizishda tavze' san'atidan foydalanadi:

"A" aql, adolat, azal, asli hammadan Afzal,

"B" botir bo'lsang bil shafqat, bemehr bo'lma faqat.

"D" dono so'zdan yarar dil, donolarni do'sting bil,

"E" eshit, esingda tutgin, erinishni unutgin.

"F" fahm, farosat albat, eng foydali fazilat.

"G" go'zaldir gul-u giyoh, gullarni toptash gunoh.

"H" hadis, hikoya, hikmat, uyg'otar mehr, himmat.

"I" intil ilm izlashga, shu maqsadni ko'zlashga.

"J" jahlingni jilovlab ol, janjal naf bermas biror.

"K" kamtarga kamol chopar. Kekkeygan zavol topar...

Ko'rinadiki, satr boshida kelgan harf misra ichida ham 4-5 marta takrorlanib, alliteratsion tovushlar sistemasini tashkil qilish bilan birga, she'riy ritmga, qofiya va mazmunga putur yetmaydi. Shoiraning **Alifbe-o'git**da harflarga mos so'z va ulardan yaxshilik xislatini topish, she'riy shakl, qofiya, vaznga solishdan ko'zlangan maqsadi bor albatta. Bu avvalo, endigina savodi chiqayotgan o'quvchining lotin alifbosidagi harflar talaffuzi, turli so'zlardagi jarangini uning qulog'iga qo'yishdir. Binobarin bunday she'rlarni "Alifbe" va boshlang'ich sinf darsliklariga kiritish, harflarni o'tishdagi rang-baranglikka olib keladi.

Alfavitdagi harflar ketma-ketligi asosida yaratilgan **topishmoqli alifbe** ham K.Turdiyeva ijodiga xos usul. Shoir



topishmoqlarni shunday ketma-ketlikda joylashtiradiki, ularning javobi alfavitdagi harflar bilan boshlanadi:

- A- Asal yig'ar, nishi bor. (Asalari)
- B- Sariq meva dorivor. (Behi)
- D- Marjonlardek terilgan. (Do'lana)
- E - Aqlliga berilgan. (Es)
- F - Juda ham ulkan j onzot. (Fil)
- G - U bilan go'zal hayot. (Gul)
- H - Qovunga kichik ini. (Handalak)
- I - Qushlar quradi uni. (In)

Shu tariqa, shoira topishmoq aytish bahonasida alifbeni yod bo'lishi, uni esdan chiqarmaslikni maqsad qilib qo'yadi. Alifbe she'rlarning bunday ko'rinishi savod o'rgatish jarayonida qo'l keladi. Kichkintoylarni topqirlikka, zukkolikka o'rgatishda, shuningdek, dam olish daqiqalarida bu kabi topishmoq she'rlardan foydalanish mumkin.

Ko'rinadiki, K.Turdiyeva bu janrning xilma-xil usullarini yaratish orqali o'quvchini so'z oyini, fonetik hodisalar bilan ham tanishtirishni ko'zlaydi. "Qofiyali topishmoqlar" shu jihati bilan alohida hodisa"

- "T"dan boshlansa - musiqiy asbob,
- "Q"dan boshlansa - yog'in behisob. (*tor, qor*)
- "X"dan boshlansamda o' smaman oddiy,
- "B"dan boshlansam shirinman, totli. (*xol, bol*)

Bunday she'rlar tabiiyki, o'quvchini yuqori sinflarda o'rganiladigan bir tovush bilan farqlanadigan paronim so'zlar bilan tanishtirib borishga zamin yaratadi. Ayni paytda so'zning oxiri bir xil alliteratsion harflar bilan tugaydigan qofiya haqida tushuncha paydo qila boradi. Har bir paronim so'zga bag'ishlangan misralar o'zaro mustaqil band hisoblanib, qofiyalanish tizimiga egaligi uning she'riy shakllardagi to'rtlik ko'rinishiga misol bo'la oladi.



Harflar orqali turli obrazli voqelik yaratish K.Turdiyeva she'riyatida ko'proq uchraydi. Shoiraning "Harflar she'r yozishgani haqida" sarlavhali **alifbe ertakda** harflar endi obrazlarga kiradi. Ular asar tarkibida mustaqil personaj sifatida harakat qilib, ma'lum voqelikning obrazli ifodasiga ko'ra kompozitsion butunlikni tashkil qilgan. Hikoya qilinishicha barcha harflar bir joyda to'da bo'lib, she'r yoki hikoya yozish g'oyasini o'ylaydilar. Ammo nima haqda yozish ular o'rtasidagi bahsga sabab bo'ladi. "T" harfi "tog'" mavzusini ma'qullasa, "Q" qisqichbaqa, qarqunoq, qarg'a haqida yozamiz deb turib oladi. "O" harfi esa oqlikni, B-bo'g'irsoq, bo'rini maqtaydi; "S", "M" harflari ham o'z so'zida turib oladi. Xullas, A-ahillikda gap ko'p deya hamma harflarni chaqirib, tizilishini shunda biror nima yozish mumkinligini aytadi. Barcha harflar alfavitdagi o'z o'rinlarini egallagach, "Alifbe"ga joylashgach, murodlariga yetadi, she'r yoza boshlaydilar.

K.Turdiyeva shu kabi ko'plab she'rlarida harflarni mustaqil harakatga keltiradi. Ulardan kichkintoylar xarakteriga xos xususiyatlarni ochib berishda foydalanadi. Natijada, harflar goh adashib ketadi, gohida almashib qoladi. Shoiraning "Manman "B", "Harflar adashdi", "Harflar o'yini", "Bitta harf qochsa-chi", "Harflar ketib qolsa", "M", "A" kelsa yonma-yon", "A" harfi qilsa o'yin", "Harflar ustaxonasi", "Bo'ling harfga hurmatda" kabi she'rlari ham shu tariqa ma'rifiy-badiiy ahamiyatga ega. Zero, alifbo-she'rlar endilikda harfiy san'atga asoslangan yangi she'riy shakllarga keng yo'l ocmoqda, desak yanglishmaymiz. Bu esa o'z navbatida, harflarni yozilishi, shakli, o'rni, jarangdorligi, xullas, barcha tasnif-u xususiyatlarini o'rganishga da'vat etadi. Harflarga ana shunday yuksak muhabbat bilan yondashgan shoiramning lotin alifbosini ommalashtirish, badiiy talqin etishdagi xizmati shu ma'noda beqiyos.

K.Turdiyeva bolalar kinochiligi sohasida ham ijod qiladi. U multfilmlar, telefilmlar uchun yozgan qo'shiqlari bilan-da mashhur bo'lgan. Shoir "Irkivoy va Kirketjon" multfilmini



va M.To'ychiyev bilan hamkorlikda "Katta oyi" badiiy filmini yaratishda faol ishtirok etdi. K.Turdiyevaning bolalar qo'shiqchiligi sohasida ham hissiyasi bor. Uning she'rlariga A.Nazarov, M.Mahmudov, Sh.Yormatov kuy bastalagan. Shoiraning "Toshkesarlar mamlakatida" dramatik ertagi "Sog'lom avlod yili"ga bag'ishlangan tanlov sovrindori bo'lgan.

Shoiraning "Baxillik haqida rivoyat"i ham o'quvchilarga ma'naviy saboq bera oladi. Unda o'ziga xos motiv va detallar uchraydi. Rivoyat xalq ertaklariga o'xshash an'anaviy zachinga ega:

Juda qadim yillarda,
Juda uzoq zamonda
Kampir-u chol yasharkan
Bilmam qaysi tomonda

Shu kampir va cholning juda badfe'lligi, xasis va baxilligi tufayli qarindoshlar oyog'i ularnikidan uzilgan, hech kim kelmas, hatto kulgi ovozi eshitilmas ekan. Ammo ularning yakka-yu yolg'iz bolasi butunlay o'zgacha, odamoxun, suxandon, o'zgalaridan yordamini ayamaydigan bo'lib voyaga yetadi. Asosan, gadolarga, yo'qsillarga boru budini ulasharkan. Chol va kampir ana shundan xunob bo'lishib, bir qarorga keladilar:

Gadoylarning barisin
Jo'nataylik mozorga,
Yo'qsa, saxiy bu o'g'lon

Bor-budimiz yo'q qilar, Qaysi gado yo'liqsa Uning qornin to'q qilar.

Oqko'ngil o'g'illari bu qora ishga yo'l qo'ymagach, uni tog' tomonga giyoh terishga yuboradilar. Xurjuniga bir kalla qand va non soladilar. Baxil chol-u kampir xamirga zahar qo'shib, non pishirishadi. So'ngra ko'chadan o'tgan nochor, bechoralarga shu nondan ulashadi. O'sha ko'chadan bir oyoqli devona o'tib ketayotsa, chol uni ham uyga chorlab, xaltangga sol deya nondan



xurjuniga tiqib yuboradilar. Tog'ma-tog' yurib, tentiragan saxiy o'g'il uyini topolmay, ochlikdan sillasi quriydi.

Shunday ajib bu dunyo,

Tasodifga to'liqdir.

Taqdir ekan, devona

Yigitchaga yo'liqdi...

Yigitga rahmi kelgan devona o'sha nonni xaltasiga soladi. Yigit devonaning ishidan, oyoqsiz bir bechora sog' kishiga non berganidan xijolat tortib, hang-u mang bo'lib turganda u g'oyib bo'ladi. Yigit uning ketidan peshma-pesh yuguradi, gadoy rizqini qiydim deb qiynaladi. Har qancha och qolib, joni qiynalsa ham, uning nonini yeyishga vijdoni yo'l qo'ymaydi. Devonani izlay deb chopgan yigit, o'z qishlog'iga kelib qoladi. Baxil ota-onalar o'g'illarini qarshi oladilar. Ammo qattiq charchagan yigitchani uyqu etadi. Uning xurjunidagi nonni esa alal-oqibat:

O'zim bergan non deya,

Qora niyat, shum ayol,

Eri bilan ikkisi

Uni yerlar bemalol.

Shu tariqa, baxil ota-ona o'zi qazigan chohga ravona bo'ladi, saxiy qalbli bola va devona omon qoladi.

Rivoyat tugallanmasi ham xalq ertaklarini eslatadi. Ezgulik va saxiylikning qo'li baxillik va zulmdan ustun bo'ladi. K.Turdiyeva asar g'oyasida istiqlool davri adabiyotiga xos an'analarni singdira olgan. Yomonlik qilgan inson kim bo'lishidan qat'y nazar yaratuvchi tomonidan jazolanishi muqarrar. Saxiyni Olloh qo'llaydi. Devona qiyofasidagi darvesh ham ilohiy hodisa. Xalq ertaklarida asosan o'gay onalarga xos bo'lgan yovuzlik timsoli saxiy yigitning o'z ota-onasi obrazida kelishi noan'anaviy talqindir. Ammo, har yomonda bir yaxshilik hikmati bor, degan hadis mazmuni bor asarda. Shu baxil ota-onadan saxiy va qobil farzand dunyoga kelgan.



K.Turdiyevaning “Dunyoni saqlar bolalar” qo’shiq’i bolalar ijrosi uchun mo’ljallab yozilgan. Qo’shiq tantanavor ohangda kuylanishi bilan e’tiborni tortadi. Unda naqarot ham berilgan. Ma’lumki, naqarot qo’shiqning har bandidan so’ng muntazam ravishda takrorlanib turuvchi qismi. Qo’shiq va madhiyalarda naqarot boshqa qismlardan musiqiy vazn, uslub va ijro sur’ati bilan farqlanishi mumkin. Xor jamoalariga mo’ljallab yaratilgan qo’shiqlarda naqarot qismi, odatda, yalpi xor tomonidan ijro etiladi.

Aytish mumkinki, bu qo’shiq ko’proq xor jamoasi ijrosiga mo’ljallangan va u madhiyaga yaqinligi bilan boshqa qo’shiqlardan ajralib turadi. Aytaylik, qo’shiqning 1-band tuzilishi aniq ritmni saqlagan, turoqlanishi - 4+4=8,

qofiyalanishi -a-a-b-a; a-b-d-b tarzida. 2-band ham shunga yaqin, faqat turoqlanishi va qofiyalanishida o’ziga xoslik bor:

Eshit, zamin, / eshit samo / -a 4+4=8

Bizning kuyni / etsin navo / -a 4+4=8

Mehr bilan / ulashsa qalb / -b 3+4=7

Boshimizga / qo’nar Humo -a 4+4=8

Humo qushim / samo qushim / - a 4+4=8

Qutlar gullar / favvoralar / - b 4+4=8

Yurtga shodlik / va obodlik / - d 4+4=8

Keltirar kimlar/}

Bolalar /- b 5+3 =8

Bu sakkizlikning 3- va 8- misralari turoqlanishida o’zgarish bor. 3-misra 7 hijoli bo’lsa, 8-9-misralar qo’shilib 8 hijoni, ya’ni bo’g’inni keltirib chiqargan. So’ngra, oxirgi to’rlikda ichki qofiyalanish bor. Bunday qofiyalanish deyarli barcha band misralarida uchraydi va qo’shiqdagi ichki ohangdoshlikni yuzaga keltirgan. Ammo, 1-sakkizlikda misra oxiridagi qofiyalar ham to’q va ritmli - muntazam takrorlanib kelgan. 2-sakkizlikda esa ichki qofiyalar ritmik ohanglarni jilolab turibdi. Naqarotda



esa misralardagi soʻzlarning har biri deyarli qofiyadosh va radiflardan tashkil topgan:

N a q a r o t

Dunyoni / poklar bolalar, /

Ishonchni / oqlar bolalar, / Tinchlikni /yoqlar bolalar,
/ Quvonchni /xohlar bolalar, / Ishongan bogʻlar / - bolalar,
Suyangan togʻlar / - bolalar. / Kelajakning / iplariga / Umidni
bogʻlar/ bolalar./

Rost, boshlangʻich sinf oʻquvchilari, hali qofiya, radif, hijo singari adabiy tushunchaga ega boʻlmaydi, ammo ularga boʻgʻin va tovushlar haqida keng maʼlumot beriladi. Binobarin, bunday matnlar oʻtilganda, avvalo, vatanparvarlik mohiyati uqtirilgani holda, soʻngra, uning tantanavor kuylanishini taʼminlovchi unsurlar orqali oʻquvchilarning yod olishi, ifodali aytishiga erishiladi.

Dilshod Rajab **(1964-yilda tugʻilgan)**

Oʻzbek bolalar sheʼriyatining isteʼdodli vakillaridan biri. U Buxoro viloyatining Shofirkon tumanida tugʻilgan. 1990-1993-yillar Nizomiy nomidagi Toshkent davlat pedagogika instituti aspiranturasida oʻqib, “80-yillar oʻzbek bolalar sheʼriyatida poetik mahoratning ayrim masalalari” mavzusida nomzodlik dissertatsiyasini himoya qilgan. 1994- 2004-yillarda Oʻzbekiston Davlat matbuot qoʻmitasida, Oʻzbekiston yozuvchilar uyushmasi “Adabiyot jamgʻarmasi” nashriyotida, Respublika “Shahidlar xotirasi” xayriya jamgʻarmasida turli lavozimlarda ishlagan. 2005-yildan buyon Oʻzbekiston Respublikasi Favqulodda vaziyatlar vazirligining “Muhofaza” jurnali, “Vaziyat” gazetasi birlashgan tahririyatida bosh muharrir oʻrinbosari sifatida faoliyat yuritmoqda. Yuzdan ortiq ilmiy, ilmiy-ommabop va publitsistik maqolalari chop etilgan.



Bugungi Dilshod Rajab yosh kitobxonlarga “Otamning bog’i”, “Daryo ko’ngil”, “Jilvon o’g’loni”, “Alifbo”, “Sanoq”, “Sukut sarhadi”, “Tanish tovushlar”, “O’n o’rtoq, sanab boq”, “Poyezdning bolasi”, “Baxshi bola - yaxshi bola” singari o’ndan ortiq she’riy va nasriy kitoblari bilan yaxshi tanish.

Dilshod Rajab ijodining eng diqqatga sazovor jihati, avvalo, shoirning ona tiliga, tilimizning so’z boyliklariga e’tiborida namoyon bo’ladi. Fikr dalili sifatida “Panshaxaning she’ri”ga murojaat qilaylik:

O’ylab so’yla,

Birodar, Besh panja ham Barobar.

To’rtlik shaklidagi ushbu she’r “Besh panja barobar emas” maqoli asosida yaratilgan bo’lib, bir qarashda, panshaxaning e’tirozida jon borga o’xshaydi, chunki uning besh panjasi ham barobar, uzunligi bir xil. Aslida esa, maqolning mohiyati, u, avvalo, insonga nisbatan qo’llanilishida namoyon bo’ladi. Biroq she’rda barcha narsaga hayrat ko’zi bilan qaraydigan, har bir hikmatni o’z tajribasi asosida qayta yaratishga intiladigan sinchkov yosh bola nuqtayi nazaridan qaraydigan bo’lsak, bu yarim hazil, yarim chin she’r ijodkorning o’ziga xos topilmasi ekanligiga iqror bo’lamiz. Chunki shoir ham olamga yosh kitobxonining hayratga to’la hamda sinchkov nigohi bilan nazar solayapti, yosh bola nazdidagi 286 har bir sir-sinoatni ayni uning nuqtayi nazaridan qayta kashf etayapti. To’rtlikni yosh kitobxonga manzur qiladigan jihat esa hayot haqiqatini qanday talqin qilishdan kelib chiqadigan badiiy haqiqatni anglab yetishga borib taqalib, uning muvaffaqiyati ham shu bilan belgilanadi.

“Bug’doyning taqdiri” she’ri go’yoki biz bilan siz har kuni ko’rib odatlanib qolgan oddiygina bug’doy yetishtirilishi jarayoni tasviridan iboratday tuyilsa-da, aslida, she’r mohiyatida, mubolag’asiz, ulkan hayot haqiqati turadi:

Maysa edi, ona oftob

Boshidan nur to’kardi.



Yuvar edi yomg'irlar goh,

Yellar silab o'tardi.

O'sib kamol topdi durkun, Rosa pishib yetildi.

Sinovlardan o'tkazmoq-chun Bir kun olib ketildi.

Avval, avval bilmoq lozim Chidam-u bardoshini.

Yuritdilar boshidan zil Tegirmonning toshini. Endi uning pokligin ham Bir tekshirish kerak-da. Mayin, oppoq un bo'lsa-da, O'tkazdilar elakdan.

Suv quydilar, mushtladilar, Ming bir ko'yga soldilar. Qizib turgan tandirga ham Bir kiritib oldilar.

Non bo'lgach, u, sabr qilib Bor sinov-otashlarga, E'zoz qilib, ko'zga surtib, Ko'tardilar boshlarga.

She'rni o'qir ekansiz, "inson hayotda o'zining munosib o'rniga ega bo'lish uchun qanchadan qancha sinovlarga mardlarcha bardosh berishi, hayotdagi qiyinchiliklarni sabr-toqat bilan yengib chiqishi kerak?" - degan ritorik so'roq beixtiyor xayolingizga kelishi shubhasiz. Chunki bug'doy maysaligidan voyaga yetgunicha she'rda tasvirlangan jarayonlar, ya'ni pishib yetilgandan keyin boshidan tegirmonning zil toshi yurgizilishi (un tortish jarayoni), hosil bo'lgan unning elakdan o'tkazilishi (tozalash jarayoni), unga suv quyib mushtlanishi (xamir qorish jarayoni), qizib turgan tandirga kiritilishi (non yopish jarayoni) va nihoyat, u sabr-toqat bilan barcha sinovlarga bardosh berib, pishib yetilgan nonga aylanishi natijasida e'zozlanib, ko'zga surtilib, boshga ko'tarilishi - bularning barchasi - jonlantirish san'ati va ijodkor badiiy mahoratining qip-qizarib, singib pishgan non singari ardoqli mahsuli. Bir qarashda, yarim hazil - yarim chin bo'lib ko'rinadigan ushbu she'r yosh kitobxon uchun ibratning go'zal va takrorlanmas namunasi. Zero, aslini olganda, har bir hazilning tagida ham uncha-muncha yuzaki qarashlarga ko'rinavermaydigan haqiqat uchqunlari bor. Shoir esa biz bilan siz uchun shunchaki oddiygina tuyiladigan kichik narsadan



ulkan badiiy haqiqatni ko'ra olishi va uni go'zal badiiyat qobig'ida tasvirlab, siz-u bizga manzur qila olishi bilan ham ijodkordir.

“Yoz tongi” she’ri, o’z nomi bilan, tong otishi manzarasining tasviridir:

Chekinadi qora g’am-zulmat

Yorishadi yuzi osmonning.

Dalalarni oladi chulg’ab

Oppoq shodlik kabi yoz tongi.

Sevinchdan ko’z yoshlar maysa-o’t,

Yig’loq chigirtkalar ovunar. Ichlariga sig’may quvonchi
“Tars” yorilib ketar qovunlar.

She’rda tasvirlangan o’ziga xos manzara – qora zulmatning chekinishi osmonning yuzi yorishishiga sabab bo’lishi (yorug’likning zulmatdan g’olib chiqishi!), dalalarni chulg’ab olayotgan yoz tongining qiyofasi ham shodlik singari oppoqligi (!), bu holatdan boshi ko’kka yetgan maysa-o’tlarning ko’zi yoshlanishi (tonggi shudring!), kechasi bilan yig’lab chiqqan chigirtkalar ham xursandligidan ovunib, tinchishi (!), qovunlarning quvonchi ichiga sig’may “tars” etib yorilib ketishi (!) - bularning barchasi jonlantirish va o’xshatishlardan hosil bo’lgan topilmalar mahsulidir.

Shunga o’xshash “Qish lavhalari” turkumidagi:

Kechki osmon ohista

Qorni elay boshlaydi.

Tunning qora sochiga

Oq oralay boshlaydi,-

to’rtligi ham jonlantirishdan paydo bo’lgan poetik ifodadir. Dastlabki manzara: kechki osmon qorni xuddi un elanganiday elay boshlaydi (o’xshatish), ikkinchi manzara: o’z o’rnini tongga bo’shatib berayotgan tun qarib, qora sochlariga oq oralaydi, bular esa birgalashib, tongdagi g’ira-shira yorug’likning



jonlantirish va o'xshatish vositasida yaratilgan manzarasining o'ziga xos tasviridir.

Shoirning "Varraklar quvonchi" she'ri bahor tasviriga bag'ishlanganidan tashqari aynan bolalarcha tasavvurga yo'g'rilgani bilan e'tiborli:

O'tib ketdi badqovoq

Qishning achchiq ayozi, Tabiat kiymoqda shod Bayramona libosin.

Guldirab kular osmon

Chaqnab chaqmoqtoshlari,

Kulgisining zo'ridan Chiqib ketar yoshlari. Ichga sig'may sevinchi Qaynab toshar buloqlar,

O'zaniga sig'masdan

Toshar soyu irmoqlar.

... Bizning ham ko'ksimizga

Shamol tegadi endi.

Quvonchlardan boshimiz Ko'kka yetadi endi.

She'rda badqovoq qishning ayozi o'tib ketib, tabiat xursandchiligidan bayramona libos kiyishi (daraxtlar gullashi, yer yuzi o't-o'lanlar va gullar bilan qoplanishi), osmon chaqmoqtoshlarini chaqnatib guldirab kulishi, kulgisining zo'ridan ko'zlaridan yoshlar chiqib ketishi, buloqlarning sevinchi ichiga sig'may qaynab toshishi, soy-u irmoqlar o'zaniga sig'masdan toshishi ("sevinchi ichiga sig'may" iborasi) - bularning barchasi g'olibona kirib kelayotgan Bahoroyini sharaflashning turfa qirralari sifatida sinchkov ijodkorning sehrli qalami yaratgan topilmalardir. Bu quvonch shu qadar ulug'vorki, hatto qish bo'yi sarg'ayib yotgan varraklarning ham ko'ksiga shamol tegadi, quvonchidan boshi ko'klarga yetadi (varrak uchirishning jonli tasviri). Har bir misrani bezab turgan jonlantirish hamda o'xshatishlar esa yosh kitobxonni shu



paytgacha bu tarzda his qilmagan beqiyos tasavvur olamiga olib kiradi, mushohadakorlikka undaydi.

Dilshod Rajab majoziy obrazlar orqali ham talay she'rlar yaratgan. Shoir she'riyatida qushlar, uy hayvonlari, turli buyumlar bor. Ular yordamida shoir o'quvchilarni hayotni tushunishga chorlaydi hamda Piyola, Supurgi, Narvon, Qoziq kabi jonsiz narsalarni obraz darajasiga ko'tarib, ularning tabiiy holatidan inson olamiga daxldor xulosalar chiqara olgan. Masalan, "Qoziqning maslahati" she'rida shunday xususiyat ko'zga tashlanadi:

Charxla tinmay kallani, Bo'lma to'mtoq, do'stginam.
Boshing o'tkir bo'lmasa, Yeysan to'qmoq, do'stginam.

She'rni o'qigan kitobxon qoziqning boshiga to'qmoq bilan urilishini ko'z oldiga keltiradi va shoirning nima demoqchiligini anglab yetadi. Bolalarni tozalikka chaqirishda esa shoir sochiq majoziy obrazidan o'rinli foydalanadi:

Nopoklarni sevmayman, Ular menga yot doim. Kim bo'lmasin, aslida Ikki yuzim oq doim.

Shoir hayvonlar obrazidan foydalanib, bolalar, ayni damda, kattalar orasidagi nuqsonlarni birma-bir ochib beradi. "Oshqovoqning shikoyati" she'rida bu jihat yaqqol ko'rinadi:

O'ylamasdan bir gapni
Aytaverar Mirsaid.
Men bekorga pushtaga
Yotmayman-ku ishshayib.
Xo'p mazali qilaman
Odamlarning oshini
Nechun menga o'xshatar
Norbo'taning boshini?

O'qituvchilar ko'pincha "ikki"chi bolalarga "Kallami bu, yo oshqovoq" deydi. Shoir fikr yordamida bolalarga aqlsiz odamning kallasidan qovoq ham yaxshi, qovoq shirin va foydali,



demoqchi. Dilshod Rajab majoziy obrazlar yaratari ekan, goh adabiyotdagi an'analarni davom ettirsa, goh novatorona yondashib, majoz yordamida bolalarga ta'lim-tarbiya beradi. Uning bu she'rlari o'zbek bolalar adabiyotida mavjud majoziy obrazlar safini kengaytiradi va bolalarning barkamol bo'lishiga hissa qo'shadi.

Dilshod Rajabning "Eng buyuk boylik", "Toshning boshi", "T" to'g'risida ertak", "O'g'ringing qismati" ertaklari o'zbek adabiy ertakchiligiga munosib hissa bo'lib qo'shiladi. Uning ertaklaridan biri "Toshning boshi" "T" to'g'risida ertak" bo'lib, tovush va harflarning qudratini tushuntirishga xizmat qiladi. Toshdagi "T" harfining jonlantirilishi yosh kitobxonni qiziqtirishi tabiiy:

Ertakda tavze', ya'ni tovush takroridan o'rinli foydalanilgan:

Tosh qotibdi shunda tosh, Tunda ajalning o'zi. Turar tishi g'ijirlab, Tikib arofat ko'zin.

Dilshod Rajab o'z she'rlarida o'xshatish, sifatlash, jonlantirish, anafora, tavze', takror kabi badiiy san'atlardan foydalanib, she'rlarining ohangdorligini, mazmundorligini oshiradi. Shoir asarlari badiiyati bilan ham ajralib turadi. Uning she'rlarida Vatan obrazi asosiy o'rin tutadi. Shoir majoziy obrazlar yordamida bolalarga to'g'ri ta'lim berib, ularning barkamol avlod bo'lib yetishuviga munosib hissa qo'shmoqda.

Abdusaid Ko'chimov (1951-yili tug'ilgan)

Samarqandning Urgut tumanida tugilgan. Toshkent Davlat pedagogika institutining o'zbek tili va adabiyoti fakultetini tugatgan. Ilk kitobi - "Kashfiyotchi bolalar" 1978-yilda chop etildi. Shundan so'ng uning "Mening O'zbekistonim"(1979) "Mening yulduzim"(1984), "Umid daraxtlari" (1992), "Chanoq"(1985), "Ikki bahor"(1990), "Qiyofa"(1996) kabi she'riy va nasriy



kitoblari nashr qilindi. “Baland tog’lar”(2002) saylanma kitobiga yozuvchining qissalari, dostonlari, she’rlari kiritilgan. A.Ko’chimov Xalqaro YUNESKO mukofoti, G’afur G’ulom nomidagi mukofot bilan taqdirlangan. Unga “O’zbekistonda xizmat ko’rsatgan jurnalist” unvoni, “Shuhrat” medali, “Mehnat shuhrati” ordeni berilgan.

A.Ko’chimov qalbi jo’shqin, shijoatli bolalar publitsisti hamdir. U mustaqillik g’oyalarini matbuotda keng yoyish, o’tmish tariximizga oid hamda istiqloq ne’matlarini bolajonlar qalbiga jo etishda dolzarb maqolalari bilan hissa qo’shib kelmoqda.

A.Ko’chimovning bolalar shoiri sifatidagi o’ziga xosligi - bolalar qalbini so’zlatishida. Uning she’rlar mavzusi rang-barang. Shoirning “Biz o’n yetti o’rtoqmiz”, “Ikki o’rtoq bor edi”, “Uch do’st”, “Mish-mishvoy”, “Yer boyliklar onasi”, “Buvimning istagi” kabi she’rlarida kichik zamondoshlarning lirik obrazi 290va murakkab ichki kechinmalari teran aks ettirilgan. Jumladan, shoirning “G’affor shamol” she’ri kichik maktab yoshidagi o’quvchilar xarakterini ochib bergishga xizmat qiladi. Unda G’affor ismli bola timsolida mashaqqatlardan hayiqadigan, o’z fikrida turmaydigan, shamol singari qo’nimsiz bolalar hajv qilingan. Ta’kidlanishicha, G’affor shundayki:

Boksyorlikka havas qo’yar

Gohida u.

Goho birdan oshpazlikni

Qilar orzu.

O’qituvchi, artist, suvchi

Yoki rassom.

U “sevmagan” hunar yo’qdir Xullas kalom.

G’affor hamma kasbni shu tariqa oirzu qiladi, ammo o’z so’zidan darrov qaytadi. Chunki, uningcha doktorlikning ishi og’ir; shofyorlikning egni dog’-dug’, yag’ir bo’ladi; mashhur olim



bo'lish soz-u, o'qish qiyin; shoirlik xo'p ajoyib, biroq she'r to'qish qiyin; xullas, hamma hunarning bir "lekin"i topila qoladi. Lirik qahramon bunday bolalarga achinadi. G'affor singarilarga biror kasbni tezroq tanlab, har daqiqa oltinga tengligini anglashga da'vat etadi.

A.Ko'chimovning yana bir she'ri "Yer - boyliklar onasi" deb nomlanadi. She'rda kichkintoy bolalarga xos "nimavoy"lik hamda undan chiqarilgan ibratli saboq mazmuni aks etgan. Yosh lirik qahramon jajji ukasi Savlatjonning ezma "bilag'on"ligidan dastlab jahli chiqadi. Chunki u juda ko'p narsaga qiziqadi: Nega kunduz chiqmas oy? Nega qishda muzlar soy? Nega tomning tili yo'q? Nega gulning qo'li yo'q? Xayriyatki, ularning tog'day bardoshli bobosi bor: u erinmay jajji nevaraning barcha "nega-nega"lariga javob beradi. Natijada, lirik qahramon ona yer haqidagi tushunchaga ega bo'ladi: Yer - non tayyorlanadigan bug'doyning, kiyim-kechak tayyorlanadigan paxtaning, oq qant olinadigan shakar qamishning, temirning, barcha boyliklarning onasi ekanligi ma'lum bo'ladi. Shuningdek, bobosining hikoyasidan yosh qahramon oqpadar Gitlarning ona-yerga chang solgani, shu urushda bobosi ham o'ng oyog'idan ajralib kelgani, hozir ham ba'zi yovlar zaminga azob berib, bog'-rog'larni xarob etayotgani ayonlashadi. Shu tariqa, lirik qahramon ongida Yer oddiy tuproq, zamin holidan buyuk Vatan darajasiga ko'tariladi va "ezmavoy" ukasiga ich-ichidan minnatdorlik bildiradi.

Shoirning "Ikki o'rtoq bor edi", "Mish-mishvoy", "Men g'iybatchi emasman", "Majlis", "Sufliyor" kabi she'rlarida ham maktab o'quvchilari o'rtasida uchrab turadigan turli voqealar, odatlar, yoki, shu yoshdagi o'g'il-qizlarning fe'l-atvori lirik ifodasini topgan. "Hiyla" she'rida kattalarga xos fe'l-atvor aslida bolalikdan, aniqrog'i, oiladan boshlanishi ochib berilgan. She'r qahramoni Shodmonjon otasidan xushomadgo'ylik sabog'ini olgach, darhol bu "o'git"ni hayotga tatbiq etadi:

Ertasi erkalanib, Oyisidan pul oldi. Darsdan keyin G'anining



Yuragiga qo'l soldi.
- "Morojnie" ga bir to'ysak.
Nima deding, jo'rajon?
G'ani labin yaladi:
- Attang, pulim yo'q edi..
Shodmon kerilib:
- Mana,

Menda bor, ketdik!-dedi.

Tandirday qizib turgan kunda ikki o'rtoq muzqaymoqni paqqos tushiradilar. A'lochi, yuvosh, morojniy jonu tani bo'lgan G'ani bu siylovdan hayron bo'lib turganda, Shodmon maqsadga ko'chadi:

- Uy ishin ko'chirsam,
Degandim daftanngdan...

G'anining yo'q demoqqa tili bormay, g'alati ahvolga tushadi. Qo'li titrab portfelini ochadi. "Yegan og'iz uyalar, xushomad zo'r shaytondir".

Shoir shu tarzda yosh kitobxonlarga ijtimoiy hayotda ro'y berayotgan hodisalar mohiyatini tushuntirgishga, realistik tasvirga e'tibor qaratadi. Bu ham bo'lsa, mustaqillik davri bolalar adabiyotining mavzu va muammoni yoritishda kengqamrovlilik kasb etgani dalolatidir. Shu ma'noda A.Ko'chimov ijodida umuman, insoniyat dardi, ruhiy kechinmalari, iztiroblari, yoxud orzu-o'ylari reallasha boradi, ya'ni, hayotga yaqinlashadi. Shoir she'rlarida yosh qahramonlar- bolalar chinakam "hayot qozonida qaynaydilar". Bu jihat "Ukamning maslahati" she'rida ham yaqqol ko'rinadi. Umuman, shoir she'rlari kichkintoylarni bolalik olamidan kattalik dunyosiga yetaklovchi vosita ekanligi ayonlashadi. A.Ko'chimovning bolalar uchun yozgan adabiy ertak, ballada va dostonlarida ham bu xususiyat majoziy, obrazli tasvir etilgan.

Uning "Saboq" she'riy ertagi ijtimoiy dolzarb mavzuga bag'ishlangan. Shoir Chumchuq va Burgut ramziy obrazlari



orqali vatanparvarlik tuyg'usini oydinlashtiradi. O'z dala-qirida - pastlikda yashashdan or qilgan Chumchuq Burgutga taqlid qilib, o'rkach-o'rkach qoyalar tomonga qarab parvoz qiladi. Qora terga botib, jiqqa ho'l bo'lgach, nafasi tomog'iga tiqilib, bir qoyaga urilib yiqiladi. Anchagacha behush yotgan chumchuqqa sor Burgut duch kelib, uning nimjonligiga rahmi keladi. Chumchuqning:

Pastliklarda shuncha yashab, Qoniqmadi yuragim Yo'q demasang sening bilan Yashamoqdir tilagim, - degan gapiga qah-qah urib kulsa ham, uni yelkasiga mindirib oppoq bulutlar orasiga kirib ketadi. Yer, dala, suv, tog', o'rmon - barchasi ko'zdan g'oyib bo'ladi. Ana shundagina yuragini qo'rquv qoplagan chumchuq yerning naqadar go'zalligini his qiladi va o'z xatosini tushunib yetadi. Burgut o'z makoni bilan cheksiz faxrlanadi: ko'k bag'rida yashash, qor-bulutlar qo'yni-yu shamollar raqsini kechalari porlagan yulduzlar qurshovini otashin muhabbat bilan ta'riflaydi.

"Bilsang, yo'qdir yer yuzida, suluvlikda bunday joy",- deb g'ururlanadi. Ammo Chumchuqqa shunday saboq beradi:

Biroq, uka, har narsaning
O'z Vatani bo'ladi,
Har narsaning baxt-iqboli
O'z bog'ida kuladi.

Chumchuq bu fikrdan to'g'ri xulosa chiqarib, o'z do'stlari bag'riga shamolday yelib, uchib ketadi.

Ko'rinadiki, ertak ezgulik bilan tugagan. Shunga muvofiq asarning tarbiyaviy ahamiyati, mavzuviy dolzarbligi katta.

Xullas, ona-Vatan, ijtimoiy-hayotiy voqealar, zamona taloto'plari, jamiyatda kechayotgan yaxshi-yomon o'zgarish-larlarni A.Ko'chimov o'ziga xos uslubda, ohangda bolalarbop ifoda etadi. Ijodkorning o'z ovozi, tahliliy mushohadalarga boy publitsistikasi, esse va ertaklari istiqlool davri bolalar



adabiyotini yangi tamoyillar bilan boyitishga hissa qo'sha oldi. Uning she'rlarida hurfikrlilik yarq etib ko'zga tashlanadi, lirik qahramonlari haqiqatga tik boqadi. Uning asarlarida Vatan oldidagi burch va mas'uliyat eng oliy insoniy tuyg'u ekanligi anglashilib turadi. Xuddi shu qirralar davr bolalar adabiyotining yetakchi xususiyatlari hamdir.

Bilim, ko'nikma va malakani rivojlantirishga yo'naltiruvchisavollar:

1. Istiqlol davri bolalar adabiyotining o'ziga xosligi nimalarda namoyon bo'ladi?
2. Istiqlol davri o'zbek bolalar she'riyatida qanday mavzular yetakchi?
3. Istiqlol davri bolalar nasri haqida mulohaza yurita olasizmi?
4. Mustaqillik davrida bolalar uchun ko'plab she'rlar yozgan qaysi ijodkorlarni bilasiz?
5. Hamza Imonberdiyevning qaysi asarlarida istiqlol ruhi yetakchi?
6. Kavsar Turdiyeva qanday ijodi bilan bolalar adabiyotiga hissa qo'sha oldi?
7. Dilshod Rajab ijodi haqida qanday ma'lumotga egasiz?
8. A.Ko'chimov she'rlari to'g'risida mulohaza yuriting?
9. Istiqlol davri o'zbek bolalar adabiyotining an'anaviyligi va o'ziga xosligi deganda nimani tushunasiz?
10. Davr bolalar adabiyotining muhim xususiyatlari aks etgan mazmun va shakllar haqida munosabatingiz?
11. M.A'zam, A.Obidjon, S.Barnoyev, T.Adashboyev kabi katta avlod bolalar adiblarining istiqlol yillaridagi ijodida qanday tamoyillar ko'zga tashlanadi?



Tavsiya etilgan adabiyotglar:

1. Karimov I.A. Yuksak ma'naviyat - yengilmas kuch. - T.: Ma'naviyat, 2008.
2. Barakayev R. Jonajonim, she'riyat. - Toshkent: Cho'lpon, 1997.
3. Jumaboyev M. Bolalar adabiyoti. Darslik. - T.: O'qituvchi, 2002.
4. Jumaboyev M. Bolalar adabiyoti. Darslik. - T.: O'qituvchi, 2011.
5. Masharipova Z. O'zbek xalq og'zaki ijodi. - T., 2008
6. O'zbek bolalar adabiyoti antologiyasi. Ikki jildlik. 1-2-jild. - T.: O'qituvchi, 2006.



XI. CHET EL BOLALAR ADABIYOTI

Reja:

- 1. Chet el bolalar adabiyotining an'analari.*
- 2. Aka-uka Grimmlar ertaklarining muhim xususiyatlari.*
- 3. Sh.Perro va X.Andersen adabiy ertaknavis adib.*
- 4. J.Svift va J.Rodari asarlarining g'oyaviy-badiiy xususiyatlari*

Chet el bolalar adabiyotining an'analari.

Chet el bolalar adabiyoti jahon adabiyoti sifatida ularning xalq og'zaki ijodi, eng qadimgi adabiy yodgorliklari, mif va afsonalar, qo'shiqlar bilan chambarchas bog'liqligi, bunday ijod namunalarining axloqiy-tarbiyaviy mohiyati, didaktik tamoyillari hamda jahon xalqlari bolalariga bag'ishlangan asarlarning tasniflanishi, ularning taraqqiyot tamoyillari, janrlar rang- barangligi yuzasidan tushuncha berishni ko'zda tutadi.

Jahon bolalar adabiyoti, dastlab, didaktik adabiyot namunasi sifatida XVII - XVIII asrlarda paydo bo'lgan. So'ngra, bu adabiyot o'zining betakror ko'rinishlari orqali dunyoga tanildi. Barcha xalqlar bolalar ijodkorlari, eng avvalo, o'z mamlakatlarining xalq og'zaki ijodiga murojaat qilgani umumiy hodisadir. Masalan, Sharl Perro kichik kitobxonlarga dastavval, folklordan oziqlangan va badiiy sayqal berilgan eng yaxshi adabiy ertaklarni taqdim etdi.



XIX asr romantiklarining faoliyati keng kitobxonlar ommasiga xalq og'zaki ijodi va har bir xalqning milliy-adabiy manbaalarini ochib berdi. Jumladan, bu bolalar adabiyotining rivojlanishiga ham o'z ta'sirini ko'rsatib, aka-uka Grimmilar, H. K. Andersen va boshqa ko'pgina ijodkorlarning adabiy hamda xalq ertaklari to'plamlari paydo bo'lishiga turtki bo'ldi. Natijada, kichik kitobxonlar endilikda ham kitob, ham o'z tengqurlari hayoti aks ettirilgan badiiy tasvirlarni qo'lga ola boshlagan. Binobarin, bolalar adabiyoti "katta" adabiyotning mustaqil tarmog'iga aylanishida bu jarayon muhim omil hisoblanadi.

Romantizm insonning ruhiy rivojlanishdagi o'z-o'zini anglash davri - bolalikda kashf etilishini ochib berdi. Romantiklar asarlarida bolalik insonning o'zidagi bebaho ichki olam sifatida, shuningdek, teran mohiyati va ajoyibotlari bilan kattalarni ham o'ziga rom etuvchi davr tarzida talqin qilinadi. Kattalik esa xuddi eng samimiy va bolalarcha beg'uborlik tark etilgan davr sifatida yoritiladi. Shuni tan olish kerakki, romantizm nafaqat *bolalikni* kashf etdi, balki uni eng sof mukammallik namunasi hamda mehr-shafqat timsoli sifatida insonga meros qilib qoldirdi.

Realistik tamoyillarning rivojlanishi, ruhiyatshunoslikning chuqurlashishi bilan bolalar adabiyotida keng qamrovli, ko'p qirrali bolalik obrazi mustahkamlandi. Bunda yozuvchilar insoniyat rivojlanishining ibtidosini, yosh inson xarakterining tub-tubiga yetib, bola ichki dunyosining murakkabliklariga asta-sekinlik bilan kirib borib, uning mutanosiblikda va ziddiyatlarda, hayotning yorqin hamda qorong'u g'am - qayg'uli onlarining kurashlarida shaxs sifatida shakllanishini ochib berishdi.

Eng yaxshi yozuvchilar ijodini aniqlovchi asosiy vosita - bu bolalikka ishonch, ulg'ayib kelayotgan insonga hurmat, unda rivojlanishning bor imkoniyatlarini, sarchashmalarini hamda asosiy omillarini ko'ra olish qobiliyatining borligidir.

XX asr o'zining keskin ijtimoiy muammolari, o'tkir ziddiyatlari, siyosiy qarashlari bilan bolalar adabiyotini ham



o'zgartirib yubordi. Dunyoning dahshatlari kichik kitobxon asari sahifalariga kirib bordi. Ularning qahramonlari - ijtimoiy jonzotlar, ular o'z hollaricha insonga nisbatan qilingan vah-shiylikka qarshi borishadi, o'zlarining do'stlikka, muhabbatga bo'lgan huquqlarini talab qilishadi hamdakattalarni ularning tushunishlariga chaqirishadi. Zamon muammolari nafaqat realistik asarlarga, balki ertaklarga ham singiy boshladi. Ular janriy xususiyatlaridan ozgina chekingan bo'lsalar-da, hamon yaxshilik yovuzlik ustidan g'alaba qozonishiga umid bog'lashadi va shu yo'lda tinimsiz ma'naviy kurashlar olib borishadi.

Ilmiy - texnika taraqqiyoti asri butun yer yuzidagi inson jamiyatiga yashash uchun kata hayotiy zarurat - Yerda hayotni saqlab qolish kabi muammoni tug'dirdi. Shuning uchun zamonaviy bolalar adabiyotida ekologik muammolar, atrofimizni o'rab turgan olam, hayvonot va o'simliklar dunyosi haqidagi kitoblar salmoqli o'rin egallaydi. Barcha mamlakatlarning naturalist (tabiat haqida yozadigan) yozuvchilari - bolalarda tabiatga hamda barcha jonzotlarga nisbatan ehtiyotkorona munosabat va ularga nisbatan muhabbat ruhini tarbiyalash vazifasini o'z oldilariga maqsad qilib qo'yishgan.

Chet el bolalar adabiyoti bugungi kunda o'zining janriy va tematik xususiyatlari jihatidan turli-tuman, o'ziga xos tarzda shakllanib ulgurdi. Unga dunyoning eng taniqli yozuvchilari o'z iste'dodlarini va faoliyatlarini bag'ishlashgan. Chunki ular insoniyat kelajagi o'sib borayotgan avlod qo'lida ekanligini yaxshi anglashadi...

Eng asosiysi, yosh inson adabiyot yordamida, fransuz shoiri Polya Elyuara ta'biri bilan aytganda, o'zining dunyoqarashida "bir kishi ufqidan barcha kishilar ufqiga" ko'tarila oldi.

Binobarin, hozirgi zamon chet el bolalar adabiyoti quyidagi omillar ta'sirida maydonga keldi, deyish mumkin:

– Folklor asarlari hamda klassik yozuvchilarning avval kattalarga mo'ljallangan, ammo vaqt o'tishi bilan bolalar kitobxonligi doirasiga kirib, kichik kitobxonga so'zlab berish



uchun hikoya tarzida qayta ishlangan asarlari (qadimgi yunon afsonalari, D. Defo, D. Swift, M. Servantesning romanlari).

– Bolalar kitobxonligi doirasiga qisqartmalarsiz va qayta ishlanmasdan kirgan folklor hamda mumtoz asarlar (folkloridagi erkalamalar, topishmoqlar, allalar, shuningdek, V. Skott, Ch. Dikkins va boshqalarning asarlari).

– Bevosita bolalarga mo'ljallangan asarlar.

Binobarin, ayrim ijodkorlar va ularning asarlari endilikda bolalar kitobxonligi mulkiga aylanib ulgurdi.

Aka-uka Yakob (1785-1863), Vilgelm (1786-1859) Grimmlar

Ikki yuz yildan ko'proq vaqt ilgari Xanau shaharchasida, hurmatli byurgaerlar oilasida (bu nasldan ko'pgina taniqli huquqshunoslar va ruhoniylar yetishib chiqqan) Filipp Vilgelm Grimm va uning ayoli Doroteyalar nikohidan dunyoga keldi. Tez orada butun oila-o'rmonli tog'lar bilan o'ralgan, tinch osuda shaharcha -Shtaynauga ko'chib o'tishdi.

Oila kattagina edi: besh bola va Lotti ismli kichik qizaloq. Bu oilada barcha g'ayritabiiy ravishda mehnatsevar edi. Va barcha bir-birini sevar, hurmat qilardi. Lekin ular orasida bir yosh farq bilan Yakob va Vilgelm o'zgacha mehr bilan bir- biriga bog'langan edilar. Yoshlik chog'laridanoq - aka-uka Grimmlar juftligi tug'ilgan edi. Taqdir ularga uzoq hayotni o'lchab bergan edi. Va ular o'zlarining keksalik chog'larigacha bu mustahkam bog'liqlik hamda mehr-oqibatni tark etishmadi.

Yakob 11 yoshga to'lganda ular otalaridan ajrab qolishdi. Bola oila boshlig'i bo'lib qoldi. U otasi tobuti oldida bolalarcha to'xtamay yig'lar, ammo umuman kattalarcha hamda qat'iylik va iroda bilan endi kichik ukalarining, mitti qizaloq Lottining, g'amdan gavdasi bukilgan bechora onasining eng katta g'amxo'ri, tayanchi o'zi ekanligini anglagan edi.



Keyin Kasselda gimnaziya o'qidi. Belgilangan sakkiz yil o'rniga - tig'izlashtirilgan to'rt yil ichida aka-ukalar o'qishni bitirib, Marburg universitetiga o'qishga kirishadi. Universitetda ular qadimgi olmon she'riyati, runalari bilan qiziqib, shu qiziqishlarini umrlarining oxirigacha olib borishdi.

Universitetni tugatgach, Grimmmlar Kasselda qaytishadi. Va shu yerda katta bo'ron boshlandi: Napoleon armiyasi Olmoniyaga bostirib kirdi. Fransuz hukmronligi - begona odamlar, begona urf-odatlar, shaharning har bir burchagidan eshitilib turgan begona so'zlashuv Olmoniyaga, uning tiliga, urf-odatlariga, tabiatiga, adabiyotiga mehr qo'ygan o'spirinlarni qattiq iztirobga solardi. O'z xalqining tushgan ruhiyatini ko'tarish, yurakni ezadigan sukunatga chek qo'yish ilinji yosh olimlarni nemis xalqi tarixi va adabiyotiga bo'lgan qiziqishlarini yanada orttirdi. Aka-uka Grimmmlar vaqtlarini kutubxonalarda noyob qadimgi olmon manuskriptlarini (qo'lyozmalarni), masalan, nemis adabiyotining birinchi yodgorligi "Xildebran haqida qo'shiq" asarini o'rganib, qadimgi nemis she'riyati to'plamlarini chop etishdi. Bu bilan ular xalq yuragining tubida mudrab yotgan qadimgi hikmatlarni qayta tiklash maqsadlarini amalga oshirishdi. Ammo bular faqat yozma manbalar bilan bog'liq edi. Ularni esa yana yiroqroq manzillar - xalq qalbining tubi, zamonlarning eng qadimi qiziqtirayotgan edi. Va ular shu niyat bilan folklorga murojaat qilishdi. Aka-uka Grimmmlar o'zlarining harakatdagi faoliyatlari - ertaklar to'plash bilan mashg'ul bo'ldilar.

Birinchi mustaqil topilmalar 1807-yilga taalluqli bo'lib, ular Kasseldagi ikki oila: Vildlar va Xassenpfluglar bilan bog'liq. "Boshmaldoq - bola", "Aqlli Gretel", "Navqiron Pahlavon", "Oq kabutar", "Mushuk va sichqonning do'stligi", "It va chumchuq" kabi ertaklar Vildlar va Xassenpfluglar oilasi a'zolaridan yozib olingan to'plamlar sirasiga kiradi. To'plamlarning jamlanishida o'zining katta hissasini qo'shgan dorifurush Vildning beshinchi



qizi Ganriett Doroteya Vild, keyinchalik Vilgelmning turmush o'rtog'i (Yakob umrining oxirigacha ham uylanmagan) haqida albatta aytib o'tish joiz. Doroteya aka-uka Grimmlarga "Ganzel va Gritel", "Yerto'la bekasi", "Kuylaydigan danakcha" kabi ertaklarni taqdim etdi.

Askarlarning achinarli, nochor-kambag'allikdagi hayotlari, kamsitilgan shaxsiyatlari haqida so'zlab beruvchi Grimmlarning qayg'uli ertaklari qariya Krauze bayonidan yozib olingan.

"Bolalar va oilaviy ertaklar" kitobiga Grimmlar ukasi Lyudovik tomonidan illyustratsiyalar chizilgan. U 20-dekabrda - Rojdestvo bayrami arafasida kitobxonlar qo'liga tegdi va eng katta sovg'a bo'ldi. To'plamning shon-shuhratiaka- uka Grimmlargauning ikkinchi qismini ham to'plab, chop ettirishga ruhlantirdi. Ikkinchi kitob nashrdan chiqqach, Grimmlar qo'lida yana anchagina ertaklar yig'ilib qoldi va ular uchinchi kitobni bosmadan chiqarishni taxmin qilishdi, ammo keyinchalik o'zlarining fikrlaridan qaytib, ikkinchi qismning keyingi nashrida yig'ilib qolgan ertaklarni qo'shib chop etishni ma'qul topadilar. Nihoyat, 1812- yilda Grimmlar tomonidan yaratilgan ertaklarning birinchi jildi, 1815-yilda ikkinchi jildi, 1822-yilda esa har ikkala jildni umumlashtiruvchi uchinchi jildi e'lon qilingan. Grimmlar bisotida jami 200 dan ortiq ertak mavjud edi. Shu o'rinda savol tug'ilishi tabiiy: xo'sh, aka-uka Grimmlarning ertaklari - bu haqiqiy ijodiy asarlarmi yoki xalq og'zaki ijodining shunchaki bayoni - yozma ko'chirmasimi? Darhaqiqat, aka-ukalar, ayniqsa, Yakob ertaklarni o'z aslicha, xalqchil bo'lib qolishining tarafdori bo'lgan; shunga ko'ra, ularni qayta bayon etilishida tuzatish kiritmaslik, zamonaviy ko'rinishda tabdil etmaslik, yoki ijodkor didi bilan yo'g'rilmagan bo'lsin, degan fikrida qat'iy turgan. Vilgelm esa olimdan ko'ra, ko'proq shoir tabiatligi uchun ertaklarga badiiy sayqal berish tarafdori bo'lgan. Shubhasiz, bunday ikki xilda fikr yuritish foydadan xoli bo'lmagan. Natijada, Grimmlar ertaklari o'zlarining



xalqchilligini yo'qotmagan holda muallif she'riy uslubining birligini saqlab qolgan. Shu tariqa, aka-uka Grimmlar ertaklari hali- hanuz dunyo kezmogda va jahon bolalarining maroq bilan o'qiydigan asarlari turkumiga kiradi. Jumladan, Grimmlarni dunyoga mashhur bo'lgan "Zolushka", "Qor qiz" ertaklarining qahramonlari hammadan turtki yeydigan, so'kish eshitadigan va eng past holda qiyin yumushlarni bajaradigan qizlar bo'lib, ertak davomida o'zlarining halol mehnatlari, oqko'ngilliklari tufayli baxtli bo'ladilar. Xususan, "Yalqov Geys", "Gansning baxti", "Botir tikuvchi", "Yosh pahlavon", "Bremen musiqachilari" kabi ertaklari o'zbek bolalar kitobxonlarining mulkiga ham aylana oldi. Grimmlar ertagining umumahamiyati shundaki, ularning qahramonlari har qanday og'ir, qaltis vaziyatlarda ham o'zlariga chora topa oladi, tadbir izlaydi. "Tulki bilan g'ozlar" ertagi shu jihatdan ahamiyatli. Unda hiyla va makr ishlatishga usta tulki obraziga tadbirkor g'ozlar timsoli qarshi qo'yiladi.

Tulki o'tloqda yurgan g'ozlarni yemoqchi bo'ladi. Ular o'limlari oldidan bitta qo'shiq aytib, so'ngra tulkiga yem bo'lishlarini so'raydi. Ammo uzundan uzoq "g'a-g'a"lari tulkini zeriktiradi, uning tinka-madorini quritadi, axiyri g'oz-o'ljadan voz kechishga majbur bo'ladi.

Bundan tashqari, aka-ukalar "Nemis grammatikasi"ni, keyinchalik nemis mifologiyasi maktabiga asos bo'lgan - "Nemis mifologiyasi"ni chop etishadi. Umrlarining so'nggida aka-uka Grimmlar Berlin universitetida ma'ruzalar o'qiydilar hamda nemis tili lug'atini tuzish ustida ishlaydilar. Ikki buyuk olim, tilshunos, adabiyotshunos, buyuk ertakchilar yashab o'tgan Kassel shahrida muzey tashkil qilinib, ularning shaxsiy buyumlari, dunyoda yuzdan ortiq tillarga tarjima qilingan kitoblarining nusxalari, ukalari Lyudvigning san'at asarlari ehtiyotkorona saqlanib kelinmoqda.

1697-yilda Fransiyada "Mening onajonim Gusinaning ertaklari" deb nomlangan kitob nashrdan chiqdi. Aslida ertakni o'sha davrdagi mashhur shoir, fransuz akademiyasining a'zosi



Sharl Perro (1625 - 1703)

Yozgan bo'lsa-da, uning muallifi P.Dermenkur deb hisoblanardi. Ko'p kitoblar muallifi Sharl Perro ismi sharifini "jiddiy bo'lmagan" ertaklar ostiga qo'yishni o'ziga lozim ko'rmay, uni o'g'lining ismi sharifi bilan imzolagan edi. Lekin aynan shu sehrli ertaklar jahon adabiyotining oltin fondiga kirib, yozuvchiga shon-shuhrat keltirdi. Perroning ertaklari ko'p marotaba boshqa tillarga tarjima qilingan va nashrdan chiqqan. Ertakningrus tilidagi tarjimasi I.S.Turgenevga mansub.

Perro o'z ertaklarining so'zboshisida ertak janrining asosida yotgan jiddiy hamda kulgili va g'alati narsalarni uyg'unlashib ketishiga ishora qilib: "...bu umuman, bekorchilik emas, balki o'zida foydali pand-nasihatni mujassamlashtirgan... hikoyaning sho'x, o'ynoqi tuzilishini esa faqatgina o'quvchi aqliga ko'proq yoqimli tarzda ta'sir qilish, shu bilan birga unga ham o'rgatib, ham xushnud qilishi uchundir..."degan edi. Bolalikning ilk davridan boshlab bizga "Qizil shapkacha", "Jimjimaloq bola", "Zolushka", "Etikli Mushukcha", "Uyqudagi malika", "Ko'k Soqol" kabi ertaklar ma'lum. Bir xil ertaklarning qahramonlari odamxo'r maxluqdan yoki, zolim bo'ridan o'zlarinio'zlari qutqargan bolalardir.Bu odatga ko'ra, Bibliyadagi yomonlikka yaxshilik bilan javob qaytarganIosifni esga soladi. Jimjimaloq bola shu kabidir; muallif ertakning oxirida yozishicha, o'zining yaqinlariga yaxshilik qiladi va o'zining butun oilasini - ham otasini, ham og'alarini ta'minlaydi. Zolushka ham xuddi shundaylardan, u qanchalar go'zal bo'lsa, shunchalar oqko'ngil hamdir; u o'gay opalarinio'zi bilan saroyga olib ketadi. Perro ertaklarida yaxshilik va haqiqat g'alaba qozonadi hamda qahramonlarga sehrGAR personajlar, Zolushka yoki Etikli mushukchada etikdo'zning kichik o'g'lini cho'qintirgan



onasi - oqko'ngil Feya yordam beradi. Bo'ri, mushuk inson tilida so'zlashadi, bu folklorning bir ko'rinishi bo'lib, muallif xalq ijodining boy an'analariiga tayanadi hamda o'ziga xos mualliflik janrini yaratadi. "Qizil shapkacha" ertagida tipik folklor asos namoyon bo'ladi: bu qizil Shapkachaning buvisiga etayotgan narsasi ("pirojok nesu da gorshochek masla"), savollaridagi hamda buvisining kiyimiga kiyinib olgan bo'rining javoblaridagi takrorlash va parallelliklarda ko'zga tashlanadi. Perroning boshqa ertaklarida birinchi o'rinniromantik sevgi tarixi egallagan. Qahramon qator sinovlardan o'tib, o'zining mukofotini oladi: yaxshilikyomonlikni ustidan g'alaba qozonadi, ya'ni xuddi "Uyqudagi malika" yoki "Ko'k Soqol" ertaklaridagi kabi. Sharl Perro ertaklari qahramonlarining nomlari allaqachon turdosh otlarga aylanib ulgurgan. Zolushka yoki Ko'k Soqol tarixlari har xil ko'rinishlarda ko'p marta jahon adabiyotida qayta- qayta ishlangan va sahnalashtirilgan.

XVII asr oxiri Sharl Perro ertaklarining yaratilishi bilan belgilanadi va uning ertaklari fransuz adabiy ertaklarining eng zo'r hamda yorqin namunalari sifatida e'tirof etiladi. Fransiya XVIII asr esa ertaklarning oltin asri hisoblanadi.

Uyg'onish davrida talaygina shoir va yozuvchilar bu universal janrga ko'p murojaat qilgan va uning estetik imkoniyatlaridan foydalanib, dolzarb mavzular bilan boyitib borishgan. Masalan, Valter falsafiy ertaklar yozgan. Sharqning "Ming bir kecha" ertaklari fransuz tiliga tarjima qilingach, sharqona ertaklarga o'xshatishlar paydo bo'ldi. Ammo, shu XVIII asrning o'zidayoq ertaklarning urf bo'lishi ancha pasaydi. Ilgari bolalarga mo'ljallangan maxsus adabiyot yo'qligi uchun kichkintoylar kattalarning asarlarini o'qishar edi. Keyingi asrlarda esa Sharl Perroning qisqartirilgan ertaklaridan aynan bolalar uchun namunalar tayyorlangan. Ulardan shafqatsizlik, erkinlik, badiiy o'yinlar olib tashlanib, anchayin soddalashtirilgan.



Hans Kristian Andersen (1805-1875)

O'zining ajoyib va g'aroyib ertaklari bilan jahonga tanilgan. U Daniyaning Odens shahrida tug'ilgan. Bolaning yashash sharoiti va o'qishi bu yerda ancha-muncha yaxshi bo'ladi. Bo'lajak yozuvchi 1823- yilda Slagels maktabiga o'qishga kiradi, undan keyin Xelsingyorda ta'lim oladi. Bolaning otasi kavushdo'z, onasi esa kir yuvuvchi bo'lib ishlar edi. Shuning uchun Hans kambag'allar maktabiga o'qishga kiradi. Oradan uncha ko'p vaqt o'tmay, ularning oilasi Kopengagenga ko'chadi. 1828-yilda esa Kopengagen universitetiga o'qishga kiradi. Andersen juda ko'p mamlakatlarni kezib chiqadi. Fransiya, Shveysariya, Italiya, Gretsiya va Ispaniya singari joylarga sayohat qiladi. Andersenning ijodi 20- yillarning boshlaridan boshlanadi. U dastlab lirik she'rlar, roman, drama, yo'l ocherklari, biografik etyudlar yaratadi.

1828-yilda Kopengagen universitetini tamomlab, 30-yillarda Fransiya, Shveysariya, Italiya, Gretsiya va Ispaniya bo'ylab sayohat qiladi. Bo'lajak adib xalq og'zaki ijodi bilan chuqur tanishib, u yozgan tarix-ertak asarlari yosh kitobxonlar uchun tanildi. Yozuvchining "Bolalar uchun aytilgan ertaklar" (1835-1842), "Yangi ertaklar"(1843-1848), "Tarix" (1852-1855), "Yangi ertaklar va tarix"(1858-1872) kabi ertaklari uning nomini jahonga tanitdi.

Andersen ertaklarining qahramonlari o'zlarining samarali mehnatlari, aql- idroklari, axloq-odoblari bilan kitobxon qiziqishiga sazovor bo'ladi. „Daniyalik Xolger“, „Qor malikasi“, vatanparvarlik ruhi bilan yo'g'rilgan „Daniya - mening vatanim“, ozodlik g'oyasi mujassamlangan „Soqchi“, „Shiron asiri“ va boshqa she'rlari poeziya janrida yaratgan eng sara asarlari jumlasiga kiradi. Andersen o'z romanlarida („Improvizator“) zamonasi uchun juda muhim bo'lgan voqealarni qamrab olishga harakat qiladi. Uning ijodi ko'p qirrali va rang-barangdir.



Andersen bu kitoblarni yaratishda xalq og'zaki ijodidan unumli foydalandi, ularning orzu-umidlarini qog'ozga tushirishga harakatqildi. Ertaklardagi xarakter va jonli nutqni yanada mukammallashtirishga erishdi. Shuning uchun Andersen yaratgan ertaklar sodda, kitobxon uchun tushunarli bo'lish bilan birga, o'quvchilar xotirasida uzoq vaqt saqlanish xususiyatiga ham ega.

Andersen ertaklarida ko'pincha bosh qahramon shahzoda ham emas, malika ham emas, balki oddiy mehnatkash xalqdir. Ular o'zlarining samarali mehnati, aql- idroki, axloq-odoblari bilan kitobxon tahsiniga muvaffaq bo'ladilar. Uning „Qo'ng'iroqli girdob“, „Kumush tanga“, „Kolbasa sixidan sho'rva“, „Go'ng qo'ng'iz“ va boshqa ertaklari fikrimizga yorqin misol bo'la oladi. Ertakchining „Qo'ng'iroqli girdob“ asarini olib ko'raylik. Unda asrlar mobaynida ezilgan, og'ir mehnat va zulmdan tinkamadori qurigan mehnatkash xalq vakili Blakenning o'z xo'jasiga qarshi turishi kitobxonni quvontiradi.

„Bolalar gurungi“ asarida hech kirn taqdirini, kichkintoy o'sib-ulg'aygach kim bo'lib yetishishini bilishi mumkin emasligini, bu ko'proq o'sha bolaning o'ziga, intilishiga, kattalarning ibratomuz pand-nasihatlariga quloq solishiga bog'liq ekanligini o'qiymiz.

Shohona qasrga to'plangan bir to'da bashang kiyingan aslzoda bolakaylar qasrni to'ldirib maqtanishar, ota-onalarining hisobsiz boyliklari bilan quvonishar, kelajakda ota-onalaridan ham badavlatroq bo'lish uchun harakat qilishlarini kibor bilan ta'kidlar edilar. Bu boy-badavlat bolalarning bir-birlariga gap bermay maqtanishlarini yirtiq-yamoq kiyim kiyib olgan bir kambag'al bola tinglab, xo'rsinar, „Bularga yetish bizga yo'l bo'lsin“, deb qo'yar edi o'zicha.Yillar o'tib o'sha juldur kiyimli bola yaxshi o'qib, rassom bo'lib yetishdi, mamlakatda eng boy odamlardan biriga aylandi, o'ziga munosib bir qasr qurdirdi. Qasr hamda uning ichidagi xazinani ko'rishni hamma istardi.



Ertakchining „No‘xat ustidagi malika” asari ham yosh kitobxonning kulgisini qistatadi ham tannoz malikaga qahrg‘azabini qo‘zg‘atadi. Bir shahzoda haqiqiy malikaga uylanish uchun butun yer yuzini, shahar-u qishloqlarni qidirib hech qayerdan haqiqiy malikani topa olmaydi. Hafsalasi pir bo‘lgan, tarvuzi qo‘ltig‘idan tushgan shahzoda qasrga qaytadi. Kunlardan bir kuni ko‘z ko‘rib, quloq eshitmagan mo‘jiza yuz beradi:

Bir oqshom havo aynigandan aynibdi: shundoq chaqmoq chaqib, momaqaldiroq gulduros solibdi, yomg‘ir chunonam chelaklab quyib beribdiki, dahshatning o‘zginasi. To‘satdan shahar darvozasi taqillab qolibdi. Keksa qirol borib darvozani ochibdi. Darvozada malika turardi. Yo qudratingdan, uni nimaga o‘xshatish mumkin! Suv malikaning sochlari, ko‘ylaklaridan sharillab oqib, to‘ppa-to‘g‘ri boshmoqlarining uchlariga, tovonlariga tushardi, u bo‘lsa pinagini buzmay: “ – Men haqiqiy malikaning xuddi o‘ziman”,- derdi.

Malikani sinab ko‘rish ishlari ham g‘alati bo‘ladi. Tunda qirq qavat ko‘rpa ostiga bitta no‘xatni yashirib, joy solib beradilar. Tannoz oqbilak qiz ertalab o‘rnidan turar ekan, „Qanday uxlab turdingiz?”- deyilgan savolga noliq, ichki dard bilan javob beradi: „- Ey, juda yomon! - deydi u. - Ko‘zimni yummadim, desam ham bo‘ladi. Men qandaydir qattiq narsaning ustida yotdim, butun a‘zoyi-badanim ko‘karib ketibdi. Naqadar dahshat!”

Shahzoda qizning haqiqiy malika ekanligini bilib, unga uylanadi.

Bolalar, odatda, hayvonlar, parrandalar, hasharotlar haqidagi ertaklarni sevib o‘qiydilar. Andersen yaratgan ertaklarning juda ko‘pchiligi ana shu mavzuni qamrab olishi bilan ham xarakterlidir.

„Dyumchaxon”, „Irkit o‘rdakcha”, „Botqoqlik shohining qizi”, „Baqa”, „Burga bilan professor” singari ertaklari o‘zbek kitobxonlarining ham sevimli asarlariga aylanib ketgan.

Xullas, Daniya ertakchisi Hans Kristian Andersenning ijodi



uzoq yillardan beri yosh kitobxonlarga zavq-shavq bag'ishlab kelmoqda.

Jonatan Svift

1667-yilda Angliyaning yaqin yaqin qo'shnisi va oroldagi mustamlakasi bo'lgan Irlandiyaning poytaxti Dublinda ingliz muhojiri oilasida tug'ilgan. Otasi u tug'ilmasdan sal avvalroq vafot etgan edi. Ziyrak Jo huquqshunos, advokat tog'asi qo'lida tarbiya topadi. Bola boshlang'ich maktabda tahsil ko'rgach, o'n to'rt yoshida tog'asi Dublin universitetining dindorlik fakultetiga o'qishga beradi. Jonatan universitetni tugatgan vaqtda Dublinda irland katoliklarining inglizlarga qarshi qo'zg'oloni yuz beradi. Shu paytda Irlandiyadan quvilgan ingliz oilalari qatori yosh dinshunos olim Svift ham Dublinni tark etadi va "katta yer" -Angliyaga yo'l oladi. Svift bu yerda otasining do'sti Vilyam Templga kotib bo'lish bilan birga uning asrandi qiziga murabbiylik qiladi. Shuningdek uning boy kutubxonasidan bilimini oshirib, gazetalarga maqola, pamflet, feletonlar, she'rilar yozib turadi. Uning dastlabki asarlaridayoq ijtimoiy hayot masalalarini, siyosiy voqealarni hajv ostiga oladi. Chunonchi, XVII asrning oxirlarida Fransiyada, keyinroq Angliyada qadimgi adabiyot tarafdorlari bilan yangi adabiyot tarafdorlari o'rtasida qizg'in bahslar bo'lib o'tadi. Bu adabiy bahsga janob Templ va uning shogirdi Svift ham qatnashadi. O'shanda buyuk faylasuf olim Bualo qadimgi adabiyotni, folklorshunos, xalq ijodi muxlisi Sharl Perro yangi davr adabiyotini himoya qilib chiqadi. Svift 1697-yili shu bahsga bag'ishlab (ustozni Templning topshirig'i bilan) "Kitoblar jangi" nomli mashhur hajviy pamfletni yozdi. Sviftning bu ilk asarida qadimiy va yangi kitoblar ramziy ma'noda bir-biriga qarshi qo'shin tortishar, qadimgi yunon shoiri Pindar yangi ingliz shoiri Kauliga qarshi ulug' "Iliada" ijodchisi Homer yangi qasidachi Draydenga qarshi jang qilishardi. Bu jangda



Zeus, Afina, Apollon, Afroditalar qadimgi adabiyot qo'shinlarini himoya qilar, yangi davr adabiyotiga esa "Adabiy tanqid" nomli mayib-majruh tangri homiylik ko'rsatardi. Svift ijodiga xos kinoya, qochiriqlar shu dastlabki asardayoq ko'rinib qoladi.

Qadimiy va yangi kitoblar o'rtasidagi jangda Sviftning o'zi ikkala tomonni himoya qildi. U hajviyasini o'rgimchak va asalari haqidagi hikoyat bilan tugatadi. Sviftning fikricha, "Haqiqiy adib o'rgimchak singari o'z ichidan chiqqan to'qima iplari bilan tanob tortaverishi yaxshi emas, asl ijodkor asalariday hamma yerda hayot materiali sharbatini yig'ib, uni san'at asaliga aylantirishi kerak". Sviftning ana shundan keyingi hayoti siyosiy kurashlarda toblanadi, u bo'sh vaqtlarida tibbiyot ilmi bilan shug'ullanadi. Chunki u qachondir dengizchi bo'lishi va bunda ana shu kasb qo'l kelishini yaxshi bilardi. U bu orzusiga erishdi ham. Bir necha yil dengiz, okean kemalarida xirurg bo'lib ishlaydi. O'z qahramoni boshidan kechirgan ko'p voqealarning aynan guvohi bo'ladi. Muhimi, siyosiy kurashlardan toliqqan adib, asarlarida bu jarayonni badiiy-kinoyaviy talqin etadi. Jonatan Svift asli ingliz bo'lib, avvallari Irlandiyaga past nazar bilan qaragan bo'lsa ham, haqiqatgo'y ijodkor sifatida har qadamda bechora irlandlarning insoniy huquqlari toptalayotganini ko'rib jim tura olmaydi. U Dublinda ekanligida, Angliyaning hukmparast, olchoq lordlari irland dehqonlarini xonavayron qilayotganligini, irland hukumatining barcha huquqlari tortib olinganligini, irland xalqining taqdiri Londonda hal etilayotganligini g'azab bilan fosh etuvchi asarlar yozdi. Bu singari muammolar "Gulliverning sayohatlari"da ayniqsa yorqin aks ettirilgan. Aslida Jonatan Svift bu asarini boshqa bir buyuk ingliz adibi Daniel Defoning "Robinzon Kruzo" romaniga hajv sifatida boshlagan edi. "Robinzon Kruzo"ning bir necha qismdan iborat davomi bo'lib, ularda qahramon mavjud qirollik tuzumida, adolatli qonunlar asosida oddiy mehnatkash odam o'z baxtini topadi, degan g'oyani ilgari surgan edi. Svift esa aksincha bir-biridan battar



olchoq, ochko'z, molparast, mansabparast, tekinxo'r, takabbur qirollar va ministrlar hukmronlik qilgan jamiyatda inson hech qachon baxtini topolmasligini Gulliver sayohat qilgan o'lkalar timsolida ravshan ko'rsatadi.

Lemyuel Gulliver mittivoylar o'lkasida Tog' (Ulkan odam) odamga aylanadi. Oyog'i ostida minglab liliputlar uymalashadi. Gulliverningro'molchasida chavandozlar ot o'ynatadi, qahramon 600 ta to'shakda uxlaydi. Darozlar o'lkasida esa Gulliverning o'zi mitti bo'lib qoladi. Kichkina quticha-sandiqchada yashaydi. Buni burgut changalida osmonga olib chiqib ketadi. Gulliver otlar o'lkasiga borib qolganda, u yerda otlar odamlarni minib yuradi... Yoxud, mittivoylar "Tog' odam"ni 91 ta arqon va 36 ta qulf yordamida bog'lab-chirmab tashlaydilar. Bu raqamlar muallif hayotiga aloqador deb qaraladi. Aytishlaricha, 36 xil toifadagi guruhlar manfaatini ko'zlab, 91 ta pamflet -hajviya yozgan.

Umuman, "Gulliverning sayohatlari"dagi juda ko'p voqealar ramziy ma'noda hayot voqeligini aks ettirishga qaratilgan. Aytaylik, liliputlar orolida tuxumni uch tarafidan sindiruvchilar bilan poynagidan sindiruvchilar guruhi o'rtasida ashaddiy bahs boradi. Tuxumni uchidan sindirishdan bosh tortganligi uchun 11 ming kishi o'lim jazosiga hukm qilingan. Bu masalaga bag'ishlab yuzlarcha tom kitoblar yozilgan. Adib bu bilan o'z zamonasidagi katoliklar vaprotestant mazhabidagi dindorlarning ashaddiy ixtiloflari aslida arzimas poydevorga qurilganligi, ammo shu arzimas sabab tufayli juda katta qirg'inbarotlar yuz berayotganligini alamli qahqaha bilan tasvirlaydi. Yoki, yana bir o'rinda adib mittivoylar o'lkasidagi Tremeksenlar va Slemeksenlar, ya'ni baland poshna tarafdorlari bilan past poshna tarafdorlari o'rtasidagi janjalni tasvirlaydi. Shuningdek, romanda hukumat rahbarlarining shaxsiga sig'inish, ularni dabdabali unvonlar bilan ulug'lash masxara qilinadi. Masalan, "Liliputiyaning qudratli imperatori, jahonning quvonchi va dahshati, podsholarning podshosi, insoniyatning



eng ulug' farzandi, boshi quyoshga yetgan, bahorday so'lim, yozday himmatli, kuz singari to'kin, qish singari qahrli Golbasto Momaren Evlem Gerdaylo Shefin Molli Oliy Gu Oliy hazratlari."

Romanda Liliputiya'dagi ahmoqona tartiblardan yana biri - yuqori mansablarga qanday odamlar tanlanishi o'tkir hajviy bo'yoqlarda tasvirlanadi: "Birorta amaldor vafot etsa yoki imperatorning g'azabiga uchrasa, bo'shagan lavozimga da'vogar bo'lganlardan besh-olti kishi oliy hazratlari va butun saroy ahlini xushnud etib, dor o'ynab berish uchun imperatordan izn so'rashadi. Kimki arqondan qulamay, hammadan balandga sakrasa, boshorin o'shaniki bo'ladi". Mukofot olish tartiblari ham shunga o'xshash. Imperator tayoq o'ynatganida uning ostidan va ustidan chaqqonlik bilan likillab o'ta oluvchilarga oliy mukofotlar beriladi.

Swift o'z hayoti davomida Angliya hukumati rahbarlariga juda ko'p yaxshiliklar qilgan bo'lsa-da, ular adibga bergan va'dalarini tez unutishdi. Bundan insoniy g'ururi ozor topgan adib "Gulliverning sayohatlari" da shunday hazil qiladi: ...har birodam birinchi ministr qabuliga kirib, arzini qisqa qilib aytganidan so'ng, esida qolishi uchun uni burnidan chimchilashi yoki qorniga bir tepishi kerak bo'ladi. "Gulliverning sayohatlari" muallifi "Robinzon Kruzo" muallifi bilan bahslashar ekan, hayotning cheksiz rang-barangligini, murakkabligini, kulgili va fojiali voqealarga boyligini idrok etishda Daniel Defoga nisbatan mislsiz yuksaklikka ko'tariladi. Shu bilan birga u inson ruhiy holatlarini, qahramonni o'rab turgan tabiiy va ijtimoiy muhitni keng, batafsil tasvirlashni Defodan o'rganadi ham.

Asar qahramoni Gulliver turli afsonaviy joylarga borib, ajoyib-g'aroyib fantastik voqealarni boshdan kechirsa-da, uning xarakteri, fe'l-atvori, ichki dunyosi nihoyatda haqqoniy, realistik bo'yoqlarda chiziladi. U liliputlar o'lkasidagi ahmoqona tartib-qoidalarga norozilik bildirmaydi, ularga barcha fuqaro qatori bo'ysunadi. Liliputiyaning fani, qonunlari, urf-odatlari, bola



tarbiyalash jarayoni, ya'ni buni jamiyat va davlat zimmasiga yuklatilishi haqida ajoyib lavhalar keltiriladi.

Romanning 3-4-qismlarida, ayniqsa, Svift satirasi g'oyat kuchayib, umuminsoniy, falsafiy umumlashmalar darajasiga ko'tariladi. Adib Gulliverning Laputaga sayohati voqealarida o'zga xalqlarni asoratda saqlashga uringan Angliyaning mustamlakachilik siyosatini, davlat rahbarlarining xalqdan uzilib qolganligini, ilm-fanda soxta, savodsiz, ahmoq odamlar ko'payib ketganligini yorqin hajviy bo'yoqlarda tasvirlaydi. Laputa hukumati lapakka o'xshash uchar orolda yashaydi. U faqat xalqdan soliq undiradigan vaqtda, yoki qo'zg'olonlarni bostirish uchun yerga yaqinlashadi. Boshqa vaqtlarda doimo osmonda yashaydi. Laputudagi "Lo'ttibozlar akademiyasi"da ahmoqona "ilmiy" loyihalar ishlab chiqiladi. Masalan, lo'ttiboz olimlar marmarni qumga aylantirish, yungsiz qo'ylarni urchitish, uylarni tomidan boshlab eng so'ngida poydevorini qurish haqida bosh qotirishadi. Yana bir o'rinda Gulliver akademiyaning tilshunoslik maktabiga qilgan tashrifi bayon qilingan. U yerda uch professor ona tilini takomillashtirishning turli loyihalarini muhokama qilishayotgan edi. Birinchi loyihada ko'p bo'g'inli so'zlarni bir bo'g'inlikka aylantirib, fe'l va sifat doshlarni chiqarib tashlab, so'zlashuv tilini soddalashtirish taklif qilinardi. Muallif faqat otlargina mavjud predmetlarga mos keladi, deb ta'kidlaydi. Ikkinchi loyihada hamma so'zlarni to'liq yo'qotish taklif qilinardi. Ushbu loyiha muallifi buning salomatlik va vaqtni tejash uchun nafi kattaligini asosiy dalil qilib ko'rsatadi. Chunki so'zlarni talaffuz qilish bo'g'iz va o'pkani toliqtiradi, demak umrni ham qisqartiradi. Yoki muallifning matematika maktabiga tashrifi ham qiziqarli ma'lumotlarga boy. Bu yerda shunday metodda o'qitiladiki, buni Yevropada qo'llash amrimahol tuyuladi. Har bir teorema isboti bilan boshog'riq dori o'raladigan qog'ozchaga siyohda yoziladi. O'quvchi ana shu qog'ozchani nahorda yutib yuboradi va uch kungacha suv hamda nondan boshqa hech



narsa yemaydi. Qog'oz hazm bo'lgandan keyin uning ichidagi dori o'zi bilan teoremani yetaklab, miyaga ko'tariladi. Ammo bolalar dorining achchiqligi va qisman ular sho'xligidan bo'lsa kerak, ular sal chetroqqa borib tuflab tashlashadi.

Asarning falsafiy utopiya darajasiga ko'tarilgan oxirgi qismida otlar aqli zotlarga, odamlar maymunsimon aqlsiz maxluqlarga - yexularga aylanadi. Yexularning eng xunugi va axmog'i podsho bo'ladi. Bosh vazirning vazifasi - qirolning boshdan oyog'igacha yalab chiqish va unga yangi-yangi urg'ochilar topib kelishdan iborat. Yexularning ishi - hammayoqni vayron etish, bir-birini qirib yo'qotish. Ular oltinga va boshqa yaltiroq toshlarga sajda qilishadi.

Romanda shu kabi g'aroyib sarguzashtlar bir talay. Ularning aksariyatida muallif "men"i sezilib turadi.

Janni Rodari **(1920 - 1980)**

O'zining ijodiy faoliyatini jurnalistlikdan boshlab, butun dunyoga mashhur muallif - ertakchi nomini olgan, o'zining adabiy faoliyati uchun H.K. Andersen nomidagi Oltin medalga sazovor bo'lgan yozuvchi. U nonvoyning o'g'li. Mamalakatning shimolida Alp etaklarida joylashgan kichkinagina shaharda tug'ilgan Janni bolaligidan o'zining aqlga sig'mas fantaziyalari bilan ajralib turardi. Bolaning boy tasavvuriga uni o'rab turgan barcha narsalar: ko'lning toza, tiniq suvi, oroldagi qasr va uning o'rtasida otasining nonvoyxonasi hamda undapo'rsillab, bijirlab, pufakchalar chiqarib turgan oshgan xamir ozuqa berardi. O'sha vaqtlarda u bir burda non uchun mehnatning og'ir mashaqqatlarini chekishiga to'g'ri keldi. U o'zi o'ylagandek musiqachi ham, rassom ham bo'lmay, u uchun juda zerikarli va diqqinafas bo'lgan seminariyada o'qishga tushib qoladi. Ammo Rodari o'zini hayoti ustidan hukm chiqara oladi; institutda



ma'ruzalar tinglaydi, o'qituvchilik qiladi, ammo "quruq o'qituvchi" bo'lmaydi, bolalarga tushunarli, xushchaqchaq o'qituvchi bo'lib yetishadi. U bir narsaga amin edi: maktab yumorga muhtoj, chunki unda "kam kulishadi", lekin "o'rganilishi kerak bo'lgan ko'p narsani achchiq ko'z yoshlar bilan foydasiz o'rgatishadi, biroq shu narsani kulib o'rgansa ham bo'ladi". Rodari o'zining birinchi she'rlarini bosmadan chiqarishni "Unita" gazetasida, unga "Bolalar sahifasi"ni topshirishganda boshlagan edi. Gazeta kommunistik gazeta bo'lib, unda birinchi navbatda kambag'al bolalar hayoti aks ettirilishi kerak edi. "Hunarlardan nima keladi?", "Hunarlar qaysi rangda?", "Ovchi", "Baliqchi", "Farrosh" kabi she'rlarining nomiyoq, uning adabiy ijodi qaysi yo'nalishdiligini yorqin ko'rsatib turadi. Yozuvchi o'z ijodining asosiy qismini ertaklarga bag'ishladi. "Men o'ylaymanki, - deb yozgan edi Rodari, - ertaklarning ham yangisi, ham eskisi aqlni tarbiyalashda yordam bera oladi. Ertak bu turli xil gipotezalarning xazinasi. Ertak bolalarga atrof-muhitni anglashga, o'zining tasavvuri bilan unga tanqidiy yondoshishga, borliqqa yangi yo'llar bilan kirishga kalit bera olishi mumkin". Ammo Rodarini katta ertak yozishga undagan narsa Kollodining "Pinokkio" asaridir. Faqat uning "Chippolino"sida qo'g'irchoqlar emas, odamlarga juda o'xshagan sabzavot va mevalar ishtirok etgan. Ular yaxshi va yomon his-tuyg'ular hamda yumor bilan yo'g'rilgan. Hikoya insoniylikni hamda bechora kambag'al odamlarning hayotiy muammolarini imkon qadar kengroq yoritishga qaratilgan. Muallifning bitmas-tuganmas fantaziyasi tufayli bechoralar obrazi Qovoqboy, usta Uzuncha, professor Nok kabilarda o'z ifodasini topadi. Rodarining qahramonlari doimo ijtimoiy jihatdan aniq belgilangan, shuning uchun ertakning boshqa tomonida Limon shahzoda, ishyoqmas Apelsin, izquvar Sabzilar obrazi mavjud. Chippolino butun piyoz oilasi bilan Limon qirolligida yashaydi. Ularda sodir bo'layotgan barcha yomonliklar qahrli shahzodaning xohish-istagi bilan



bo'ladi, ammo "ular o'zlari yaxshi odamlar bo'lsalar-da, hamma narsaning to'g'risini aytish kerak, ularning omadlari hayotda chopmagan. Nima ham qila olardik, qayerda piyoz bo'lsa, o'sha yerda ko'z yosh ham bor".

Ertakona qahramonlarning hayoti ko'p hollarda hayotiy muammolar bilan bog'liq. Masalan, mingoyoq otaga ikkita o'g'lining oyoq kiyimini almashtirish to'g'ri keladi. Ammo usta Uzumchaning esa poyafzal tikishga shuncha charmi yo'q. Uning ustiga ota shuncha poyafzal pulini to'lashi uchun bir umr ishlashiga to'g'ri kelar edi. Bechoralar vaziyatdan chiqish imkonini o'ylab topishadi: faqatgina eng eskirib ketgan poyafzallarning bir nechtasini almashtirishadi xolos. Hikoya bayonining oxirigacha personajlar xarakterlaridagi o'ziga xos tomonlarini sabzavotlarga, mevalarga, hasharot hamda hayvonlarga xos bo'lgan xususiyatlarini yo'qotmaydilar. Shu bilan bir qatorda muallif kichik kitobxonlarni yaxshi va oq ko'ngil odamlar yana ham yaxshiroq yashashga intilishlari, yomon va badxulq odamlar o'zlarining bo'lmag'ur odatlarini tark etishlari hamda yaxshilarni ezmasliklari kerak, degan xulosaga kelishlariga chorlaydi. Ijobiy qahramonlarning barcha sarguzashtlari va his-tuyg'ulari bir maqsadga - haqiqatni qaror toptirishga qaratilgan. Ertakning oxirida shu ro'yobga chiqadi. Lekin kekxa Chipollone o'zining o'g'li Chipollinoga takrorlaganidek, "do'stim, hech qachon esingdan chiqarmagilki, dunyoda yomonlar ko'p, sen haydab chiqarganlarning esa bir kun kelib qaytishi mumkin"... Rus tilida bu asarni mashhur bo'lib ketishiga sababchi bo'lgan adib esa S.Y.Marshak edi. Rodari o'zining butun ijodi davomida ijtimoiy qarashlariga, haqiqat g'oyalariga sodiq qoladi. Hattoki, "Osmondagi tort" asarining sujeti aql bovar qilmas darajada o'zgarib ketganda ham, ya'ni atom bombasi bahaybat ulkan tortga aylanib qolib, ishchilar shaharchasi ustida muallaq turib qolishi, muallif ta'kidlaganidek, bunda ham o'git "shaffof"dir: agar inson tabiat resurslaridan



qurollanishga emas, balki yaxshi ishlar uchun foydalanganlarida edi, unda nafaqat millionlab och, kambag'allarni to'ydirish, kiyintirish mumkin edi, balki shokoladli tortlar hamma uchun yetarli bo'lgan bo'lardi, degan fikr bolalarcha talqin etiladi.

“Yangi yil archalari sayyorasi” asari qahramoni Marko kosmik kemada sayr qilib yurib, o'zga sayyoraliklar bilan uchrashib, ularning do'stona munosabatlarini ko'rib, kosmik sivilizatsiyalarga tegmasdan, barcha sayyoralarning odamlarini birlashtirish imkoniyati borligi haqidagi fikrga keladi. “Jip televizorda” ertagida esa butun dunyoni qurollantirish haqida fikr yuritayotgan olimlarning tafakkurini Koinotni tinch yo'l bilan zabt etish yo'llarini izlashga qaratadi. Insonning umri, hayoti har narsadan ustun ekanligi Rodari asarida yana bir bor yorqin satrlarda ta'kidlanib, insoniyat barhayotligining asosi barcha uchun foydali bo'lgan mehnatda ekanligi takror uqtirib o'tiladi. Ammo insoniyatga kerakli bo'lish uchun tayyorgarlikni bolalikdan boshlash kerak. Shuning uchun yozuvchi o'zining asarlarini bilishga oid ma'lumotlar bilan boyitgan holda “Dunyodagi barcha narsalar haqida” deb nomlangan she'rlar majmuasini hamda “Nima uchun? Nimaga? Nima sababdan?” deb nomlangan kichik, jozibador novellalar bilan qo'shilgan she'rlar to'plamini yozadi.

Yozuvchining barkamol insonni tarbiyalash g'oyasi haqidagi fikrlari

“Jelsomino yolg'onchilar mamlakatida” deb nomlangan ertagida mujassamlashgan.

Uning asosiy g'oyasi - yolg'on bilan kurashish. Rodarining ta'kidlashicha, “insoniyatning eng xavfli dushmanlari - bu yolg'onchilar”. Asar sujetining yanada yorqinroq chiqishi uchun telba-teskari usuldan foydalanadi: barcha haqiqatlar teskari qurilgan bu shaharda hamma narsa “aniqlikdan teskari tomonga” tarzidagi bema'ni ko'rinishga ega: biror-bir narsani faqatgina



soxta pullarga sotib olish mumkin, mushuklar vovillashadi, “qo‘rqinch” so‘zini o‘rniga “jasurlik” so‘zini ishlatish qabul qilingan va h.k. Rodarining bosh qahramoni har doimgidek, yomonlik bilan yolg‘iz kurashadi. U go‘zal ovoz sohibi, ovozining sehrini juda o‘rinli hamda unumli ishlata olgan asar qahramoni: “Bu qirollikni vayron qilish uchun, faqatgina qo‘shiqni maromiga yetkazib kuylashning o‘zi kifoya edi”, - deydi.

Rodarining “Fantaziya grammatikasi” (Sarguzashtlar o‘ylab topish san‘atiga kirish) asari uning fantaziya tabiati haqidagi fikrlari va tajribalari borasidagi mehnati samarasidir. Bu asarda adib o‘zining shu sohadagi kuzatishlari, ertaklar yozishda qanday usullardan foydalanishi, ertaklar yozuvchining xayolotida qanday vujudga kelishi haqidagi fikr-mulohazalarini umumlashtiradi.



XII. RUS BOLALAR ADABIYOTI

Reja:

1. *A.S.Pushkin ertaklari ahamiyati.*
2. *L.Tolstoy - bolalar kitobxonligida.*
3. *K.Chukovskiy - bolalar shoiri va adibi.*
4. *S.Marshak - bolalar shoiri*

MAVZUGA DOIR TAYANCH TUSHUNCHALAR: *seminariya, qirollik, kosmiksvilizatsiya, novella, sarchashma, arxaik, antik, slavyan, vizantiya, grek, monolog, dialog, alifbo-kitob, alifbo-yozuv, sentimentalizm, lubochnaya, lubka, gravyura, taxtakach, masal, grammatika, miniatura, ertakonasujet, mozaika, badiiysayqal, ertakshunos, germanistika, naturmort, illyustratsiya, mifologiya.*

Aleksandr Sergeevich Pushkin (1799-1837)

Ta'lim-tarbiyasida Yevropa madaniyati, fransuz Uyg'onish davri adabiyoti ta'siri katta. U bolaligidan fransuz va rus tillarida erkin so'zlasha olgan. Bo'lajak shoir litseydagi talabalik davridayoq antik adabiyotning mumtoz hamda Yevropa yozuvchilarining asarlarini sevib o'qish bilan birga, rus klassiklarining kitoblarini ham sevib mutolaa qilgan. Qadimgi rus adabiyoti unga kam tanish bo'lsa-da, ammo uning estetik jihatdan shakllanishida xalq folklori eng katta ta'sir ko'rsatgan. Pushkin davrida, hatto dvoryanlar oilalarida ham, ertaklar



aytish urf bo'lgan. Shoir bolaligida ertaklarni o'z enagasi Arina Rodionovna Matveevadan, buvisi Mariya Alekseevna Gannibaldan, uy xizmatchisi Nikita Kazlovdan hamda Moskva yaqinidagi Zaxarova qishlog'ining dehqonlaridan eshitganligini ko'p ta'kidlaydi. U Ukrainada janubda, Nijegorod shahridagi Boldinoda, Janubiy Ural va Orenburg tomonlarda bo'lib ertaklar, maqollar, matallar, qo'shiqlar eshitgan va yozib olgan.

Pushkin ijodida bolalar mavzusi kam uchraydi. Faqatgina uncha katta bo'lmagan "Go'dakka" (1824), "Go'dakka epitafiya" (1828) (epitafiya - qabr toshi ustidagi bitik) she'rlari bevosita bag'ishlovdir. Ammo uning ko'pgina lirik she'rlari, doston va adabiy ertaklari bolalar kitobxonligida mashhur. Shu sababli Tvardovskiy haqli ravishda, u bizning hayotimizga bolaligimizning ilk davrlaridan boshlab kirib keladi va umrimizning oxirigcha bizni hech qachon tark etmaydi, degan edi. Muhimi, Pushkin yangi rus adabiyotini realistik va xalqona tamoyillar bilan boyitdi. U "Ruslan va Ludmila" dostonini yozishni o'n yetti yoshida boshlab, yigirma yoshida tugatadi. Shoirning ana shu ilk ijod namunasidayoq ertak ajoyibotlari olami mavjud. Bu bir necha yuz yillardan buyon o'quvchilarni doimo o'ziga rom etib kelayotir. "Ruslan va Ludmila" dostonining mashhur muqaddimasi kitobning ikkinchi nashri (1828-yilda) bilan paydo bo'ldi va u mustaqil asar deb talqin qilinadi.

Muqaddimaning asosiy qahramoni qo'shiqchi hamda ertakchi bo'lgan "Bilimdon Mushuk" ("Kot uchyoniy"). Muallifning ertakona sujet mozaikasini oldindan berishi bejiz emas, bunda qo'shiqlar hamda ertaklar qanday dunyoga kelishi, inson tomonidan o'ylab, to'qib bo'lmaydigan g'ayritabiiy xalq g'oyalari sirli rishtalar bilan bog'langani anglashiladi. Shu sababli shoiro'sha sirli manzil (Yashil eman daraxti o'sayotgan Dengiz bo'yi)da ertaklar eshitganini, shu jumladan "Ruslan va Ludmila" ertagini ham tinglaganini muqaddimada ta'kidlaydi. Ajoyibotlarning tasviri go'zal suv parisi va suv alvastisi,



yovuzkuchlar (demonologiyadan), ya'ni xalq ishonadigan qahramonlar talqinidan boshlanadi. Keyin misli ko'rilmagan olam tasvirlanadiki, buni to'qima yo haqiqiyligi anglash qiyin. "Ko'z ko'rib, quloq eshitmagan yo'lakchalarda misli ko'rilmagan hayvonlarning oyoq izlari..." Va shu zahotiyoq, notanish manzarani haqiqiy rus ertagi sujeti egallaydi: "U yerda, eshiksiz, derazasiz tovuq oyoqli kulbacha..." xalq ijodida o'tloq va o'rmon orasidagi chegara ma'nosini anglatuvchi, ya'ni ikki qirolik orasidagi chegara - qahramon oilasi yashaydigan odamlar qirolligi hamda yovuzlik hukmronlik qiladigan "boshqa" O'lmas Kasheshey istiqomat qiladigan personajlar tasviri. "U yerda o'rmon va mo'jizalar to'la maydoncha..." - shoir sirli tabiat bilansehrli g'oyalarning bog'liqligini

ko'rsatmoqchi bo'ladi, so'ngra esa dengizdan ajoyibotlarni paydo bo'lishini "ko'rsatadi": "U yoqda tongdan to'lqinlar xabar berar, Va o'ttiz uchta pahlavon o'zlarining dengiz bobolari bilan birin-ketin suvdan chiqib, kimsasiz va qumloq sohilda saf tortib turar"...O'quvchi endi haqiqatdan shahzodani ham, maftunkor shohni ham, pahlavon bilan uchib yurgan jodugarni ham, yovuz bo'ri bilan malikani ham ko'rishga tayyor. Va nihoyat, xalqning oddiy taxayyulidan paydo bo'lgan eng buyuk qahramonlar - Yalmog'iz kampir (Baba Yaga) hamda o'lmas podshoh Kasheshey (Tsar Kashey) paydo bo'lishadi. "U yerda rus ruhiyati U yerda Rus ufurib turibdi!" - shu tariqa, shoir tomonidan olib chiqilganrus xalq ertagiga oliy baho beriladi. "Men ham u yerda bo'ldim, bol ham tatidim..." Shoir xalq folklori xotimasini so'zma-so'z bayon qilib, o'zining ijodining sarchashmasi xalq she'riyatidan olinganligini barchaga ayon qiladi. Shu tariqa, Pushkin ertaklarni yuqori adabiy janrlar bilan bir qatarga qo'yadi. Shoir nigohida ularning har biri butun birdoston. Binobarin, bolalar kitobxonligi doirasiga kiruvchi "Pop va uning xizmatkori Balda haqida ertak" (1831), "Shoh Saltan, uning shavkatli va pahlavon bahodir o'g'li knyaz Gvidon", "Oqqush



malika haqida ertak”, “Baliqchi va baliq haqida ertak” (1831) kabi o’nlab ertaklar shoir ijodining eng gullab yashnagan, mashhur asarlari yaratilgan vaqtda yozilgan. Bularning barchasi Pushkinning xalq og’zaki ijodiga yuksak munosabatini ko’rsatadi. Shunisi e’tiborliki, Pushkinning ko’pgina ertaklari jahon xalq ertaklari sujeti asosida yozilgan. Jumladan, uning “Baliqchi va baliq haqida ertak”i nemis ertakshunoslari aka-uka Grimmlarning “Baliqchi va uning xotini” ertagi sujetiga monand. Yakob va Vilgelm Grimmilar ertagi 1815-yilda nashr qilingan “Bolalar va oilaviy ertaklar” to’plamida chop etilgan. Grimmlarning ertagi V.A.Jukovskiy tomonidan 1826-yilda rus tiliga tarjima qilingan va “Detskiy sobesednik” jurnalida chop etilgan. Aytish mumkinki, Pushkinijodida ularning alohida ta’siri bo’lgan. Natijada, bir xil sujet asosida yozilgan ertaklarlarning o’ziga xos mushtarak va farqli xususiyatlarini kuzatish mumkin. Aka-uka Grimmilar ertagining G.Petnikova tomonidan rus tiligaqilingan tarjimasi nasriy bayonga ega va unda baliqchichol kambala- baliqlarningshahzodasini tutadi; undan avval yangi uy, qasr so’raydi. So’ngra kampir malika, imperator, rim papasi bo’lishni orzu qiladi. Barcha tilaklari amalga oshgan kampir endi quyoshva oyning chiqishi-yu botishini o’zi belgilamoqchi, xudo darajasiga ko’tarilishni istaganda, eski uyiga qaytib qoladi. Pushkin esa ertaknixalqona uslub, qofiyasiz she’r shaklida yozadi. Bu vazn ertak hikoyasiga musiqiylik baxsh etgan. Vaznga mos tarzda unda ma’naviy-falsafiy mazmun ham mavjud. Chol oltin baliqdan avval yangi tog’ora, so’ngra uy, keyin qasr so’raydi. Malikaga aylangan kampiri dengiz hukmroni bo’lishni xohlab, cholni haydaganda eski uycha va teshik tog’ora qaytib oldida paydo bo’ladi. Demak, Grimmilar ertagida bitta istak ziyod bo’lishdan tashqari, siyosiy hayot va davlat boshqaruviga daxldor shartlar qo’yilgan. Chol ham o’z kampirining har bir xohishiga qarshi borib, uni insofga chaqirishga harakat qiladi, baliqni boshqa bezovta qilmaslikni so’rab, yalinib-yolvoradi. Shunga o’xshash, chol-kampir munosabatida muloyimlik, har bir orzu



ro'yobga chiqqach, kampirning cholga nisbatan mehri iyib, "Ko'ryapsanmi, qanday yaxshi?", "Ha, nima axir, bu ajoyib-ku?", - degan iqrorlari ko'zga tashlanadi. Ya'ni, ertak qahr-g'azabdan xoliroq va xalqning shunchaki xayolparastlik tuyg'usiga monand. Kampir boy-badavlat, hatto, "imperator" va "Rim papasi" bo'lganda ham o'z choliga munosabati o'zgarmagan. U bilan odatdagidek muomala qiladi, yashaydi...

Pushkin ertagi variantida esa real hayot manzaralari ustuvor. Kampir har safar cholni "Eh, sen ahmoq, sodda chol, qani, jo'na dengizga!", - deb so'kadi. Va har gal orzusi ro'yobga chiqqach, tag'in-da darg'azab bo'lib, cholni haqoratlaydi hamda unga xizmatkoridek munosabat ko'rsatib, haydab soladi. Chol ham "la'nati kampir"ga qanday chora ko'rishni bilmaydi. Aslidau oltin baliqchani hech ta'masiz qo'yib yuborgan edi ("Tangri yoring bo'lsin, baliqcha"). Shu sababli baliq ham cholga har gal minnatdorlik yordamini ado etadi: "Qayg'urmagil, tangri yor bo'lsin!". Kampir esa oltin baliqchagao'zining ushalmas orzularini ro'yobga chiqarish vositasi sifatida qaraydi. U dastlab o'zini zarur narsalarnigina istayotgandek tutadi, keyin esa ko'proq va yana mo'lroq narsalar xohlaydi. Zero, kampirga hokimiyatning tashqi ko'rinishi kifoya qiladi, u zodagonlik va qirollik xizmatining ichki mazmun-mohiyatini tushunmaydiva istamaydi ham. Bu oddiy xalq nazdidagi "hokimiyat ahlining boy, farovon hayot kechirishi"ga oid sodda fikrlashining ifodasidir. Ertakning asosiy g'oyalaridan biri - "buyuk" vazifalarni bajarishni da'vo qilishdan ko'ra, har kim o'z kuchi etadigan ishni (masalan, kampir ipini yigirishi, chol to'rda baliq ovlashi) bajarishi yaxshiroq ekanligidir.

Dengiz Pushkin uchun doimo erkin odatlar, ya'ni o'ziga xos olam, har xil chegaralardan xoli o'zgacha dunyo sifatida qarab kelingani e'tiborga olinsa, ertakda insoniyatning boylik va mansabcho'qqilari sari intilish kuchi yoki uni o'ziga maftun qilib, domiga tortayotgan orzu-istaklar ko'proq yerga xosligi



anglashiladi. Insonning ochko'zligi va ahmoqligi tufayli tabiatdagi mutanosiblik buzilishini shoir teran his qiladi. Shu sababli, ertak oxirida barcha narsalarning tartibi o'z o'rnini topadi: chol o'z kampirini o'sha yerto'la va teshik tog'ora oldida ko'radi. Muammo yechimi - aqlsizlikning mag'lub bo'lishi. Bu jihatlar har ikkala ertak varianti uchun daxldor bo'lsa-da, Pushkino'z ertagida keskinlikni oshiradi. Bunda kampir shafqatsiz, qahrli va xudbin tasvirlangan. Cholning g'azabi, kinoya va pichinglari ham shunga yarasha dag'al. Demak, bir xil sujetga ega ertaklarning talqinida har bir xalqning qarashlari, ijtimoiy turmush tarzi, voqelikka munosabati turlicha aks etadi. Aytish mumkinki, A. S.Pushkin ertagida ijodiy g'oya, badiiy sayqal va real davr voqeligi yorqinroq ko'rinadi. Va bu shoir asarlarining sarchashmasi xalq ijodiyoti ekanidan dalolat berish bilan birga, unga ijodiy yondashganligini e'tirof etadi. Zero, uning yosh yozuvchilarga ko'proq ertaklar o'qishni maslahat berishibejiz emas.

Tolstoy Lev Nikolayevich (1828-1910)

Rus yozuvchisi. Rossiyadagi qadimiy dvoryanlar sulolasidan, Qozon universitetining arab-turk va huquqshunoslik fakultetlarida o'qigan. 1851-53-yillarda Kavkazda bo'lib, janglarda ishtirok etgan. 1855-yilda Peterburgga borib, N. A. Nekrasovnnng "Sovremennik" ("Zamondosh") jurnali va jurnal atrofidagi yozuvchilar (I. S. Turgenev, I. A. Goncharov, N. G. Chernishevskiy va b.) bilan hamkorlik qilgan. Bolalik kezlarida rus va arab xalq ertaklari, A.S.Pushkin she'rlari, shuningdek, Yusuf haqidagi Injil rivoyati ta'sirida she'rlar yozgan. Birinchi yirik asari - "Inson kamolotining to'rt davri" avtobiografik asari ("Bolalik", 1852; "O'smirlik", 1852-54; "Yoshlik", 1855-57; "Yigitlik", yozilmay qolgan). Urush lavhalari va askarlarning



maishiy turmushi Tolstoyning “Sevastopol hikoyalari” (1855) to‘plamiga kirgan hikoya va ocherklarida o‘z ifodasini topgan.

50-yillar Tolstoy ruhiy hayot lavhalari va maishiy turmush tafsillarini tarixiy voqealarning keng manzarasi, hayotning axloqiy-falsafiy asoslari tasviri bilan uyg‘unlashtirishga harakat qiladi.

Rus va jahon adabiyoti xazinasidan mustahkam o‘rinolgan “Urush va tinchlik” (1863-69) epopeyasi Tolstoyning 60-yillarda ijodiy kamolotga erishganidan shahodat beradi. Ayrim adabiyotshunoslar garchand bu asarni Tolstoyning o‘z davri muammolaridan qochishi, deb baholagan bo‘lsalarda, yozuvchi “Urush va tinchlik” romani bilan o‘z davrida ro‘y bergan va o‘zi shaxsan guvoh bo‘lgan voqealarga faol munosabat bildirgan. Eng muhimi, u Napoleonning 1805-07 va 1812-14 yillardagi harbiy yurishlari mavzuiga murojaat etib, ko‘plab qahramonlar ishtirok etgan epik voqealar bilan birga qahramonlarning ruhiy tasvirlari ilk bor katta mahorat bilan uyg‘unlashgan tarixiy roman janrini yaratdi. Holbuki, 19-asr o‘rtalarida epik asarlar davri o‘tdi, degan fikrlar keng tarqalgan, 60-yillarda rus jamiyatida kuch ola boshlagan sinfiy ziddiyat va kurashlar esa “Urush va tinchlik”dek epopeyaning maydonga kelishi uchun unumli zamin bo‘la olmas edi. 1812- yildada Rossiyaning Napoleon qo‘shinlari tomonidan bosib olinishi mumkinligi bir-biri bilan kelisha olmagan turli tabaqa va sinflarni dushmanga qarshi kurashshiori ostida birlashtirdiki, Tolstoyning rus xalqi ongidagi ana shu uyg‘onishga murojaat etishi “Urush va tinchlik” romanining yuzaga kelishi uchun hayotbaxsh zamin vazifasini o‘tadi.

Tolstoyning 70-yillar ijodida “Anna Karenina” romani alohida mavqega ega. “Urush va tinchlik”dan bu romanni yozguniga qadar bo‘lgan davrda Tolstoyning rus jamiyatidagi ijtimoiy tenglik va adolat to‘g‘risidagi orzu umidlari ro‘yobga chiqmadi. 60-yillardagi islohot yozuvchi kutgan natijani bermadi. Mazkur romanda Tolstoyning jamiyat hayotida kechayotgan



noxush jarayonlar haqidagi iztirobli o'ylari aks etdi. Romanda Kareninlar, Oblonskiylar va Levinlardan iborat 3 oilaning bir-biri bilan chatishgan, ammo mustaqil sujet chizig'iga ega bo'lgan tarixi tasvir etilgan. Tolstoy aksar rus yozuvchilaridek, nasroniy diniga katta e'tiqod qo'ygan, hayotda ro'y berayotgan voqealarga va kishilarning xatti-harakatlariga ham shu din nuqtayi nazaridan yondashgan. Uning diniy qarashlari jamiyat va shu jamiyatda yashovchi kishilarga, binobarin, u yoki bu qahramoniga bo'lgan munosabatiga, shak-shubhasiz, ta'sir o'tkazgan. Tolstoyning oila masalasiga, chunonchi, Kareninlar oilasida sodir bo'layotgan voqealarga yondashuvida ham diniy qarashlari seziladi. U jamiyat a'zolarida qanday chirkin xislatlar mavjud bo'lmasin, kishilar diniy qonun-qoidalar doirasida harakat qilishlari lozim, aks holda jamiyat halokat sari boradi, degan fikrdan kelib chiqib, qahramonlar obrazini yaratadi.

70-yillarda ruhiy iztirob iqlimida yashagan Tolstoy o'z hayot yo'lini qayta nazardan o'tkazdi va shu jarayonda ijtimoiy kelib chiqishi, tarbiyasi va hayot yo'li bilan bog'liq jamiyat qatlamining ma'naviy asoslari yolg'onga asoslangan, degan xulosaga keldi. Uning bunday qarashlari "Iqrornoma" (1880) va "E'tiqodim nimada?" (1884) asarlarida o'z ifodasini topdi.

Tolstoyning bolalar uchun yozgan qator hikoyalari Saidrasul Aziziy ("Ustodi avval", 1902), Aliasqar Kalinin ("Muallimi soniy", 1903), Abdulla Avloniy ("Birinch muallim", 1909; "Ikkinchi muallim", 1912) singari jadid ma'rifat-parvarlarining o'quv qo'llanmalari va darsliklarida e'lon qilingan hamda usuli savtiya maktablarida o'qitilgan.

Korney Chukovskiy (1882-1969)

XX asr bolalar adabiyotining asoschilaridan biri, 2 yoshdan 5 yoshgacha bo'lgan bolalar psixologiyasining tadqiqot-



chisi. Bundan tashqari u ajoyib adabiy tanqidchi, tarjimon, adabiyotshunos olim ham bo'lgan. "Men bolalarni o'rganishga ahd qildim... Bir vaqtlar xalqqa qaytganlaridek men ham "bolalikka qaytishga" qaror qilib, kattalar jamiyati bilan munosabatimni deyarli uzdim va uch yoshli bolalar bilangina muloqotga kirishdim", - deb yozgan edi Chukovskiy o'zining kundaliklarida.

Rus bolalar adabiyotining ulkan daholaridan biri Korney Chukovskiy yirik yozuvchi, shoir, taniqli olim, mohir tarjimon sifatida tanilgan so'z ustasi edi. U o'z asarlarida bolalarga xos ajoyib xislatlarni - rahmdillik va insoniylik, do'stlik va birodarlik, yovuzlikka nisbatan shafqatsizlik, vatanparvarlik kabi fazilat-larni targ'ib etadi. K.Chukovskiy bolalar uchun asarlar yaratish, ijod qilishni o'zi uchun katta baxt deb biladi.

Chukovskiyning dastlabki "San'at nima?" maqolasi 1901-yilda "Odisseykie novosti" gazetasida bosilib chiqqan. 1903-yilda u gazeta muxbiri sifatida Angliyaga boradi. Londonda xizmat qila boshlaydi. Lekin bu yerdagi faoliyati uzoq davom etmaydi. Gazeta unga maosh to'lamay qo'yadi. U Britaniya muzeyiga ishga kirib, tirikchilik o'tkazishga majbur bo'ladi.

1905-yilda K.Chukovskiy Odessaga qaytib keladi va bu yerda "Signal" degan jurnal chiqara boshlaydi. Jurnal sahifalarida chor hukumati siyosatiga qarshi materiallar bosilganligi uchun uni sud qilishadi.

Keyingi yillarda u bolalar adabiyoti bilan mashg'ul bo'ladi, bolalar adabiyoti to'grisidagi ko'plab maqolalar yozadi, 1907-yilda "Bolalar tili" asari maydonga keladi. Adib tanqidchi sifatida o'sha davrda mashhur bo'lgan ba'zi yozuvchilarning soxta iste'dodlarini tanqid ostiga ola turib: "qaysi bir bola shu narsani tushunishi mumkin, bu yerda zarracha ham qalb, ruhiyat ifodasi ko'zga tashlanmaydi, faqatgina vintchalar, prujinkachalar, g'ildirakchalar..." deb yozadi Charskaya haqida. Muallifning



1911-yilda “Onalarga bolalar jurnallari haqida” deb nomlangan kitobi nashrdan chiqadi. Unda “Zadushevnyaya slovo” jurnalini qattiq tanqid ostiga olib, uni bolalarning yosh xususiyatlarini bilmasdan turib, kichik kitobxonlarga muhrlangan dahshatlarni, o‘zini yo‘qotishlarni, behushliklarni, vasvasa, yomonliklar bilan bog‘liq bo‘lgan “qahramonlik”larni targ‘ib qilishni fosh etadi. Tanqidchi “Zadushevnyaya slovo” jurnaliga “Yunaya (Navqiron) Rossiya”, “Rodnik” (“Chashma”), “Semya i shkola” (“Oila va maktab”), “Yuniy chitatel” (“Yosh kitobxon”) jurnallarini qarama-qarshi qo‘yib, “Bu yerda bola bilan ohista va tetikso‘zlasha turib, uni sevishadi va hurmat qilishadi, aldashmaydi va uning oldida tovlanishmaydi, deb yozadi, ammo ular ham bolani bilishmaydi hamda tushunishmaydi”.

Chukovskiyning ta’kidlashicha, bola o‘zining dunyosini, o‘zining mantiqini, o‘zining astronomiyasini yaratadi, agar kim u bilan muloqotga kirmoqchi bo‘lsa, uning olamiga kirishi hamda u yerda yashashi lozim. Bolalar - o‘ziga xos devonalar, chunki aniq va mustahkam voqea-hodisalar ular uchun sho‘x quvnoq va o‘tuvchan. Yo‘q, bolalar jurnalining vazifasi umuman bunda emas, ya’ni bolalarni bolalar aqlsizligidan davolashda emas, ular o‘z vaqtida bizning yordamimizsiz ham o‘zlarini davolab oladi, gap shundaki, bu aqlsizlikning ichiga kirib olishda. Bu antiqa, hayratlanarli, go‘zal, umuman boshqa dunyoga kirib yashashda hamda bolalar bilan ularning tilida, o‘sha boshqa olam tilida so‘zlashishda, ularning qiyofalarini o‘zida qabul qilishda hamda o‘ziga xos mantiqini tushunishda (chunki bu olamning mantiqi o‘zgacha”).

Ko‘pincha bolalar poeziyasiga she’rni tushunmaydiganlar, yoki bolalarni tushunmaydiganlar, ba’zida esa unisini ham, bunisini ham-na she’rni, na bolalarni tushunmaydiganlar kirib kelishadi. Menga bu narsa jinoyatdek tuyuladi. Kattalar yozuvchisi iste’dodsiz bo‘lsa, bo‘lishi mumkin, ammo lekin bolalar yozuvchisi iste’dodli, mahoratli bo‘lishi shart. Chukovskiy bolani



imkon qadar tezroq katta qilishga va uni tezroq jiddiylashtirishga harakat qilgan mualliflardan nafratlanardi. Shuning uchun ham jahon bolalar adabiyotida haliga qadar birorta quvnoq bolalar kitobi yo'q. Bola bilan bolalarcha kulish naqadar muhimligini u qayta-qayta ta'kidlaydi. Chukovskiy bolalarni faqatgina bema'ni narsalar bilan tarbiyalash kerak degan fikrdan yiroq bo'lib, "shu bema'ni narsalar olib tashlangan bolalar adabiyoti, 3 va 4 yoshli bolalarning sermahsul instinklari talablariga javob bera olmaydi va ular foydaliroq bo'lgan aqliy ozuqadan mahrum qiladi", - degan fikrni ilgari suradi. Bolalarga bolalar kitoblari orqali ularning yosh xususiyatlariga to'g'ri kelmaydigan yoki ularga tushunarsiz bo'lgan narsalarni singdirish - bu ularning kitobxonlikka bo'lgan xoxish-istaklarini umuman yo'q qilib yuboradi. Bu tanqidchining fikricha, emizikli bolani ona suti o'rnida majburlab bifshteks bilan boqishga o'xshaydi. Chukovskiy har qanday bola ulkan ijodiy imkoniyatlarga, hatto daholikka ega bo'lishi mumkin.

Bola ona tili daryosida buyuk zahmatkash kabidir. Chunki u grammatik shakllar tartibotida hech narsa bo'lmagandek mo'ljal oladi, lug'atni zehn bilan o'zlashtiradi, mustaqil o'qishni o'rganadi, degan fikrni isbotlab beradi. Kattalarga esaayniqsa bolalar yozuvchilari va pedagoglariga bolaga ergashish emas, balki bola bo'lish kerakligini uqtiradi.

Adibning "Ikkidan beshgacha" kitobining "Bolalar nashrlariga nasihatlar" bobi ana shunday mulohazalarga boy. Aslida bu kitobni Chukovskiy oltmish yildan ortiq vaqt mobaynida yozgan. Uning yaratilishi bolalar nutqi haqidagi suhbatdan boshlanib, vaqt o'tgan sayin kitob bolaning o'zi haqidagi, uning ruhiyati, atrof olamni o'zlashtirishi bilan bog'liq bo'lgan jarayonlar, uning ijodiy qobiliyatlari haqidagi fundamental asarga aylandi.

Kitobning "Bolalar shoirilariga o'gitlar" bobi shunisi bilan diqqatga sazovorki, unda Chukovskiyning bolalar adabiyoti borasidagi shaxsiy tajribasi, uning hamkasblari



Marshak, Mixalkov, Barto, Xarms, Vedenskiy kabi boshqa ko'plab shoirlarning umumlashma qarashlarini o'zida mujassamlantirgan. Bundan K.Chukovskiy shunday xulosaga keladi: xalq poeziyasi va bolalarning so'z ijodkorligi bitta qonuniyat asosida yaratiladi. Bolalar yozuvchisi xalqdan o'rganishi kerak, chunki xalq ko'p asrlar mobaynida ideal badiiy uslublarni hamda bolaga to'g'ri pedagogik yondashish mahoratini o'z qo'shiq va ertaklarida mukammal ishlab chiqqan. Bolalar shoirlarining ikkinchi o'qituvchisi - bolaning o'zi. Ular o'z she'rlari bilan bolaga murojaat qilishdan avval ularning didini va ehtiyojlarini o'rganib chiqish, unga to'g'ri psixologik ta'sir ko'rsatish malakasini egallashi zarur.

Chukovskiy shoir asari matnining har bir bandida rassom uchun material bo'lishga katta ahamiyat bergan. Tasviriy obraz hamda ohang birikib bir butunni tashkil qilishi, har ikki misradan bitta rasm paydo bo'lishi kerak. Bunday sifatga ega bo'lgan she'rlarni Chukovskiy "grafikali" she'r deb ta'rif bergan bolalar shoirlariga birinchi o'git sifatida uqtirgan.

Ikkinchi o'git esa obrazlarning zudlik bilan almashinishi. Bolalarning ko'rish qobiliyati narsalarning sifatini emas, balki ularning harakatiniqabul qiladi, shuning uchun she'r serharakat hamda turli-tuman personajlarga boy bo'lishi kerak.

Uchinchi o'git: bu so'z tasvirining lirikligiga daxldor. Qo'shiq va raqs ham she'r uchun zarurdir. Bolalar o'zlarini shirin ohanglar bilan ovutishadi, she'rlar bilan xuddi musiqadek sarmast bo'lishadi.

Beshinchi o'git: poetik nutqning yuqori darajada musiqiyli.

Oltinchi o'gitga ko'ra bolalar uchun yozilgan she'rlarning qofiyasi bir-biri bilan juda yaqin masofada qo'yilishi kerak.

Yettinchi o'gitda qofiyadosh so'zlar she'rning asosiy ma'nosini anglatuvchi bo'lishi shart. Chunki aynan shu so'zlar bolaning diqqat e'tiborini o'ziga jiddiy jalb etadi. "Bolalar



she'rlarining har bir satri o'zining shaxsiy hayoti bilan yashashi kerak", - deb ta'kidlanadi sakkizinchi o'g'itda. Chukovskiyning o'g'itlari qotib qolgan dogmalar emas, bu haqda muallifning o'zi ham eslatib o'tadi. Tabiiyki, bolalar yozuvchilari uchun eng asosiy o'git-baxtiyorlik, shodlik holati.

Chukovskiyning ertaklari va she'rlari butun bir komik eposni tashkil etib, ko'pincha "krokodiliada" (muallifning sevimli qahramonlarining nomi bilan) deb ataladi. Bu asarlar doimiy qahramonlari, bir-birini to'ldiruvchi sujetlari, umumiy geografiyasi bilan bir-biriga hamohangdir.

Chukovskiy ertaklar olamining yaratilishi 1915-yildan "Krokodil" poemasining ilk bandlari yozilishi bilan boshlanadi. U 1917-yilda juda ko'p rasmlar bilan birga "Niva" bolalar jurnalida "Vanya va Timsoh" nomi bilan chop etilgan. Bu yangi nashr bolalar poeziyasida katta shov-shuvga sabab bo'lgan edi. Y. Tinyanov bu haqda keyinroq shunday deb yozgan edi: "Shiddatli she'rlar, o'lchamlarning tez almashinishi, jo'shqin qo'shiq, qofiya, yangi ohanglar-quyidagilarni o'z ichiga olgan, xuddi adabiyotda yangilik yaratilganda sodir bo'ladigan shov-shuv ko'tarishib, qiziqish uyg'otib, hayratda qoldirib Korney Chukovskiyning "Krokodil"i paydo bo'lgan edi. Nimjon oyoqlarida zo'rg'a qaltirab turgan gullarning harakatsiz fantastikasi birdan shovqin-suronli ajoyib hayvonlar bilan almashinishi hamda qahramonlar va muallifning hayratini qo'zg'atuvchi jonli, real sarguzashtlarning paydo bo'lishi barchaga birdek taassurot qoldirgan edi. Yo'llarni, ulardagi harakatlarni, har xil xarakterlarni, sarguzashtlarni tasvirlash uchun kitoblar ochildi. Bolalar adabiyoti poeziyasi kino san'atiga, kinokomediya yaqin bo'lib qoldi" ("Korney Chukovskiy" ocherkidan).

"Krokodil"dagi boshqa ertaklarda odatiy holga aylangan yaxshilik va yomonlik keskin ajratilmaydi. Shuningdek, yoqimtoy qahramonlarning xususiyatlariga haqqoniy baho berishni muallif kichik qahramonlarning o'ziga havola qiladi.



Chukovskiy dastlab A.M.Gorkiy hikoya qilib bergan sujet asosida bugungi kunda o'z axamiyatini yo'qotmagan badiiy baquvvat "Timsoh" ertagini yozdi. 1918-yilda esa "Archa" nomli to'plami bosilib chiqdi. O'sha yili "Jahon adabiyoti" nashriyotiga ishga kirdi. 1919-yilda N.A.Nekrasov asarlarining to'la to'plamini nashr ettirdi. Shu yillarda uning mashhur "Moydodir", "Suvarakxon" ertaklari, "Kichik bolalar" kitobi bosilib chiqdi.

"Pashsha-xarxasha", "Barmaley", "Telefon", "Fyodor o'tkazgan alam", "O'g'irlangan quyosh", "Doktor Voyjonim" asarlari Korney Chukovskiyning nomini olamga yoydi, kitobxonlar hurmatini qozondi.

Korney Chukovskiyning ertak-poemalarida ezgulikning yovuzlik ustidan g'alabasi, baxt, yorqin hayot sari keskin kurash bo'rtib turadi. Masalan, shoirning "MoHgogbip" asarida bolalarning odobli, ozoda, har doim to'g'ri so'z bo'lishi va tozalikka rioya qilish mavzusi ilgari surilgan.

Asar qahramoni qator fazilatlariga loyiq. Lekin bir aybi bor. Faqat kir-chir yuradi. Shuning uchun bir kuni unga xizmat qiluvchi barcha narsalar ish tashlaydi, undan yuz o'girib qochib ketishadi. Bola voqeaga tushunmay, xafa bo'lib turganida joniga yuz-qo'l yuvgich oro kiradi.

Shoirning "Pashsha-xarxasha", "Telefon", "O'g'irlangan quyosh", "Filisa kitob o'qir", "Kirpilar kuladi" singari asarlari ham bolalar uchun maroqlidir. "Doktor Voyjonim" asari bir umr bolalarga shodlik-quvonch bag'ishlab kelmoqda. Voyjonimning oqko'ngilligi, mehribonligi, jonkuyarligi, hayvonlar bilan inoq, do'stligi ibratomuz chizib berilgan.

Chukovskiyning she'rlari ertaklariga nisbatan kamroq. Uning har bir she'ri go'yoki bir zumda mustaqil sujetga aylanib, butun bir ertak tusini oladiganga o'xshab ketaveradi. Masalan, "Ajoyib daraxt"ni Chukovskiy ertak deb hisoblagan, unga o'xshash "Quvonch"ni esa she'r deb. Muallif o'z she'rlarida xalq bolalar poeziyasiga hamohang bo'lgan qo'shiq, raqs, o'yinlarni



ishlatgan. Uning poeziyasining asosiy mavzusibeg‘ubor sho‘xlik, bolalarga baxt-saodatdir.

Chukovskiy she‘rlarining lirik qahramoni qoidaga ko‘ra, shoirning o‘zi, u katta odam, ammo u bir vaqtning o‘zida bola bilan birga bo‘la oladi, uning xursandchiligiga sherik bo‘lib, u bilan birga ko‘ra oladi, eshita oladi, orzu qila oladi, hatto bolalarcha soddalik bilan chalkashib, adashib ketadi. Kattalarning “men” iva bolalarcha “sen” orasida hech qanday chegara yo‘q, bola o‘zini shoir ruhiy dunyosida shunchalar erkin his etadiki, xuddi otasi bag‘rida o‘tirgandek.

Chukovskiy o‘zining she‘rlarida rus va ingliz xalq bolalar poeziyasining an‘analarini mujassamlashtirishga harakat qiladi. Masalan, “Buterbrod”,

“Tipratikan”, “Objara” (“Yeb to‘ymas”), “Ona fil o‘qimoqda”, “Cho‘chqalar” v.b.

Tarjimalar va ishlanmalar Chukovskiyning ijodida alohida yo‘nalishni tashkil etadi. Uning tomonidan valliylar xalq ertagi “Ulkan odamlarni zabt etuvchi Djek” (1918), E.Raspening “Baron Myunxauzenning sarguzashtlari” (1935), D.Defoning “Robinzon Kruzo” asarini (1935) rus tiliga o‘girib, qayta ishlagan. Uning tarjima asarlarida yosh kitobxonlar qadimgi yunon mifologiyasi bilan tanishishadi. “Jasur Persey” (1940) eng mashhur qayta ishlangan asar, o‘zining so‘z ifodalari, voqeahodisalarning aniq bayoni, esda qolarli tasvirlari bilan mashhur hamda hikoyadagi barcha narsalar bolaning qabul qilish qobiliyatiga bo‘ysundirilgan. Yozuvchi nasrda ijod qilarkan, bola talaffuzi uchun har bir so‘z oson, yengil bo‘lishiga ahamiyat bergan, katta, qiyin so‘zlarni bo‘g‘inlarga ajratib bergan. Masalan, “i<a-pa6-je-i<py- me-Hue” (ke-ma-ning ha-lo-ka-ti), yoki, il-lyumi-nat-siya kabi. Shu tariqa u kichik kitobxonlarni hayvonlar tiliga “o‘rgatadi”.

Chukovskiyning bolalar nasridagi ijodi deyarli to‘la-to‘kis sarguzasht adabiyotga mansub. Yozuvchixatarli sarguzasht



sujetlarini uzoq ekzotik mamlakatlarga o'tkazib yuboradi. Afrikaga, Janubiy Amerikaga, "yovvoyi" orollarga uning uchun har qanday sarguzashtning ma'nosi yuksak maqsadga qaratilgan, mard-jasur qahramonlar yaxshilik uchun hech narsadan tap tortmay, o'zlarini xavf-xatarga qo'yib kurashga otlanadilar. Chukovskiy "Bobil minorasi" kitobining ruscha nashriga muharrirlik qilgan. "Bobil minorasi" - Injildagi afsonaning qayta ishlangan ko'rinishi. Bu afsonalar ertaklarga yaqinlashtirilgan hamda hikoyada qadimgi umuminsoniy donishmandlik qayd etilib, unda diniy- mistik ruh olib tashlangan.

K.Chukovskiy o'zining hamda boshqalarning ish tajribalari asosida badiiy tarjimaning nazariyasini yaratadi. Adibning "Yuqori san'at" kitobi 1919-1964-yillar mobaynida yaratilgan.

Samuil Yakovlevich Marshak (1887-1964)

O'zidan keyin juda katta hamda serqirra ijodiy meros qoldirgan. Uning bolalar va kattalar uchun she'rlar, o'qish hamda namoyish qilish uchun ertaklar, satirik epigrammalar, tarjimalar, tanqidiy va memuar nasriy asarlari shu ma'noda e'tirofli. Zero, uning hayotidagi asosiy ishi bolalar adabiyoti bo'lganligini ta'kidlab o'tish joiz. U avvalo, rus bolalar adabiyotida kichkintoylar uchun katta she'riyat yaratib bergan mohir san'atkor, taniqli tarjimon, yetuk dramaturg, mohir pedagog va bilimdon muharrirdir.

1927-1937-yillarda bolalar yozuvchilarini o'ziga jalb etadigan markazlar – bu bolalar folklorining tadqiqotchisi O.I.Kapitsa tomonidan tashkil etilgan to'garak, Detizdatning ("Bolalar nashriyoti") Leningraddagi nashriyoti "Yangi Robinzon", "L'ni<i>" va "E^tj"(Tipratikan) bolalar jurnallarining nashriyoti edi. Bunda asta- sekin hamfikrlar doirasi paydo bo'la boshladi. Bolalar uchun yozilgan asarlar mualliflari,



chunonchi, B.A.Lebedev, E.L.Shvars, T.G.Gobbe, A.I.Lyubarskaya, L.K.Chukovskaya kabilarni adabiyotshunos I.A.Raxtanov “Marshak akademiyasi” deb atagan edi. “Akademiya”da muharrirlik san’ati sayqal topayotgan, yosh mualliflar bilan ishlash usullari ishlab chiqilayotgan edi. Binobarin, kelajakda bolalar adabiyotining mumtoz vakillariga aylangan yozuvchi, shoirlar shular davrasidan chiqqan edi. Masalan, L.Panteleev, D.Xarms, A.I.Vvedenskiy, N.A.Zabolotskiy va boshqalar .

Samuil Yakovlevich Marshak 20-yillarda o’zining she’r, ertak va poemalari bilan yosh kitobxonlarning sevimli shoiri sifatida tanildi. “Qayerda ovqatlaning, ey chumchuq”, “Ahmoq sichqoncha haqida ertak”, “Kecha va bugun”, “Sirk” va boshqa shu kabi mashhur asarlari o’sha yillarda maydonga kelgan edi.

S.Y.Marshak rus bolalar adabiyotini rivojlantirish uchun A.M.Gorkiy hamda V.V.Mayakovskiylar bilan yelkama-yelka turib mehnat qildi. 1939-yilda Marshakning “Petya nimadan qo’rqar edi?”, “Korablcha” singari mashhur she’rlari bosilib chiqdi. Vatan urushi davrida shoir ijodining asosiy temasini urush, bosqinchilarga qarshi kurash mavzui tashkil etdi. Ayniqsa, 1943-yilda yaratilgan “O’n ikki oy” nomli ertak-dramasi tez orada millionlab yosh kitobxonlar orasida mashhur bo’lib ketdi.

S.Y.Marshakning nomini olamga yoygan, bolalar shoiri sifatida tanitgan she’rlaridan biri “Ahmoq sichqoncha haqida ertak”dir. Bu ertakda shoir bolalar xayoti va xarakteriga mos bo’lgan qiziqarli sujet topa olgan. Kimki o’ziga ortiqcha oro bersa, oqibatini o’ylamay ko’r-ko’rona ish tutsa, o’zidan kattalarning pand- nasihatiga amal qilmasa, hayotda ko’p narsa yutqazadi, o’z baxtini qo’ldan boy beradi, degan fikr ertakning asosiy g’oyaviy mazmunini tashkil etadi.

S.Y.Marshak “Ahmoq sichqoncha haqida ertak” asarida majoziy obrazlar orqali bolalar hayotiga oid muhim masalalarni ilgari suradi. Shoir noshukur, farosatsiz, mehnatsiz kun kechiruvchilarni ahmoq sichqoncha obrazi misolida fosh qiladi.



S.Y.Marshak “Yong’in”, “Pochta”, “Musobaqalar doskasi” asarlari bilan ham rus bolalar adabiyoti taraqqiyotiga katta hissa qo’shdi.

Shoir o’zining “Stol kelgan qayerdan?” degan she’rida maktab mebellari o’z- o’zidan paydo bo’lib qolmaganligini, buning uchun kattalarning qanchadan-qancha vaqtlari, mehnatlari sarf etilganligini tushuntirib bersa, “Bir yil nima” asarida esa juda qimmatli vaqtini behuda o’tkazib, maktabda yaxshi o’qimay, o’qituvchi- ustozlarning pand-nasihatlariga amal qilmay, o’z vaqtida darslarini tayyorlamay, natijada sinfdan-sinfga o’ta olmay xijolat bo’lib yuradigan qoloqlarga qarata:

Dalalarda saranjom ish, Zavodda ham plan qoyil, Maktabda yo’q, Qoloqlar hech.

Bil, bir sinfdan o’qish- Bir yil!

Marshak uchun bolalar adabiyotida mayda-chuyda yo’q edi. O’quvchining yoshi qancha kichik bo’lsa, u bus-butunligicha qabul qilayotgan kitobga bo’lgan talabi ham shuncha jiddiy, ya’ni uning mazmuniga, tiliga, bezaklariga, shirifti va formatiga, nomerning silatiga... Marshak ishlanmagan yoki qolip so’z va fikrlarni, shuningdek o’chirilgan so’zlarni umuman hazm qila olmasdi. Uning shiori: “Kichiklar uchun katta adabiyot” deb jaranglardir.

Dramaturgiya Marshak uchun bolalar adabiyotiga kirib kelishida ilk pog’onani o’tagan. 1920-yillarning boshlarida u Krasnodarsk bolalar teatri uchun bir qator ertak-pyesalar yozdi. Ular orasida “Mushuk uyi”, “Echki haqida ertak”, “Petrushka”, “Qayg’u-yomon baxt” kabilar keng tarqalgan. Keyinchalik Marshak bu ertaklarni qayta ishlab chiqqan. Birinchi pyesalari folklordan unib chiqqan bo’lib, sho’x, harakatli o’yinlarni eslatadi. Ularning voqeligi atayin sodda, ammo nozik did va yumor bilan yo’g’rilgan. Obrazlari ham oddiy, ayni paytda juda moslashuvchan, muloyim. Personajlarning monologlari hamda replikalarida juda ko’p so’z ishlatilmaydi, ammo ular juda ifodali. Pyesalarning o’ziga xosligi - epizodlarning takrorlashishida,



harakat ketma-ketligining uzluksizligida va voqea- hodisalarning ajoyib tarzda rivojlanishidadir.

Marshak o'z ijodini bir aktli kichik pyesalardan boshlab, asta-sekin ko'p aktli dramatik asarlarga, shu bilan bir qatorda o'zining tomirlari bilan xalq lolkloridan kelib chiqqan yetuk asarlar sari boradi. "O'n ikki oy", "G'am-qayg'udan qo'rqqan baxtga erisha olmaydi", "Aqlli narsalar" kabi asarlari shular jumlasidandir. Uning pyesalari musiqa va ohangga, raqslarga, so'z o'yinlari bilan to'la bo'lgan xalq teatriga monand. "Mushuk uyi" – ertak-pyesasini kattalar dramaturgiyasidan olingan kundalik turmush dramasi desa bo'ladi.

Bilim, ko'nikma va malakani rivojlantirishga yo'nal-tiruvchi savollar:

1. "Chippolino" va uning muallifi haqida nimalarni bilasiz?
2. "Yangi yil archalari", "Osmondagi tort", "Jip televizorda", "Jelsomino yolg'onchilar mamlakatida" nomli novellalarda qanday mavzu-g'oya ilgari surilgan?
3. "Fantaziya grammatikasi" qanday asar?
4. "Doktor Voyjonim" qissasidagi timsollarni izohlang?
5. "Ahmoq sichqoncha" asarining muallifi va g'oyasi haqida ma'lumot bering..
6. V.Y.Grimmlarning adabiy-ilmiy ijodi va tadqiqotchilik faoliyati haqida nimalarni bilasiz?
7. Grimmlarning ertaklar to'plami va folklorshunoslikka oid asarlarini sanang.
8. "Gulliverning sayohati" asarining yozilish tarixi va muallifi haqida ma'lumot bering.
9. Lemuel Gulliverning mittivoilar o'lkasiga sayohati va uning badiiy talqinida qanday g'oyalar ilgari surilgan?



GLOSSARIY

Avtobiografik asar – (yun. Autos-o‘zim, bios-hayot, grafo-yozaman) – muallifning o‘z hayoti haqida izchil hikoya qilishiga asoslangan adabiy janr. Avtobiografik asar muallifi o‘z hayotini qaytadan yashab ko‘radi, uni bir butun sifatida idrok etishga intiladi. A.a.aksar hollarda mualliflarning ijodiy yetuklik pallalarida, umrlari nihoyasida yoziladi. (mas. Oybekning “Bolalik” qissasi.) U memuar, kundalik va sayohatnomalarga o‘xshab ketsa-da, ulardan tubdan farq qiladi. Shuningdek, A. a. avtobiografik xarakterdagi asarlar hamda turli munosabatlar bilan yoziladigan tarjimaiy hollardan tafovutlanadi.

Adabiyot – (ar. adab-go‘zal xulq) – keng ma’noda, inson tafakkurining mahsuli o‘laroq dunyoga kelgan, o‘qish uchun mo‘ljallab yozilgan asarlar jami. Tor ma’noda - so‘z san’ati, badiiy adabiyot.

Adabiyotshunoslik – (ar. -adab, fors. tanish, o‘rganish)- badiiy adabiyotning kelib chiqishi, mohiyati, rivojlanish qonuniyatlari, ijtimoiy aloqalarni o‘rganuvchi fan. A.ning obyekti bo‘lmish badiiy adabiyotga taalluqli ilmiy muammolar ko‘lami-predmeti juda keng. Zamonaviy A. fani uchta asosiy sohadan tashkil topadi: *adabiyot tarixi*, *adabiyot nazariyasi* va *adabiy tanqid*. Uning matnshunoslik, manbashunoslik, bibliografiya singari yordamchi sohalari ham mavjud.

Allegoriya – (yun. allos-o‘zgacha, agoreuo-gapiraman) - 1) mavhum tushuncha yoki hodisani konkret narsa orqali ifodalashga asoslangan ko‘chim turi. Mas. tulki- ayyorlikni ifodalaydi.



Alliteratsiya – (lot.al- yonida, litera-harf) - she'riy nutqda (nasrda nisbatan kam) bir xil undosh tovushlarning takrorlanishiga asoslangan ifodaviylikni kuchaytiruvchi vosita, takrorning fonetik sathdagi xususiy ko'rinishi. Mas. sochilgan sochingdek sochilsa siring (Cho'lpon).

Annotatsiya – (lot. annotatio - izoh, sharh) - asar mazmunining qisqacha bayoni. Noshirlik amaliyotida kitoblarning ichki muqovasida, ilmiy maqolalarning sarlavhasidan keyin beriladi. A. asarning o'ziga xos pasporti bo'lib, u bilan umumiy tarzda tarzda tanishtiradi.

Antologiya – (yun. guldasta)- biror milliy adabiyot, davr, adabiy yo'nalishga mansubligi jihatidan tanlangan ijodkorlar asarlaridan namunalarni jamlovchi to'plam.

Aforizm – (yun. ta'rif, ixcham ifoda) - muallifi ma'lum bo'lgan, ixcham shaklda va ta'sirli ifoda etilgan umumlashma fikr.

Badiiy tahlil – (ar. tekshirish, hal qilish) - adabiy asarning mazmun mohiyatini idrok etish, uning yaxlit estetik hodisa sifatidagi mavjudliginiturli aspektlarda o'rganib, o'ziga xosligini ochib berish va qimmatini belgilashga qaratilgan hissiy-intelektual faoliyat.

Badiiy to'qima – (ruscha kalka-xud.vim.)- yozuvchining ijodiy tasavvur va taxayyuli mahsuli, voqelikda real asosi yoki to'liq o'xshashi mavjud bo'lmagan badiiy obrazlar, hayotiy holatlar, voqealar yaratishda namoyon bo'luvchi bad. Ijodning muhim komponenti.

Band – she'rning ritmik ritmik - intonatsion va mazmuniy jihatdan nisbiy mustaqillikka ega bo'lagi.

Gimn – (yun. madhiya) -qadimgi yunon adabiyotida ilohlarni ulug'lash, maqtash uchun kuylangan qo'shiq. Mas. yunonlar Appolonni madh etgan. Keyinchalik tarixiy voqealar, qahramonlar madhetiluvchi tantanovar qo'shiqlar ham gimn deb yuritilgan.



Mazmunan dasturiy xarakterdagi she'r asosidagi tantanovar qo'shiq, muayyan ijtimoiy harakat, uyushma, davlat va shu kabilarning atributlaridan biri, madhiyasi.

Detektiv adabiyot – (yun. izquvar) – sarguzasht adabiyotining bir tarmog'I, sujeti asosida sirli jinoyatlarni ochish bilan bog'liq voqealar yotuvchi asarlarning umumiy nomi.

Didaktik adabiyot – (yun. o'rgatuvchi, ta'limiy) - muayyan ta'limiy, tarbiyaviy maqsadlarda yaratilgan adabiy asarlarning umumiy nomi. Mas. sa'diyning "Guliston" va "Bo'ston", Kaykovusning "Qobusnoma" asari.

Improvizatsiya – (lot. kutilmagan, birdan) – badiiy ijodning alohida bir ko'rinishi bo'lib, bunda asar bevosita ijro jarayonida yaratiladi.

Interpretatsiya – (lot. tushuntirmoq) - talqin; adabiy asar mazmunini idrok qilish, uning mazmuni, badiiy konsepsiyasini anglash, tushunish.

Insenirovka – (lot. sahna) - aslida sahnaga mo'ljallab yozilmagan asarlarni (ko'proq, epic asarlarni) sahnalashtirish uchun qayta ishlash. I. sahnalashtirilishi mo'ljallangan asarning g'oyaviy-badiiy xususiyatlarini qayta yaratishni taqozo etadi.

Intonatsiya – (lot.-kuchli talaffuz etaman) - jonli nutqning ifodaviyligini ta'minlovchi asosiy omil, tipning fonetik vositalari (tovush toni, talaffuz tempi, tembr, pauzalar, melodika, mantiqiy va so'z urg'ulari) majmui. U estetik emotsional ta'sir o'tkazishda muhim ahamiyatga ega.

Remarka – (fr. - izoh) - dramatik asarlarda muallif tomonidan sahna voqeasining boshlanishi oldidan beriluvchi yoki uning kechishi davomida qavs ichida berib boriluvchi izohlar. Remarka parda yoki ko'rinish oldidan berilgan hollarda vopqea kechayotgan joy, vaqt, ishtirok etuvchilar va sh.k.lar haqidagi zarur ma'lumotlardan iborat bo'ladi.



Epigrafi – (yun. - bitik. sarlavha) - asarning boshlanishida sarlavhadan keyin yoki uning bo'lim (bob.fasl)lari boshida keltiriluvchi qisqa, odatda, e'tiborli manbalardan (xalq ijodi, mashhur kishilarning purhikmat so'zlari va sh.k) olingan ko'chirma, sitataning bir ko'rinishi.



FOYDALANILADIGAN ADABIYOTLAR:

I. Asosiy darslik va o'quv qo'llanmalar

1. Jumaboyev M. Bolalar adabiyoti. Darslik. T., "O'qituvchi", 2002.
2. Jumaboyev M. Bolalar adabiyoti. Darslik. T., "O'qituvchi", 2011
3. Safarov O, Rahmatulla Barakayev, Bashorat Jamilova. Bolalar adabiyoti. Buxoro. 2018

II. Qo'shimcha adabiyotlar

1. Barakayev R. O'zbek bolalar adabiyoti va Abdulla Avloniy ijodi. T., "Fan", 2004
2. Murodov M. Oltin sandiq ochildi. Toshkent, "O'qituvchi", 1994.
3. Safarov O. O'zbek xalq og'zaki ijodi. T., "Musiq", 2010; yana: Bolalik kuychisi. T., "Fan", 1978; yana: Bolalarni erkalovchi o'zbek xalq qo'shiqlari. T., 1985; yana: Oliy o'quv yurtlarida bolalar adabiyotini o'qitish muammolari. "Til va adabiyot ta'limi" j., 1999y., 3-4 - sonlar.
4. O'zbek bolalar adabiyoti va adabiy jarayon. T. "Fan", 1989.
5. O'zbek bolalar adabiyoti antalogiyasi. Ikki jildlik. 1-2-jild. T., "O'qituvchi", 2006.
6. O'zbek bolalar adabiyoti. Maqolalar. T., "Yosh gvardiya", 1969.
7. G'aniyev Sh. O'zbek bolalar o'yin folklori. T., "Fan", 1998



III. Badiiy adabiyotlar

1. Adashboyev T. Orzularim qo'sh qanotim. T.: Sharq, 2003.
2. Attor F. Ilohiynoma. T.1994
3. Avesto. Hurmuzd.Yasht. O'zbekchaga M.Ishoqov tarj. - O'TA, 1999, 1-6-son.
4. Avloniy Abdulla. Tanlangan asarlar.1-2-jild. T., Ma'naviyat, 1998; yana: Turkiy guliston yoxud axloq. T.: O'qituvchi,1992
5. Barakayev R. Jonajonim she'riyat. T.: Cho'lpon, 1997
6. Barnoyev S. Dadam haqida qo'shiq. T.: Yulduzcha, 1989.
7. Barnoyev S. Kichkina Xo'ja Nasriddin. T.: Yozuvchi, 1998.
8. Bolalar olami. T.,Yosh gvardiya,1989
9. Berdiyorov H.Rasulov R.. O'zbek tilining paremilogik lug'ati. T.: O'qituvchi, 1989
10. Drachuk Viktor. Yozuvlar o'tmish sirlari shohidi. T., 1980
11. Fozilov N. Saylanma. 2 jildlik. T.,G'ASN, 1982; yana: Ustozlar davrasida. T., 1988
12. Fattoyev M. Atoqli pedagoglarimiz. T., 1988
13. Hakim Nazir. Tohir Zuhra. T., 1980.
14. Hakim Nazir. Lochin qanotlar. T., 1987.
15. Hakim Nazir. Yonar daryo. T.: Yosh gvardiya, 1966
16. Hozirgi o'zbek adabiyotining milliy o'ziga xosligi. T.: Fan, 1984.
17. Ibrohimova Z. Kichkintoylar adabiyotining xususiyatlari. T.: O'qituvchi, 1994.
18. Irisov A. Ibn Sino ma'rifatparvar adib. T., 1992;



19. Imom Ismoil al-Buxoriy. Hadis. Al-jome' as-sahih. 4 kitob. T., 1991-1994; yana: Al-adab al-mufrad. T., 1990.
20. Imomov B. O'zbek sovet bolalar adabiyoti yuksalish yo'lida. T.: Y.g., 1973;
21. Yana: Po'lat Mo'min. Adabiy portret. T., 1982
22. Jamilova B. O'zbek bolalar publitsistikasi. T.: Fan, 2006
23. Kaykovus. Qobusnoma.. T., 1986.
24. Karimov H. Istiqlol davri adabiyoti. T., 2010
25. Malik Tohir. Qaldirg'och. T., Yosh gvardiya, 1987
26. Matchonov S. Tiriklik suvi. T., Yosh gvardiya, 1986
27. Muhammadiy Q. Tabiat alifbesi. 1-kitob, T.: Yosh gvardiya, 1974; yana: Bog'larda bolalar. 2-kitob. T., 1976.
28. Muhammadiy Q. Cho'pon bobo qo'shig'i. 4-kitob. T., 1975; yana: Odam-olam qo'shig'i. 5-kitob. T., 1981.
29. Muxtor Omon. Uchqur poyezdlar. Hujjatli qissa. T.: Yosh gvardiya, 1988.
30. Malik T. Alvado bolalik. T., 1986; yana: Qaldirg'och. T., 1987; yana: Shaytanat. 1-4- kitob. T.: Sharq, 1999-2003
31. Mirkarim Osim. Karvon yo'llarida. Saylanma. T. G'ASN, 1987.
32. Navoiy Alisher. Mahbub ul-qulub. T., 1983; yana: Hayrat ul-abror. T., 1978; yana: Arba'in hadis. Qirq hadis. T.: yozuvchi, 1991
33. Niyoziy H.H. Mukammal asarlar to'plami. 4 tomlik, 2-tom. Pedagogik risolalar. T.: Fan, 1980; yana: Bolaning yomon bo'lmog'iga sabab bo'lgan onaning jazosi. MAT, 2-t. T., 1981
34. Olimjon H. Oygul bilan Baxtiyor. T.: Yulduzcha, 1988.
35. Obidjon A. Oltin yurakli avtobola. T., 1988. yana: Dahshatli Meshpolvon. T.: Yulduzcha, 1989; yana: Alamazon va Gulmat hangomalari. T.: Cho'lpon, 1992.



36. Oybek. Bolalik. T.,2005; yana: Alisherning yoshligi. T., 2007
37. Ravshanov P. Bolalikning sehrli olami. T.: Yosh gvardiya, 1985; yana: Tarix badiiyati. T., 1989
38. Qahramonov Q. Adabiy tanqid va o'zbek bolalar adabiyoti. T.: Fan, 1991.
39. Qobilov N. Kichkintoylarning katta shoiri. T.:Yosh gvardiya,1973; yana: Elbek. T. G'ASN, 1988.
40. Qosimov B. Milliy uyg'onish. T.:Ma'naviyat, 2005; yana: Uyg'ongan millat ma'rifati. T., "Ma'naviyat", 2011.
41. Qodiriy A. Kichik nasriy asarlar. N., 1989
42. Qahhor A. O'tmishdan ertaklar. T., 2005
43. Qo'shjonov M. Onaga ta'zim, bolaga mehr. T.:Yosh gvardiya, 1983.
44. Quvvatova D. Sirli olam musavviri. T.: Fan, 2003
45. Sa'dulla Sh. Sening bayraming. T., Yosh gvardiya, 1972; yana: Mening aziz bolalarim. Qissalar. T., 1974; yana: Kachal polvon yoki yog'och qo'g'irchoqning boshidan kechirganlari. Ertak-qissa. T.:Yosh gvardiya,1969; yana: Yoriltosh. Ertak-drama. T.,1971.
46. Sattorov M. Mirkarim Osim. Adabiy portret. T.G'ASN, 1977.
47. Sulton Jo'ra. Qaldirg'och. T., 1989.
48. To'xtaboyev X. Sariq devni minib. T., 1982.
49. To'xtaboyev X. Qasoskorning oltin boshi. T., 1980; yana: Shirin qovunlar mamlakati yoki sehrgarlar jangi. T., 1986; yana: Mungli ko'zlar. T., 1988.
50. To'xliyev B. Bilim ezgulik yo'li. T.: Fan, 1990
51. Uvvatov U. Imom Ismoil al-Buxoriy. T., 1998
52. Uvaysiy. Ko'ngil gulzori. T., G'ASN, 1983
53. Yassaviy A. Hikmatlar. T.G'ASN, 1991.



54. Yusuf xos Hojib. Qutadg'u bilig. T., 1990.
55. O'zbek xalq ertaklari. T.:Sharq, 2006; yana: O'zbek adabiy ertaklari. T.: Meros, 1992
56. G'aniyev A. Sadriddin Ayniyning pedagoglik faoliyati. T.: O'qituvchi, 1965.
57. G'ulom G'afur. Shum bola. T., 1992;
58. Shermuhammedov P.,Tursunov J.,Safarov O. Egamov X. O'zbek bolalar adabiyoti. Darslik -xrestomatiya. T.: O'qituvchi, 1976.
59. Shermuhammad Munis. Savodi ta'lim. T., 1991.
60. Shomaqsudov Sh., Shorahmedov I. Hikmatnoma. T., 1990.
61. Shermuhammedov P. Ona sutidek pokiza. T.: Yosh gvardiya, 1975; yana: Istiqbolni o'ylab. T., 1987
62. Chor kitob. Olim Bo'ri tarj. T.: Cho'lpon, 1992.

IV. Xorijiy manbalar

1. Arzamaseva I.N., Nikolayeva S.A. Detskaya literatura. M.: Akademiya, 2000.
2. Budur N.V., Ivanova E.I., Nikolayeva S.A., Chesnokova T.A. Zarubejnaya detskaya literature.Moskva, "Akademiya", 1998.
3. Belinskiy V.G., Chernishevskiy N.G., Dobrolyubov N.A. O detskoy literature. M.,Det.lit. 1983
4. Kerroll L. Prikladyeniya Alisi v strane chudes. T.; O'qituvchi, 1986.
5. Karlo Kollodi. Pinokkioning boshidan kechirganlari. T., 2009
6. Janni Rodari. Rim ertaklari. T.:Raduga, 1989.
7. Chukovskiy K. Ot dvux do pyati. T.1,2. M., "Pravda", 1990



8. Barishnya-gersoginya. Skazki zarubejnix pisateley. T., Yosh gvardiya, 1988.
9. Swift J. Gulliverning sayohatlari. T.,: Sharq, 2006.
10. .Perro Sh. Skazki matushki gusini. - M., 1991
11. Zarubejnaya literature dlya detey i yunosheatva. Pod. red. N.K.Mesheryakovoy, I.S.Chernyayevskoy. - M., 1989.
12. Brandis Yevg. Ot Ezopa do Djanni Rodari. - M.,1980
13. Detskaya literature Avstrii, Germanii, Shevetsarii. Uchebnaya xrestomatiya. - M., 1997

V. Dasturning informatsion - uslubiy ta'minoti **Elektron ta'lim resurslari**

1. www.tdpu.uz
2. www.pedagog.uz
3. www.Ziyonet.uz
4. www.edu.uz
5. [tdpu-INTERNET. Ped](http://tdpu-INTERNET.Ped)
6. [WWW.nuqf.intal. Uz](http://WWW.nuqf.intal.Uz)



MUNDARIJA

SO‘ZBOSHI	3
------------------------	----------

I BOB. BOLALAR ADABIYOTI FANINING NAZARIY ASOSLARI.....	5
--	----------

Bolalar adabiyoti istilohi haqida tushuncha	8
---	---

Bolalar adabiyotining maqsadi va vazifalari	10
---	----

Bolalar adabiyotining o‘ziga xos xususiyatlari	12
--	----

II BOB. BOLALAR FOLKLORI	41
---------------------------------------	-----------

Bolalar folklori tabiati	41
--------------------------------	----

III BOB. BOLALAR O‘YIN FOLKLORI	79
--	-----------

Ma’naviy (so‘z) o‘yinlari	80
---------------------------------	----

Harakatli o‘yinlar	87
--------------------------	----

Tez aytishlar	96
---------------------	----

3-MAVZU: MUMTOZ ADABIYOTDA BOLALAR KITOB-XONLIGI ASOSLARI	104
--	------------

Bolalar kitobxonligi tabiati.	104
------------------------------------	-----

Alisher Navoiy - bolalar kitobxonligida	112
---	-----

Muhammad Sharif Gulxaniy	125
--------------------------------	-----

Alifbe manzumalar (abitsedariy) ta’lim-tarbiya asosi. ...	130
---	-----

4-MAVZU: O‘ZBEK BOLALAR ADABIYOTINING SHAKLLANISHI.....	143
--	------------

5-MAVZU: BOLALAR ADABIYOTI RIVOJLANISH SARI..	198
--	------------

VII. BOLALAR ADABIYOTI RIVOJLANISH BOSQICHIDA	232
--	------------



VIII. BOLALAR ADABIYOTI TARAQQIYOT SARI	290
Farhod Musajon.	337
IX. BOLALAR ADABIYOTI YUKSALISHDA.....	346
Xudoyberdi To‘xtaboyev	346
Miraziz A‘zam	355
Safar Barnoyev	366
Tursunboy Adashboyev.....	373
Anvar Oobidjon	384
X. ISTIQLOL DAVRI BOLALAR ADABIYOTI	402
Hamza Imonberdiyev	404
Kavsar Turdiyeva	411
Dilshod Rajab	423
Abdusaid Ko‘chimov	429
XI. CHET EL BOLALAR ADABIYOTI.....	436
Chet el bolalar adabiyotining an‘analari.	436
Aka-uka Yakob, Vilgelm Grimmlar	439
Sharl Perro	443
Hans Kristian Andersen	445
Jonatan Svift	448
Janni Rodari	453
XII. RUS BOLALAR ADABIYOTI.....	458
Aleksandr Sergeevich Pushkin (1799-1837)	458
Tolstoy Lev Nikolayevich (1828-1910)	463
Korney Chukovskiy (1882-1969)	465
Samuil Yakovlevich Marshak (1887-1964)	473
Glossariy.....	477
Foydalaniladigan adabiyotlar:.....	481



ISBN: 9786258956160



9 786258 956160